

AXWEND MIHEMED SALIH
ZENGENE BELUÇ



KURDGALNAMEK
[KURDBÊJNAME]



GENCÎNE Û ŞAHKAREKE HÊJA
YA DÎROKA KEVN A KURD Û BELUÇAN



Cild: I



Wergêrê wê yê Soranî: Hîwa Mihemed Zendi
Kurmanciya Wê: Ziya Avcî



KURDGALNAMEK [KURDBÊJNAME]
Gencîne û Şahkareke Hêja Ya Dîroka Kevn a Kurd û Beluçan
Cild: I

Nivîskar
Axwend Mihemed Salih Zengene Beluç

Wergêrê wê yê Soranî
Hiwa Mihemed Zendî

Kurmanciya Wê
Ziya Avcî

Dîrok: 05 / 12

Gerinendeya Weşanê
Eslîxan Yildirim

Sererastkirin
Serwet Deniz

Berg û Rûpelsazî
J&J

Çapa Yekemîn
Weşanên Azad, 2019

Çapxane
Berdan Matbaası Davutpaşa Caddesi
Güven İş Merkezi C . Blok No:215/216 Topkapı/İstanbul
Sertifika No:12491

ISBN: 978-605-81463-1-0
Sertifika No: 40407

Navnişan
AZAD YAYINEVİ
Viranşehir Mah.
34330. Sk. No: 15 A/4
Mezitli / Mersin

Web: www.wesanxaneyazad.com
E-mail: info@wesaxaneyazad.com

© *Mafê wê parastî ye.*
© *Ji bilî danasîne bêyî destûr bi tu awayî nayê kopîkirin û nayê belavkirin.*

AXWEND MIHEMED SALIH
ZENGENE BELUÇ



KURDGALNAMEK
[KURDBÊJNAME]



GENCÎNE Û ŞAHKAREKE HÊJA
YA DÎROKA KEVN A KURD Û BELUÇAN



Cild: I



Wergêrê wê yê Soranî: Hîwa Mihemed Zendi
Kurmanciya Wê: Ziya Avcî



Pêşkêş e ji
“Ayrîn” re ku çaverêya çavhildanê ye...

NAVEROK

Pêşgotina Wergêr.....	17
Kurtiya Gotara Seydayê Cemal Nebez Li Ser Kurdgalnamekê.....	23
Kurtiya Pêşgotina Birêz Nesîrxan Ehmed Zeyî Beluç Ji Bo Kurdgalnamekê.....	25
Pêşgotina Nadir Qemberanî Ji Bo Kurdgalnamekê	31
Pêşgotina Kurmanciya Wê	35

BEŞA YEKEM

Destpêk.....	41
Behsa Xwendegehên Îslamê.....	44
Behsa Kurdên Zengene	46
Behsa Kurdên Biraxoyî.....	49
Bingeha Kurdên Biraxoyî Bi Vî Awayê Xwarê ye	49

DEWLETA MADÊ

Şerê Di Navbera Mad û Tûranê De.....	53
Serekên Hevçerx ên Tîreyên Kurdên Biraxoyî û Paşayên Madê..	54
Têkçûna Fermanrewatiya Malbata Kurdên Madê.....	56
Malbata Hexamenşîyan	56
Şêla Hexamenşîyan Bi Kurdên Madê Re.....	57
Serekên Hevçerx ên Tîreyên Kurdên Biraxoyî û Paşayên Hexamenşî.....	58
Têkçûna Fermanrewatiya Hexamenşîyan	59
Hatina Îskenderê Makedonî	60
Parçebûna Seltaneta Îskender	61

BEŞA DUYEM

MÎRNIŞÎNA KURDÊN BIRAXOYÎ LI TÛRANÊ (Dewreya Yekem)	63
1- Mîrêmîran Mîr Kikan	64
Dîwana Bulikê	64
Alîkariya Keyqubad Paşa	64
Çakkirina Keleha Kîkan û Misatinkê	65
2- Mîrêmîran Mîr Zûrak	65
Parvekirina Herêmên Tûranê	65
Koça Dawiyê ya Keyqubadê Paşayê Mad û Parsê	66
Êrişên Fermanrewayên Sindanê Li Ser Tûranê û Şikestina Wan	66
Behsa Rostemê Pehlewan	66
Êrişa Mîrê Sindanê ya Cara Duyem	67
Koça Dawiyê ya Mîr Zûrak	67
3- Mîrêmîran Mîr Ūştab	67
4- Mîrêmîran Mîr Zigrîn	68
Êrişa Dadpirsiya Sindan Li Ser Tûranê	68
Koça Dawiyê ya Mîr Zigrîn	70
5- Mîrêmîran Mîr Zibar	70
Koça Dawiyê ya Tûsê (Keyxusrew-Keyxesro) Paşayê Madê	70
Çêkirina Perestgeha Zorak Li Kîkanê	70
Koça Dawiyê ya Mîr Zibar	71
6- Mîrêmîran Mîr Biraxim	71
Avakirina Perestgeha Helwanê Li Xuzdarê	71
Kuştina Feribûrz Paşayê Madê Li Bajarê Aşûrê	71
Mafpêdana Beşdariya Kurdên Biraxoyî û Edreganiyan Di Şerê Neteweyî De	72
Paşabûna Keyaksar	72
Tolewegirtina Keyaksar Ji Aşûriyan	72
Êrişa Sîtan Li Ser Erdê Madê	72
Koça Dawiyê ya Mîr Biraxim	73
7- Mîrêmîran Mîr Goran	73
Paşabûna Azdiyak	73
Daxistina Azdiyak Ji Paşatiyê	74
Şerê Azdiyek Bi Kuriş Re	74
Hereketê Kuriş Bi Kurdên Mayî Re	74
Koça Dawiyê ya Mîr Goran	75
Tîreyên Parsê	75
Desteya Hexamenşîyan	76

BEŞA SÊYEM

MÎRNIŞÎNA KURDÊN BIRAXOYÎ LI TÛRANÊ (Dewreya Duyem).....	79
8- Mîrêmîran Mîr Zirşan	79
Çêkirina Bendên Avê.....	79
Êrişên Fermanrewayên Sindanê	80
Koça Dawiyê ya Kurişê Mezin.....	80
Paşabûna Kambûciyê Hexamenşî.....	80
Xwekuştina Kambûc.....	81
Koça Dawiyê ya Mîr Zirşan.....	81
9- Mîrêmîran Mîr Zûrakê Duyem	81
Belavkirina Adetê “Heşer”ê.....	81
Şiroveya Adetê Heşerê.....	81
Paşabûna Darayê Yekem ê Hexamenşî.....	82
Koça Dawiyê ya Mîr Zûrak.....	82
10- Mîrêmîran Mîr Ercan	82
Damezirandina Leşkerê Dîdevaniyê	82
Paşabûna Xişayarşayê Hexamenşî	83
Dagirkirina Misrê û Babilê	83
Êrişa [Xişayarşa] ya Ser Yûnanê.....	83
Kuştina Pindranê Birayê Mîr Ercan	83
Kuştina Xişayarşayi Hexamenşî	84
Koça Dawiyê ya Mîr Ercan	84
11- Mîrêmîran Mîr Şamûz.....	84
Paşabûna Erdeşêrê Yekem ê Hexamenşî.....	85
Êrişa Mîrê Sindanê a Ser Tengava Mîlayê.....	85
Koça Dawiyê ya Erdeşêrê Yekem	86
Koça Dawiyê ya Mîr Şamûz.....	87
12- Mîrêmîran Mîr Biraxmê Duyem.....	87
Kolana Karêzan	87
Parvekirina Destkeftiyên Şer.....	87
Paşabûn û Kuştina Xişayarşayê Duyem	87
Paşabûna Darayê Duyem ê Hexamenşî	88
Koça Dawiyê ya Mîr Biraxmê Duyem.....	88
Koça Dawiyê ya Darayê Duyem.....	88
13- Mîrêmîran Mîr Sabûl.....	88
Koça Dawiyê ya Mîr Sabûl.....	89
Paşabûna Erdeşêrê Duyem	89
14- Mîrêmîran Mîr Nûrgan	89
Avakirina Keleha Nûrganê.....	90
Koça Dawiyê ya Erdeşêrê Duyem.....	90
Paşabûna Erdeşêrê Sêyem.....	90
Koça Dawiyê ya Mîr Nûrgan.....	91

15- Mîrêmîran Mîr Kiyânûş	91
Kuştîna Erdeşêrê Sêyem.....	91
Koça Dawiyê ya Kiyânûş.....	91
16- Mîrêmîran Mîr Kikanê Duyem	92
Paşabûna Darayê Sêyem	92

BEŞA ÇAREM

KURDÊN BELUÇÎ DI SERDEMA YÛNANÎ Û HINDIYAN DE93	
Êrîşa Yûnaniyan a Ser Erdê Mad û Parsê.....	93
Destpêkirina Şer.....	93
Hatina Îskender a Hindê	94
Vegera Îskenderê Makedonî	94
Şerê Kurdên Tûran û Mekranê Bi Leşkerê Îskender Re	95
Danîna Nexşeya Şer.....	95
Şer û Derketina Kurdên Beluçî Ji Tengava Milayê.....	96
Hatina Îskender a Nav Erdê Tûranê û Dagirkirina Ermabilê.....	96
Şer Li Tengava Hullînê	97
Şerê Galgalanê Li Navçeya Raskîçanê	97
Karbidestên Îskenderê Makedonî Li Tûran û Mekranê	98
Destbikarkirina Kisandus Wekî Fermanrewayê Tûran û Mekranê	98
Şert û Mercên Neguncayî yên Kurdên Beluçî yên Tûran û Mekranê.....	98
Êrîşa Silukus (Selefkos) a Ser Welatê Hindê.....	99
Kurdên Beluçî Di Bin Desthilata Welatê Hindê de.....	99
Hatina Tîreyên Hindî ya Navçeya Tûran û Mekranê	100
Sebebê Alikariya Kurdên Zabilistanê	100
Şerê Giran ê Suhrabadanê.....	100
Girêdana Navçeya Kikanê Bi Mîrnişîna Zabilistanê Ve.....	101

BEŞA PÊNCHEM

ŞARISTANIYETA KURDÊN BELUÇÎ	103
Dînê Kurdên Beluçî	103
Awayê Avakirina Avahiya Arînê (Perestgehê).....	104
Ûrf û Adetên Kurdên Beluçî.....	104
Ziraeta Kurdên Beluçî	106
Zimanê Kurdên Beluçî	107
Nûnertiya Artêşa Kurdên Beluçî.....	108
Sîstema Medenî/Sîvîl a Kurdên Beluçî.....	109
Mezra, Gund û Bajarên Kurdan	109

BEŞA ŞEŞEM

ESLÊ KURDÊN BELUÇÎ	111
Eslê Kurdên Biraxoyî yên Beluçî	111
Paşatiya Malbata Pişdadiyan	114
Eslê Kurdên Beluçiyên Edreganî, Mamilî û Kirmanî	118
Peywendiyên Di Navbera Kurdên Tûran û Mekranê De	122

BEŞA HEFTEM

KURDÊN BELUÇÎ DI SERDEMA PAŞAYÊN SILUKIYÊ (SELEFKOS) YÛNANÎ DE	123
Pişdadi	123
Tîreyên Sindanê	124
Serkeftina Cidgalan Li Ser Tûran û Mekranê	125
Fermanrewatiya Paşayên Silukiyê Yûnanî Li Mad û Parsê	126
Mîrê Wilayeta Zabilistanê Mîr Birsan Zengene	127
Şorişa Hakimên Bi Nijad Yûnanî Li Mad û Parsê	128
Sîstema Nû ya Tîreyên Kurdên Beluçî yên Tûran û Mekranê	129

BEŞA HEŞTEM

KURDÊN BELUÇÎ DI SERDEMA EŞKANIYAN DE	131
Eşkanî	131
Peywendiyên Di Navbera Kurdên Beluçî û Paşayên Eşkanî de ..	132
Êrişên Antiyakûsê Sêyem ên Ser Seltene Eşkanî	133
Kurdên Beluçî û Alikariya Paşayê Eşkanî	133
Koça Dawiyê ya Erdeganê Yekem	134
Paşabûna Pirpatyûsê Eşkanî	134
Paşabûna Ferhadê Yekem ê Eşkanî	134
Paşabûna Mihirdadê Yekem ê Eşkanî	134
Hatina Kurdên Beluçî ya Nav Erdê Tûran û Mekranê	135
Şer Li Suhrabadanê	135
Şer Li Kuhyarê	136
Eslê Tîreyên Kurdên Beluçî yên Ji Welat Dûr	136

FERMANREWAYÊN KURDÊN BELUÇÎ LI TÛRAN Û

MEKRANÊ (Dewreya Sêyem)	139
Mîrêmîran Mîr Behram Biraxoyî	139
Koça Dawiyê ya Mihirdadê Yekem	140
Êrişa Hozên Sakayê ya Ser Kewşenê Madê	140
Paşabûna Ferhadê Duyem	140

Kuştina Ferhed Bi Destê Sakayan	141
Paşabûna Erdewanê Duyem	142
Koça Dawiyê ya Mîr Behramê Biraxoyî.....	142
Mîrêmîran Mîr Şahdad Biraxoyî.....	142
Paşabûna Mihirdadê Duyem.....	143
Şerê Kurdên Beluçi Bi Sakayîyan Re.....	143
Mîrêmîran Mîr Feyrûz Biraxoyî.....	143
Li Geliyê Misatnicê Bi Sakayîyan Re Şer.....	144
Paşabûn û Kuştina Guhderzê Yekem.....	144
Paşabûn û Kuştina Ewrûdê Yekem	144
Paşabûna Sena Turk.....	144
Mîrêmîran Mîr Mihirdadê Biraxoyî.....	145
Paşabûna Ferhadê Sêyem.....	146
Kuştina Ferhadê Sêyem	146
Hozên Saka	146
Damezirandina Mîrnişîna Sakayîyan.....	147
Mayîsesê Mîrê Sakayîyan	147
Yekgirtina Kurdên Beluçi yên Tûran û Mekranê Bi Sakayîyên	
Zabilistanê Re	148
Mîr Îzsês Saka.....	148
Paşabûn û Kuştina Mihirdadê Sêyem	149
Mîrêmîran Mîr Behmen Biraxoyî.....	149
Îzsêsê Duyem ê Mîrê Sakayîyan.....	150
Mîrêmîran Mîr Besam Biraxoyî.....	150
Paşabûn û Goşenişîniya Ewrûdê Duyem.....	150
Gundus Fasanê Mîrê Sakanê	151
Paşabûna Ferhadê Çarem	151
Paşabûna Tîrdadê Duyem.....	151
Kuştina Ferhadê Çarem.....	152
Mîr Gûdayê Mîrê Sakayîyan	152
Hatina Dinyayê ya Peyamber Îsa (Silav Lê Bin).....	152
Mîr Feyrûzê Mîrê Sakayîyan û Têkçûna Mîrnişîna wî.....	153
Mîrêmîran Xefî Biraxoyî.....	153
Xweyîkirina Selgur û Sagdî.....	153
Paşabûn û Kuştina Ferhadê Pêncem.....	154
Hoza Koşaniyan	154
Paşabûn û Kuştina Ewrûdê Sêyem	155
Paşabûna Enuşê Yekem û Dûrxistina Wî Ji Text.....	155
Paşabûn û Koça Dawiyê ya Erdewanê Sêyem	156
Kucele Kile Kedfîzsê Mîrê Koşanê	156
Mîrêmîran Şawîş Biraxoyî.....	157
Paşabûna Guhderzê Duyem û Rakirina Wî Ji Ser Text.....	157
Paşabûn û Kuştina Wardanê Yekem	158
Paşabûna Cara Duyem a Guhderz û Koça Wî ya Dawiyê	158

Paşabûn û Koça Dawiyê ya Enuşê Duyem	159
Paşabûn û Koça Dawiyê ya Bilaşê Yekem	159
Mîrêmîran Mîr Miradan Biraxoyî	160
Êrişa Mîrê Sindanê ya Ser Tûranê.....	160
Wîman Kile Kefîzê Mîrê Koşanê.....	161
Mîrêmîran Mîr Şahbûz Biraxoyî.....	162
Paşabûn û Koça Dawiyê ya Feyrûzê Duyem	162
Paşabûna Erdewanê Çarem û Rakirina Wî Ji Ser Text.....	163
Paşabûn û Koça Dawiyê ya Xesro	163
Mîrêmîran Mîr Sergêj Biraxoyî.....	163
Kenşikinê/Kenişkin Mîrê Koşanê	164
Mîrêmîran Mîr Şahmîr Biraxoyî.....	165
Paşabûn û Koça Dawiyê ya Bilaşê Duyem	166
Paşabûn û Koça Dawiyê ya Mihirdadê Çarem.....	166
Paşabûn û Koça Dawiyê ya Bilaşê Sêyem	167
Paşabûn û Koça Dawiyê ya Bilaşê Çarem.....	167
Hûşan Ūşka Mîrê Koşanê.....	168
Mîrêmîran Mîr Beyx Biraxoyî.....	168
Paşabûna Erdewanê Pêncem Li Parsê û Bilaşê Pêncem Li Babilê.....	169
Mîrêmîran Mîr Şahrûz Biraxoyî	169
Kuştina Erdewanê Pêncem ê Dawîn Paşayê Eşkanî	170

BEŞA NEHEM

KURDÊN BELUÇÎ DI SERDEMA SASANIYAN DE.....	171
Sasanî.....	171
Paşabûna Erdeşêr	171
Mîrêmîran Mîr Bûrak Biraxoyî.....	172
Êrişa Erdeşêr Li Ser Erdê Hindê	173
Paşabûna Şahpûrê Yekem	173
Manî û Dinê Wî.....	174
Mîrêmîran Mîr Mihran Biraxoyî	174
Paşabûna Hurmuzê Yekem	175
Hatina Şiretkerên Manî Li Sikistan, Tûran û Mekranê	175
Mîrêmîran Mîr Şadan Biraxoyî.....	176
Paşabûna Behramê Yekem	176
Kuştina Manî	176
Paşabûna Behramê Duyem.....	177
Îtaetkirina Hozên Sakayî û Kurdên Beluçî	178
Hatina Zawik a Ser Dadgeriya Tûran û Mekranê	178
Paşabûna Behramê Sêyem	178
Paşabûna Narses.....	179

Şer Bi Romayîyan Re	179
Paşabûna Hurmuzê Duyem.....	179
Hatina Erşem Ji Bo Dadgeriya Tûran û Mekranê.....	180
Bingeha Eslê Sakayiyên Sikistanê.....	180
Paşabûna Şahpûrê Duyem.....	180
Hatina Menûçeher Ji Bo Dagirkirina Tûran û Mekranê.....	181
Paşabûna Erdeşêrê Duyem	182
Hatina Erbed Ji Bo Dadgeriya Tûran û Mekranê.....	182
Paşabûna Şahpûr (Sêyem)	182
Paşabûna Behramê Çarem.....	182
Paşabûna Yezgurdê Yekem.....	182
Hatina Mîr Keysûn Ji Bo Dadgeriya Tûran û Mekranê	183
Paşabûna Behramê Pêncem.....	183
Şer Bi Selteneta Romayê Re	184
Hatina Mîr Xeyzûn Ji Bo Dagirkirina Tûran û Mekranê.....	184
Hatina Xwarê ya Hoza Hîtalî.....	184
Şerê Hîtalan Bi Behramê Pêncem Re	184
Paşabûna Yezdgurdê Duyem.....	185
Hatina Mîr Kirahûn Ji Bo Dadgeriya Tûran û Mekranê.....	185
Paşabûna Feyrûz	186
Hatina Kirkûyî Ji Bo Dadgeriya Tûran û Mekranê.....	186
Paşabûna Bilaş.....	186
Hatina Mîr Kiyarş Ji Bo Dadgeriya Tûran û Mekranê	187
Paşabûna Kubadê Yekem	187
Bêdengkirina Hozên Hezerê.....	187
Hatina Îmam Mezdek.....	187
Guftûgoyên Mezdek Bi Pêşewayên Zerdeştîyan Re.....	188
Paşabûna Tehmasp.....	188
Paşabûna Kubad Cara Duyem.....	189
Hatina Mîr Gistim Ji Bo Dadgeriya Tûran û Mekranê.....	189
Paşabûna Enuşêrwan.....	189
Qetlîama Mezdek û Mezdekiyan	190
Hatina Mîr Yezen Ji Bo Dadgeriya Tûran û Mekranê	190
Şahiya Zêde ya Ji Bo Hatina Dinyayê ya Hz. Mihemed Mistefa (Silav Lê Bin)	190
Paşabûna Hurmuzê Çarem.....	191
Hatina Mîr Erşib Ji Bo Dadgeriya Tûran û Mekranê	192
Rizgakerina Wilayetên Tûran û Mekranê Ji Waliyê Sindanê	192
Paşabûna Xesro Perwîz	192
Şerê Xesro Perwîz Bi Romayîyan Re	193
Nameya Hz. Mihemed Mistefa Ji Xesro Perwîz Re	193
Paşabûna Kubadê Duyem.....	193
Misilmanbûna Xelkê Yemenê.....	193
Li Ser Erdê Sindanê.....	194

Risal Dîwanç	194
Parastina Teqlîdkerên Mezdek	195
Rasil Siharis.....	195
Dağirkirina Wilayetên Tûran û Mekranê	195
Tayîna Mîr Li Tûran û Mekranê.....	195
Sîwa Semerayê Mîrê Tûran û Mekranê	196
Beşdariya Kurdên Beluçî ya Nav Hêzên Eskerî.....	197
Rasil Sihalas	197
Sîwa Cunîn Mîrê Tûran û Mekranê.....	197
Rasil Siharisê Duyem.....	197
Paşabûna Pûran Duxt.....	198
Koça Hz. Mihemed Mistefayê Peyamberê Îslamê û Malavahiya Wî	198
Paşabûna Arzim Duxt	199
Risal Sihalasê Duyem	199
Sîwa Eşyarê Mîrê Tûran û Mekranê.....	199

BEŞA DEHEM

KURDÊN BELUÇÎ DI SERDEMA ÎSLAMIYETÊ DE	201
Xilafeta Mîrê Misilmanan Ebûbekir	201
Xilafeta Mîrê Misilmanan Omerê Kurê Xetab	201
Paşabûna Yezdگردê Sêyem.....	203
Rasil Çeçê Kurê Silayîç	204
Şer Bi Ranûn Mihirtûn Re	204
Sîwa Mayînê Mîrê Tûran û Mekranê.....	204
Êrîşa Leşkerê Îslamê Li Ser Secistan û Mekranê	205
Îtaeta Kurdên Beluçî a ji Mîrê Misilmanan Hz. Omerê Kurê Xetab Re.....	205
Xilafeta Mîrê Misilmanan Osmanê kurê 'Efan.....	206
Şorişa Xelkê Kabilistan û Zabilistanê	207
Hatina Ebdurehmanê Kurê Semere a Mekranê	207
Hatina Ubeydullayê Kurê Mu'emer a Mekranê.....	208
Xilafeta Mîrê Misilmanan Eliyê Kurê Ebî Talib	208
Sîwa Zûrakê Mîrê Tûranê.....	208
Hatina Saxirê Kurê Ze'êr a Mekranê.....	209
Benî Umeye.....	209
Rûniştina Mu'awiye ya Li Ser Textê Xelîfetiye.....	210
Hatina Ebdula Siwar El'ebdî ya Mekranê.....	210
Êrîşa Ser Tûranê	211
Hatina Senanê kurê Seleme ya Tûranê.....	212
Hatina Raşidê Kurê Omer a Mekranê	212
Careke Din Hatina Senanê kurê Seleme ya Mekranê.....	212

Rasil Çenderê Birayê Çeç.....	213
Hatina Menzerê kurê Carûd Bişir a Mekranê	214
Hatina Hekemê Kurê Menzer a Mekranê	214
Hatina Ebdulmulikê Kurê Merwan a Ser Textê Xelifetiyê.....	214
Hatina Seidê Kurê Eslem Kulab a Mekranê.....	215
Mixalefeta [Seid] Bi 'Elafiyen Re.....	215
Hatina Meca'eyê Kurê Si'erê Kurê Yezîdê Kurê Hezîfe ya Mekranê.....	215
Xelifebûna Welidê Kurê Ebdulmelikê Kurê Merwan	216
Hatina Mihemedê Kurê Harûn a Mekranê.....	216
HIN WÊNE.....	217
Wêneyên Mîrên Mîrnişîna Kurdên Beluçî yên Beluçîstanê Û Wêneyên Kulturî.....	217

PÊŞGOTINA WERGÊR

Kurdgalnamek | Gencîneya Dîroka Kurd û Beluçan

Ji bo berbipêşveçûn û duristkirina dahatûya neteweyekê, dîrok xwediyê peywendiyêke misogerî ye ku bi bibîranîna bûyer, nişûv, hevraz, serkevtin û hilweşîna borî, hest û coşa neteweyê dilivîne û ji bo hewldana jînê şîyanên veşartî bi teyîsok û taybetmendiyên tîr dike.¹

Dîroka balkêş a Kurdan di Kurdistana niha û Kurdistana kevn(Medya) de diçe digihê bi çendîn hezar sal beriya niha. Di piraniya serdemên pênc hezar salên borî de, bi gelemperî di piraniya navçeyên Kurdistana û bi taybetî Kurdistana niha de, şaristaniya neteweya Kurd di warê siyasî, civakî, çandî, urf û adet û dînî de, serektirîn an yek ji serektirîn danerên bingeha dîroka vê rêveberiyê bûye. Nimûneyên balkêş ên vê şaristaniya kevn ên wekî Gûtiyan, Lolojiyan, Elamiyan, Hûriyan, Madan, Eşkaniyan, Sasaniyan, Şedadiyan, Eyûbiyan, Zendan, Biraxoyiyan û mîrnişînên sedsalên dawiyê belgenexwestiyên vê rastiyê ne.

Şaristaniyên kevn tesîra bi vî awayî bêguman divê kelepûr/bermayî, mîratên siyasî, coxrafi, çandî, civakî, zanistî, edebî û urf û adeti bi cih hiştibin ku neviyên piştî wan jê sûdmend bin û pê şanaziyê bikin.

¹ Mîr Gulxan Nesir, Mêjûy Beluçistan, cilda yekem û duyem, çapa Qelat Peylîşerzê, Kwête, 1993, pêşgotin Xews Bexş Bizinco, rûp: 1.

Dîrok li vir, bi taybetî dîroka nivîskî, yek ji wasiteya sereke ya qeydkirina kelepûrên şaristaniyê ye. Kelepûrên şaristaniya Kurdan ji bêguman divê bi vê perspektîvê ve cihê pençeyê wê bixuyê.

Di warê qeydên nivîskî yên dîrok û şaristaniya neteweya Kurd de em dikarin behsa navê komê kelepûrên balkêş bikin. Awesta û Dînkurd du kitêbên giranbuha yên dinî yên bi Kurdî hatine nasîn in. Teng Gilo yê bi navê Şingulê hatiye nasîn, di sala 700ê beriya zayînê de bi Kurdî kitêbek li ser dîn û stêrnasiyê nivîsiye. Aryate bizişkekî Kurd ê bi nav û deng bûye di sala 668ê beriya zayînê de li ser zanista bizişkiyê bi rênivîsa Kurdî nivîsiye. Ev kitêb tenê beriya hatina dinyayê ya Mesîh û Îslamê hatine nivîsandin, em dikarin behsa navê Awesta, Dînkurd, Bendhisen, Datistan Dînik, Artay Wêrafname, Karnameya Erdeşêrê Babekan, Padkar (Yadgarê Zerîran), Dastan Rîdk, Xesro Giwatan û Xutayê Name bikin.² Cihê ecêbiyê ye ji bilî tek tûkan, ev û kelepûlên nivîskî yên kevn bi giştî ji nav çûne yan ne li ber dest in.

Ji ber wê, di vê girêdanê de, peydakirina kitêba “Kurdgalnamek”ê ku di sala 1659ê zayînî de ji aliyê Kurdekî Zengene yê Beluçî ve hatiye nivîsandin, xezîne û şahkareke dîrokî ya bi qîmet û mezin e ku (valatiya) dîroka Kurd û Beluçan tijî dike.

Girîngiya Kurdgalnamekê

Kurdgalnamek ji bilî tîşk kiriye ser peydabûna neteweya Kurd li Kurdistanê û avabûna dewleta Medyayê, bi dirêji behsa Beluçîyan dike ku bi eslê xwe Kurd in û bingeha wan diçe ser Kurdên Madê û piştîre çawan ji Kurdên Madê hatine qutkirin.

Kurdgalnamek behs dike dema ku Keyqubadê paşayê mezin ê Kurdê Madan di sala 853’yê beriya zayînê de bingeha dewleta Kurdan a Madî danî û piştîre bi Efrasiyabê paşayê Tûranê re dest bi şer kir, Kurdên Beluçî bi piştgirîya

² Ferhenga Baban, Şukrulayê Baban, 1361’ê koçî, rûp: 7-8.

Keyqubad li dijî Efrasiyab şer kirin. Piştî şikandina Efrasiyab û dagirkirina navçeyên selteneta Tûranê, Keyqubad Kurdên Beluçî li navçeyên hatine dagirkirin, yanî Beluçîstana vê serdemê ku dikeve rojhilatê selteneta Madê bi cih kirin.

Kurdên Beluçî ku destpêkê wek Kurdên Madê û li gel şertên serdemê bi navê Beluç û Birahuyî (Biraxoyî) hatin nasîn, venegeriyan ser erdê bav û bapîrên xwe Kurdistana kevn (Medya) û li navçeyên Beluçîstana vê serdemê bi cih bûn.

Kurdgalnamek bi dirêji tişk dike ser bingeha Kurdên Beluçî û li nişîngeha wan a nû behsa dîroka siyasî, civakî, ziman, dîn, urf û adet, rêxistina leşkerî, awayê hozî (eşîretî) û pîşeya wan dike. Behsa peywendî û helwêsta Kurdên Beluçî bi fermanrewayên serdemên cihê cihê yên Madan, Hexameniyên, Yûnaniyan, Aşkaniyan, Sasaniyan, Hindiyan û Îslamiyan dike.

Her çend hevniyadên Kurd û Beluçî di çavkaniyên kevn ên gerokên Îslamê yên sedsala 10 û 11'an ên zayînî de îşaret pê kirine û di sedsala 19 û 20'emîn de komek lêkolînerên biyanî û xwemalî yên Beluç di perav û lêkolînên xwe de îşaret bi hevniyadiya Kurd û Beluçan kirine lê Kurdgalnamek yekem çavkaniya bawerpêkirî ya dîrokî ye ku bi awayekî têr û tijî li ser vê babeta dîrokî sekiniye û awayê qutbûna Kurdên Beluçî ji Kurdên Madan ronî dike.

Di warê Kurdnasiyê de ev behs û xeberên dîrokî nediyar bûn û di nivîsên dîrokî yên Kurdî de îşaret bi wê nehatibû kirin, ji ber wê em spasdarên Şerefexanê Bedlîsî ne ji bo nivîsandina Şerefnameyê û parastina dîroka neteweya Kurd; bi eynî awayî divê em spasdarê Axwend Mihemed Salih bin ji bo nivîsandina Kurd Gelnamekê û parastina dîroka Kurd û Beluçîyan.

Peydakirina Kurdgalnamekê

Kitêba Kurd Gelnamekê piştî wê dête berhem, di nav Beluçîyan de pişt bi pişt hatiye parastin. Dîroknivîsê Beluç

seyda Mîr Nesîrxan Ehmed Zeyî Beluç, di sala 1943'yan de, dema ku li ser pileya mîrî ya cihgirê bacgir di hikûmeta Qelatê ya Beluçîstanê de li bajarokê Sorabê kar dikir, li ba Qazî Ebdulhemîd ê bi navê Qazî Xews Bexş cara yekê destnivîsa Kurd Galekê ditiye. Ji ber girîngiya destnivîsê Mîr Nesîrxan ji Qazî dixwaze ku destnivîsê bide wî. Lê bêfeyde dibe û wê wextê makîneya fotokopiyê tune bûye, ji ber wê ji neçarî destnivîseke din ji ber dinivîse.

Mîr Nesîrxan piştê li ser Kurdgalnamekê lêkolîn kiriye û netîceya lêkolîna xwe di pêveka kitêba bi qîmet a dîroka heşt cild a bi navê "Dîroka Beluç û Beluçîstan"ê de diweşîne. Yekem cilda vê kitêbê di sala 1988'an de li Kiwêteya paytexta Beluçîstana Pakistanê tê weşandin. Min jî ev ji cilda yekem a vê kitêbê wergerandiye Kurdî û bi kurtelêkolîneke xwe ya li ser hevniyada Kurd û Beluçan di sala 2005'an de, bi rêya dezgeha Çap û Weşanên Arasê li Hewlêrê weşandiye.

Mîr Nesîrxan piştê teksta Farişî ya Kurdgalnamekê cara yekem di sala 1991'an de bi alîkariya "Beluçî Akademi"yê (Akademiya Beluçî) li Kiwête weşandiye. Piştî weşandina Kurdgalnamekê, Prof. Ebdula Can Cemaledîn û Prof. Nadir Kemberanî Kurdgalnamek wergerandin ser zimanê Urdûyî û di sala 1994'an de ji aliyê Beluç Akademiyê ve hat weşandin.

Nivîskarê Kurdgalnamekê Axwend Mihemed Salih Zengene

Axwend Mihemed Salih Zengene, kitêba Kurdgalnamekê di sala 1070'yê k./1659-1660'ê zayînî de nivîsiye. Her wekî Axwend di destpêka kitêbê de di behsa Xwendegehên Îslamê de îşaretê pê dike, kitêba Kurd Galname bi alîkariya çendîn çavkaniyên dîrokî nivîsandiye ku kitêbên kitêbxaneya xwendegehên Îslamê eslê wan li Zerenga paytexta Zabilistanê (Sîstan) hatibûn parastin û ji birin û talana Teymûrê Leng hatibûn rizgarkirin. Teymûrê Leng di sala 1383'yê zayînî de êrîş biribû ser Zerencê û ew dagir kiribû.

Axwend di sala 1659'ê z. de di der barê Mîrnişîna Biraxoyî de li Qelata paytexta Beluçîstanê ya di serdema fermanrewatiya Altazê Duyem de wekî karbidestê mîr dest bi kar dike. Piştî ji bo meqamê wezîrê mezin tê bilindkirin û li ser vî meqamî ji pênc fermanrewayên Beluçê re kar dike.

Axwend kesekî bi helwest, kirdar û dilsoz bûye û fermanrewayên Beluçê rêzeke mezin lê girtine. Tê gotin di serdema fermanrewaya Qelatê de, du birayên ji desthilatdariya Kelhûriyên Sindê ji aliyê Semender Birohî ve tînin girtin û Semender Birohî fermana kuştina wan dide. Wê wextê Axwendê wezîrê Semender Birohî destara (cemedanî, mêzer) serê xwe tîne xwarê û datîne serê herdu birayên girtî da ku Semender Birohî wan efû bike. Di eynî wextê de Axwend ji Semender Birohî re dibêje, kuştina girtiyan ji bo paşa ne baş e, eger tu vî cezayî bidî wan lekeyeke nehez dikeve ser hikûmeta Beluçîyan. Semender Birohî jî ku rêzeke mezin ji Axwend re hebûye, bi gotina wî dike û fermana kuştina wan paşve dikêşe.³

Axwend kesekî bêtirs û mêrxas bûye û li ba fermanrewayên Beluçîyan xwediyê cihê baweriyeke zêde bûye. Tê gotin di şerê Xanpûrê yê Ebdula Xanê mîrê Qelata Beluçîstanê yê li hemberî Kelhûriyan de, ji ber kêmbûna leşkerên xwe li hemberî leşkerên dijmin xwe destgîrêdayî dibîne û di serkevtinê de dudil dibe. Wê wextê Axwend Mihemed Salih pê re ye, jê re dibêje ku kurê wî yê biçûk bi xwe re bibe û wî biparêze ku hakim û fermanrewatiya Beluçîyan dom bike û welatê wan ji destê wan dernekeve. Lê Axwend bersiva wî dide û jê re dibêje, min di hevkarîkirina mezinê xwe Ebdula Xan de canê xwe feda kiriye, ez naçim. Lê wê wextê Ebdula Xan û serdarên din jê re dibêjin, eger ew Mihemed Xanê kurê Ebdula Xan nebe û neke hakim, desthilat di destê Beluçîyan de namîne. Axwend neçar dibe ku dibe û datîne ser textê Qelatê. Ebdula Xan jî di

³ Tarîx Sinde, cilda şeşem, serdema Kelhûre, beşa duyem, Xulam Resûl "Mehr" bordî edeba Sindehî, çapa yekem, 1958, rûp: 260-263.

wî şerî de şehîd dibe.⁴

Di dawiyê de, ez hêvîdar im wergera Kurddalnamekê bibe sebebê lêkolînan û di pêdeçûna zêdetir li ser peywendiya hevnijadên Kurd û Beluç û hişyariya neteweyî û dîroka zêdetir di navbera Kurd û Beluciyên de.

Li vir pêwîst e ez spasê şair û seydayê Afxanî birêz Nesîbê Ekrem bikim ku ji bo ronîkirina çendîn bêjeyên nav teksta Farisî ya Kurddalnamekê alîkariya min kir. Her wiha spas û pêzanîna birêz kak Bedran Ehmed Hebîb jî dikim, ku bi germî bi dengê min ve hat û Kurddalnamek weşand. Ez niha di Zanîngeha Kwinzelandê de mijûlî xwendina masterê ya hiqûqê me.

Hîwa Mihemed Zendî
Birizbin, Avûstiralya -1/7/2011

⁴ Tarîx Sinde, cilda şeşem, serdema Kelhûre, beşa duyem, Xulam Resûl “Mehr”, bordî edeba Sindehî, Keraçî, çapa yekem, 1958, rûp: 395-396.

KURTIYA GOTARA SEYDAYÊ CEMAL NEBEZ LI SER KURDGALNAMEKÊ

Kurdgelnamek | Dîtina Destnivîsa Çavkaniyeke Gelek Girîng Ji Bo Dîroka Kurd û Beluçiyan

Çar sed sal beriya niha Şeref Xanê Bedlîsî nivîsandina Şerefnameyê temam kiriye, bi wê berhemeke girîng li ser dîroka neteweya Kurd pêşkêşî cîhanê kiriye. Vêca eger Şerefname wek çavkaniyeke gelek girîng a dîrokê hatiye nasîn, bêguman girîngiya Kurd Gelnamekê ji Şerefnameyê ne kêm e. Destnivîsa Kurdgalnamekê di van salên dawiyê de li Beluçîstana Pakistanê hatiye dîtin. Venivîsa Axwend Mihemed Salih Zengenyê Kurdê Beluç bûye, di sala 1070'yê k./1659-1660ê z. de hatiye nivîsandin.

Li gor vî dîroknivîsî, bingeh û eslê Beluçiyan Kurd e. Nivîskar behsa pismamtiya xwe bi Hoza Biraxoyî re dike û Hoza Zengene jî beşek ji Hoza Bûdî hesêb dike. Herdu hozan jî neviyên du kurên Bûd [Biraxom] û Zengan dinivîse û dibêje, Bûd heftemîn kurê mîrê Madê Kurd bûye.

Axwend Mihemed Salih Zengene dûr û dirêj behsa hozên Kurd ên Belucistanê dike û dibêje, Beluçî Kurd bûn û ji Kurdistanê çûne Beluçîstana kevn ku wê wextê navê wê Tûran û Mekran bûye û li wir bi cih bûne. Ev jî di sala 853'yê beriya zayînê de bûye. Her wiha dibêje: Dema ku serokê Kurdên Mad Keyqubad împaratoriya xwe li welatê Medyayê û Parsê damezirand û li ser Afrasiyayê paşayê dewleta Tûranê hakim bû, vêca Keyqubad êrîşî Belxê kiriye û Kurdên Biraxoyî û Edre-

ganê yên herêma Tûran û Mekranyayê girtine. Piştî navê van herêman bûye Beluçistan û navê xelkê wê jî Beluç.

Axa Nesîrxan Ehmed Zeyî Beluç, kevnewezîrê hikûmeta Beluçistana Pakistanê, di van dawîyan de ji bo vê berhema hêja pêşgotinek nivîsandîye û behsa wê yekê kiriye ku Kurdgalnamek ronahiyeke bi hêz arasteyî dîroka Beluçistanê kiriye û bûye sebebê hildana wan tem û mijên li ser dîroka Biraxoyê û Beluçistanê yên ji aliyê Denys Brayê rojhilatnasê Brîtanyayê ve hatine weşandin. Nesîrxan seydayê ziman û çanda Beluçistanê di Zanîngeha Beluçistana Pakistanê de ye. Hêjayî gotinê ye ku eynî vî nivîskarî, Nesîrxan Ehmed Zeyî Beluç, kitêbeke bi qîmet bi navê Dîroka Beluç û Beluçistanê bi zimanê Urdûyî nivîsiye û li ber ronahiya Kurd Galnameyê û Dîroka Kurd û Kurdistanê ya seydayê Merdoxî Kurdistanî behsa Beluç û welatê Beluçistanê kiriye. Xwendekarekî Kurd ê xwendegêha navendî ya Rewelpendê ya Pakistanê ku navê wî Hîwa Mihemed Zend e ev kitêb kiriye Kurdiyeke gelek spehî û rewan. Birêz Hîwa Zendî wergera xwe ji bo lînêrînê ji min re şandiye, ku bi rastî ne pêwîstî destlêdanê ye. Min jî di dema konferansa li ser Şerefnameyê ya di 1-2/5/1998'an de li Berlinê hat çêkirin de, behsa wê wergerê û Kurd Gelnameyê kir... Her wiha ez ji bo wê xizmeta mezin a ku kiriye spasê Hîwa Mihemed Zend dikim, hêviya min ew e hewl û têkoşîna rewşenbirî ya Kurdan a di rêya xizmeta dîrok û çanda neteweya Kurd de serkeftî be.

Cemal Nebez

Mehnameya Seko

Hejmar 20, Hezîran 1998

KURTIYA PÊŞGOTINA BIRÊZ NESÎRXAN EHMED ZEYÎ BELUÇ JI BO KURDGALNAMEKÊ

Kurdgalname kitêbeke dirokê ye ku Axwend Mihemed Salih Kurdî Zengene yê Beluç bi Farisî di sala 1070'yê k./1659'ê z. de nivîsiye. Kesê ku navê wî derbas dibe di beşa yekem a kitêbê de behsa eslê xwe dike ku ji hoza Kurd a Zengene ye û Zengene jî ji tîreke hoza Bûdî ye. Her wiha pismamtiya xwe bi Kurdên Biraxoyî re nişan daye ku ev herdu tîre neviyên du kurên Bûd, Biraxom û Zengan in. Bûd bi xwe heftemîn kurê Mîr Mad Kurd e.

Ev kitêb behsa dîroka Beluçiyan dike ku di hêla nijad de Kurd in, lê di dawiyê de, ji ber sebabên nişana eskerî ku "taca dîkê" bû û di zimanê Farisiya kevn û Kurdî de jê re "Beluç" tê gotin, bi navê "Beluç" hatin nasîn.

Li gor Kurdgalnamekê, Kurdên Beluçî di sala 853'yê beriya zayînê de hatine nav erdê Beluçistana kevn, Tûran û Mekanê. Ew jî di wextekî de bûye ku Keyqubad mîrê Madê ye, Kurdan li Mad û Farsê bingeha selteneta xwe damezirandin û Efrasya û paşayê selteneta Tûranê şikandin.

Selteneta Tûranê ji van pênc navçeyan pêk hatiye: Suxdistan (erdê naverasta Asyayê: Ozbekistan, Tacikistan, Kirgizistan û Turkmenistan), Kabilistan, Zabilistan (Afganîstana niha) û Tûran û Mekan (Beluçistana niha).

Dema ku Keyqubad Paşa ji bakur ve êrîşî ser Beluçê kir, paytexta seltenetê Tûranê, eskerên Kurdên Beluçên Biraxoyî û Edreganî di bin fermana wî de êrîşî ser Tûranê (bilindahiyên Qelatê) û Mekanê kirin û ev navçe dagir kir. Piştî dagirkiri-

na navçeyên selteneta Tûranê, Keyqubad Paşa yê Kurdê Madê navçeyên awa awa yên dagirkirî di navbera destê û hozan de parve kir. Bi vî awayî, navçeya Tûranê (bilindahiyên Qelatê) li ber Kurdên Biraxoyî ket û navçeya Mekranê jî li ber Kurdên Edreganiyê ket. Ev desteyên hozan li navçeyên ji wan re hatin bexişandin bi awayekî timî bi cih bûn û wê wextê Kurdên Zengene jî Zabilistan (Afganîstana niha) dagir kirin û ew kirin niştegeha xwe ya heta bi hetayî.

Bapîrên nivîskarê Kurdgalnamekê fermanrewayên Zabilistanê bûne û piştî derketina Îslamiyê bapîrekî şikurdarî di serdema desthilatdariya xelîfeyên benî Ebas de li Zerenca paytexta Zabilistanê xwendegeheke dinî damezirandiye. Ev xwendegêh piştî hilweşîna serdema fermanrewatiya xelîfeyên benî Ebas û bi geşbûna hêzên Moxoliyan bi taybetî di şerê dagirkeriya Mîr Teymûr Gurganî yê di sala 1383'yê zayînî de hat wêrankirin. Di netîceya vê karesatê de, her çend malbata nivîskar jî desthilatê ket, lê endamên malbatê dest ji pişeya zanistiyê bernedan. Ji ber wê nivîskar bi çend xwendekarên hevalên xwe re bi mebesta bidestxistina xwendina bilind diçe Şîrazê û piştî temamkirina xwendina xwe vedigerin Zabilê niştegeha bapîrên xwe.

Di wê serdemê de, tîreya Mîrwanî ya Beluçî li navçeya Tûranê (bilindahiyên Qelatê) di sala 1410'ê zayînî de di bin serekatiya Mîr Mîro Mîrwanê mîrê mezin ê Kurdên Beluçî de fermanrewatiya çarem a Beluçiyan ava kiribû. Di dema nivîsandina kitêba Axwend Mihemed Salih de, ev hikûmeta Beluç bi rêberiya Mîr Ehmedê Mezin (1666-1695) ku pazdehem cihnişînê Mîr Mîro Mîrwanî bû, gihîştibû kopa serkeftina xwe.

Axwend Mihemed Salih Kurdê Beluçî bû û her ji ber vê yekê jî hat keleha paytexta Beluçistanê û di sala 1659'ê zayînî de li ser kelehê rûnişt û bû karmendê Mîr Eltaziye Duyem ê bavê Ehmedê Mezin. Axwend Mihemed Salih ku ji bilî zanayekî payebilind bû, xwediyê kesayetiyekî hûrgilî ya mezin, bi tedbîr û siyasetmedar bû. Piştî çend salan karkirinê, Ehmedê Mezin li ser meqamê wezîrtiya bilind dan rûniştandin û

rawêjkariya pênc fermanrewayên Kurdên Biraxoyî yên Beluçî kir ku navê wan bi vî awayî bû: Ehmedê Mezin, Mihrab Sermişar, Semender Sexî, Ehmed Parsa û Ebdula Weqab Kuhlî. Axwend Mihemed Salih piştîre bê kur koça dawîn kir, ji ber wê kurê mamê wî, Axwend Mihemed Heyatê kurê Axwend Şahdad bû cihnişînê wî.

Axwend Mihemed Salih serpehatiya dîroka girîng û cihê rêzê ya Kurdên Beluçî yên Beluçîstana kevn kir ber behsê ku di der barê wê de heta niha kesek agahdar nebû û di tariya dîrokê de wenda bûbû.

Ji ber wê, di dinyaya dîrokê de dîtina destnivîsa Kurdgal-namekê di rastiyê de xwediyê qîmetêke taybet e.

Eger destnivîsa kitêbê nehatibûya dîtin, piraniya rastiyên dîroka Beluçîstanê veşartî diman. Gelek bûyerên dîrokî ku Axwend Mihemed Salih di kitêbê de behs kiriye, gelek balkêş in û piştî wî lêkolînerên dîroka cihana nû ew piştrast kirine. Nimûneyên vê piştrastkirinê wekî xalên jêrê ne:

Yekem: Axwend bi dirêjî behsa bûyerên şerê Beluçîyan bi eskerên Îskenderê Mezin re dike ku dema ber bi welatê xwe ve vedigeriyan û di xwarê Beluçîstanê re derbas dibûn. Dema ku Îngilîzan Beluçîstan dagir kirin, efserên siyasî li ser parêzgehên Beluçîstanê ferhengoka coxrafyayê nivîsandin. Di vê navê re nivîskarê ferhengoka coxrafyayê Lesibêle A. R. Heyes Buler Î. S. C., di beşa dîrokê de babeta Axwend Mihemed Salih a di warê şerê Beluçîyan ê bi Îskenderê Mezin re piştrast dike.

Dirêjiya behsa ferhengoka coxrafyayê bi vî awayî ye: "Nerçis eskerên xwe li vir bi cih kirin û di vê beşa welatê de Lewnatus karibû Orîtiyan û hevkarên wan di şerekî mezin de bişikîna ku tê de şeş hezar kes ji hozan hatin kuştin. Piştî wê serkeftinê, Îskenderê Mezin li vir urf û adetê taca zêrîn ê danîna serê Lewnatus meşand."⁵ Herdu neqilker tenê li ser xalekê li hev nakin ku ew jî hejmarê kuştîyên hozan ên di meydana şerê de ne. Li gor Axwend Mihemed Salih di vî şerê de deh hezar

⁵ Ferhengoka Coxrafyayê ya Lesibêle, rûp: 219

şervanên Kurdên Beluç tên kuştin, lê dîroknivîsên Îskender hejmara kuştîyên hozên Ortîyan wek şeş hezar neqil dikin.

Duyem: Di destnivîsa dîrokê ya Axwend Mihemed Salih de behsa bîngeha mîrên van heşt tîreyên Kurd ên Biraxoyên Beluçî kirîye: Kîkanî, Goranî, Sarûnî, Xuzdarî, Mişkani, Ermilî, Bolanî û Girişkanî. Di navçeya Tûranê (bilindahiyên Qelatê) de niha jî çiya, gir, gelî, rûbar, gund û bajarên wisan hene ku her bi wan navan tên nasîn ku di bîngeha mîran de behs hatiye kirin. Her bi vî awayî, di navçeya Mekranê de jî çiya, gir, gelî, rûbar, gund û bajarên wisan hene ku heta niha jî bi wan navan tên nasîn ku di bîngeha mîrên Kurdên Beluçî yên hozên Edrekanî, Mamilî û Kirmanî de behsa wan hatiye kirin. Beriya dîtina Kurdgâlnameyê ew nav ji me re çîrok bûn, ji ber wê em spasdarê Axwend Mihemed Salih in ku ev mesele ji me re ronî kirîye.

Sêyem: Kurdgâlname ronahiya zêde kirîye ser peywendiyên civakî, siyasî û aborî yên di navbera rûniştîyên Beluçîstanê û Sindê de ku di vî warî de zana bi giştî bêagah bûn. Axwend bi dirêjahî behsa van sê destê hozên Sindê dike: Bînyan, Takîn û Mûmîdanê. Ew zanyariyên Axwend behs kirine di warê dîrokî de bi radeyeke zêde rast in û durist in. Ji ber wê, hemû dîroknivîsên serdema dawîn ên Sindê, ji wan Elî Kufiyê nivîskarê Çeçnameyê, Mîr Me'sûmê nivîskarê Mêjûy/Dîroka Me'sûmî û Mîr Şêr Qanî'ê Tehtehoyîyê nivîskarê Tohfetul-Keram di perawên dîrokê de van sê destê hozên Sindê rûniştîyên eslî yên Sindê dane nasîn.

Çarem: Li Beluçîstanê karmendekî siyasî yê Îngilîz Denys Bray ku di midetê karê xwe de çar salan li Beluçîstanê maye û bi çavdêriyeke serbestane lêkolîn li ser zîmanê Birahuyî (Biraxoyî) kirîye. Ew di pêşgotina kitêba xwe de wiha dibêje: Pênase, rêzîman û hevoksaziya zîmanê Birahuyî... Birahuyî kî ne û kengî hatine Beluçîstanê, ev ew awa pirs in ku em heta niha çaverêya bersiva wan in. Di rastiyê de dîrkirina ji ber bi şaşiyê

ve çûna Denys Bray li ser bingeha nijada hozên Birahuyan û zimanê wan vedigere li karnameya bilind a nivîskarê Dîroka Merdox a Şêx Mihemed Merdox Kurdistanî û nivîskarê Kurdgalnameyê Axwend Mihemed Salih ê Kurdê Beluçî Zengene.

... Ji ber wê em ji radeyê der spasdaren Şêx Mihemed Merdox Kurdistanî yê nivîskarê Dîroka Merdox û Axwend Mihemed Salih ê nivîskarê Kurdgalnameyê ne ku perdeya tarî ji ser vê astenga dîrokê ya girîng hildan ku lêkolînerên dîrokê ji ber wê perîşan bûn.

Ji ber wê bi hebûna van herdu belgeyên dîrokî em di qonaxekê de ne ku bi rastî bizanin hozên Biraxoyî (Birahwî) kî ne û ji ku hatine ser erdê Beluçîstana niha û bi çi awayî ev desteya mezin a nijada Beluç di vê dema dûr û dirêj de bi navê Biraxoyî Beluç hatine naskirin û hatine meydanê.

Li gor vî nivîskarî, Kurdên Biraxoyên Beluçî ku navçeya Tûranê, selteneta Tûranê dagir kirin, li vê navçeyê ji serdema destpêkê ya damezirandina selteneta Tûraniyan ve 22 hozên Tirk li wê navçeyê bi cih bûn û serî li ber mîrên Biraxoyî yên Beluçiyên biserketî dananîn.

Bi vî awayî, Kurdên Biraxoyî yên Beluçî û hozên Tirk tevlihev bûn û ji ber wê ji zimanê tirkî di netîceya tesîra zimanê Beluçî de awayê îro yê zimanê Birahuyî derket.

Ev xal dîroka girîng a destnivîsa Kurdgalnameyê ye ku em bi mebesta bala xwendevanan bikêşin behs dikin.

Nesîrxan Ehmed Zeyî Beluç

18 Şeqamê Serbab, Kiwête.

Tarîx 27/8/1991

PÊŞGOTINA NADIR QEMBERANÎ JI BO KURDGALNAMEKÊ⁶

Dîtina Dîrokeke Nû

Kurdgalname her çend nêzikî 400 sal beriya niha hatiye nivîsandin, van demên dawîn hatiye dîtina û dîtina vê çavkaniyê ji bo Beluçistanê û neteweya Beluçî ji gencîneyeke giranbuha ne kêmtir e.

Vê kitêba li ser dîroka neteweya Beluç deriyekî nû ji bo hûrbûn û birlêkirina li pêşîya lêkolînerên xwendekarên dîrokê vekirîye. Heta niha dîroknas û lêkolîneran dîroka Beluçistanê

⁶ Piştî teksta Kurdgalnameyê ya Farisî li bajarê Kiwêta Beluçîstana Pakistanê hat çapkirin, Prof. Ebdula Cemaledîn erka wergera li ser zimanê Urdûyî girt ser milê xwe. Ji ber ku Beluçiyên Pakistanê bi giştî bi Farisî nizanin ku bikaribin vê kitêba hêja bixwînin û dîrok û boriya neteweya xwe fehm bikin. Mixabin di esnayê wergerandinê de nexweş dikeve û daxwaz ji Prof. Nadir Qemberiyani dike ku karê wergera kitêbê tamam bike. Ev babeta jorê kurtiya wê pêşgotina seydayê Nadir Qemberiyani ye ku ji bo çapa Urdûyî ya Kurdgalnameyê nivîsandibû. Ez xwediyê wê xweşbextiyê bûm ku di sala 1996'an de, di esnayê sefera xwe ya Kiwêta ye ji bo dîtina seydayê Mîr Nesîrxan Ehmed Zeyî Beluç ê nivîskarê Dîroka Beluç û Beluçistanê de, ji nêzik ve bibînim. Hêjayî gotinê ye seydayê Nadir kesekî gelek rûgeş û dilsoz e. Wê wextê li Zanîngeha Beluçistanê li Kiwêta serekê beşa zimanê Farisî bû û ders dida xwendekarên masterê yê zimanê Farisî. Ji bilî vana, seydayê Nadir kesekî xebatker ji bû û gelek caran li ser xebata azadixwazên Beluçî hatibû zindankirin û demekê ji dûr xistibûn û şandibûn Afganistanê. Li gor wî ew ji hoza Kemberanî (Qemberanî) ye, ew ji ji neviyên Kurdên Biraxoyî ne (wergêr).

û neteweya Beluçistanê bi neteweyên çarçoveya wan biçûk ve girêdane ku ev jî bi serê xwe hewl û xebateke bê ber û bê netîce bûye. Lê vê kitêbê arasteya lêgerîna dîroka Beluçistanê û neteweya Beluçî ber bi naverasta Asyayê û neteweyên Îranê ve vegerandiye ku bêguman rê û arasteyeke rast û durist e. Ji ber peywendiya Beluç û Kurdan bi yek nijadê ve heye û di serdemekê de ji hev hatine qutkirin û yek jê li rojhilat û ya din jî li rojavayê, heta li bakurê rojavayê ava bûne. Ev herdu netewe ji nijada Arî ne, lê li gor neteweyên Arî yê din nêzikahiya di navbera wan de gelek zêdetir e.

Neteweya Beluç li navçeya rojhilatê yanî Sîstan, Zabil û Beluçîstana niha ku ji Kirmanê heta kenarên rojavayê rûbarê Sindê digire belav bûye û ji ber kewşenê siyasî yê coxrafya Pakistan, Îran û Afganîstanê ji hev cihê cihê dijîn. Ev jî di demekê de ku di warê dîrok, ziman û çandê de ji yek neteweyê ne. Her bi vî awayî neteweya Kurd jî li rojavayê Asyayê li Sûriye, Îraq, Îran û Tirkiyeyê ji ber sînorên siyasî û coxrafyayê ji hev cihê cihê dijîn û perş û belav bûne.

Li gor Kurdgalnameyê Beluçî jî beşek ji neteweya mezin a Kurd in, ji ber ew hozên di nav Beluçîyan de hene bi heman awayî di nav Kurdan de jî bi heman navî hene û heta di nav Beluçîyên niha de hozeke mezin heye navê wê “Kurd” e. Her çend Axwend Mihemed Salih 400 sal beriya niha ev kitêb nivîsiye jî, hemû ew karesat û bûyerên dîroka Asyaya Navîn û Îranê wekî eslê wan nivîsiye û tu cihêtiyek tê de nayê dîtîn.

Kurdgalname ji aliyê Axa Mîr Nesîrxan Ehmed Zeyî Beluç ve nû hatiye dîtîn û akademîsyenên Beluçî tekstên wê yê Farisî weşandine.

Cihê balkêşiyê ye ku li ser dîroka neteweya Beluç heta niha gelek kitêb hatine weşandin, lê hemû bi piranî yê heyî û pîvan in. Dîroknivîsên me jî bi piranî berhemên dîroknivîsên rojavayê bi bawerpêkirî lê nêrîne û kirine bingeha lêkolînên xwe. Heta niha her çend dîroka li ser neteweya Beluçî

hatibe nivîsandin, li ser çavge û çavkanîgirtina Beluçan hîç zanyariyeke bi vî awayî bi dest neketiye ku têhniya xwendevan û xwendekarên dîrokê bişikîne. Helbet, dîtina Kurdgalnameyê arasteyeke nû ya lêkolînê aniye meydanê. Êdî dîroknivîs û xwendekarên dîrokê dikarin bingeh û xîmê dîroka kevn a Asyaya Navîn û Îranê û di warê neteweya Beluç de rastiyên bawerpêkirî zêdetir bi dest bixin.

Nadir Qemberanî
Zanîngeha Beluçistanê, Kîwête
6 Oktobra 1993

PÊŞGOTINA KURMANCIYA WÊ

Gelek dîrokzan û dîroknas bi van çend gotinan dirokê tarîf dikin: “Dîrok, şehê maziyê û eynika pêşerojê ye.” Belê tarîf û îzaheke kurt lê tijî, dagirtî, rast û di cihê xwe de.

Şerefnameya Şerefxanê Bedlîsî bê şik di xebata dîroka Kurd û Kurdistanê de xwediyê cihê girîng e û em bi saya wê ji demeke dîroka xwe agahdar dibin.

Piştî wê xebata Mela Mehmûdê Bazîdî ya bi navê “Dîroka Kurdistanê” tê. Lê mixabin tenê pêşgotina jê re hatiye nivîsandin di destê me de heye. Kitêb heta niha jî hê wenda ye, em hêvî dikin ku rojekê bê dîtî û nehatibe îmhakirin. Qasî em ji wê pêşgotinê fehm dikin, wî jî xebata xwe ya ji bo dîroka Kurd û Kurdistanê ji wî cihê Şerefxan hiştiye (1597) dest pê kiriye û heta nivê salên sedsala 19^ê (1850) aniye.

Xebateke din a gelek hêja û gelek bi qîmet, ev kitêba di destê we de ya bi navê “Kurdgalnamek” a dîroka kevn a Kurd û Beluçan e. Ev kitêb di sala 1659’an de ji aliyê dîroknivîsê Beluçî Axwend Mihemed Salih Zengene Beluç ve hatiye nivîsandin. Qasî em ji cilda yekem a kitêbê derdixin, ku ev kitêba di destê we de ye, wî ev xebata xwe ya li ser dîroka Kurd û Kurdistanê û Beluçiyên ji Medan dest pê kiriye û heta dewra çar xelîfeyên Îslamê aniye. Mixabin ji bo ku cilda duduyan a kitêbê di destê me de tune, em tiştêkî di derbarê wê de nizanin. Lê mirov dikare texmîn bike ku ew ji piştî dewra çar xelîfeyên Îslamê heta sala nivîsandina vê kitêbê ya 1659’an e.

Belê, bi ser hemû van îmha, înkâr û xêyreta daxwaza bi temamî jiholêmalîna Kurdan ji aliyê dijminên wê yên kolonî-

liyalîst ve, em dibînin her roj li ser dîroka Kurdistanê çavkaniyên nû tên dîtin. Yek ji van çavkaniyan, wekî li jorê navê wê derbas bû, ev kitêba di destê we de ya bi navê “KURDGAL-NAMEK”ê ye. Wekî ez bawer im piştî xwendina wê hûn dê vê raya min parve bikin ku ev kitêb ji bo dîroka Kurd û Beluçîyan xezîneyeke bêemsal e.

Nivîskarê Kurdgalnamekê Axwend Mihemed Salih Zengene Beluç, eslê Beluçan digihîne Kurdan û li ser dewra dîroka Kurdên Beluçî yê dema Medî, Axamenşî, Yûnanî, Eşkanî, Sasanî û Îslamê disekine.

Di sala 1943’yan de yek ji rewşenbîrên Beluçî yê bi navê Mîr Nesirxan Ehmed Zeyî, ji bo berhevkirina bacê li ser navê hikûmetê diçe qezaya Sorabê ya Beluçîstanê. Li wir di mala Qazî Ebdulhemîd de yê bi navê Qazî Xewsbeş jî tê nasîn, kitêba Kurdgalnamekê ya bi destxet dibîne. Kitêbê jê dixwaze lê ew nadê. Ew jî nusxeyekê li ber dinivîse û di sala 1988’an de li Quettaya paytexta Beluçîstanê ya Pakistanê, ji herdu cildan cildeke wê bi navê “Dîroka Beluç û Beluçîstanê” diweşîne. Di sala 1991’an de jî bi alîkariya Akademîsyenên Beluçî li paytexta Beluçîstanê Quettayê Farîsiya wê diweşîne. Di sala 1994’an de jî bi zimanê Urdûyî tê weşandin.

Piştî wergera Kurdiya Kurmanciya Xwarê/Soranî ya vê berhema hêja û bi qîmet di sala 2012’an de ji aliyê Hêwa Mihemed Zendî ve tê amadekirin û ji aliyê Weşanxaneya Arasê ve li Hewlêrê tê weşandin. Ev berhema niha ya bi Kurdiya Kurmanciya Jorê ya di destê we de min li ber vê wergera Kurdiya Kurmanciya Xwarê amade kiriye. Ez hêvîdar im wergera cilda duyem jî di demeke kurt de bê kirin û em wê jî bigihînin ber destê kesên di xema zanîna dîroka xwe de ne.

Ev cilda Kurdgalnamekê ji deh beşan pêk hatiye:

Beşa yekem: Ji destpêkê û Dewleta Medan, têkçûna wê, malbata Hexamenşîyan, danûstendina wan bi Medan re, têkçûna Hexamenşîyan, hatina Îskenderê Makedonî û perçebûna

desthilatdariya Îskender... pêk hatiye.

Beşa duyem: Li ser Mîrnişîna Kurdên Biraxoyî Li Tûranê ya Dewra Yekem e. Yanî ji demên Mîrêmîran Mîr Kîkan, Mîrêmîran Mîr Zurak, Mîrê Mîran Mîr Uştâb, Mîrê Mîran Mîr Zigrîn, Mîrê Mîran Mîr Zîbar, Mîrê Mîran Mîr Biraxem, Mîrê Mîran Mîr Goran, Tîreyên Parsê û ji desteya Hexamenşîyan pêk tê.

Beşa sêyem: Li ser Mîrnişîna Kurdên Biraxoyî Li Tûranê ya Dewreya Duyem e. Ji dewreya Mîrêmîran Mîr Zirşan, Mîrê Mîran Mîr Zurakê Duyem, Mîrê Mîran Mîr Ercan, Mîrê Mîran Mîr Şamûz, Mîrê Mîran Biraxmê Duyem, Mîrê Mîran Mîr Sabûl, Mîrê Mîran Mîr Nûrgan, Mîrê Mîran Mîr Kîyanûş û Mîrê Mîran Mîr Kîkanê Duyem... pêk hatiye.

Beşa çarem: Sernav, Kurdên Beluçî Di Serdema Yûnanî û Hindîyan De ye. Ev jî ji êrişên Yûnaniyan li ser erdê Mad û Farsê, hatina Îskender li Hindê... girêdana navçeya Kîkanê bi Mîrnişîna Zabilistanê pêk tê.

Beşa pêncem: Di derqeqê Şaristaniyeta Kurdên Beluçî de ye. Ev jî ji dînen Kurdên Beluçî, awayê avakirina perestgeha Arînê, urf û adetên Kurdên Beluçî, ziraet li ba Kurdên Beluçî, zimanê Kurdên Beluçî, sîstema artêşa Kurdên Beluçî, sîstema medenî/sîvîl a Kurdên Beluçî û mezra, gund û bajarên Kurdan pêk tê.

Beşa şeşem: Eslê Kurdên Beluçî. Eslê Kurdên Biraxoyî yên Beluçî, paşatiya malbata Pişdadiyan... peywendiyên di navbera Kurdên Tûranê û Mekranê de... tê vegotin.

Beşa heftem: Kurdên Beluçî Di Serdema Paşayên Silukiyê Yûnanî De. Ev jî ji Pişdadî, tîreyên Sindanê... Fermanrewayîya paşayên Silukiyê Yûnanî li Mad û Parsê... Sîstema nû ya tîreyên Kurdên Beluçî yên Tûran û Mekranê... pêk tê.

Beşa heştam: Kurdên Beluçî Di Serdema Eşkaniyan De. Eşkanî, peywendiyên di navbera Kurdên Beluçî û paşayên

Eşkanî de, êrişên Antiyakusê Sêyem li ser selteneza Eşkanî... Hatina Kurdên Beluçî ya nav erdê Tûran û Mekranê... Eslê tîreyên Kurdên Beluçî yên ji welat dûr... Fermanrewayên Kurdên Beluçî li Tûran û Mekranê ya Dewreya Sêyem tê vegotin.

Beşa nehem: Kurdên Beluçî Di Serdema Sasaniyan De. Ev jî ji vegotinên di derheqê Sasanî... Manî û dinê Wî... Kuştina Manî... Şer bi Romayîyan re... Bingeha eslê Sakayiyên Sikistanê... Hatina Îmam Mezdek, guftûgoyên Mezdek bi pêşewayên Zerdeştîyan re... Qetlîama Mezdekiyan û Mezdek... Îşgalkirina welatê Tûran û Mekranê... Koça dawiyê ya Hz. Mihemedê peyamberê Îslamê û malavahiya Wî... pêk tê.

Beşa dehem: Kurdên Beluçî Di Serdema Îslamiyete De. Xilafeta mîrê Misilmanan Ebûbekir, xilafeta mîrê Misilmanan Omerê kurê Xetab... Êrişa leşkerê Îslamê ya li ser Secistan û Mekranê... Xilafeta mîrê Misilmanan Osmanê kurê 'Efan, şorişa xelkê Kabilistan û Zabilistanê... Xilafeta mîrê Misilmanan Eliyê kurê ebî Talib... tê vegotin.

Di dawiya kitêbê de, wêneyên mîrên Mîrnişîna Kurdên Beluçî li Beluçîstanê û wêneyên kulturî hatine danîn.

Bi kurtî ew mijarên di Kurdgalnamekê de li ser hatine sekinîn û nivîsandin ev in. Bi amadekirina vê berhema hêja ya bi Kurdiya Kurmanciya Jorê ez dilşad im û bi hêviya bibe alîkarî ji bo kesên li ser dîroka Kurd û Kurdistanê xebat dikin û perspektîva me ya li ser dîroka me fireh bike.

Zîya Avci

Stockholm 2018

KURDGALNAMEK [KURDBÊJNAME]



AXWEND MIHEMED SALIH ZENGENE BELUÇ

BEŞA YEKEM

Destpêk

Ez Axwend Salihê kurê Axwend Silêmanê kurê Axwend Mehmûdê kurê Axwend Mûsayê kurê Axwend Mubarekê kurê Axwend Ehmedê kurê Mistefayê kurê Leysê kurê Hebibê kurê Xelefê kurê Qeyserê kurê Osmanê kurê Îlyasê kurê Omerê kurê Ye'qûbê kurê Îsayê kurê Sencerê kurê Behaurê kurê Şahbêgê kurê Melikê kurê Behmenê kurê Eybekê kurê Pûy Begê kurê Ehmedê kurê Senanê kurê Parisê kurê Sîracê kurê Birsanê kurê Cabirê kurê Mu'înê kurê Medanê kurê Hekemê kurê Başarê kurê Ehmedê kurê Abanê kurê Tûrabê kurê 'Ubeydê kurê Îsayê kurê Seidê kurê Bekirê kurê Xelefê kurê Sewîdê kurê Ewramê kurê Tîrdadê kurê Beykerê kurê Şaganê kurê Seranê kurê Selemê kurê Girşabê kurê Kubadê kurê Resanê kurê Guderzê kurê Tîrdadê kurê Rostemê kurê Mihirdadê kurê Bûrakê kurê Şêrbozê kurê Behramê kurê Yezburkê kurê Rewanşêrê kurê Merdanê kurê Bedlîsê kurê Mehranê kurê Bîsûtê kurê Şahmîrê kurê Nûzerê kurê Wendanê kurê Siyawuşê kurê Ferhadê kurê Bîdarê kurê Siyamekê kurê Nocehanê kurê Mehranê kurê Bûrganê kurê Kurengê kurê Îspîbûdê kurê Feyrûzê kurê Bersanê kurê Patakê kurê Bakîlê kurê Merzekê kurê Ferkê kurê Kazanê kurê Şiwankê kurê Zirkanê kurê Dîzeyê kurê Xanê kurê Bacelê kurê Manûyê kurê Hurmuzê kurê Sabûlê kurê Nedranê kurê Sewîdê kurê Ramînê kurê Rişwanê kurê Zaxuyê kurê Şûhanê kurê Zeynalê kurê Yazuyê kurê Kusadê kurê Gilê kurê Rasînê kurê Başmanê kurê Arînê kurê Dilfanê kurê Seldûzê kurê Kulkê kurê Şibanê kurê Ezîzê kurê Tûrê kurê Zengeneyê kurê Bûdê kurê Madê kurê Cîgeyê kurê Agazê kurê Mengurê kurê

Kawirê kurê Kadê kurê Pazoyê kurê Sûbarê kurê Mîranê kurê Wanê kurê Gurekê kurê Şûhanê kurê Şikakê kurê Sencarê kurê Sasunê kurê Zaranê kurê Xoşnawê kurê Hekarê kurê Diracê kurê Zenganê kurê Rasinê kurê Çerkeşê kurê Madê Mezinê kurê Xuranê kurê Şûdê kurê Têrxanê kurê Pişderê kurê Bulgarê kurê Dexûyê kurê Sûrê kurê Rûdînê kurê Gîwerê kurê Arînê kurê Mîtanê kurê Buxazê kurê Kardakê kurê Zezerê kurê Turkê kurê Kumerê Kurdiyê Yafesê kurê Nûh silav lê bin, ji hoza Kurdên Zengeneyê me ku tîreyeke hoza “Bûdî” ye û di warê nijad de jî nêzikî Kurdên Biraxoyî me. Bapîrên mezin ên van herdu tîreyan “Bûd” e û hoza Bûdî jî yek ji wan heft tîreyên hoza Madê ye. Du kurên Bûd ên navên wan Biraxim û Zengan hebûn. Di destpêkê de neviyên van herdu kurên Bûd bi navê tîreya Bûdî hatin naskirin lê piştê ji ber firehbûna bereyan tîreya Bûdê bi ser du tîreyên mezin Biraxoyî û Zengeneyê ve hatin parvekirin.

Bêjerên⁷ Kurd neqil dikin ku “Kurd” xelkek in di destpêkê de çend hezar sal beriya zayîna Mesîh, hatine wê navçeya ku ketiye xwarê “Ermenistan”ê û niha bi navê “Azerbaycan”ê tê nasîn. Ev navçe ji ber niştecihbûna wan di wê serdemê de bi navê “Mad” hat nasîn û nav û deng da. Piştê Kurd ji vir ber bi navçeyên rojhilatê, rojavayê û xwarê ve belav bûne û nişîngeha wan a niha ku ketiye xwarê Azerbaycanê bi navê “Kurdistan”ê tê nasîn. Bêjer li ser van nêrînan hevbîr in ku nişîngeha destpêkê ya Kurdan Asyaya Navîn bûye û ji wir hatine qeraxên başûrê Deryaya Hezerê. Piştê ji wir jî hêdî hêdî bi rewşa serdemê re ber bi aliyê zincîra Çiyayên Zagrosê ku ketiye xwarê Madê û ji aliyê rojhilatê ve li navçeya Dîcleyê belav bûne û niştecih bûne.

Di destpêkê de peywendiyên Kurdan beriya desthilatdariya Keyqubad û avabûna dewleta Madê, bi desthilatdariya

⁷ Di teksta Farisî de “rawî” hatiye nivîsandin.

Sumer, Akad, Kilde, Asûr, Elamê û piştî vana jî bi Pişdadiyan re çêbûye. Kurdên Mad piştî ji rojhilatê ber bi bakurê rojavayê Îranê ve koç kirin û li wan cihan bi cih bûn, ji sedsala 30'ê ya beriya zayînê heta der û dora sedsala 21'ê ya pêş zayînê, bi awayê deste deste jiyana xwe domandin. Her desteyek xwediyê serekê xwe yê taybet bûye û bi giştî di şert û mercên nateba û paşvemayî de bûne. Her hozek li cihêkî niştecih bûye û di bin desthilatdariya fermanrewayekî de jiyana xwe domandiyê.

Dema ku malbata Pişdadî li Madê û Parsê desthilata xwe pêk anî, peywendiyên Madên Kurd bi malbata wan re hebû û di bin desthilatdariya fermanrewayên wan de jiyana xwe didomandin. Lê di sedsala 9'ê ya beriya zayînê de, dema ku dawîn paşayê malbata Pişdarî, Girşaspê kurê Ūştabê kurê Tehmasbê kurê Menûçehrê kurê Îrecê kurê Ferîdûnê kurê Epteyanê kurê Cemşîd koça dawiyê kir, êriş û pêlên paşayên Asûrî li ser Madê û Parsê dest pê kirin. Desteyên Kurdên Mad li hemberî dewleta destdirêjker û şidetê ya Asûrî, neçar bûn ji bo parastina welatê xwe, selteneteke serbixwe damezirînin. Ji bo vê mebestê, serek û serdarên Mada Mezin û Mada Biçûk û Kurdên Parsê, Gilê, Dewlemê û Hezerê bi giştî di rûniştekekê de berhev bûn û piştî rawêjkariya dirêj, gihîştin wê netîceyê ku Keyqubadê Kurd ku serekê yek ji wan hozên Madê bû û di warê erd, zanist, dadperwerî û karzaniyê de bêemsal û bi nav û deng bû, bikin fermanrewayê selteneta xwe.

Efrasiyabê paşayê Tûranê ji ber nêzikî û xizmatiya bi Pişdadiyan re, xwe fermanrewa û mîratgirê eslî yê selteneta Mad û Parsê dizanî. Ev jî ji ber wê bû ku di warê eslî de ji bereya Tûrê bû û zincîra eslê Tûraniyan jî digihê Pişdadiyan. Ji ber vê sebebê, Efrasiyab paşatiya Keyqubad qebûl nekir û dest bi dijîtiyê kir. Di netîceyê de, şer di navbera Tûran, Mad û Parsê de dest pê kir. Keyqubad karîbû hêzên Efrasiyab bişikîne û welatê Tûranê dagir bike. Selteneta Tûranê ji navçeyên: Suxdistan, Kabilistan, Zabilistan, Tûran û Mekranê pêk hatibû. Keyqubad piştî dagirkirin û serkeftinê, hozên Kurd li wan navçeyan

bi cih kir. Di vê navê re, di Zabilistanê de Kurdên Zengane, di Tûranê de Kurdên Biraxoyî, di Mekranê de ji Kurdên Ed-reganê Mamilî û Kirmanî, bi mebesta parêzgarî û çavdêriya sînorên rojhilatê selteneta Madê bikin û di dema pêwîst, şoriş û serhildanên cihanî de bibin rêgir û mertal rê li dijmin bigrin, bi cih kirin. Ev hoz, di vê navçeyê de heta bi hetayê bi cih bûn û mijûlî parêzgeriya sînorên selteneta Madê bûn.

Behsa Xwendegehên Îslamê

Di serdema kevn de, Zerenc paytexta Zabilistanê bû û niştecihên Zabilistanê piştî hatina Îslamê, dîne pîroz ê Îslamê hilibjartin. Di serdema xelifetiya Hz. Omer de, Zerenc bi destê 'Asimê kurê 'Omer ku ji aliyê Hz. Omer ve ji bo dagirkirina Secistanê hatibû tayînkirin, hat dagirkirin. Di vê girêdanê de, Mîr Ewram serdarê hoza Kurdên Zengeniyan ku piştî 49'emîn bapîrê mezin ê bingeha nivîskarê vê kitêbê ye, piştî dîne Îslamê qebûl kir, dest bi propaganda û belavkirina dîne Îslamê kir.

Di serdema desthilatdariya Mîr Mehmûd Xaziyê kurê Sebuktegîn, mîrê Xezneyê di sala 399'ê koçî de/1008-9'ê z. de, welatê xwe firehtir kir û Zabilistan kir bin rikêfa desthilatdariya xwe. Wê wextê, serekê Kurdên Zengene Mîr Sirac ku bi piştê 33'yemîn bapîrê min e, li Zerencê bi mebesta xelkê bi rêbaza Îslamê agahdar bike û wan ji diyardeya bêdîniyê biparêze, ku di serdema desthilata Ebasiyan de li hemû cihî serî hildabû, bingeha xwendegeheke Îslamî danî. Xwendegeh di bin rêveberiya sereke Kurdên Zengeneyê de di belavkirina rêbaza Îslamê de, nav û dengêkî zêde peyda kir û xwendekarên derçûyî piştî temamkirina zanista Îslamê, tişk û perwerdeya Îslamê li hemû der û doran belav kirin. Zîncîra dersgotina hînkirina xwendekaran heta dema Mîr Teymûrê Gurganî berdewam bû, ku di sala 785'ê k./1383'yê z. de ji nişka ve ji Maweraunehrê êrişî ser Zabilistanê kir ku bi rewşa serdemê re bi navê Sîstanê hat nasîn.

Li Zerenca paytexta Sîstanê di navbera Mîr Teymûr û desthilatdarên Zabilistanê Mîr Qutbedîn de şerekî giran rû da. Mîr Teymûr Zerenc dorpêç kir û piştî şerekî giran sîstanî şikestin û der û dora wî dest bi qetlîama xelkê bajêr kir, bapîre min ê mezin Mîr Qeyser Zengene jî di vî şerî de hat kuştin.

Avahiya xwendegehê ku di nav bajêr de bû talan û wêran kirin. Piraniya beşa kitêbxaneyê jî zerar dît û zincîra dersgotin û perwerdeyê dawî lê hat. Piştî nemana şer, kuştin û kuştari, Mîr Xelefê kurê Mîr Qeyser bi pismam û kes û nasên xwe re çû bajarê Zabilê û bi temamî li wir bi cih bû. Li vir jî xwendegeheke biçûk vekir û daxilî dersgotina Îslamî bû. Hinek kitêbên dînî û belgnameyên dîrokî ku ji dizî, talan û şewata serbazên Teymûr mabûn, bi xwe re anîbûn.

Zincîra dersgotinê û perwerdeya di vê xwendegehê de heta serdema desthilatdariya malbata Sefewiyan dewam kir û piştîre dawî lê hat. Ev jî ji ber navçeya Qendeharê bû ku timî çavkaniya şer, qirên û tevliheviya di navbera selteneta Îranê û welatê Moxolên Hindistanê de bû.

Di sala 1050'yê k./1640'ê z. de, di navbera Şah Ebasê Du-yem ê Sefewî yê fermanrewayê Îranê û Şah Cîhanê paşayê Moxoliyên Hindistanê de şer û problemên durr û dirêj rû dan û di netîceyê de Şah Ebas bi ser ket û Şah Cîhan nikaribû navçeya Qendeharê careke din têke bin desthilata xwe. Bi vî awayî, herêma Qendeharê duçarî tevliheviyê bû û aştî û ewlekariya bajêr û bajarokên derûdorê jî ket nav tirsê. Ev bi giştî bûn sebebê jihevdu ketina zincîra dersgotinê û perwerdeya xwendegehên Zabilê.

Piştî sekna dersan û xwendinê di xwendegehên Zabilê de, ew firset ji min re li hev hat ku qelema cewherdar bixim ger û destana kevn û dîroka dêrînî ya Kurdên Beluçiyên Zabilê, Tûran û Mekranê, ku di çavkaniyên dîrokî de hatibûn qeydkirin û bi sûdwergirtina ji wan çend çavkaniyên ku ji êriş û tevliheviyên Teymûrê Gurganî ji navçûnê rizgar bûbûn, careke din

bi awayê nivîskî derbixim. Vê jî ji bo ez bikaribim evîndarî û dilgiriya xwe li hemberî serek û mîrên Kurdên Beluçî nişan bidim û wekî stêrkên gerdûnê ronahiya her timî bi kirin û çakakeriya xwe bi serbaz û navdarên Kurdên Beluçiyên Zabilê, Tûranê û Mekranê bidim nasîn, min kir. Ji bo ku exlaqê wan ê şayanê pesnê, xizmeta wan a rojane ya mezin û kirinên wan di xaneyê feremoşkirinê de nemîne. Ji bo vê mebestê jî, li gor şiyane ez ewqas jê agahdar bûme û min zaniye, di tarîxa 11^ê rebûlsaniya sala 1070^{yê} [26^ê kanûna paşîn-december 1659^ê z.] de, min nivîsandin temam kir. Min navê vê kitêbê jî danî “Kurdgalnamek”, ji bo ku naveroka kitêbê ji destpêkê heta dawiyê behsa dîroka wê desteya Kurdên Madê dike ku nêzikî 850 sal beriya zayîne, piştî avabûna desthilata Madê, hatine vevavçeyê û tê de bi cih bûne. Ev desteya Kurdên Madê ji tîreyên Zengene, Biraxoyî, Mamilî, Edreganî û Kirmanî pêk hatibûn û cara yekê bi alîkariya paşayê Madê Keyqubadê kurê Mad hatine navçeya Zerengê (Zerenc), Tûranê û Mekranê.

Behsa Kurdên Zengene

Kurdên Zengene ji beşa wan Kurdan in ku wek Kurdên Rojhilatê tên nasîn û bi vevav û dengê wan derketiye. Kurdên rojhilatê jî ew desteya Kurdan in ku ji rojhilatê hatine Madê û ji vir ber bi başûr û rojavayê koç kirine û li navçeya vevavdemê ku bi navê Kurdistanê tê nasîn bi cih bûne. Li gor dîroka kevn, desteya rojhilatî ku bi navê Madê tê nasîn ji heft tîran pêk hatine: Partasî, Bûz, Estrûşat, Arîzant, Bûdî, Maj û Dîlmanê. Tîreya Bûdî bi rewşa serdemê re bi ser du tîreyan, Zengene û Biraxoyî ve parve bû ku ew jî ji Zengan û Biraximê kurên Bûd çavkaniya xwe girtine û ji bo wê neviyên wan bi navê Zengene û Biraxoyî nav û deng dane.

Eslê Zengene bi vevawayî dest pê dike: Hz. Nûh, silav lê bin, Bafsî, Kumer, Turk, Xezer, Kardak, Buxaz, Mîtan, Arîn, Gîwer, Rûdîn, Sûr, Dexû, Bulgar, Pişder, Têrxan, Şûd, Xuran,

Mada Mezin, Çerkeş, Rasin, Zengan, Dirac, Hekar, [Xoşnaw, Zaran, Sasan, Sencar, Şikak, Şûhan], Gurek, Wan, Mîran, Sûpar, Pazû, Kad, Gawr, Mengur, Tagaz, Cîg, Mada Biçûk.

Heft kurên Mada Biçûk hebûne û navê wan ev bûne: Partasin, Estrûşan, Arîzanit, Bûz, Maj, Bûd û Dîlman. Du kurên Bûd hebûne: Zengan û Biraxmî. Bingeha Zengan ku piştê bi navê Tîra Zengene hatin nasîn, bi vî awayî ye: Mada Biçûk, Bûd, Zengan, Tûr, Xidîr, Şeban, Kulk, Seldûz, Dîlfan, Arîn, Başman, Rasin, Gil, Kusad, Pazû, Zînil/Zeynil, Şûhan, Zaxu, Rişwan, Ramîn, Sewîd, Nedran, Sabûl, Hurmuz, Bacel, Xanî, Dîze, Zirkan, Şiwank, Kazan, Firkî, Merzek, Bakîl, Padak, Birsan, Feyrûz, Îspîbûd, Kuring, Bûrgan, Mihran, Nûcehan, Siyamek, Bîdar/Bêydar, Ferhad, Siyawîş, Wendan, Nûzer, Şahmîr, Bîsûd/Beysûd, Mihran, Bedlîs, Merdan, Riwanşêr, Îzbûk, Behram, Şêrburz, Bûrak, Mihran, Rostem, Tîrdad, Guderz, Resan, Kubad, Girşasp, Selem, Seran, Şagan, Beyker, Tîrdad, Ewram, Sewîd, Xelef, Bekir, Se'îd, 'Îsa, 'Ubeyd, Tûran, Aban, Ehmed, Başar, Hekem, Mihran, Mu'in, Cabir, Birsan, Sîrac, Haris, Senan, Ehmed, Pûlbêg, Eybeg, Behmen, Melik, Şahbêg, Behadur, Sencer, 'Îsa, Ye'qûb, 'Umran, 'Osman, Qeyser, Xelef, Hebîb, Leys, Mistefa, Ehmed, Mubarek, Mûsa, Meh-mûd, Dawîd, Silêman, Salih.

Dema ku Keyqubad fermanrewayê Madê û Farsê bû, mîrnişîna Zabilistanê da kurên Zengeniyan, Mîr Sewîd ser-ekê tîreya Zengene yê bû û malbata wî heta serdema Îskender Paşayê welatê Makedonyaya Yûnanê li Zabilistanê fermanrewatî kirine. Piştî Mîr Sewîd, kurê Nedran, kurê Sabûl, kurê Hurmuz, kurê Bacil, kurê Xanî, kurê Dîze, kurê Padga û kurê Birsan yek li pey yekê li ser textê Zabilistanê fermanrewatî kirine. Di dirêjahiya dîrokê û serdema van serokên Kurdên Zengene ya serdema êriş û pêlên Mîr Teymûr Gurganî de, di sala 785'ê k./1383'yê z. de ji nav çûne. Ji ber wê ye di vî warî de tu çavkanî û nivîsek li ber destê me tune ku em bikaribin di vî warî de bi dirêjî behsa rewşê bikin. Helbet em vî qasî diza-

nin ku di serdema dagirkirina Farsê de, Îskenderê Makedonî dema ku li cihê Dara digeriya û berê xwe da wilayetên rojavayê, Mîr Birsan mîrê welatê Zabilistanê bû û ji bilî teslîmbûna bi desthilata Îskender re tu çareyeke wî ya din nema. Îskender jî ew bi diyariyên hêja û bi qîmet xelat kir û li ser fermanrewatiya Zabilistanê hişt û ew wek hevkarê xwe hesêb kir. Dîroknivîsên Yûnanî navçeya Zabilistanê bi navê “Zerengîna” ku ji “Zereng” hatiye wergirtin, dane nasîn.

Îskender di sala 323’yê beriya zayînê de hat Babilê û her li wir jî koça dawiyê kir. Piştî mirina wî, di navbera serleşkerên wî de asteng, dijîtî û şerên giran li ser cihnişîniya wî berpa bû û di netîceyê de selteneta fireh û mezin di navbera xwe de parve kirin. Beşa rojhilatê seltenetê ku ji Madê û Parsê pêk hatibû, dan destê serleşker Silukus. Silukus û malbata wî, Mîr Birsan û neviyên wî li ser Mîrnişîna Zabilistanê hiştin. Ji ber wê piştî Mîr Birsan, kurê wî Feyrûz, kurê Îspîbûd, kurê Kureng û kurê Bûrgan Begê li pişt hev li ser textê Zabilistanê fermanrewatî kirin û ji ber kirinên xwe yê dadperweriyê nav û deng dan.

Piştî Mîr Eşkê desthilatdarê Belxê, ku Yûnaniyan jê re “Baxtirya” (Bactria) gotine, di sala 245ê beriya zayînê de, bingeha fermanrewatiya xwe damezirand û malbata wî bi navê “Eşkani” nav û deng da. Biraziyê Mîr Eşk, Tîrdadê Yekem paşvemayê navçeyên selteneta Madê û Parsê girtin û kirin bin rikêfa desthilata xwe. Bi vî awayî Zabilistan jî ket bin desthilata Eşkaniyan û dawî bi fermanrewaya Kurdên Zengene li Zabilistanê hat. Sebebê vê jî ew bû ku di serdema fermanrewatiya paşayê Eşkani Mihirdadê Yekem de, hinek ji mîrên Alayî serhildan bilind kiribûn û dijîtî dikirin. Piştî şikestina van şorişan, rewşa fermanrewayê îtaetkar û bindestan di gumanê de bû û Mihirdadê Yekem fermanrewayên welatên dûr û desthilatdarên xwemalî ji ser kar hildan û di cihê wan de şehzadeyên Eşkani bi cih kirin. Ji ber vê yekê, fermanrewatiya Bûrganê Kurdên Zengeneyê jî li Zabilistanê dawî lê hat û şehzadekî Eşkani, Sinarbar hat ser textê wilayetê û zincîra

fermanrewatiya wî û bereya wî li Zabilistanê dest pê kir. Bi vî awayî, piştî koça dawiyê ya Sinarbar, kurê wî Gundus hat ser textê mîrnişînê. Piştî koça wî ya dawiyê jî, kurê Gûda desthilata mîrnişînê girt destê xwe. Bi vî awayî, piştî Gûda jî Erşem, Hoşeng, Sinarbarê Duyem û Gorşabê Yekem li pişt hev heta dema hatina Tirkên Koşanî li ser textê Mîrnişîna Zabilistanê fermanrewatî kirin.

Behsa Kurdên Biraxoyî

Kurdên Biraxoyî yek ji wan tîreyên mezin ên Kurd e ku di seranserê dinyayê de bi awayê şer û welatgirtinê yê wekî tîreyên din ên Kurd bi nav û deng in û heta qelesa Bonî ‘Enber jî di nivîsandin û pesnê karakterê çakiya wan de ji zîziya xwe daketiye. Kurdên Biraxoyî di der û dora sala 850’yê beriya zayînê de, piştî avabûna selteneta Kurdên Mad û Persê ku piştê bi navê selteneta Mad û Parsê nav û dengê wan derket, cara yekê bi piştevaniya Keyqubad paşayê Madî Kurdên Payanê aniye ser erdê Beluçistanê û desthilatdariya wan erdan kiriye bin rêveberiya xwe. Piştî bicihbûna wan li wan navçeyan, ji aliyê wan xelkên ku beriya hatina wan li wan navçeyan niştecîh bûn, bi navê “Kurdgal”ê hatin nasîn, ev jî tê maneya “yên bi Kurdî diaxivin”. Her ji ber wê di destpêkê de ev tîreya Kurd bi navê “Kurdgal” nav da.

Bingeha Kurdên Biraxoyî Bi Vî Awayê Xwarê ye

Vegoterên dîni neqil dikin ku piştî tofana Nûh (silav lê bin), sê kurên wî: Ham, Sam û Yafes ji tofanê rizgar bûn û hemû însanên dinê neviyên van her sê kurên peyamber Nûh (silav lê bin) tên zanîn. Dibêjin nesla van sê kuran di dawiyê de ewqas zêde bû ku ji bo debara/îdareya jiyana xwe belavê hemû cih û goşeyên cîhanê bûn. Yekem car berê xwe dan navçeyên bakurê rojhilatê Girdayê Zewî û li wir bi cih bûn û piştê hinekan jê ber bi xwarê ve koç kirin û li navçeyaya xwe ya niha

nişîngeha xwe damezirandin. Heşt kurên Hz. Yafes hebûn û navê yekî ji wan Kumer bû. Zincîra bîngeha Kurdan ji Kumer bi vî awayî dest pê dike:

Yafes, Kumer, Xezer, Kardak, Buwaz, Mîtan, Arîn, Gîwer, Rûdîn, Sûr, Dexû, Bulgar, Pişder, Têrxan, Şûd, Xuran, Mada Mezin, Çerkeş, Rasin, Zengan, Dirac, Hekar, Xoşnaw, Zaran, Sasun, Sencar, Şikak, Şûhan, Gurek, Wan, Mîran, Sûbar, Pazû, Kad, Gawr, Mengur, Tagaz, Çîg û Mada Biçûk.

Heft kurên Mada Biçûk hebûne: Partasin, Estrûşat, Arîzant, Bûz, Maj, Bûd û Dîlman. Ji van heft kurên Mada Biçûk, heft tîreyên Kurd çêbûn û her yek bi navê bapîrên xwe yê mezin hatin naskirin. Ev tîreyên Kurd bi navê “Kurdên Rojhilat”ê tên nasîn. Ji ber wê ew ji aliyê rojhilatê ve hatine [Mad] û Farsê.

Kurdên Biraxoyî ji neviyên Bûd in û bîngeha wan piştî Bûd bi vî awayî ye: Bûd, Biraxmê Mezin, Cagîn, Pûran, Xutan, Dusek, Arûk û Zûrak. Biraxmê Biçûk bapîrê mezin ê heşt tîreyên Biraxoyî ye. Di zimanê Kurdî de “Birahîm” wek “Biraxim” tê telafuzkirin, ji ber wê neviyên Biraxim wek “Biraxoyî” hatin naskirin. Heşt kurên Biraximê Biçûk hebûn û navê wan ev bûn: Kîkan, Goran, Sarûn, Xuz, Mişkan, Ermîl, Bolan û Girişkan. Bi rewşa serdemê re nijada kurên Biraximê Biçûk ewqas zêde bû ku heşt tîreyên cihê ji Biraxo peyda bûn û her tîre bi navê bapîrê xwe hat nasîn û nav û deng dan. Bi vî awayî neviyên Kîkan wek Kîkanî, neviyên Goran wek Goranî, neviyên Sarûn wek Sarûnî, neviyên Xuz wek Xuzdarî, neviyên Mişkan wek Mişkanî, neviyên Ermîl wek Ermîlî, neviyên Bolan wek Bolanî û neviyên Girişkan wek Girişkanî hatin nasîn.

Kurdên Biraxoyî wek tîreyên din ên Kurd li Madê jiyan xwe derbas dikirin û destpêkê di serdemeke ne diyar de, yanî çend hezar sal beriya zayînê hatine wê navçeya ku ketiye başûrê Madê û wek Kurdistan tê nasîn. Kîkan kurê herî mezin ê Biraximê Biçûk bû, ji ber wê pileya serdarî û serokatiya Kurdên Biraxoyî di destê Kîkan de bû. Koka heşt kurên Biraximê

Biçûk bi vî awayê xwarê bû:

- A- Kîkan, Zûrak, Sengîn, Arîn, Pindran, Daxur, Zîbar, Umran,
Sengîn, Xuman û Kîkan
- B- Goran, Şîdan, Başman, Dilût, Zînil/Zeynil, Tekş, Kaş, Şî-
dan, Kusad, Başman, Goran
- C- Sarûn, Zîdek, Başûk, Kurtî, Lasîn, Mamiş, Dusek, Sarim,
Basîr, Daxur, Zaxu
- D- Xuz, Ewram, Rasin, Duxan, Katên, Gîwer, Xuz, Gurus, Ma-
hek, Rûçap, Mihran
- E- Mişkan, Eyle, Nûkî, Mişk, Eyle, Başar, Mirdas, Gîlek, Tû-
ran, Kuyan, Mişkan
- F- Ermîl, Merzek, Zirwan, Kuyan, Mengur, Sabûl, Merzek,
Zirwan, Kaş, Şawil, Ermîl
- G- Bolan, Zînil/Zeynil, Bûzîk, Kazan, Melîl, Karçî, Şagan, Şû-
han, Kirmac, Bûzîk, Bolan
- H- Girişkan, Berûz, Basîr, Gîj, Bûlak, Berûz, Girişkan, Kireçk,
Maxan, Çirmûk, Lertzîn

DEWLETA MADÊ

Dema ku Girşasp, dawîn paşayê malbata Pişdadiyan dinyaya fanî terk kir, welatê Mad û Parsê duçarî rewşeka tevlihev û bêhêziyê bû. Ev rewş bû sebebê sergêjî û tirsê serekê hozên Mad û Parsê. Di netîceyê de, hemû serek, serdar û rihspî di civînekê de berhev bûn û piştî rawêjkariya di navbera xwe de bi giştî biryar dan ku Keyqubadê kurê Mad ku serekê giştî yê hozên Madê bû, di cihê Girşasp de li ser textê fermanrewatiyê bidin rûniştandin.

Bi vî awayî, Keyqubad di sala 853'yê beriya zayînê de, hat ser textê Mad û Parsê. Wê wextê Kurdên Biraxoyî tîreke bi hêz û aza ya Kurd dihatin hesêbkirin, Mîr Kîkan wekî serekê tîreyên Kurd, serekê mezin ê hozê, yanî Kurdên Biraxoyî bû û bi van heft serekên din ên tîreyên Kurdên Biraxoyî re hemû wextan ji bo hevkarîya Keyqubad paşayê Madê amade bûn û di kar û barên seltenetê de yarmetî didanê û alîkariya wî dikirin: Mîr Goran Goranî, Mîr Zaxu Sarûnî, Mîr Mihran Xuzadî, Mîr Mişkan Mişkanî, Mîr Ermîl Ermîlî, Mîr Bolan Bolanî û Mîr Lerzîn Girişkanî,

Şerê Di Navbera Mad û Tûranê De

Efrasyabê paşayê Tûranê di warê mîratê de xwe mîratgirê rewa yê selteneta Pişdadiyan ku ji Mad û Parsê pêk hatibû dizanibû û zêde pê zor bû ku Keyqubadê Kurd ê Madî ji bo fermanrewatiya Mad û Parsê hatiye hilibijartin. Her ji ber vê, alaya dijîtîkirinê bilind kir, di netîceyê de şerê Tûranê bi Madê re dest pê kir. Keyqubad jî dema ku desthilata fermanrewatiyê

girt destê xwe, beriya hemû tiştî ji bo jinavbirina Efrasyab ket rê û di şerekî de karîbû wî bişikîne û Efrasyab daxwaza aştiyê bike. Piştî aştiyê, Keyqubad bi eskerên xwe re ji Belxa paytexta selteneta Tûranê vegeheriya Madê.

Di vî şerî de, hemû tîre û hozên Kurd yarmetî û hevaltiya Keyqubad kirin. Dema ku Keyqubad vegeheriya Zerengê, ferman da serekên Kurdên Biraxoyî da ku êrişî ser welatê Tûranê bikin. Serekên Kurd ên Edreganî, Mamilî û Kirmanî êrişî ser welatê Mekranê kirin û bi zebra şûran ew girtin. Ev herdu wilayet ji wilayetên welatê Tûranê bûn.

Piştî ew serokên me behsa wan kir ew wilayet girtin, bi ser ketin û dilşadî bi dest xistin û Keyqubad Mîrnişîna Tûranê da mîrê Kîkan Biraxoyî û Mîrnişîna Mekranê da Mîr Eyle Edreganî. Kurdên Biraxoyî û Edreganî heta hilweşîna seltenetê desteya Madê li van wilayetên fermanrewatî dikirin.

Desteya Kurdên Madan heta şeş piştan li ser textê selteneta Madê û Parsê fermanrewatî kirin, ku navê wan bi vî awayî ye: Keyqubad, Keykawus, Tûs ku bi navê “Keyxusrew-Keyxero” jî tê nasîn, Ferîbûrz, Keyaksar û Azdiyak.

Serekên Hevçerx ên Tîreyên Kurdên Biraxoyî û Paşayên Madê

Keyqubad yekem paşayê malbata Madê bû û di serdema destpêkê ya fermanrewatiya xwe de, ev serekên tîreyên Kurd ên Biraxoyî hevçerxê wî bûn: Mîr Kîkan Kîkanî, Mîr Goran Goranî, Mîr Zaxu Sarûnî, Mîr Mihran Xuzdarî, Mîr Mişkan Mişkanî, Mîr Ermil Ermilî, Mîr Bolan Bolanî û Mîr Lertzîn Girişkanî.

Li gor wê ku temenê Keyqubad dirêj bûye, serdema fermanrewatiya wî jî ji mideteke dûr û dirêj pêk hatiye. Ji ber wê di dawîna serdema fermanrewatiya wî de ev mîrên ji tîreyên Biraxoyî hevçerxê wî bûn: Mîr Zûrak Kîkanî, Mîr Kireck Goranî, Mîr Seldûz Sarûnî, Mîr Keytûn Xuzdarî, Mîr Mirdas Mişkanî,

Mîr Mişkan Ermîlî, Mîr Bachel Bolanî û Mîr Tadi Girişkanî.

Piştî Keyqubad koça dawiyê kir, kurê wî Keykawus derket ser textê seltenetê û ev serekên tîreyên Kurd ên Biraxoyî hevçerxên wî bûn: Mîr Ūştab Kîkanî, Mîr Şadîn Goranî, Mîr Şagîn Sarûnî, Mîr Kaşîk Xuzdarî, Mîr Kirec Mişkanî, Mîr Xuman Ermîlî, Mîr Pûran Bolanî û Mîr Zîdan/Zeydan Girişkanî. Keykawus bi ocaxkorî koça dawiyê kir, ji ber wê hozên Kurdên Madê Tûsiyê kurê Ferîbûrz ji bo serekatiya giştî ya Madê hilibjartin. Ev serekên Kurdên Biraxoyî hevçerxên wî bûn: Mîr Zikrîn Kîkanî, Mîr Kaş Goranî, Mîr Sabûl Sarûnî, Mîr Kîçan Xuzdarî, Mîr Gilbag Mişkanî, Mîr Kileck Ermîlî, Mîr Xuman Bolanî û Mîr Birûş Girişkanî.

Piştî Tûs dinyaya fanî terk kir, kurê wî Ferîbûrz derket ser textê seltenetê. Ev serekên tîreyên Biraxoyî hevçerxê wî bûn: Mîr Zîbar Kîkanî, Mîr Ramîn Goranî, Mîr Sûrçîn Sarûnî, Mîr Manûr Xuzdarî, Mîr Tûrab Mişkanî, Mîr Kirmac Ermîlî, Mîr Keytûn Bolanî û Mîr Pazû Girişkanî. Ferîbûrz di şerê Aşûriyan de hat kuştin. Piştî serekên Kurd Keyaksar anîn ser textê fermanrewatiyê ku ew pêncemîn paşayê malbata Kurdên Madê bû li ser textê fermanrewatiya Mad û Parsê paşatiyê bike. Ev serekên tîreyên Kurd ên Biraxoyî hevçerxê wî bûn: Mîr Biraxim Kîkanî, Mîr Buxaz Goranî, Mîr Manî Sarûnî, Mîr Gawr Xuzdarî, Mîr Manûr Mişkanî, Mîr Guren Ermîlî, Mîr Tirman Bolanî û Mîr Tapîn Girişkanî.

Piştî Keyaksar ji koça dawiyê kir, kurê wî Azdiyak hat ser textê selteneta Madê ku dawîn paşayê malbata Kurdên Madê bû û ji ber kêrnehatinê text ji destê xwe kir. Ev serekên tîreyên Kurd ên Biraxoyî hevçerxê wî bûn: Mîr Goran Kîkanî, Mîr Rasin Goranî, Mîr Şûhan Sarûnî, Mîr Mihran Xuzdarî, Mîr Beyker Mişkanî, Mîr Kusad Ermîlî, Mîr Hekar Bolanî û Mîr Xîzan Girişkanî.

Têkçûna Fermanrewatiya Malbata Kurdên Madê

Malbata Madê ya ji Mad û Parsê nêzikî 300 salan fermanrewatî kirin. Keyqubad bingeha seltenetê damezirand û Keykawus, Tûs, Feribûrz û Keyaksar pile, paye û mezintiya welatê xwe gihandin kopa serî. Lê Azdiyak bû sebebê têkçûna desthilata malbatê. Ev jî ji ber wê bû ku ew kesekî kêrnehatî û bêhêz bû û nikaribû kar û barên seltenetê bimeşîne. Bi vê re stemkarî û ezîyetkirina xelkê beşek ji idareya xwe dizanibû. Xelk ji destê wî dinaliya û hez jê nedikirin. Bi dîtina vê, mîr û serdarên Mad û Parsê bi hev şewirîn û biryar dan ku Azdiyak ji ser kar rakin. Ji bo ku kurên Azdiyak tune bûn, hewceyî Kurişê Hexamenî yê neviyê keçê yê Azdiyak bûn.

Bi vî awayî, dewleta Madê ku ji ber sebebê gavavêtin û kirinên Keyaksar gihîştibû wê seviya bilind a pesnê û şikurmendiyê, Azdiyakê cihnişînê wî şîyanê van hemû mal û darayiyê biselimîne, bû stemkar û hêdî hêdî ji radeyê derket. Dilê serrekên leşker jî jê sar bû. Di netîceyê de, ji bo ku kurên Azdiyak tune bûn, Kurişê Hexamenî anîn ser textê Madê.

Malbata Hexamenşîyan

Hexamenş yekem paşayê zincîra paşatiya malbata Hexamenşîyan bû û ji ber navê wî malbat bi navê Hexamenş hatiya naskirin. Di destpêkê de ev malbat li Parsê paşatî dikir û bacdarê dewleta Madê bûn. Di serdema paşatiya Azdiyak de, Kembûcê Hexamenş fermanrewayê Parsê bû ku Azdiyak ew kir zavayê xwe û di vê navê re kurekî wî çavê xwe li dinyayê vekir ku navê Kuriş(Kîros) lê kirin.

Wê wextê, wezirê Azdiyak, Erpak, dît ku kar û barên welat ber bi têkçûnê ve diçe û ji Azdiyak hêvî û lava kir ku kar û barên seltenetê bine ser rewşa normal. Lê ew ne mirovekî tégihîştî bû, hemû wextî bi kêf û qeşmeriyan mijûl bû û hişê wî nedigihîşt kar û barên welat. Dilê Erpak jî jê reş bûbû û xwe nêzikî kesên dijî Azdiyak kir. Di netîceyê de serek, mîr û

mezinên Kurdên Mad û Parsê di rûniştineke taybetî de bi îm-zayên xwe nameyeke nehênî ji Kurişê kurê Kembûc û neviyê Azdiyak re nivîsandin û tê de bangî fermanrewayên Mad û Parsê kirin. Di nameyê de ji wan re ragihandin ku bi leşkerêkî biçûk ve xwe bigihîne nêzikî Ekbatana paytexta Madê ku leşkerê Kurd bigihên wî û piştî wî deynin ser textê paşatiyê.

Dema ku Azdiyak ev xeber seh kir, gelek aciz bû û ew bi leşkerêkî giran ve ber bi paytexta Kuriş ve ket rê. Di navbera herdu aliyên de şerekî giran dest pê kir lê Azdiyak hê di dest-pêka şer de şikest û ew girtin. Bi vî awayî dewleta Madê têk çû û paşatiya Mad û Parsê ji Madan derbasî destê Hexamenşiyân bû û zincîra fermanrewatiya Hexamenş li ser welatê Mad û Parsê dest pê kir.

Şêla Hexamenşiyân Bi Kurdên Madê Re

Piştî Kuriş desthilata selteneta Madê û Parsê girt destê xwe, li gor ku dayîka wî Kurd bû û peywendiyên wî bi Kurdan re hebûn, peywendiyên dostane û birayane bi Kurdên Madê re girêdan. Ji vê jî zêdetir, Kurd wek zend û baskên xwe yên bi hêz hesêb dikir. Pile û payeyên bilind ên şahaneyî da kesên ji malbata paşayên Madê û şahzadeyên Madê di nav artêşa xwe de di seviya serdariya bilind de ragirt. Her wiha, bi keça meta xwe yanî keça Ertîmayê zavayê Azdiyak re zewicî.

Ji bilî vana, Kuriş hemû awa rêxistinên Madê wekî wan hişt, vê jî ji bo wê kir ku hest û bîra biyanî û cihêtiyê di navbera Kurdên Madê û Hexamenşiyân de peyda nebe. Her wiha, rêz û qedir li serek û serdarên Madê girt û pileya piraniyan bilind kir. Di vê navê re fermanrewayên Kurdên Biraxoyî yên Tûranê û Kurdên Edreganiyê yên Mekranê nas kir. Bi vî awayî du-yem serdema fermanrewatiya Kurdên Biraxoyî Edreganiyan li Tûran û Mekranê dest pê kir û heta dema destbiserdegirtina Dara ji aliyê Îskender ve dewam kir.

Serekên Hevçerx ên Tîreyên Kurdên Biraxoyî û Paşayên Hexamenşî

Kuriş bingeha selteneta Hexamenşî li Mad û Farsê danî. Wî ev seltenet di netîceya hevkarîya Kurdên Madê de bi dest xistibû. Ji ber wê rêz û qedrê mîr û serekan girt. Ev serekê tîreyên Kurdên Biraxoyî yên hevçerxê Kurişê Mezin yekem paşayên Hexamenşîyan bûn: Mîr Zirşan Kîkanî, Mîr Nagan Goranî, Mîr Nêrman Sarûnî, Mîr Şîşar Xurdarî, Mîr Gurgîn Mişkanî, Mîr Bahûr Ermîlî, Mîr Buxa Bolanî û Mîr Semban Girişkanî.

Piştî koça dawiyê ya Kuriş, kurê wî, Kembûcî derket ser text û di serdema fermanrewatiya wî de ev serekên tîreyên Kurdên Biraxoyî hevçerxên wî bûn: Mîr Zirşan Kîkanî, Mîr Nakan Goranî, Mîr Nêrman Sarûnî, Mîr Şîşar Xurdarî, Mîr Gurgîn Mişkanî, Mîr Bahûr Ermîlî, Mîr Buxa Bolanî û Mîr Semban Girişkanî.

Piştî mirina Kembûcî, Dara bû paşa û ev mîrên tîreyên Kurdê Biraxoyî hevçerxê wî bûn: Mîr Zurat Kîkanî, Mîr Dûc Goranî, Mîr Hînar Sarûnî, Mîr Kaşk Xuzdarî, Mîr Bûlûr Mişkanî, Mîr Amaç Ermîlî, Mîr Dernil Bolanî û Mîr Zîdek Girişkanî. Piştî mirina wî, kurê wî Xişayarşa bû cihnişînê wî û ev mîrên tîreyên Kurdên Biraxoyî hevçerxên wî bûn: Mîr Ercan Kîkanî, Mîr Çirmûk Goranî, Mîr Kabû Sarûnî, Mîr Deylem Xuzdarî, Mîr Tûtîk Mişkanî, Mîr Kembil Ermîlî, Mîr Xîzan Bolanî û Mîr Pîlar Girişkanî.

Piştî kuştina wî, Xişayarşayê kurê Erdeşêrê Yekem hat ser textê fermanrewayê û ev serekên tîreyên Kurdên Biraxoyî hevçerxên wî bûn: Mîr Şamûz Kîkanî, Mîr Kazan Goranî, Mîr Mirdas Sarûnî, Mîr Xerzan Xuzdarî, Mîr Duxan Mişkanî, Mîr Basîr Ermîlî, Mîr Mişkan Bolanî û Mîr Maxan Girişkanî. Piştî ku Erdeşêrê Yekem dinyaya fanî terk kir, kurê wî Xişayarşayê Duyem hat ser textê fermanrewayê û ji bo ku birayê wî ew kuşt, tenê bi qasî 45 rojan paşatî kir. Bi vî awayî li cihê wî Darayê Duyem ê birayê wî hat ser text. Ev serekên tîreyên Kurdên

Biraxoyî hevçerxên wan herdu paşayên Hexamenşî bûn: Mîr Biraxim Kîkanî, Mîr Zeyrel Goranî, Mîr Rîgan Sarûnî, Mîr Kusad Xuzdarî, Mîr Katîn Mişkanî, Mîr Bûlak Ermîlî, Mîr Sîkran Bolanî û Mîr Sarim Girişkanî.

Piştî Darayê Duyem koça dawiyê kir, kurê wî Erdeşêrê Duyem li ser textê Farsê rûnişt û ev mîrên tîreyên Kurdên Biraxoyî hevçerxên wî bûn: Mîr Sabûl Kîkanî, Mîr Goran Goranî, Mîr Keytûn Sarûnî, Mîr Mişkan Xuzdarî, Mîr Zuran Mişkanî, Mîr Ewram Ermîlî, Mîr Sasun Bolanî û Mîr Darûn Girişkanî. Piştî mirina Erdeşêrê Duyem, kurê wî Erdeşêrê Sêyem hat ser text. Ev serekên tîreyên Kurdên Biraxoyî hevçerxên wî bûn: Mîr Nûrgan Kîkanî, Mîr Mihran Goranî, Mîr Başûk Sarûnî, Mîr Bîfil Xuzdarî, Mîr Bûzik Mişkanî, Mîr Ewkî Ermîlî, Mîr Kelxil Bolanî û Mîr Nûxî Girişkanî. Ev mîrên din ên tîreyên Kurdên Biraxoyî di dawîn serdema fermanrewatiya Erdeşêrê Sêyem de hevçerxên wî bûn: Mîr Kîyanûş Kîkanî, Mîr Gîştâr Goranî, Mîr Înax/Eynax Sarûnî, Mîr Zerrîn Ermîlî, Mîr Lakûr Bolanî, Mîr Bilbas Girişkanî, Mîr Kirecil Xuzdarî û Mîr Biraxim Mişkanî.

Bagwas ku kesekî xesandî bû, jehr da Erdeşêrê Sêyem û piştî kuştina wî malbatên Hexemenşîyan kesekî navê wî Kidman ê bi nasnavê “Darayê Sêyem” anîn ser textê fermanrewatiyê. Ev mîrên tîreyên Kurdên Biraxoyî hevçerxên wî bûn: Mîr Kîkan Kîkanî, Mîr Rûjî Goranî, Mîr Cakîn Sarûnî, Mîr Şadîn Xuzdarî, Mîr Rasin Mişkanî, Mîr Nûrgan Ermîlî, Mîr Berûz Bolanî û Mîr Açîk Girişkanî.

Têkçûna Fermanrewatiya Hexamenşîyan

Kurîşê Mezin textnişînê pêşîn ê wan e, malbata wî bi navê Hexamenşîyan nav û deng da. Ev malbata paşayî heta neh piştan fermanrewatî kir û navê paşayên wan bi vî awayî ne: Kurîşê Mezin, Kembûcî, Darayê Yekem, Xişayarşayê Yekem, Erdeşêrê Yekem, Xişayarşayê Duyem, Darayê Duyem, Erdeşêrê Duyem û Erdeşêrê Sêyem.

Paşayên Hexamenşî karîbûn selteneta xwe gelekî fireh bikin û gelekî bi nav û deng bin. Bi Yûnaniyan re her timî di nav şer de bûne. Fîlqusê (Philipos) fermanrewayê welatê Makedonyayê ku yek ji fermanrewayê xwemalî yê welatê Yûnanê bû, hevkar û hevserek bi xwe re hevdeng kir û yekîtî fireh kir û xwest bi Hexamenşîyan re dest bi şer bike. Lê ew di sala 337ê beriya zayînê de di şerekî navxweyî yê Yûnanê de hat kuştin. Piştî kurê wî, Îskender li cihê wî hat ser textê Makedonyayê û bi welatê Parsê re dest bi şer kir û serkeftin û serbilindî bi dest xist.

Darayê Sêyem ê dawîn paşayê malbata Hexamenşîyan, piştî bi destê Îskender hat şikandin, ji bajarekî bazdida bajarekî din û Îskenderê Mezin jî her tim li pey bû. Di netîceyê de Dara mir; hevkarên wî jê bêzar û dilteng bûn û ji bo ku ji destê Îskender rizgar bibe xwe da kuştin. Bi vî awayî Îskender selteneta Farsê kir bin desthilata xwe û dawî li fermanrewatiya malbata Hexamenşîyan hat.

Hatina Îskenderê Makedonî

Îskender piştî koça dawiyê ya Fîlqusê (Fîlîp) bavê wî, hat ser textê wilayeta Makedonyayê ku yek ji wilayetên Yûnanê bû. Di destpêkê de wilayetên der û dora xwe anî bin desthilata xwe û ew ji xwe re kirin hevpeyman û hevdeng. Piştî di sala 334ê beriya zayînê de berê xwe da Farsê û dest bi dagirkirina navçeyên wê kir. Hêzên Darayê paşayê Hexamenşî yek li pey yekê şikandin û gihîşt welatê Hindê.

Piştî hatina nav Hindê, navçeya Pencaba⁸ Hindê dagir kir û xwest ber bi pêş ve biçê û navçeyên din ên Hindê jî dagir

⁸ Navê kevn Pencab e, tê bi maneya erdê pênc deryayan ku navê wan bi vî awayî ye: Deryaya Sindê, Biyas, Sutlec, Cêhlem, Çenab. Ev navçe di serdemaya kevn de bi navên cihê cihê yên wekî vana hatiye nasîn: Sepet Sindhu, Heft Sindhu, Pencined, Penc Abe û dawîn nav jî Pencab. Îngilîzan di sala 1947ê de ev navçe li ser welatê Hindê û Pakistanê parve kirin (Wergêr).

bike. Lê daxwaza wî bi cih nehat, ji ber ku eskerên wî ji ber meşa mideteke dirêj û şerê gav bi gav, aciz û bêzar bûbûn û di çûna pêş de asê bûn. Îskenderê Makedonî jî neçar bû ber bi niştimanê xwe ve vegere. Ji bo vê mebestê bi rêya Tûranê hat Farsê û ji wir jî çû nav Babilê. Li Babilê nexweş ket û di Hereta Lawêtê de dinyaya fanî terk kir û ew selteneta mezin û fireh ku bi xwe anîbû bin desthilata xwe, bê serek bi cih hişt.

Parçebûna Selteneta Îskender

Mirina bê payîn a Îskender û nebûna mîratgirekî textê wî, bû sebebê problemeke dûr û dirêj di navbera leşkerên Îskender de. Ev problem heta demeke dirêj berdewam bû û serleşkeran di navbera xwe de çend şerên giran kirin û di netîceyê de gihîştin wê encamê ku selteneta mezin û fireh a Îskender di navbera xwe de parve bikin.

Beşa rojhilatê seltenetê ku ji navçeyên Mad, Pars, Tûran, Mekran, Zabilistan û Kabilistanê pêk hatibû, ji serleşker Sîlukus re hat dayîn. Serleşker Sîlukus di sala 310ê beriya zayînê de desthilata van welatan girt destê xwe û heta mideteke dirêj li van navçeyan fermanrewatî kir.

BEŞA DUYEM

MÎRNIŞÎNA KURDÊN BIRAXOYÎ LI TÛRANÊ (Dewreya Yekem)

Keyqubad ê serekê Kurdên Madê di nêzikî sala 850'yê beriya zayînê de, dewleta Mad û Parsê damezirand.

Keyqubad ji ber wî welatî bi hêza zend û baskên şûrweşîna Kurdên xwe bi dest xistibû, hozên mêrxas û xwebextkerên Kurd guhest wan naçeyên dûr ku nêzikî sînorên welatên din bûn. Ev ji bo wê mebestê bû ku bi xatircemî parêzgeriya sînorên welatê xwe bikin û ji hemû milan ve bi lezgîni bergiriyê li hatina pêş a dijminên dewletê bikin û destdirêjîya dijmin binkol bikin û selteneta xwe ji van awa ziyanan biparêzên.

Keyqubad tîreyên Madî ber bi hemû milan û welatan ve belav kir. Tîreya Partasnî veguhest navçeya lêwarên Deryaya Hezerê û ew li wir bi cih kirin. Tîreya Bûzê bi fermana wî li navçeya Hemedanê bi cih bû. Tîreya Estrûşatê li navçeya Semerqendê û Xarezme niştêcih bû. Tîreya Arîzantê li Azerbaycanê nişîngeha xwe pêk anî. Tîreya Bûdiyê ku ji du tîreyên Biraxoyî û Zengeneyê pêk hatibû, ber bi aliyê xwarê rojavayê koç kirin û li navçeya Tûran û Mekranê ku bi navçeya Sindanê ve ye bi cih bûn. Sê tîreyên din ên Kurd ku bi navên Edreganî, Mamilî û Kirmanî dihatin nasîn, hatin Mekranê û li wir bi cih bûn.

Keyqubad piştî şikandina Efrasyabê paşayê Tûranê û têkbirina desthilata wî di welatê wî de, piraniya herêmên wî welatî kir bin desthilata xwe û Kurdî di wan cihan de ava kir. Li

ser vê Kurdên Biraxoyî li Tûranê, Kurdên Nedreganî, Mamilî û Kirmanî li Mekranê niştegeha xwe pêk anîn û bi timî bi cih bûn. Tîreya Kurdên Biraxoyî wê wextê ji bereya heşt kurên Biraxmê Biçûk pêk hatibûn: Kîkanî, Goranî, Sarûnî, Xuzdarî, Mişkani, Ermilî, Bolanî û Girişkanî. Kîkan kurê mezin ê Biraxmê Biçûk bû, ji ber wê pileya serek û serdariya tîreya Kurdên Biraxoyî ji malbata Kîkan re hat dayîn. Her wiha dema ku dewleta Madê damezirî, rêveberiya Tûranê jî ji aliyê Keyqubad ve ji wan re hat dayîn, yanî ji Mîr Kîkan Kîkanî re ku wê wextê mîrê mezin ê Kurdên Biraxoyî bû.

1- Mîrêmîran Mîr Kîkan

Dîwana Bulikê

Dema ku Kîkan desthilata Mîrnişîna Tûranê girt destê xwe, ji bo birêvebirina kar û barên dewletê, dîwana desthilatdariyê ya bi navê “Dîwana Bulik”ê damezirand. Di vê dîwanê de, serekên hemû tîreyên Biraxoyî, yanî Kîkanî, Goranî, Sarûzî, Xuzdarî, Mişkani, Ermilî, Bolanî û Girişkanî endam bûn.

Alîkariya Keyqubad Paşa

Piştî Keyqubad hat ser kar, xwest welatê xwe ji sîtem û karên ne rewya yên paşayên Aşûrî rizgar bike. Ji bo vê mebestê, bi Bilazisê paşayê Kildanî re ku ew jî ji destê destdirêjiya Aşûriyan bêzar bûbû, yekgirtin pêk anî û herdu paşa bi niyaza jinavbirina desthilata Aşûriyan û talankirina paytexta Aşûriyan yanî Nînovayê, li hev kirin.

Berîya şer dest pê bike, xeber ji Mîr Kîkanê mîrê Tûranê re hat û leşkerekî ji serbazê Kurdên Biraxoyî ku ji serbazên tîreya Kîkanî û her wiha serbazên tîreyên Edreganî, Mamilî û Kirmanî pêk hatibû, ji bo alîkariya Keyqubad şand. Ev leşker li der û dora bajarê Nînovayê bi leşkerê Aşûrî re ketin himberî hev û sê caran şer hat kirin û her sê caran jî leşkerê Aşûriyan şikest. Keyqubad bi serkeftî û serbilindî vegeriya. Xelkê van

tîreyên Kurdên Biraxoyî venegeriyan Tûran û Mekranê, heta bi Keyqubad re çûn Madê û li wir bi cih bûn.

Çakkirina Keleha Kîkan û Misatinkê

Di dema şerê navbera Tûranî û Madan de, Kelehên Kîkan, Xuzdar, Nixan, Misatink û Gilgalayê hatibûn xerakirin. Mîr Kîkan wêraniya van kelehan ava kir. Ji ber ku nehêniya parastin û bihêziya bergirî di kelehên qahîm de ye. Piştî Mîr Kîkan esker tê de bi cih kirin.

Mîr Kîkan hevçerxê Keyqubadê Paşayê Madê bû, ev mîr û tîreyên din ên Kurdên Biraxoyî jî hevçerxên wî bûn: Mîr Goran Goranî, Mîr Zaxu Sarûnî, Mîr Mihran Xuzdarî, Mîr Mişkan Mişkanî, Mîr Ermîl Ermîlî, Mîr Bolan Bolanî û Mîr Lerzîn Girişkanî.

2- Mîrêmîran Mîr Zûrak

Piştî koça dawiyê ya Mîr Kîkan, kurê mîr Zûrak derket ser textê Mîrnişîna Tûranê. Mîr Zûrak gelek zana û têgihîştî bû û di rêvberiya karê welat de bêemsal bû. Dema ku Mîrnişîna Tûranê ket bin desthilata wî, bi mebesta xizmeta xweşiktirîn a herêma Tûranê, tîreyên Kurdên Biraxoyî ji bo mijûlî ziraetê bibin û bibin sebebê aramiya rûniştîyên welat, li navçeyên awa awa yên Tûranê belav kir.

Parvekirina Herêmên Tûranê

Mîr Zûrak navçeyên jorê yên Tûranê ku bi navê “Bincîr”ê dihatin nasîn da tîreya Kîkan û Goranê, piştî bicihbûna wan, navê navçeyê wek “Kîkanan” hat naskirin. Navçeya naverasta Tûranê ku bi navê “Kuhînar” dihat nasîn da tîreyên Xuzdarî, Sarûnî, Girişkanî û Mişkanî. Piştî bicihbûna wan tîreyan, navê bajêr wek “Xuzdar” hat naskirin. Navçeya xwarê Tûranê ku bi navê “Sinarbîl”ê dihat nasîn da tîreya Ermîlê û bi rewşa serdemê re û ji ber niştecihbûna wan, ev navçe bi navê “Ermabîl”ê hat naskirin. Her wiha Geliyê “Derengan”ê ku ketibû cihên çiyayî

yên Kîkananê da tîreya Bolanê û piştî bicihbûna wan, navê “Derengan” guherî û bû “Bolan”.

Koça Dawiyê ya Keyqubadê Paşayê Mad û Parsê

Di serdema fermanrewatiya Mîr Zûrak de, Keyqubadê paşayê Mad û Parsê, di sala 759^ê beriya zayînê de koça dawiyê kir û pênc kur li pey xwe hiştin ku navê wan ev bûn: Keykawus, Kiyapû, Kiyashîr, Kiyarmîn û Kiyabşîn. Mîr û mezinên welat, kurên mezin yanî Keykawus li ser text dan rûniştandin.

Êrîşên Fermanrewayên Sindanê Li

Ser Tûranê û Şikestina Wan

Fermanrewayê Sindanê, Singhar bi bêhêvî ji Geliyê Derenganê êrîşî ser Kîkanan a navçeya jorê Tûranê kir. Leşkerên Kurdên Biraxoyî di nivê rê de li Geliyê Derenganê rê li dijmin girtin. Piştî şerekî giran, ew şikandin, ji bilî yê bazdan û bi silametî derketin ên din hemû kuştin.

Behsa Rostemê Pehlewan

Vegoter neqil dîkin ku Rostemê Pehlewan hevçerxê Mîr Kîkan û Mîr Zûrak bûye. Zalê bavê wî û Samê bapîrê wî mîrên Zabilistanê bûne. Rostemê Pehlewan di destpêkê de bi Efrasyab Paşayê Tûranê re peywendiyên dostane hebûye û di destpêka selteneta Mad û Parsê de piştevaniya Efrasyab kiriye û li dijî Keyqubad Paşayê Madê şer kiriye. Zalê bavê Rostem di serdema desthilatdariya xwe de bi destê Keyqubad Paşayê Madê hatiye şikandin û xwe avêtiye ba Efrasyab.

Zal bi Rostemê kurê xwe re midetekê li ba Efrasyab dimîne, lê dilmanî dikeve navbera Rostem û Efrasyab û Zal jî berê xwe dide ba Keyqubad. Keyqubad wî dike hevalê xwe û di dawîn şerê navbera Mad û Tûranê de, Zal alîkariya Keyqubad dike û li dijî leşkerê Tûraniyan şer dike. Welatê Tûranê di vî şerî de dişikê û Keyqubad ji Zal razî dibe û mîrnişîna mîrata Zabilistanê dide destan.

Êrîşa Mîrê Sindanê ya Cara Duyem

Singhar Mûmîdanê fermanrewayê Sindanê ji şikestina cara yekê ders wernegirtiye û careke din êrîş aniyê ser erdê Tûranê. Vê carê di Geliyê Calîranê re hatiye nav erdê Tûranê û li Geliyê Calîranê di navbera Kurdên Biraxoyî û leşkerê Cidgariyan de şerekî giran rû dide. Piştî şerekî giran, şer dibe destpîrçkî û Mîr Zûrakê fermanrewayê Sindanê, Mîr Singhar ji hespê davêje xwarê, serê wî jê dike û dike serê rima xwe bilind dike. Dema ku leşkerê dijmin mîrê xwe serbirî dibînin, ji şer sar dibin û bazdidin. Di vî şerî de piraniya leşkerên dijmin hatin kuştin û telef bûn.

Koça Dawiyê ya Mîr Zûrak

Mîr Zûrak hevçerxê Keyqubadê kurê Mad û paşayê Madê bû û çend roj piştî koça dawiyê ya Keyqubad, wî jî dinyaya fanî li pişt xwe hişt. Ev serekên tîreyên Kurdên Biraxoyî hevçerxên Mîr Zûrak Kîkanî û Keyqubad Paşa bûne: Mîr Kireck Goranî, Mîr Seldûz Sarûnî, Mîr Kitûn Xuzdarî, Mîr Mirdas Mişkanî, Mîr Mişkan Ermilî, Mîr Bacel Bolanî û Mîr Tadi Girişkanî.

3- Mîrêmîran Mîr Êştab

Mîr Zûrak piştî 44 sal fermanrewatiyê koça dawiyê kir û kurê wî Mîr Êştab derket ser textê Tûranê. Êştab mirovekî xwediyê exlaq û rabûn û rûnişteke baş bû, dadperwerî kiribû rêbaza xwe û gelek qencî bi xelkê dikir. Bi vî awayî, hemû temenê xwe ji bo xizmeta xelkê derbas kir û midetê 45 salan fermanrewatî kir.

Mîr Êştab hevçerxê Keykawusê fermanrewayê Mad û Persê bû û ev serekên tîreyên Kurdên Biraxoyî yê hevnijad, hevpile, hevdem û hevçerxên wî bûn: Mîr Şadîn Goranî, Mîr Şakîn Sarûnî, Mîr Kaşik Xuzdarî, Mîr Kirecil Mişkanî, Mîr Xuman Ermilî, Mîr Pûran Bolanî û Mîr Zîdan Girişkanî.

4- Mîrêmîran Mîr Zigrîn

Piştî koça dawiyê ya Mîr Êştab, serekên Kurdên Biraxoyî Mîr Zigrînê kurê Mîr Êştab ji bo mîrêmîraniyê hilbijartin. Di serdema fermanrewatiya wî de, Keykawus Paşayê Madê bi ocaxkorî koça dawiyê kir û di nav Kurdan de li ser hilbijartina paşayê Madê cihêtiya bîr û rayê û dijîtî peyda bû û tîreyên Kurd li hev ketin. Ev jî ji ber wê bû ku piştî mirina Keykawus du kesên berbiçav hebûn; Lihraspê zavayê Keykawus û Tûsiyê kurê Ferîbûrz sax bûn û Kurd di nav girê astengekê de bûn ku ji van herduyan kîjan ji bo serekatiya Madê hilbijêrin.

Ji van herdu kesan, Lihrasp her çend neviyê kurê Keyqubad û zavayê Keykawus bû, lê bi tecrûbe, karzan û lêhatî nebû û bi kar û rêveberiya seltenetê serî dernedixist. Ev jî bûbû sebê wê ku di nav civatê de mirovekî qebûlkerî nebe. Dijberî wî, Tûsê kurê Ferîbûrz mirovekî zana, rewşenbîr û siyasetmedar bû û Kurdan ew ji bo serekê seltenetê hilbijartin. Lihrasp di warê mîratê de xwe bi heqîr û pêştir dizanibû û ji fermanrewatiya Tûs re îtaet nekir.

Di netîcê de, Kurdan ev herdu bi awayekî bi hev re hevdeng kirin ku biryar dan fermanrewatiya herêma Baxter û Kabilistanê bidin Lihrasp. Piştî desthilata van herdu herêman spartin Lihrasp, dawî li girêk û astenga navbera Lihrasp û Tûsî hat. Dema ku Lihrasp jî koça dawiyê kir, paşatiya van herêman di warê mîratê de cardin ket bin desthilata Tûsî.

Kurdên Biraxoyî yên Tûran û Edreganê, Mamilî û Kirmaniyên Mekranê di vê girêk û astengê de piştevanî û layengiriyê Tûs Paşa kirin û tu peywendiyên wan bi Lihrasp re tune bûn.

Êrîşa Dadpirsiya Sindan Li Ser Tûranê

Niv sedsal beriya textnişîna Zigrîn, Mîr Singhar Mûmîdan êrîş aniyê ser Tûranê, di şer de şikestineke heyabirî xwariyê û rêya bazdanê daye pêşiya xwe. Matan ku kurê neviyê wî bû, di serdema Mîr Zigrîn de dixwest wê peleya heyabirî ya bapirê

xwe rake û toleya şikandina wî hilde. Ji bo vê mebestê jî, gelek bi nehênî xwe ji şer re amade dikir. Wê wextê, nûçegihanê Kurdên Biraxoyî ku li ser sînorê Tûranê hatibûn bicihkirin, Mîr Zigrîn ji mebesta Matan agahdar kirin.

Mîr Zigrîn bi serekên tîreyên Kurdên Biraxoyî şewirî û serbazên Kurdên li der û dorê li hemû sînorên Tûranê, ku bi sînorê Sindanê ve bûn, belav kir. Mîr Zigrîn ev guhestin û bicihkirin nehênî pêk anî ku nizanibin Kurd bi mebesta şer li der û dora sînoran belav bûne. Serhengên leşker tîravêjen bi tecrûbe li tengiyên ser sînor bi cih kirin û ev plana şer danîn: Dema ku leşkerên Sindan hatin nav erdê Tûranê, dê Kurd bazdin, ji bo ku dijmin bifikire Kurd şikestine û bi xatircemî û bêtirs bên nav welat û dorpêça wan hêsan be.

Di netîceyê de, di demsala germahiya sala 700ê beriya zayînê de, Matan bi artêşekê êrişî ser erdê Tûranê kir û leşkerên Kurd paşve kişyan. Ev fenda Kurdan bi ser ket û serbazên dijmin pê nehisiya û bi pey Kurdan ketin heta ku hatin nav giran. Vêca Kurdên Biraxoyî li wan vegeyriyan, wekî mûrî û mûristanan rijyan ser Cidgalan, li hemû cihî dora wan pêçan, Matan û hemû serbazên wan kuştin. Dema ku kurê Matan, Bengan ku li dora Ermabilê mijûlî şer bû ev xeber seh kir, di esnayê bêhnvedanê de meydana şer terk kir û ber bi Sindanê ve bazda. Her çend Mîr Kileck Ermilî, Mîr Sabûl Sarûnî û Mîr Kîçan Xuzdarî rêya bazdanê dabûn ber xwe, lê di çarenivîsa wan de hêj jiyana mabû û karibûn bi çend fedayiyên xwe re bi birindarî biçin û bi silametî bigihên welatê xwe.

Vî şerê giran bi awayekî tîrsa dilêrî, azayî, cesaret, mêrxasî û camêriya Kurdên Biraxoyî xist dilê fermanrewayên Sindanê ku di serdema xwe ya dawiyê de dev ji adetê şer û qirênên bi Kurdan re berdîn û peywendiyên dostaniyê bi wan re girêbidin. Netîceya vê jî bû sebêbê çûn û hatin û bazirganiya di navbera Kurdan û Cidgalan de.

Koça Dawiyê ya Mîr Zigrîn

Mîr Zigrîn piştî derbaskirina 35 salên şer, mala xwe ji dinyaya fanî bar kir û çû. Mîr Zigrîn bi Tûsî, ku wek Keyxesro jî tê nasîn re hevçerx bûye. Ev serekên han ên tûreyên Biraxoyî hevçerxên wî bûn: Mîr Ka Goranî, Mîr Sabûl Sarûnî, Mîr Kîçan Xuzdarî, Mîr Gilbag Mişkanî, Mîr Kileck Ermîlî, Mîr Xuman Bolanî û Mîr Birûş Girişkanî.

5- Mîrêmîran Mîr Zîbar

Piştî koça dawiyê ya Mîr Zigrîn, kurê wî Mîr Zîbar hate ser textê Mîrnişîna Tûranê. Mîr Zîbar mirovekî zana, zîrek, ziring û kara bû û di hunera şer de şarezahiyeke wî ya tamam hebû. Mîr Zîbar nedixwest bûyerên wan şerên ku di serdemên pêşîn de di navbera Tûran û Sindanê de rû dabûn careke din rû bidin û neteweya Kurdên Tûranê ji bo hemû wextan bi vî awayî ji destdirêjkerî û êrişhênerên biyanî selamet be. Ji bo vê mebestê jî, li ser sînorên rojhilatê Tûranê ku bi sînorên Sindan ve bûn, çeper û senger çêkir û serbazên Kurd tê de bi cih kir ku şev û roj pasevaniya navçeyê dikirin.

Koça Dawiyê ya Tûsê (Keyxusrew- Keyxesro) Paşayê Madê

Di serdema fermanrewatiya Mîr Zîbar de, Tûs Paşayê Mad û Parsê cihana fanî terk kir û Ferîbûrz hat ser textê seltenetê.

Çêkirina Perestgeha Zorak Li Kîkanê

Dema ku Mîr Zîbar Mîrêmîranê Tûranê bû, Ferîbûrz Paşayê Mad û Parsê bû. Ferîbûrz dûrbîn, destvekirî û bi tedbîr bû. Peywendiyêke wî ya bi hêz bi dîn re hebû û navenda dîne Zerdeştî ku heta serdema fermanrewatiya wî li Belxê bû, veguhest Ekbatana paytexta Madê.

Mîr Zîbar bi birlêkirina veguhestina vê perestgeha Zerdeştî, ji bajarê Kîkanê yê paytexta Tûranê, yekem perestgeh

ava kir. Cihê avakirinê jî li ser bilindahiya kopa zincîra çiyayê Zawkê hilibijart ku ketiye pênc fersex xwarê bajarê Kîkanê. Perestgeh jî bi navê “Zorak” da nasîn ku bi Kurdî tê maneya şiyar û bi hêz.

Koça Dawiyê ya Mîr Zîbar

Mîr Zîbar ji bo cejna Newrozê hatibû Xuzdarê û di vê cejnê de di esnayê pêşbirka rimavêtinê de ji hespê ket xwarê û mir. Piştî veşartina Mîr Zîbar destara mîrnişinê li ser Mîr Biraximê kurê wî geriya.

Ev serekên tîreyên Kurdên Biraxoyî hevçerxên Mîr Zîbar bûn: Mîr Ramîn Goranî, Mîr Sûrçîn Sarûnî, Mîr Manûr Xuzdarî, Mîr Tûras Mişkanî, Mîr Kirmac Ermîlî, Mîr Keytûn Bolanî û Mîr Pazû Girişkanî.

6- Mîrêmîran Mîr Biraxim

Piştî mirina bavê xwe Mîr Biraxim hat ser textê Mîrnişina Tûranê. Mîr Biraxim ji Kurdan hez dikir û dixwest hemû karên mîrnişinê di bin çavdêriya wî de bîn meşandin. Ji bo vê mebestê jî, hemû wextan di ger û geştê de bû û li hemû goşê û kenarên herêma Tûranê digeriya. Xeberên tîreyên Kurd dipirsî û daxwaz û pêwîstiyên wan bi cih dikirin. Mirovekî dîndost û yezdanperest bû, ji ber wê propagandaya dîn dikir û hewl dida xelk ji rêya dîn dernekeve.

Avakirina Perestgeha Helwanê Li Xuzdarê

Mîr Biraxim bi mebesta bihêzkirina dînperestiyê, li Xuzdarê li ser kopa çiyayekî ku 10 fersex ji rojhilatê bajêr dûr bû, perestgehek ava kir û navê wê kir “Helwan”. Di Kurdî de helwan tê maneya “hisçûyî û mest”ê. Ji ber vê perestgehê ew zincîra çiyayan jî bi navê Helwanê hatiye nasîn.

Kuşîna Ferîbûrz Paşayê Madê Li Bajarê Aşûrê

Ferîbûrz di sala 625ê beriya zayînê de rêveberiya seltaneta xwe li milekî heta rûbarê Ceyhûnê û li milekî din jî heta Hindê

fireh kir. Piştî wê bi leşkerekî mezin ve ku ji hozên awa awa pêk hatibû, ji bo şerê Aşûriyan ket rê.

Di netîceyê de, leşkerê wî şikest û ew bi xwe jî di şer de hat kuştin. Tirs ket nav Kurdan ku di van şert û mercên ne musaîd de welatê Mad û Parsê bikeve bin desthilata Aşûriyan. Ji ber wê bi lez serekên tîreyên Kurd careke din berhev bûn û kurê Ferîbûrz Keyaksar anîn ser text.

Mafpêdana Beşdariya Kurdên Biraxoyî û Edreganiyan Di Şerê Neteweyî De

Dema ku Tûs hat ser textê Mad û Parsê, maf da Kurdên Biraxoyî yên Tûran û Edreganê û yên Mamilî û Kirmanî yên Mekranê di şerê neteweyî de beşdar nebin. Ev jî ji ber wê bû ku welatê wan ji paytextê gelekî dûr bû û berpîrsê çavdêrikirina sînorên rojhilatê bûn. Eger ew li welatê xwe amade nebûna, tirs peyda dibû ku welatên biyanî destdirêjî û êrîşî ser welatê wan bikin. Ji ber vê maf ji wan re hat dayîn ku ew beşdarî şerên neteweyî nebin.

Paşabûna Keyaksar

Piştî kuştina Ferîbûrz, Keyaksarê kurê wî hat ser textê Mad û Parsê. Keyaksar ew mîrata ku ji bavê wî jê re mabû delaletê wê dikir ku bi wî awayî toleyê ji Aşûriyan werbigire. Ji ber vê, Keyaksar dest bi rêxistina eskerî û leşkerezayî kir.

Tolewgirtina Keyaksar Ji Aşûriyan

Piştî Keyaksar leşkerekî mezin amade kir, bi mebesta wergirtina toleya bavê xwe, êrîşî ser welatê Aşûrî kir. Aşûriyan bi xurtî bergirî kirin lê li gel wê jî Keyaksar ew şikandin û bajarê Nînovayê dorpêç kir. Dema ku Şarakuyê paşayê Aşûrî fam kir hêviya bergiriyê nemaye, agir bi koşka paşatiyê ve danî û xwe û malbata xwe tê de şewitand.

Êrîşa Sîtan Li Ser Erdê Madê

Keyaksar di şerê Aşûriyan de li navçeya “Navbera Deryayan” (Beynul-Nehrîn) mijûlî şer bû û xeber gihîştê ku

Sîtan êrîşî ser erdê Madê kiriye û piştî derbasbûna ji çiyayên Qefqasê, gihîştine navçeyên bakurê Madê û şer û qirêneke nebirî berpa kirine. Keyaksar ji neçarî dev ji şerê Aşûriyan berda û ji bo parêzgariya welatê xwe vegeriya. Li jorê rûbarê Urumyeyê şerekî giran bi Sîtiyan re rû da, lê şiyana bergiriya wan nema û bi wan re aştî kir. Ev jî bû sebabê ku Mad û Baqîyan û welatên derûdorê bibin bazara talan, birîn û ziyankariya Sîtiyan, heta wextê ku Keyaksar bi plan ji bo mêvandariyê bang serek û mîrên Sîtiyan kirin û ewqas mey da wan ku bi temamî serxweş bûn û di van şertan de ew yek bi yek kuştin. Bi vî awayî Baqîyan Sîtî jî ji welatê Madê avêtin derve.

Koça Dawiyê ya Mîr Biraxim

Mîr Biraxim piştî 44 salan fermanrewayî kir, koça dawiyê kir. Ev serekên Tîreyên Kurdên Biraxoyî hevçerxên wî bûn: Mîr Buxaz Goranî, Mîr Manî Sarûnî, Mîr Gawr Xuzdarî, Mîr Manûr Mişkanî, Mîr Guren Ermîlî, Mîr Tirman Bolanî û Mîr Tapîn Girişkanî

7- Mîrêmîran Mîr Goran

Mîr Goran, piştî bavê wî koça dawiyê kir, derket ser textê Mîrnişîna Tûranê û bi dadperwerî sîstema mîrnişînê meşand. Ew mirovekî çakekar bû û li her kesî qencî dikir. Di serdema fermanrewatiya wî de Kiyaksarê paşayê Madê koça dawiyê kir.

Paşabûna Azdiyak

Piştî mirina Keyaksar, Azdiyakê kurê wî derket ser textê Madê. Ev paşa mirovekî lêhatî nebû û nikaribû rêveberiya welatê xwe ya mezin û fireh bike ku wekî mîrat jê re mabû. Mebest û bingeha jiyana xwe li ser qeşmerî, derbaskirina wextê xweş û vexwarina meyê danîbû. Kêf û şadî bi ser desthilatdariya şer de bilind kiribû û eziyetkirina xelkê ji xwe re kiribû adet. Ji ber van sebeban dilê wan jê bi êş bû û xelkê jê hez nedikir.

Daxistina Azdiyak Ji Paşatiyê

Dewleta Madê ku ji ber kirin û gavên Keyaksar gihîştibû wê seviya şikurdarî û hêziyê, di serdema Azdiyak de berê xwe da têkçûn û belengaziyê. Di serdema paşatiya Azdiyak de, kesekî ku bikaribe dewleta Madê bi rê ve bibe nemabû û heta mezin û giregirên dewleta Madê jî xwe dabûn kêfê û serserîtiyê. Li milekî din, xatircemî û asûdeyî ji radebideriya xelkê bûbû sebebê hêrsbûna paşa û vê jî paşa ji sitemkariyên xwe zêdetir germ kiribû.

Bi vî awayî, peywendiyên di navbera dewlet û xelkê de sartir bû û di van şertan de, wezîrê Azdiyak ku navê wî Erpak bû bi serek û mîrên Kurd re li hev kir û piştî wê di civîneke taybet de li ser daxistina Azdiyak pê re rawêjî kirin. Bi nehênî ji Kurişê kurê Çişpişê Duyem ê fermanrewayê Farsê û neviyê keçê yê Azdiyak re nameyek nivîsandin û bi rêya kesekî bawerpêkirî bi nehênî ji Parsagirda navenda welatê Parsê re şandin. Di nameyê de bang kirin Kuriş ku bi leşkerekî kêr ve xwe bigihîne nêzikî Ekbatanê, ji bo leşkerê Kurdên Madê bi serekên xwe ve pê re hevaheng bin. Kuriş jî bi dîtina vê nameyê bi serek û serdarên artêşa xwe re ber bi Ekbatanê ve bi rê ket.

Şerê Azdiyak Bi Kuriş Re

Bi sehkirina vê xeberê re Azdiyak leşkerekî mezin di bin serekatiya Erpak de ji bo bindestkirina Kuriş şand. Erpak di êrişê duyem de bi ser nakeve û bi leşkerê Madê û Kuriş re rû bi rû dibe. Azdiyak bi vê bûyera nedihat payîn hêrs dibe û vê carê bi xwe bi leşkerekî din ve ber bi Kuriş ve dimeşe. Azdiyak hê di destpêka şer de dişikê û vedigere Ekbatanê û li wir disitire. Di netîceyê de, leşkerên Kuriş dikevin nav Ekbatanê û Azdiyak digirin û selteneta Madê dawî lê tê.

Hereketê Kuriş Bi Kurdên Mayî Re

Piştî Kuriş paytexta Madê Ekbatan kir bin desthilata xwe û textê paşatiyê girt destê xwe, miameleya mihribaniyê

hilibjart û rêz û newaz ji malbata Azdiyak re girt. Ji ber wan peywendiyên xwedîtîyê ku ji milê dayîka xwe ve bi Kurdan re hebû, di nav esker de pileya serdariyê da şahzadeyên Madê. Her wiha, bi Sepnewiya keça Arîtmare zavayê Azdiyak û keça meta xwe re zewicî. Hemû rêkxistin û damezrayiyên selteneta Madê wekî wan hişt, ji bo hisa cihêti û biyantiyê di navbera Kurdan û Parsiyan de çênebe. Serek û serdarên Kurd li kijan navçeyê bûna newaz kirin û pileya hê bilintir da wan.

Ji ber van sebebên, Kurdên Biraxoyî li ser Mîrnişîna Tûranê û Kurdên Edreganiyê li ser Mîrnişîna Mekranê man û berdewam bûn. Bi heman awayî, li çî cihê Kurdek pileya bilind di dest de bûya, li ser pileyên xwe man û heta Kuriş wî welatê ku bi dest xistibû bi navê “Mad” û “Pars”ê nasî û di pênaseyê de tu guhertin nekir.

Koça Dawiyê ya Mîr Goran

Di serdema fermanrewatiya Mîr Goran de, paşatiya Mad û Parsê bi malbata Madê ve ket destê malbata Hexamenşîyan û Kuriş bû desthilatdarê textê Mad û Farsê. Çend meh piştî hatina Kuriş a ser text, Mîr Goran koça dawiyê kir.

Ev serekên tîreyên Kurdên Biraxoyî hevçerxên wî bûn: Mîr Rasîn Goranî, Mîr Şûhan Sarûnî, Mîr Mihran Xuzdarî, Mîr Beyker Mişkanî, Mîr Kusad Ermîlî, Mîr Hekar Bolanî û Mîr Xîzan Girişkanî.

Tîreyên Parsê

Li gor vegotinan, navê tîreyên Parsê bi vî awayî ne: Parsagird, Marafîn (Marafî), Marspîn (Marspiyanî), Panşîyanî, Dirusyanî (Diruzî), Diropîkî, Sagartî, Girmanî (Jirminanî), Mardî (Mirdî) û Dayî (Darani). Ji van Parsagird, Marafîn, Marspîn, Panşîyanî, Dirusyanî û Girmanî gundnişîn û bajarnişîn bûne û tîreyên Diropîkî, Sagartî, Mardî û Dayî xêwetnişîn û koçer bûne.

Di nav tîreyên bajarnişinan de jî, Parsagird, Marafîn û Marspîn wêrektirîn û berçavtirîn hozên Parsiyan bûne û serek û serdarên wan bi ser tîreyên Parsê yên din ku me li jorê behsa wan kir, baladest bûne û fermanrewatiya xwe bi ser wan de girtine.

Desteya Hexamenşiyân

Tîreyên Parsagird, Marafîn û Marspîn ji hozên fermanrewayî yên Parsiyan bûn û tîreya Hexamenşî şaxeke hoza Parsagird e. Kurişê mîrê vê tîreyê bingeha fermanrewatiya Hexamenşiyân li Mad û Parsê damezirand.

Hexamenşê bapîrê Kuriş serdarê hoza Parsagird bû û tîreyên Parsê di çarçoveya sîstemekê de berhev kir û bingeha fermanrewatiya xwe li Parsê damezirand. Bajarekî bi navê Parsagirt ava kir û kir paytexta fermanrewatiya xwe. Piştî mirina wî kurên Çişpişê Duyem, yek li pey yekê fermanrewatiya Parsê kirin.

Di serdema Çişpişê Duyem de, welatê Eylemê ji ber sebebê êriş û destdirêjîyên Aşûrbanîpalê paşayê Aşûrî ber bi tîkçûnê ve çûbû û sîstema welat bêhêz bûbû. Çişpiş ji vê rewşê îstîfade kir û êriş bir ser Enşana paytexta wî welatî, ew dagir kir û welatê Eylemê ('Eylam/'Elam) xist bin hukmê xwe. Du kurên Çişpiş ên navê wan Aryan û Kuriş hebûn û Kuriş ji keça Azdiyakê Mad û Parsê bû. Dema ku Çişpiş tûşî nexweşiya Kuştari⁹ hatibû, fermanrewatiya Parsê da destê Aryan û fermanrewaya Enşanê jî spart Kuriş. Ev herdu welat bacdêrê paşayê Madê bûn.

Azdiyakê Paşayê Mad û Parsê ji ber nebişkêrhatinê, mîr û serekên Kurd ew ji ser kar hilda û li cihê wî neviyê keçê Kurişê Hexamenşî anî ser text. Bi vî awayî, fermanrewatiya malbata

⁹ Di teksta Farisî de "Mewt we zeyset" hatiye nivîsandin.

Hexamenşî li ser Mad û Parsê dest pê kir. Bingeha du kurên
Çişpişê Duyem bi vî awayî ye: Kurişê Mezin ê kurê Çişpişê
Duyem ê kurê Kurişê Yekem ê kurê Kambûcê Yekem ê kurê
Çişpişê Yekem ê kurê Hexamenş. Aryanê kurê Çişpişê Duyem
ê kurê Kurişê Yekem ê kurê Kambûcê Yekem ê kurê Çişpişê
Yekem ê kurê Hexamenş.

BEŞA SÊYEM

MÎRNIŞÎNA KURDÊN BIRAXOYÎ LI TÛRANÊ (Dewreya Duyem)

Piştî têkçûna malbata Kurdên Mad, serek, serdar û mîrên tîreyên Mad û Parsê, neviyê keçê yê Azdiyakê paşayê Mad û Parsê ku bi navê Kurişê Hexamenşî dihat nasîn, anîn ser text. Kuriş, piştî hatina ser text, bi tu awayî guhertinek di damezirawayê selteneta Madê de nekir û wekî berê hişt. Ji ber vê sebebê, mîrnişîna Kurdên Biraxoyî li Tûranê û Kurdên Edreganiyan li Mekranê wekî berê man û di bin siha sozê Hexamenşîyan de cara duyem bingeha fermanrewatiya xwe damezirandin.

8- Mîrêmîran Mîr Zirşan

Dema ku Mîr Goran koça dawiyê kir, serekên Kurdên Biraxoyî Mîr Zirşanê kurê Ewyan anîn ser textê mîrnişînê. Du kurên Mîr Goran hebûn: Mîr Zîn û Mîr Zirşan. Mîr Zîn kurê wî yê mezin bû, lê di serdema saxiya wî de koça dawiyê kiribû. Ji ber wê Mîr Zirşan bû cihnişîn ku meyla wî ya zêde li ser ziraetê hebû.

Çêkirina Bendên Avê

Mîr Zirşan xwezyar bû, ji bo aramî û xweşiya xelkê xwest ku erdên bejî avî bike û ji bo vê mebestê jî îstîfade ji avên hêsan werbigire. Loma li baniyên¹⁰ bê av û cihên çiyayî gelek bendên avê ava kirin û bi rêya ava baranê bend çêkirin. Bi vî awayî ziraet li Tûranê fireh bû, rûniştîyên Tûranê ji sûda ziraetê para

¹⁰ Banû/Banî: Erdê deşt û bilind, ban.

xwe wergirtin û darayî, mal û dewlemendiyeke zêde bi dest xistin.

Êrîşên Fermanrewayên Sindanê

Guhertina paşatiyê ji malbata Madê derbasbûna malbata Hexamenşî bû sebebê êrîşên dagirkerî yên Sindan li ser Tûranê. Bagarmê fermanrewayê Sindan gûman kiribû ku ji ber vê rewşa nû ya guhertina paşatiyê, rêveberî û karûbarên seltenatê hêj bi temamî bingeha wê nehatiye danîn, bi hêz nebûye û divê dest biserdegirtina erdê Tûranê hêsan be.

Bi vî awayê bêyî dûrbîniyê, di rêya Ermanbilê re êrîşî ser xwarê Tûranê kir. Dîdevanên sengerên ser sînoran rêya hatina pêş ve li wan girtin û xebera êrîş û destdirêjiya dagirkerî ya Sindaniyan gihandin Mir Zirşan ku ew bi serbazên hozan ên tîreyên Kîkanî, Xuzdarî, Ermîlî, Sarûnî û Mişkanî ve daket meydana şer û bi lez dest bi êrîşa ser serbazên dagirkerên Sindan kirin. Desteya tîravêjên Kurd bi awayekî tîr bi ser wan de barandin ku leşkerê Sindan di cihê pêşketinê de rêya bazdanê hilibijartin. Tîrbaranî ewqas tûj û giran bû ku dijmin nikaribû heta bi zexîreyên xwe jî bibin û bi vî awayî di vî şerî de Kurdan destkeftiyeke zêde û bêendaze bi dest xistin.

Koça Dawiyê ya Kurişê Mezin

Kuriş piştî hatina ser text, qîmeteke zêde da dagirkirina welatan û seltenata xwe gelek fireh kir û bi nasnavê Kurişê Mezin nav û deng da. Lê di şerekî wilayetên rojhilatê de hat kuştin.

Paşabûna Kambûciyê Hexamenşî

Piştî mirina Kurişê Mezin, kurê wî Kambûc hat ser text û wan welatên ku şoriş berpa kiribûn û serî hildabûn jî jê re îtaet kirin. Kambûc tûşî nexweşiya “fê”/epilepsiyê bû, ji ber wê hinek caran ta û êşeke giran digirt. Kambûc di dawiyê de ji bo dagirkirina Misrê bi rê ket û ew dagir kir.

Xwekuştina Kambûc

Kambûc piştî dagirkirina Misrê, bi serfirazî û kameranî vegeerîya û çavê wî li Sûriyê bû. Xeber gihîştê ku perestgeheke Zerdeştî alaya şorişê bilind kiriye. Bi sehkirina vê xebera nexweş gelekî xemgîn bû û ji bo ku nexweşiya sarayê/epilepsiyê pê re hebû, hevsengiya mejiyê wî têk çû û xwe kuşt.

Koça Dawiyê ya Mîr Zirşan

Mîr Zirşan piştî 31 sal fermanrewatiyê, koça dawiyê kir ku hevçerxê Kurişê Mezin û Kembûc bû. Ev serekên tîreyên Kurdên Biraxoyî hevçerxên wî bûn: Mîr Nagan Goranî, Mîr Nêrman Sarûnî, Mîr Şîşar Xuzdarî, Mîr Gurgîn Mişkanî, Mîr Bahûr Ermilî, Mîr Buxa Bolanî û Mîr Semban Girişkani.

9- Mîrêmîran Mîr Zûrakê Duyem

Piştî koça dawiyê ya Mîr Zirşan, kurê wî Mîr Zûrakê Duyem hat ser textê Tûranê. Mîr Zûrakê Duyem ji wekî bavê xwe meyla wî li ser ziraetê hebû. Zincîra avakirina bendan domand û ew bendavên di serdema bavê wî de nêvcî mabûn temam kirin û gihand netîceyê.

Belavkirina Adetê “Heşer”ê

Zûrakê Duyem yekem mîrê Tûranê bû ku di serdema mîrnişîna xwe de adetê “heşer”ê pêş ve bir. Karên mezin û bi qîmet bi rêya vî adetî bi hêsanî gihand netîceyê, bendên zêde li seranserê navçeyên banî yên Tûranê ava kirin û ziraet ber bi pêş ve çû. Ev jî bû sebeb ku rûniştîyên Tûranê parên zêde bi dest bixin û rewşa wan xweş bibe.

Şiroveya Adetê Heşerê

“Heşer” tê maneya desteyeke mezin, yanî karekî ku ji aliyê desteyeke mezin an hejmareke zêde mirovan ve bi kolektîvî bê kirin, jê re dibêjin ev kar bi rêya “heşer”ê ve hatiye kirin. Piştî belavbûna vî adetî, li hemû bajar, bajarok û gundên Mîrnişîna Tûranê mirov berhev dibûn û karên xwe pêk dianîn. Bi rewşa

serdemê re, ev awa karkirin bi navê “heşer”ê hat nasîn.

Paşabûna Darayê Yekem ê Hexamenşî

Kembûc ocaxkor bû, ji ber wê wezîr û mîrên wî Darayê ku neviyê Aryamanê Hexamenşî bû, anîn ser text. Dara di warê zanebûn, hêz, bikêrhatin û dadperweriyê de nav û deng da. Di siyaseta û rewşenbîriyê de bêemsal bû û bi wê bihêzî û mezintiyê fermanrewayî kir û karîbû welatê xwe bigihîne kopa mezintiyê.

Di vê navê re, ji bo bêdengkirina parêzgarê perestgehê¹¹ ku li hemû navçeyên welat alaya serhildan û şorişê bilind kiribûn ket rê ku di netîceyê de ew girtin û kuştin. Piştî vê dest bi dagirkirina welat kir.

Koça Dawiyê ya Mîr Zûrak

Mîr Zûrakê Duyem piştî 34 sal fermanrewatiyê, koça dawiyê kir. Hevçerxê Darayê Yekem bû û ev serekên tîreyên Kurdên Biraxoyî hevçerxê wî bûn: Mîr Dûc Goranî, Mîr Hînar Sarûnî, Mîr Kaşîk Xuzdarî, Mîr Bûlûr Mişkanî, Mîr Amaç Ermîlî, Mîr Dernîl Bolanî û Mîr Zîdek Girişkanî.

10- Mîrêmîran Mîr Ercan

Mîr Ercan piştî koça dawiyê ya bavê xwe, derket ser textê Tûranê ku mirovekî bikêrhatî û xwediyê exlaqekî baş û bi dadperweriyê bi nav û deng bû. Siwarekî bêemsal bû û tê gotin di dema seferê de sê hespên zînkirî li pêşiya wî diçûn û hespek tenê şiyane siwariya wî nebû. Her wiha mirovekî kirox û bi ferq bû. Çi karê dest pê bikira digihand netîceyê.

Damezirandina Leşkerê Dîdevaniyê

Mîr Zirşan di serdema fermanrewatiya xwe de li ser sînorên hevbeş ên Tûran û Sindanê çendîn senger ava kirin û bi mebesta nobedariyê tê de esker bi cih kirin. Dema ku Mîr

¹¹ Di teksta Farisî de nivîsandiye “Gumat Me’bed”.

Ercan hat ser text leşkerekî cihê yê dîdevaniyê ava kir ku bi berdewamî di nav sengeran de dîdevanî û çavdêriya sînoran dikirin.

Paşabûna Xişayarşayê Hexamenşî

Dema ku Darayê Yekem tûşî nexweşiya kuştari bû, Xişayarşayê kurê wî ku ji Atusaya keça Kuriş bû, wek şahzadeyê wergirê text hat hilbijartin û piştî mirina wî derket ser text. Di destpêka desthilatdariyê de, rûniştîyên Parsê ji dil ew dixwestin û qebûlkiriyê civatê bû.

Dagirkirina Misrê û Babilê

Di serdema fermanrewatiya Xişayarşa de, welatê Misrê û Babilê şoriş berpa kiribûn û xwe ji bin destê welatê Parsê rizgar kiribûn. Ji ber wê, Xişayarşa ber bi Misrê ve bi rê ket û piştî şerekî giran, Misrî şikandin û agirê serhildanê tefand.

Piştî wê, Xişayarşa berê xwe da Babilê, bajar dorpêç kir û eskerên nav bajêr neçar man çekên xwe bavêjin û teslîm bibin.

Êrişa [Xişayarşa] ya Ser Yûnanê

Dema ku Xişayarşa ji dagirkirinê vala ma, bala êrişkirina ser Yûnanê rakêşa. Ji bo vê mebestê jî, leşkerê derya û reşahiyê berhev kir û bi leşkerekî mezin û pirçek û amadehiya şer êrişî erdê Yûnanê kir.

Vî şerî dirêj kêşa û di dawiyê de di şerê “Silase”yê de neviyên Parsê şikestin. Piştî vê şikestinê Xişayarşa, serdariya leşker da destê Merdûnya û ew bi xwe ber bi Parsê ve vegehiya.

Kuştina Pindranê Birayê Mîr Ercan

Di serdema mîrnişîniya Mîr Ercan de, desteyek rêgir û tawanbarên Cidgaliyên Sindanê bi nehênî çûbûn nav çiyayên navbera bajarê Kîkan û Bilbilanê û li ser bilindtirin kopa saxên çiyayê Mulkeyê bi cih bûbûn. Ev kemîngeh, nişîngeh û penageha wan bû û dema ku xelkê rêwî û karwanî diçûn seferê, rê li wan digirtin û talan dikirin.

Mîr Ercan birayê xwe Mîr Pindran ji bo bêdengkirina vê desteyê bijart ku wî jî bi şev bê payîn êrişî ser wan kir. Lê di şer de birîndar bû û birîna wî ewqas xeter bû ku nikaribû xelas bibe û mir. Ji ber vê bûyerê, navê wî geliyî wek “Pindran” hat nasîn.

Kuştina Xişayarşayi Hexamenşî

Dema ku Xişayarşa ji şerê Yûnanê vegeheriya û hat Parsê, divibû heyfa şikestina Yûnanê hilaniya û xwe ji bo şer amade bikira.

Lê dijberî vê, jiyana xwe ji bo şahîkirin, wextê xweş û vexwarina meya zêde amade kir. Rûniştinên şahiya li ser amadekariya şer û şerkirinê li ser hakim bû û duçarî tirsonekî, bêdilî û tembelyê bû.

Ji ber van sebebên, mîr û endamên dewletê û mîrên leşker lê zîz û bêzar bûn. Di wê navê re, Erdewanê mîrê serbazên amadesaz bi mezinên dewletê û dewlemendên koşka paşayî re li hev kir û Xişayarşa kuştin.

Koça Dawiyê ya Mîr Ercan

Mîr Ercan 25 sal fermanrewatî kir û piştê tûşî nexweşiya zerdikê bû û koça dawiyê kir. Hevçerxê Xişayarşayê paşayê Hexamenşî bû û ev mîrên tîreyên Kurdên Biraxoyî hevçerxên wî bûn: Mîr Çirmûk Goranî, Mîr Kabû Sarûnî, Mîr Dewlem Xuzdarî, Mîr Tûtik Mişkanî, Mîr Kembîl Ermilî, Mîr Xîzan Bolanî û Mîr Pilar Girişkanî.

11- Mîrêmîran Mîr Şamûz

Mîr Şamûz li cihê bavê xwe hat ser textê Tûranê û mirovekî zana û hişmend bû û bêyî ku bi serekên tîreyên Kurdan bişewiriyay tu kar nedikir. Serekên tîreyên Kurdên Biraxoyî her wextê hevkarên wî bûn û di dîwana wî de di amadehiyê de bûn. Mîr Şamûz di şûrbaziyê de bêemsal bû û di şer de du şûr dixist destê xwe û mertal bi kar nedianî.

Paşabûna Erdeşêrê Yekem ê Hexamenşî

Erdewan Xişyarşa di odeya raketinê de kuşt û xwest Erdeşêr ku şahzadekî temenê wî biçûk bû textnişîn bike û bi vê rêyê desthilata welat bigire destê xwe. Lê ji bo hebûna Darayê kurê mezin ê Xişyarşa ev ne mimkun bû. Ji ber wê Erdewan, wek ku Darayê birayê mezin bavê xwe kuştiye û gerek toleya bavê xwe hilîne Erdeşêr han da û wisan kir ku Dara bikuje.

Bi vî awayî Dara hat kuştin û piştî wê Erdewan bi rihetî li dijî Erdeşêrê paşayê nû serî hilda û dixebitiya wî jî bikuje. Lê Erdeşêr bi plana wî hesiya, serê wî birî û welatê xwe ji tevlihevî, kînerwerî û bednişîniyê rizgar kir.

Êrişa Mîrê Sindanê a Ser Tengava Mîlayê

Kindabûc Mîrê Sindan bi serbazên peyade û siwarî yên Cidgalan ku hemû çekdar û zirxpoş bûn, ji Kindabîla paytexta Burhayê ketibû devê Tengava Mîlayê, ber bi erdê Tûranê ketin rê û hatin Tengava Mîlayê. Li wir sengerên pasewanê serbazên Kurdan dagir kirin, hemû dîdevanên wan kuştin û tenê yek jê sax nema ku xebera vê êrişa leşkerê Sindanê bigihîne mîrê Tûranê.

Piştî çend rojan, rêwiyên Kurd ên Biraxoyiyên Xuzdarê xebera vê bûyera diltezîn gihandin Mîr Şamûz, ew jî bi sehkirina vê gelek dilteng û aciz bû. Leşkerên hozi yên Kurd bi lez berhev kirin û ji Kîkanê hat Xuzdarê. Li wir bi mîrên serbazî/eskerî şewirî û leşker li ser sê qolan¹², qolê rast, qolê çep û qolê navendê parve kir. Serekatiya qola yekem da Mîr Mirdas Sarûnî, ya duyem da Mîr Xerzan Xuzdarî û bi xwe jî serekatiya qola sêyem girt destê xwe û ber bi Tengava Mîlayê ket rê. Dema ku leşkerê Biraxoyî nêzikî leşkergeha Cidgalan bûn, desteya serekî ya artêşa Sindan bi awayê çargoşeyî xwe rêk xist. Ji Kurdan re hêj hejmar û hêza dijmin ronî nebûbû, ji ber wê di destpêkê de desteya pêşîn (pêşqerewîl) cihê xwe

¹² Bi me'naya ball yan beşa artêşê.

girt. Desteya serekî ya şervanên Biraxoyî ku hemû çek û cebirxaneyên xwe di bin kincên xwe de veşartibûn li navenda meydanê bûn û bi yek îşareta mîr van eskerên siwarî kincên xwe avêtin û bi hawara sew'î û dengê dehulan êrîşî ser sefên Cidgalan kirin. Kindabûcê mîrê Sindan beriya xwe ji vê tirs û ecêbmayînê xelas bike, xwe di nav dorpêça leşkerên Biraxoyî de dît. Tîravêjên Kurd leşkerên peyade yên Cidgalan ji hemû milan ve dorpêç kirin û ew dan ber tîrbarana mirinê. Di netîceyê de, şerê destpirçkî di navbera Cidgalan û Kurdan de dest pê kir, Kindabûcê mîrê Sindan birîndar bû û ber bi paşve kişiya. Hinek serbazên Cidgalan li girekî biçûk senger girtin û ji bo parastinê mertalên xwe li pêşiya xwe danîn û bergirî li xwe kirin heta hemû hatin kuştin. Mîr Şamûz serê Kindabûcî ji laşê wî cihê kir, bi serê rima xwe bilind kir û bi yekcarî berê xwe da qola navendê ya leşkerê Cidgalan. Serbazên Cidgalan şikestin û dest bi bazdanê kirin. Lê ji aliyê Kurdên Biraxoyî ve hemû rê li wan hatibû girtin, berê xwe didan kîjan milî rastî sûrên Kurdan dihatin û dihatin kuştin.

Vî şerî di sala 454'ê beriya zayînê de rû da û nêzikî 15 hezar serbazên Cidgalan hatin kuştin. Kurdan ji bo yadê vê serkeftin û serbilindiyê navê cihê şerî kirin Mîr Şamûz. Ev tîreyên xwarê yên Cidgalan, di vî şerî de ji bo piştevaniya Kindabûcê mîrê Sindan beşdarî kiribûn: Luhanî, Sithunanî, Ebraniî, Maçaniî, Bembî, Çexawerî, Canî, Dendawer, Kilwarî, Mencuhrî, Nisurî, Puhurî, Runchahî, Gungu, Mangî, Engarî, Radî, Randanî, Camus, Dihur, Mundir, Bunarî, Sumarî, Bihatî, Kuhlî, Lake û Kihukihî.

Koça Dawiyê ya Erdeşêrê Yekem

Erdeşêr piştî 40 sal fermanrewatîyê, koça dawiyê kir. Di serdema fermanrewatîya wî de selteneta Hexamenşî ber bi hilweşînê ve diçû û şêla paşveçûnê di welat de tovê xwe çandibû. Li gel vê hemû bêhêzî, nerêkî, nerastî û nezanînê, serdema fermanrewatîya Erdeşêrê Yekem dirêj kêşa.

Koça Dawiyê ya Mîr Şamûz

Piştî mirina Erdeşêrê Yekem, Mîr Şamûz ji koça dawiyê kir. Ev serekên tîreyên Kurdên Biraxoyî hevçerxê wî bûn: Mîr Kazan Goranî, Mîr Mirdas Sarûnî, Mîr Xerzan Xuzdarî, Mîr Duxan Mişkanî, Mîr Basîr Ermilî, Mîr Mişkan Bolanî û Mîr Maxan Girişkanî.

12- Mîrêmîran Mîr Biraxmê Duyem

Piştî mirina Şamûz, kurê wî Mîr Biraxmê Duyem hat ser textê Mîrnîşîna Tûranê. Mîr Biraxm mirovekî xwediyê exlaqekî baş, qisexweş û boriya baş bû. Her wextê jiyana tijî aramî ji bo tîreyên Kurdên Biraxoyî temîn dikir û ji bo qencî û ewlekariya wan tédikoşiya. Her wiha, ji bo pêşvebirina ziraetê û alavên wê hêsankarî dikir.

Kolana Karêzan

Mîr Biraxmê Duyem di serdema fermanrewatiya xwe de îstifade ji çavkaniyên din ên avê wergirt ku jê re “karêz” dibêjin. Bi rêya vê çavkaniyê karibûn zexîreya ava binerd bînin ser erdê û ji bo kar û barên ziraetê bi kar bînin. Ev awa, di serdema Mîr Biraxmê Duyem de adetê kolana karêzan bi awayekî berfireh pêşve çû û li her cihêkî musaid bûya xelkê navçeyê karêz dikola û ava wê bi kar dianîn.

Parvekirina Destkeftiyên Şer

Ew destkeftiyên di şerê Kindabûcê fermanrewayê Sindanê de bi dest Kurdan ketibûn, ewqas zêde bûn ku Mîr Şamûz di serdema fermanrewatiya xwe de nikaribû parve bike, ji ber ku çend roj piştî şer koça dawiyê kir. Piştî Mîr Biraxmê Duyem ê kurê wî ev destkeftî di navbera mafdaran de parve kir.

Paşabûn û Kuştina Xişyarşayê Duyem

Piştî mirina Erdeşêrê Yekem, kurê wî Xişyarşayê Duyem derket ser textê seltenetê û tenê 45 rojan fermanrewayî kir. Ji ber ku Sifidyanûyê birayê wî ku ji cariyekê bû, çavnebarî lê

dikir. Di rûniştineke şevê de Xişyarşayê Duyem ewqas mey vexwar ku serxweş bû, bêhiş ket û ew di wî halê bêhişiyê de kuştin.

Paşabûna Darayê Duyem ê Hexamenşî

Dema ku Sifidyânû Xişayarşa kuşt, Oxus fermanrewayê Belxê bû. Endamên dewletê ji ber vê kirina nebaş, ji Sifidyânû aciz bibûn. Ji ber wê bi Oxus re bûn yek û Sifidyânû girtin. Piştîre ji ber toleya xwîna birayê wî kuştin.

Oxus nasnavê “Dara” hilibjart û derket ser textê seltentê ku mirovekî bedkirdar, xweperest, tembel û bêhêz bû. Xwediyê îradeyêke bi hêz nebû û desthilata hikûmetê di bin destê şahjin û sê kesên xesandî de bû. Ji ber wê, li seranserê welat şoriş û serhildan berpa bû. Nêaramî çêbû û li hemû cihan şer û qirênan dest pê kir. Ev rewş bû sebebê bêhêziya dewletê û malbata Hexamenşî. Lê Darayê Duyem li gel van hemû bedkarî û tawanbariyê heta 20 salan fermanrewayî kir û piştîre koça dawiyê kir.

Koça Dawiyê ya Mîr Biraxmê Duyem

Mîr Biraxmê Duyem dozdemîn fermanrewayê Mîrnişîna Tûranê bû û 24 salan fermanrewatî kir û piştîre koça dawiyê kir. Ev serekên Kurdên Biraxoyî hevçerxên wî bûn: Mîr Zeynel Goran, Mîr Rîgan Sarûnî, Mîr Kusad Xuzdarî, Mîr Katîn Mişkanî, Mîr Bûlak Ermîlî, Mîr Sîkran Bolanî û Mîr Sarim Girîşkanî.

Koça Dawiyê ya Darayê Duyem

Darayê Duyem nêzikî 20 salan fermanrewatî kir û piştî wê koça dawiyê kir. Beriya koça dawiyê bike Erşîkê kurê wî bi şahzadeyî text wergirt û hat hilibjartin ku ew ji piştîre bi navê Erdeşêrê Duyem hat ser textê fermanrewatiyê.

13- Mîrêmîran Mîr Sabûl

Piştî mirina Mîr Biraxmê Duyem, kurê wî Mîr Sabûl

hat ser textê Tûranê. Mîr Sabûl mirovekî dadperwer, dûrbîn û sexbêr bû. Di serdema fermanrewatiya wî de rewşa bêhêzî, aramî û netebayî li welatê Farsê fireh bûbû û mîrên dewletê li pey şer û qirênan digeriyan. Mîr Sabûl amade nebû rewşa netebayî û bêqanûnî di welatê wî de jî belav bibe. Ji ber wê, welatê Tûran û Mekranê ji şer, ziyankarî, bedxweyî û tevliheviyê parast.

Koça Dawiyê ya Mîr Sabûl

Mîr Sabûl Kikanî piştî 31 sal fermanrewatiyê koça dawiyê kir ku hevçerxê Darayê Duyem ê Hexamenşî yê paşayê Pars û Madê bû. Ev serekên Kurdên Biraxoyî hevçerxê wî bûn: Mîr Goran Goranî, Mîr Keytûn Sarûnî, Mîr Mişkan Xuzdarî, Mîr Zuran Mişkanî, Mîr Eram Ermîlî, Mîr Sasun Bolanî û Darûn Girîşkanî.

Paşabûna Erdeşêrê Duyem

Erdeşêrê Duyem, piştî mirina bavê xwe derket ser textê Parsê û 41 sal fermanrewatî kir. Erdeşêr mirovekî hêmin û mîhrîban bû û hemû wextan bi efûkirin û çavlêgirtina xelitiya kar dikir. Ev jî dibû sebab ku mîr û berpîrsên dewletê li dijî fermanên wî derkevin.

Di serdema desthilatdariya wî de serhildan û dijîtiyên zêde hebûn. Tê gotin hejmara jinên wî 360 bûne û 115 kur û keçên wî hebûne. Piraniya zarokên wî di serdema saxiya wî de mirine û çar kurên wî yê navên wan Dara, Aryasb, Ersam û Uks li pişt xwe bi cih hiştine û ji wan kurê xwe yê mezin wek şahzadeyê wergirê text hilbijartîye. Li gor hin gotinan Erdeşêrê Duyem 64 salan fermanrewatî kiriye.

14- Mîrêmîran Mîr Nûrgan

Piştî Mîr Sabûl koça dawiyê kir, serekên Kurdên Biraxoyî, kurê wî yê navê wî Nûrgan anîn ser textê Mîrnişîna Tûranê. Dema ku Mîr Nûrgan fermanrewatiya Mîrnişîna Tûranê girt destê xwe, rewşa navçeyên der û dorê ne guncaw û ne sazgar

bû û bazara şer û tevliheviyê li hemû milên welatê Mad û Parsê germ bû. Mîrên dewletê bi hev re şer dikirin û her kesî dixwest li hemberî yê din bihêztir be û wilayetên zêdetir bîne bin desthilata xwe.

Mîr Nûrgan mirovekî zîrek û têgihîştî bû, ji ber wê sîstema mîrnişîna xwe ji van tevlihevî û qelebaxiyan parast û Kurd bi bergiriya Tûranê mijûl kirin.

Avakirina Keleha Nûrganê

Piştî êrîşên mezin ên mîrê Sindanê yên ser Tengava Mîlayê yên di serdema Mîr Şamûz de, ev rastî ronî bû ku bergiriya gel jar bûye. Ji ber wê, Mîr Nûrgan li Geliyê Siwîndrûnê ji milê bakurê Tengava Mîlayê ve dest bi avakirina kelehê mezin û qahîm kir. Ji bo di dema pêwîstiyê de bi rehetî bergiriya gelî bê kirin. Ev keleh li nêzikî kaniyeke li ser kopa çiyê ava kir û serbazên Kurd ji bo dîdevaniyê tê de bi cih kir. Piştî avakirina vê kelehê, navçe bi navê “Nûrgan” hat nasîn.

Koça Dawiyê ya Erdeşêrê Duyem

Erdeşêrê Duyem, piştî 64 sal fermanrewatîkirinê, koça dawiyê kir û çar kur jê man ku navên wan Dara, Eryasb, Ersam û Uks bûn. Hê di serdema fermanrewatiya xwe de Dara wek şahzadeyê wergirê text hîlbijartibû. Mîr Sabûl, mîrêmîranê Tûranê yê hevçerxê wî bû.

Paşabûna Erdeşêrê Sêyem

Piştî koça dawiyê ya Erdeşêrê Duyem, kurê wî yê biçûk Uks nasnavê Erdeşêrê Sêyem ji xwe re hîlbijart û derket ser text. Lê mirovekî xwediyê kirinên xerab, bêexlaq û hundirê wî pîs bû û di nav mirovên xerab de hatibû perwerdekirin. Ji ber wê tebîet û exlaqê wan wergirtibû û ketibû nav rêza wan.

Darayê birayê wî yê mezin ku hê di serdema saxiya bavê xwe de şahzadeyê wergirê text bû, bi fêl û fendan kuşt. Eryaspê birayê wî jî ku mirovekî exlaqxweş, xwediyê peywendiyên baş, rûgeş, zimaşîrîn û pesendkiriyê endamê dewletê bû, rabû ew

jî ji orteyê rakir. Her wiha hemû pismam, kes û nêzikên xwe jî kuştin, ku kesek ji daxwazkarê text û tacê seltenetê nemîne.

Koça Dawiyê ya Mîr Nûrgan

Mîr Nûrgan hevçerxê Erdeşêrê Sêyem bû û ev serekên Kurdên Biraxoyê jî hevçerxên wî bûn: Mîr Mihran Goranî, Mîr Başûk Sarûnî, Mîr Bîfil Xuzdarî, Mîr Bûzîk Mişkanî, Mîr Êkî Ermîlî, Mîr Kelfil Bolanî û Mîr Nûxê Girişkanî.

15- Mîrêmîran Mîr Kiyanûş

Piştî mirina Mîr Nûrgan, serekên Kurdên Biraxoyî Mîr Kiyanûşê kurê wî anîn ser textê Mîrnişîna Tûranê ku di serdema fermanrewatiya xwe de ji bo tebayî û yekîtiya rêzên tîreyên Kurd têkoşîya. Hewldana wî nehişt şîrazeya Kurdan têk biçe û ji hev cihê bibin û di navbera wan de problem çêbibe. Bi ekis yekgirtin û pêwîstbûnê zêdetir xurt kir. Ev jî gelekî pêwîst bû, ji ber ku li hemû navçeyên Mad û Parsê tevlihevî û serhildan belav bûbû. Dadgeriya welat di kûrahiya têkçûnê de bû û kar û barên sistema welatê Mad û Parsê duçarî dijîti û tevliheviyê hatibû.

Kuşîna Erdeşêrê Sêyem

Bagwasê xesandî pismamê bawerpêkirî yê Erdeşêr bû û hewesa paşatiyê di mejiyê wî de bi cih bûbû. Dilê wî bêyî wê av venedixwar ku desthilata hemû welat di destan de bû û birêvebirê reş û spî yê welat bû. Ji ber vê hêviyê jehr da Erdeşêr û ew kuşt.

Koça Dawiyê ya Kiyanûş

Mîr Kiyanûş piştî 12 sal fermanrewatî kir, di salên xwe yên xortîniyê de tûşî nexweşîya xûrikê bû û koça dawiyê kir. Mîr Kiyanûş hevçerxê Erdeşêrê Sêyem bû û ev serekên tîreyên Kurdên Biraxoyî jî hevçerxê wî bûn: Mîr Giştî Goranî, Mîr Înax Sarûnî, Mîr Zerîn Ermîlî, Mîr Lakûr Bolanî, Mîr Bilbas Girişkanî, Mîr Kireçil Xuzdarî û Mîr Biraxim Mişkanî.

16- Mîrêmîran Mîr Kîkanê Duyem

Piştî koça dawiyê ya Mîr Kîyanûş, kurê wî Mîr Kîkanê Duyem hat ser textê Mîrnişîna Tûranê. Di hatina serdema li ser text de rewşa nerêkî û tevliheviyê li Mad û Parsê gîhabû kopa serî û tevlihevî li hemû cihî germ bû. Mîr Kîkan xwe di çarçoveya van probleman de di dorpêçê de dît. Ji ber wê xwe mijûlî birêkûpêkîkirina sîstema neteweyî û perwerdekirina leşkerê tîreyên Kurdan kir.

Paşabûna Darayê Sêyem

Dema ku Bagwas jehr da Erdeşêrê Sêyem, kesekî ji malbata Hexamenşî ku navê wî Kidman bû û jiyana goşenişiyê derbas dikir û biraziyê Astinê birayê Erdeşêrê Sêyem bû, ji bo textê seltenetê hat hîlbijartin. Dema ku Kidman derket ser text, nasnavê “Dara” ji xwe re hîlbijart.

Dara mirovekî şîyanê paşatiyê bû û li sembol, kar û barên seltenetê şareza bû. Her wiha mirovekî bexşînde û mêrxas bû û ji pêşrewên xwe gelekî bikêrhatîtir bû. Dema ku Bagwas vê hîlbijartina miamele û exlaqbaşîya wî dît, tirs ket dilê wî û biryar da jehrê bide wî. Lê Dara ji plana wî agahdar bû û ew neçar kir bi xwe jehrê bixwe û bimire.

BEŞA ÇAREM

KURDÊN BELUÇÎ DI SERDEMA YÛNANÎ Û HINDIYAN DE

Êrîşa Yûnaniyan a Ser Erdê Mad û Parsê

Welatê Yûnanê ji giravên awa awa yên mezin û biçûk pêk hatiye û her giravek di bin desthilata fermanrewayekî de bûye. Ev fermanrewayî di nav xwe de yekgirtî û teba nebûne, heta hemû wextan êrîşên talankerî li ser hevdû kirine. Ji ber vê sebebê, paşayên Mad û Parsê bi ser wan de hakim bûne.

Makedonya wilayeteke mezin a Yûnanê bû ku navê paşayê wê Fîlqus [Philippos] bû û dixwest wilayetên Yûnanê bigihîne hev û êrîşî ser erdê Mad û Parsê bike. Ji wê jî agahdar bû ku heta dema çek û wasiteyên wî yên şer ji yên dijmin baştir û seviyebilindtir nebin nikare li ser wan yanî Madan û Persan hakim bibe. Lê dema ku dest bi nûsaziya çekan û amadekariya şer kir, mirovekî navê wî Pausaniyas ji bo çaresiyeye qanûnî berê xwe da Fîlqus û biryara pirsê li gor berjewendiyên wî nehat dayîn, ji ber wê dilê wî ji Fîlqus êşiya û di firsetekê de ew kuşt. Piştî vê bûyera diltezîn, Îskenderê kurê Fîlqus derket ser textê Makedonyayê û kar û barên şer yên bavê wî dest pê kiribû girt destê xwe.

Destpêkirina Şer

Îskender di sala 334ê beriya zayînê de, şer da destpêkirin û ji bo dagirkirina welatên Asyayê ket rê. Di destpêkê de

Sûriye û Misir dagir kir û piştire berê xwe da navçeyên Mad û Parsê û di yekem şerê bi welatê Mad û Parsê de şikest û bi paş ve vegeriya. Îskender bi pey Dara ket û bajar û bajarokên wî hêdî hêdî dagir kirin û heta gihîşt navçeya “Gagamîlan”ê û li vir piştî şerekî giran Dara şikand.

Di netîceya vê şikestinê de, Dara bêdil bû û navçe terk kir û ber bi rojavayê welat ve çû. Dawî, Bisûsê fermanrewayê Belxê û Birsanê mîrê Sistanê li navçeya Dimxanê Dara hêsir kirin. Îskender gelek bi lez xwe gihand navçeya wan. Dema ku Bisûs xebera hatina Îskender seh kir, bi hevkarên xwe re Dara kuşt û bi vî awayî xwe ji şerê Îskender rizgar kir û çiraya serdema Hexamenşiyân jî tefand.

Hatina Îskender a Hindê

Îskenderê Makedonî, piştî dagirkirina wilayetên rojavayê Mad û Parsê, heta du salan geşta li ser van erdên dagirkirî domand, her çend hemû welatê Mad û Parsê kiribû bin desthilata xwe, karakterê bi zorî girtina welatan têhniya vê seltaneta fireh û mezin neşikand û timaya dagirkirinê cardin xwe livand ku bi dagirkirina wan welatên ku ketibûn rojhilatê Mad û Parsê rabe û bike bin desthilata fermanrewatiya xwe. Ji bo bicihkirina vê mebestê, zincîra çiyayê Hindûkûşê derbas kir û hat nav erdê Hindê û wilayeta Pencabê dagir kir. Bi niyet bû hêj pêş ve biçê û ew wilayetên ku ketibûn rojhilatê Pencabê dagir bike. Lê serbazên Yûnanî li dij derketin û ber bi pêş ve neçûn.

Vegera Îskenderê Makedonî

Dema ku Îskender his bi wê kir ku serbazên wî ji şer û êrişkirina berdewamî bêzar û bêdil bûne, ji neçarî biryara veogerê da.

Di destpêkê de ber bi başûr ket rê û hat nav erdê Sindanê

û li qeraxên rûbarê Sindanê¹³ leşgergeha xwe damezirand. Li wir artêşa xwe bi ser du beşan ve parve kir. Beşeke ku ji saman, barên giran û serbazên birîndar pêk hatibû di bin serekatiya serleşker Kirayturas de bi rêya Tûranê ber bi Zabilistanê ve şand û bi xwe jî bi artêşa li wir ve çû bendergeha Dîwlê. Li wir careke din artêşa xwe bi ser du beşan ve parve kir û beşek jê di bin serekatiya Niyarkusê mîrê deryayê de bi keştî û beleman bi rêya ava Deryaya Umanê ber bi Parsê ve şand. Beşa din jî di bin serekatiya wî de bi rêya reşayîyê ber bi Parsê ve bi rê ket. Di destpêkê de hat navçeya Ermabilê ya xwarê Tûranê û piştî derbasbûna ji çend navçeyan gihîşt wilayeta Mekranê. Ji Mekranê çû Parsê û ji wir jî hat Babilê. Li Babilê nexweş ket û di serdema xortîniyê ya temenê 32 salî de koça dawiyê kir.

Şerê Kurdên Tûran û Mekranê Bi Leşkerê Îskender Re

Dema ku xeber gihîşt Kurdên Beluçî yên Tûran û Mekranê ku Îskenderê Makedonî bi leşkerê xwe ve ji xwarê Tûran û Mekranê ve vedigere Parsê, serekê Kurdên Tûran û Mekranê bi hev şewirîn û biryar dan bi liberçavgirtina adetê camêrî yê Kurdên Beluçî bi dijmin re şer bikin. Ji bo ku ji dijmin re ew gûman çênebe ku rûniştîyên erdê Tûran û Mekranê bê berxwedanî û xwînretinê erdê xwe didin destê dijmin.

Danîna Nexşeya Şer

Îskender hêj li erdê Sindanê di rê de bû ku serekên Kurdên Beluçî yên Tûran û Mekranê li navçeya Mengurê berhev bûn û plana şer danîn û awayê berxwedana navçeyan bi rêk xistin.

¹³ Divê mebest rûbarê "Sind"ê be ku çavkaniya herî mezin a ava Pakistanê ye û çavkaniya `wê li Hindistanê ye. Ji nav herêmên Pakistanê derbas dibe û di dawiyê de dirije nav Okyanusê. Li gor peyman "Sindtas"ê ku di bin çavdêriya Banka Navneteweyî di sala 1960ê de encam da, Pakistan ava wî rûbarî bi kar tîne.

Tîreyên Bolanî û Goranî bi serdarên xwe Mîr Berûz Bolanî û Mîr Rûşî Goranî re bergiriya Tengava Bolaniyê girtin ser xwe. Bergiriya Tengava Mîlayê spartin Mîr Şadîn Xuzdarî û Mîr Rasin Mişkanî û tîreyên wan. Mîr Kîkan bi tîreyên Kîkanî, Sarûnî, Ermîlî û Girişkanî û her wiha Mîr Ebûsan bi desteyên tîreyên Edreganî, Mamîlî û Kirmanî ve hatin Ermabilê û li ser rêya derbasbûna Îskender senger çêkirin û çaverêya hatina wî bûn.

Şer û Derketina Kurdên Beluçî Ji Tengava Mîlayê

Dema ku Kiraytursê serleşkerê Yûnanî di qeraxên Rûbarê Sindanê re gihîşt deşta Bedhanê û ji wir hat Tengava Mîlayê, tîreyên Kurdên Beluçî şerê lêdan û bazdanê dan destpêkirin. Bi şev êrişî ser leşkergeha wan dikirin û serbazên dijmin dikuştin. Kirayturs gelek bi zehmetî û dijwarî ji Tengava Mîlayê derbas bû û hat Geliyê Kuhîranê. Li ber devê vî geliyê li navçeya Ziydanê şerekî giran di navbera Kurdên Beluçî û Yûnaniyan de rû da. Mîr Rasin Mişkanî hat kuştin û Mîr Şadîn bi birîndarî xwe rizgar kir û ber bi Ermabilê ji bo alîkariya Kurdên Beluçî ket rê.

Hatina Îskender a Nav Erdê Tûranê û Dagirkirina Ermabilê

Dema ku Îskenderê Makedonî ji welatê Sindanê hat navçeya Ermabila Tûranê, li Geliyê Erkîlanê leşkergeha xwe damezirand. Li vir Kurdên Beluçî û Yûnanî rû bi rûyê hev bûn û Kurdên Beluçî şerê lêdan û bazdanê dan destpêkirin. Piştî şerekî giran, leşkerên Kurdên Beluçî ber bi paş ve vekîşyan. Mîr Cagîn Sarûnî û Mîr Nûrgan Ermîlî bi desteserbazên xwe ve hatin nav Keleha Ermabilê û senger girêdan. Îskender bi lez li pey wan gihîşt wir, bajar dorpêç kir û eskerên wî ji her çar milan ve êrişî ser kelehê kirin û ew girtin. Di van kuştin û kuştariyan de gelek lawên şervan ên Kurdên Beluçî telef bûn.

Şer Li Tengava Hullînê

Piştî dagirkirina bajarê Ermîlanê, tîreyên Kurdên Sarûnî û Ermîlî bazdan Tengava Hulînê ku li vir tîreyên Kurdên Tûran û Mekranê ji bo bi Yûnaniyan re şer bikin berhev bûbûn. Îskender bi eskerên xwe ve zû li pey wan gihîşt wir. Şerekî xwînavî di navbera wan de rû da û Yûnanî bi ser Kurdan de hakim bûn. Di netîceyê de Kurd paşve kişiyân û belavî nav çiyayan bûn. Piştî vê, hemû tîreyên Kurdên Beluçî di Geliyê Galgalê de berhev bûn û xwe ji şerekî mezin re amade kirin.

Şerê Galgalanê Li Navçeya Raskîçanê

Îskender bi eskerê xwe re gelek bi zehmetî Tengava Hulînê derbas kir û li Geliyê Galgalanê leşkergeha xwe damezirand. Ev gelî ketiye navbera Rûbarê Puralê û zincîra Çiyayê Hulînê ku meydana pehn û fireh e. Îskender li vir ma û çaverê dikir ku leşkerê deryayî bigihê qeraxên Raskîçanê ku bi geliyê Galgalê ve bû û lenger bavêje, piştî leşkerê reşayî û deryayî bi hev re şewrê bikin ku piştî berhevkirina agahdariyên li ser rê, bi rê bikevin.

Kurdên Beluçî ku li çiyayê Geliyê Galgalê berhev bûbûn, dest bi êrîşa ser leşkerê Îskender kirin. Şerê lêdan û bazdanê pênc şev û pênc rojan domand. Sê şevan li ser hev êrîşî ser leşkergeha Îskenderê Makedonî dikirin û berê beyanê vedigeriyan kemînên xwe û di nav gelî û çiyayan de xwe vedişartin. Ev jî ji bo wê bû ku eskerên Yûnanî nerihet bikin û bêxew bihelin û di rewşa bêxewiyê de bimînin û bergiriya wan têk biçê. Roja pêncan serleşkerê Kurdên Beluçî berê beyanê bi 25 hezar eskerên siwarî ji sê milan ve pêlên êrîşê birin ser leşkergeha Îskenderê Makedonî û bi awayê rêzbandê şer dest pê kir. Destpêkê rêza yekem êrîşî ser dijmin kir, piştî rêza duyem hereket kir û rêza sêyem jî li pey rêza duyem bi rê ket. Hemûyan bi hev re êrîşî ser dijmin kirin û rojê gelek giran bi eskerên Yûnanî dan jiyandin. Êvarê şer temam bû û 10 hezar

pehlewan û lawên Kurdên Beluçî ku şerker, aza, bi tecrûbe, rêzşikên û xwebextker bûn, ji bo bergirî û parastina niştimanê xwe wekî cengawer daketin meydanê û giyanê xwe ji dest dan. Di vî şerê xwînrij, tirsnak, dilbirîn û dilaza de, serekên tîreyên Kurdên Biraxoyî Mîr Cagîn Sarûnî û Mîr Açaq Girişkanî giyanê xwe ji dest dan û di dîroka fedakariyê de navê xwe dan qeydkirin.

Karbidestên Îskenderê Makedonî Li Tûran û Mekranê

Dema ku Îskenderê Makedonî navçeyên xwarê yên Tûranê, yanî Ermabîl dagir kirin, yek ji serdarên leşkerî ku navê wî Hîfîsus bû, ew navçe terk kir, ku sistema rêveberiya vê navçeya nûdagirkirî li gor adet û awayê Yûnanî bê meşandin. Îskender piştî hat nav erdê Mekranê û serleşker Epalifanîs wek fermanrewayê vî welatî tayîn kir.

Destbikarkirina Kisandus Wekî Fermanrewayê Tûran û Mekranê

Piştî Îskenderê Makedonî koça dawiyê kir, serleşkerekî navê wî Sîlukus derket ser textê desthilata Mad û Parsê. Wî ji ji aliyê xwe ve piledarekî leşkerî, Kisandus wek rêveberê Tûran û Mekranê hîlbijart. Piştî vê Kisandus hat Mekranê û desthilata van herdu hikûmetan girt destê xwe.

Şert û Mercên Neguncayî yên Kurdên Beluçî yên Tûran û Mekranê

Piştî têkçûna paşatiya Hexamênşîyan, fermanrewayên Yûnanî li seranserê welatê wan hatin ser kar, guherîn di awayê rêxistina Hexamênşîyan de kirin û di cihê wê de awa û adetê rêxistina Yûnaniyan bi zorê bi ser Mad û Parsê de bi cih kirin. Çi teref û milekî ku dijîti bikira, desthilat û karbidestên Yûnaniyan êrîşî ser wan dikirin. Ji ber vê, bi giştî di welatê Mad û Parsê de ewlekarî û aştî nedihat dîtin û bazara şer û

qirênan, kuştin û birînan berdewam dikir.

Kurdên Beluçî yê Tûran û Mekranê jî di peyrewkirina awayê rêveberiya Yûnaniyan de bêdil û bi êş bûn û amade nebûn teslîm bibin. Ev jî bûbû sebebê wê ku Yûnanî ji wan dilreş û bi kîn bin û di rewşeke nelibar û bêçare de bijîn.

Êrişa Silukus (Selefkos) a Ser Welatê Hindê

Silukusê serleşkerê Yûnanî hêj midetekî dirêj li ser fermanrewatiya Mad û Parsê derbas nekiribû pozbilindî dikir û nazî bi bihêzî û xurtiya xwe dikir û ji ber firehiya wasite û melzemeyên ji selteneta fireh û mezin xwe ji welatê Hindê jîrtir dizanibû. Vê jî wisan kir ku bêyî tu tehqîq û bîrweriyê bi lez êriş bike ser Hindê. Lê Çenderan Gubtan Moryan ew şikand û dema ku zanî şiyana wî ya li hember sekinandinê nemaye û his bi şaşî û rewşa nerastiya xwe kir, daxwaza aştiyê kir û herêmên rojhilatê selteneta Mad û Parsê ku bi welatê Hindê ve bûn, wekî cirma şer (tezmînat) da paşayê Hindê. Bi vî awayî welatê Tûran û Mekranê jî bin desthilat û fermanrewatiya welatê Mad û Parsê derket û ket bin desthilata welatê Hindê.

Kurdên Beluçî Di Bin Desthilata Welatê Hindê de

Ev guhertina siyasî, fermanrewatiya Kurdên Beluçî rû bi rûyî asteng, dijîtî û giraniyên awa awa kir. Ji ber ku di serdemên kevn de welatên serkeftî ew adet bi kar anîne ku dema welatekî nû bihata bin desthilata wê, ew rûniştîyên eslî yê wê navçeyê vediguhestin welatê wan û li cihê wan ên ji neteweya xwe li wir bi cih dikirin. Di vê rewşê de, du rê li pêşiya Kurdên Beluçî hebûn: Yekem, xwe bidin destê desthilatdarên Hindê û stûxwariyê ji desthilata hozên Hindê re bikin. Duyem, dijberî wê, bi xurtî serxwebûna xwe biparêzin û wê ji dest nedin û ji bo berdewambûna wê bixebitin. Kurdên Beluçî rêya duyem hilbijartin û ji bo mayîn û berdewambûna serbestiya xwe, dest bi têkoşîn û peydakirina rêçareyekê kirin.

Hatina Tîreyên Hindî ya Navçeya Tûran û Mekranê

Dema ku berpîrsiyarên Hindê desthilatdariya rêveberiya Mîrnişîna Tûran û Mekranê girtin destê xwe, hatina tîreyên Hindê li navçeya Tûran û Mekranê dest pê kir. Kurdên Beluçî di serdemên kevn de ji wan tîreyan re “Sindan” an “Cidgal” digotin. Van tîreyan wekî mûriyan êrîşî ser erdê Tûran û Mekranê kirin û Kurdên Beluçî bi temamî ji Mekranê derxistin. Herêmen navend û xwarê Tûranê jî ku bi navê “Xuzdar” û “Ermabil” dihatin nasîn, dagir kirin û Kurdên Beluçî ji wir jî derxistin. Lê nikaribûn herêmen bakurê Tûranê ku bi navê Kîkanê dihatin nasîn dagir bikin. Ji ber wê hemû ew tîreyên Kurdên Beluçê ku şikestibûn, di vê herême de berhev bûn û tîreyên Kurdên Zabilistanê jî, yanî Sebahî, Sincawî, Sifarî û Zengene, ji bo alîkarî û hatina hawara birayên xwe yên Beluçî hatibûn navçeya Kîkanê. Ev jî bû sebêbê wê ku hêza wan a bergiriyê zêdetir bibe û Cidgalî ne xwediyê wê himetê bûn êrîşî ser Kurdên Beluçî bikin.

Sebebê Alîkariya Kurdên Zabilistanê

Ji rojhilat û başûr ve sînorê Zabilistanê bi Tûran û Mekranê ve bû û fermanrewayê Zabilistanê Mîr Birsan bi eslê xwe Kurd bû û dema ev rewşa neguncaw a Kurdên Tûran û Mekranê dît, dilê wî şewitî û têkçûna wan wek bêhêziya nijada Kurd zanibû. Her wiha, ji wê jî agahdar bû ku bi têkçûna temamê Kurdên Tûran û Mekranê, morala Cidgalan bilind dibe û wan han dide êrîşê binin ser Zabilistanê jî. Ji ber van sebebên, xwe ji bo hevaltîya Kurdên Beluçî amade kir û bi rê ket.

Şerê Giran ê Suhrabadanê

Piştî dagirkirina welatê Mekranê û navçeya başûr û navenda welatê Tûranê, Cidgalî li Suhrabadê berhev bûn û serekê wan Mîr Egmaran li keleha Nixanê bi tîreyên Binyan, Miwîdan û Tagîn ên niştecihên Bûbû û bi karbidestên xwe re

di nav tevgerê de bûn ku çawa êrîşê bibin ser Kîkanê paytexta Tûranê. Xebera vê planê gihîşt Kurdên Beluçî û gelek bi lez êrîşî ser Sûhrabadanê kirin û li hemberî leşkergeha Cidgalan leşkerê xwe ji bo şer rêzbend kirin. Berê beyanê hemûyan bi hev re êrîşê birin ser leşkergeha dijmin û şer dest pê kir. Mîrê Zabilistanê Mîr Birsan bi tîreyên Kurdên Sebahî, Sincawî, Sifarî û Zengene êrîşî ser şaxê rastê yê dijmin kir, mîrê Tûranê Mîr Kîkan bi tîreyên Kurdên Biraxoyî êrîşê bir ser şaxê milê navenda leşkerê dijmin û mîrê Mekran Mîr Kîba bi tîreyên Edreganî, Mamilî û Kirmanî pêlên êrîşê birin ser şaxê çepê yê leşkerê Cidgalan.

Vî şerî sê rojan dewam kir, Cidgalî şikestin û paşve kişyan. Piştî mîrê Cidgalan hêza berxwedanê bi xwe re nedît û daxwaza aştîyê kir û li gor peymana aştîyê Geliyê Suhrabadanê kirin sînore navbera navçeya Kurdên Beluçî û Cidgalan. Tê gotin ev şer di sala 290'ê beriya zayînê de rû daye.

Girêdana Navçeya Kîkanê Bi Mîrnişîna Zabilistanê Ve

Piştî hatina Yûnaniyan û tîreyên Cidgalanê Sindanê, şîrazeya hozîtî/bulkî ya Kurdên Beluçî li Mekran û Tûranê tîk çûbû û ji bîngeha xwe derketibû. Serek û serdarên Kurdên Beluçî ku dinyadîtî, bi tecrûbe, karzan û tîgihîştî bûn, di şerên Yûnanê û Cidgalan de giyanê xwe bexşî bûn. Mîr Rasin Mişkanî di şerê bi Kiraytursê serleşkerê Yûnanî re li Tengava Milanê hatibû kuştin, li milekî din Mîr Cagîn Sarûnî, Mîr Açaq Girişkanî, Mîr Bolan Mamilî û Mîr Tûran Kirmanî di şerê Îskender Paşayê Yûnanî de şehîd ketibûn û her wiha Mîr Şadîn Xuzdarî, Mîr Nûrgan Ermilî û Mîr Berûz Bolanî di şerê xwînavî yê Suhrabadê de hatibûn kuştin. Di nav serekên Kurdên Beluçî de tenê Mîr Kîkan Kîkanî û Mîr Rûşî Goranî di van lêdan, kuştin û kuştariyan de sax mabûn û nehatibûn şehîdkirin. Ji ber wê awayê rêkxistinê hozîtî ya Kurdên Beluçî

têk çûbû, nikaribûn siyaset û rêveberiya xwe bêyî alîkariya
milekî din bimeşînin. Ji ber wê wan tu çareyeke din peyda
nekirin, ku navçeya Kîkanan bi Mîrnişîna Zabilistanê ve
girêbidin.

BEŞA PÛNCEM

ŞARISTANIYETA KURDÊN BELUÇÎ

Dînê Kurdên Beluçî

Dînê Kurdan beriya koçkirina wan a navçeya Madê, gelek tarî û nediyar e. Lê piştî hatina wan a navçeya Madê, li şûnewar û nişanên wan derdikeve ku Ahûraperest yanî ronahîperest bûne, ji ronahiyê hez kirine û ji tarîtiyê tirsiyane û pê dilteng bûne.

Bêjeya ahûra ji “a” û “hûr” ayê pêk hatiye. Hûr tê maneya agir û “a” jî tê maneya “hatî”, yanî rastiyeke ku ji agir hatibe. Ev rastî çi ye? “Ronahî” ye. Kurdan agir hêmayê wê rastiye zanîne. Yanî ronahî pîroz zanîne û perestine. Roj jî her ji ber vê ku nişana rastiya ronahiyê ye pîroz zanîne û perestine.

Dema ku Kurdên Beluçî jî li Tûran û Mekranê bi cih bûn, dînê xwe pêşve birin û dînê pûtperestiyê yê Tûranan jî ku beriya hatina Kurdan li van wilayetên belav bû, terk kirin.

Adetê dînî yê Kurdan gelek sade û hêsan bûye. Di rojekê de sê caran, di wextê rojhilatê û rojavayê û nivroyê de, agir diperestin. Navê perestgeha wan “Arîn” a ji “ar” ê hatiye bûye. Ji pasevanên agirdanga perestgehê re digotin “Arîwan”. Bi giştî di her bajêr û gundî de agirdangek hebûye.

Li wilayeta Tûranê du perestgehên mezin ên bi navê “Arîn Zawk” û “Tarîn Helwan” hebûne ku fermanrewayên Kurdên Beluçî li bajarê Kikan û Xuzdarê ava kiribûn. Ev herdu perestgeh li serê kopa çiyayê Zawk û Helwanê ava kiribûn. Kurdên Beluçî ev herdu perestgeh gelek pîroz dizanîn

û di salekê de du caran, di demsala bihar û payîzê de, ji hemû milên Tûran û Mekranê ji bo ziyareta vê perestgehê dihatin. Bi hatina xwe re jî, diyarî û xwarinên zêde dianîn û çendîn roj di vê perestgeha pîroz de dua dikirin û mijûlî perestina Yezdan dibûn.

Awayê Avakirina Avahiya Arînê (Perestgehê)

Ji ber urf û adetên dînê Kurdên Beluçî gelek sade bûye, awayê duristkirina perestgehan jî di warê xemilandin û neqîşkirina hindûr de pak bûye.

Kurdên Beluçî di dîndariyê de tewsîrî nekirine. Her ji ber wê avahiyên perestgehên wan fireh û bilind bûne, bi awayê çargoşeya çik a kenardirêj hatine avakirin, tê de bi şev û roj agir kirine û xelk ji bo perestina Yezdan ku ronahiyê ji nûra Wî dizanin, diketin hundirê perestgehê. Di navenda hundirê perestgehê de bazinek hebû ku tê de sê agirdan hebûn, hemû wextan agir tê de vêdîket. Xelkê perestgehê jî li dora vî bazinî rûdiniştin û nûra Yezdan dipereştin.

Ûrf û Adetên Kurdên Beluçî

A- Kurdên Beluçî baweriya wan bi jiyana piştî mirinê tune bûye û mirin ji ber qetandina peywendiyên berdewamî ji Ehrîmen zanîne. Di destpêkê de laşê miriyan neşûştine, danîne ser kevirekî yan li cihekî bilind ku teyr û ajal bixwin û careke din bibin beşek ji laşê jîndaran. Lê piştî, ev adet terk kirine û mirî kirine nav kûpek mezin û di nav çiyayan de veşartine.

B- Adetê mehrbirînê di nav wan de ne belav bûye. Ji bo dawetê, tenê rizamendiya herdu aliyan yanî jin û mêr û bav an serêkê malbatê pêwîst bûye.

C- Zêde jinanîn di nav Kurdan de ne qedexe bûye, lê çêbûna neşer'iyê (zina) bi giranî qedexe bûye.

D- Bi dê, xweh û keça xwe re nezewicîne û zewac bi wan re

heram bûye.

- E- Adetê sinetkirinê di nav wan de belav nebûye.
- F- Keçan heta dema balixbûnê şalvar li xwe nekirine.
- G- Kuran heta temenê balixbûnê piştîni li piştî xwe girênedane û di şer de kuştina wan qedexe bûye.
- H- Kurdên Belucî di warê pişeyê de koçer û xwediyê keriyên bûne. Gelek zêde pez û dewarên wan hebûye û bi erebeyên du teker geriyane.
- J- Kurdên Beluçî niştecihê yek cihî nebûne, ji ber wê jî çûne zozan û germiyanan.
- K- Piştî ku derbasî jiyana bajêr bûne, dest bi jiyana ziraetê, baxvanî û darçandinê kirine. Lê li gel wê jî ji bo zexîrekirina avê, bendavên avê ava kirine ku bi dîtina wan mirov ecêbmayî dimîne.
- L- Desthilata malbatê di destê bav û mezinê malbatê de bûye. Piştî serekên hozan jî di çareseriyê problemên girîng de xwedî biryar bûne. Di hemû problemên hundirîn ên din de, desthilata çaresirkirinê bi temamî di destê serekên hoz û rihspîyan de bûye.
- M- Dema ku di bin desthilata siltanekî de bûna, tenê serekên hozan li milê peywendîdar li gel siltan bûye. Ev milê peywendîdar jî peywendî bi kar û barên siyasî û mirî yên wekî şer, aştî, bac, leşker û nimûneyên vê bûne.
- N- Bi pere re ewqas zêde nasîna wan tune bûye. Pêdawistiyên xwe bi rêya guhertina kelûpelan bi dest xistine.
- O- Cilûberg û pêlavên wan sade ji hirî û postên heywanên xwemalî û kûvî çêkirine.
- P- Jinên wan di karûbarên rojane de mil bi milê mêran kar kirine.
- R- Çekên Kurdên Beluçî ji tîr û kevan, gurz, şûr, xencer, şirîtên nêçîrê û berqenîk pêk hatine.

- S- Adetê halgirtinê¹⁴: Adetê halgirtinê di nav Kurdên Beluçî de belav bûye. Dema ku kesekî xerîb hatiye nav bajarekî yan gundekî û çûye mala kesekî, xwediyê malê piştî bixêrhatinê, xebera sefera wî jê pirsîye. Bi vê rêyê xwediyê malê sebebê hatina wî zaniye.
- Ş- Adetê Hulê: Kurdên Beluçî xwediyê leşkerê her dem amade nebûne. Ji ber wê, di esnayê şer de bi rêya delalan xebera şer di nav welat de belav kirine û serbazên Kurdên Beluçî agahdar kirine. Bi vî awayî ji yê xeber gihandî re “hul” gotine. Hul bêjeyeke Kurdî ye ku tê maneya eşkerekirinê. Di esnayê adetê hulê de, cihê berhevbûna serbazan jî hatiye diyarkirin. Bi vî awayî, serbazên leşkerî yên Kurdên Beluçî jî li wî cihî berhev dibûn.

Ziraeta Kurdên Beluçî

Di destpêkê de dema ku Kurdên Beluçî ji naverasta Asyaya Biçûk koç kirin û hatin Madê, wekî pişe koçer û şivan bûne, mal, serwet û dewlemendiya wan ji pez û dewaran pêk hatiye. Bi ziraetê re mijûl nebûne û bi erebeyên duteker sefer kirine.

Lê dema ku di sala 850'yê beriya zayînê de mîrê mezin ê Kurdan Keyqubad bingeha selteneta Madê danî û êrişî ser welatê Tûranê kir û karîbû ji ortê rake û welatê wan dagir bike, guhertin bi ser de hat. Ew welat ev bûn: Suxdistan, Kalibistan, Zabilistan, Tûran û Mekran. Keyqubad piştî tîreyên Kurdên Beluçî yên Biraxoyî, Edreganî, Mamilî û Kirmanî li wilayetên Tûran û Mekranê belav kir. Ev tîreyên hanê li Tûran û Mekranê bi cih bûn û piştî dest bi karê ziraetê kirin. Ji bo vê mebestê jî karêz kolan, bendên avê girêdan û îstifadeyeke zêde ji berhemên ziraetê bi dest xistin.

¹⁴ Nivîskar vî adetî wek “xall girtin” daye nasîn ku di Kurdiya vê serdemê de jî wek “hall girtin” yan “hewall/xeber pirsîn” tê gotin.

Zimanê Kurdên Beluçî

Kurdên rojhilatê yanî Kurdên Madê bi eynî zimanî axivîne ku Avesta pê hatiye nivîsandin. Dema ku Kurdên Biraxoyî, Edreganî, Kirmanî û Mamîlî hatin nav erdê Tûran û Mekranê, her bi wî zimanî diaxivîn. Ji ber vê, xelkê xwemalî navê wan kirin “Kurdgal”, yanî ew xelkên ku bi Kurdî diaxivin.

Vegoter neqil dikin ku dema Keyqubadê paşayê Madê welatê Tûranê dagir kir û Kurdan desthilata wilayeta Tûran, Mekran û Zabilistanê girtin destê xwe, hinek ji hozên Tûranî, Tûran terk nekirin û neçûn Suxdistanê ku niştimanê eslî yê bapîrên wan bû û fermanrewatiya Kurdan qebûl kirin. Ew hozên Tirkan ên koç nekirin, navê wan bi vî awayê xwarê ye:

Girgawî, Gindarçî, Hengasartî, Mucark, Rezendak, Semîxan, Sûrxan, Mendxan, Dahîmak, Retgasartî, Mîmûcandik, Cûgman, Hûnak, Cesfak, Bezincek, Elyatûn, Kawkan, Erzeng, Sarxûn û Kaldaş.

Van hozên Tûranî bi Tirkî diaxivîn û piştê teslîmî desthilata Kurdan bûn, tevlihevî bi civata Kurdî re pêk anîn û hewceyê hevdû bûn. Vê jî mebesta peywendiya biratiya navbera wan xurtir kir.

Ev tevliheviya Kurdên Biraxoyî bi hozên Tûraniyan re bûye sebebê guherîna zimanê wan. Van herdu zimanan yanî Tirkî û Kurdî tesîr li ser hevdû dikirin û bi rewşa serdemê re, Kurdên Biraxoyî peyvên Kurdî û Tirkî pêşve birin.

Sîstema Leşkerî ya Kurdên Beluçî

Di desthilata Madî de parêzgerî, bergirî û ewlekariya hundirê welat, li hemû wilayetan awayê leşkerî yê Kurdan wekî hev û yeksan bûye. Artêş ji mêran pêk hatiye û xortên hozên Kurd ji bo eskeriyê dihatin wergirtin û serek û serdarên bi sal de çûyî, dinyadîtî, rêkxer û xwediyê tecrûbeya şer dibûn rêveber.

Ew desteyên hozên Kurd ku pîr û rihspî bûn û ji ber

bêhêziyê xwediyê şiyana beşdariya şer nebûn, di dema şer de çavdêriya jin û zarokan û jinên şahan dikirin. Her wiha erka pasewanikirina terşê, dewarên bar, kêlgeh/çiflik û zeviyan li ser milê wan bû.

Nûnertiya Artêşa Kurdên Beluçî

Artêşa Kurdên Tûran û Mekranê bi ser çend beşan ve hatibû parvekirin. Ji her beşa leşker re “bulik” gotine ku navê wan bi vî awayî bûye: Kîkan Bulik, Goran Bulik, Sarûn Bulik, Xuzdar Bulik, Mişkan Bulik, Ermil Bulik, Bolan Bulik, Girîşkan Bulik, Edregan Bulik, Mamil Bulik û Kirman Bulik. Li ser alaya wan wêneyê serê piling hebûye.

Bulik ji çendîn tîre/tayfe, tîre ji çendîn berebab/eşîret, berebab jî ji çedîn “şalwar”an pêk hatiye. Ji xêzanê bavekî re ku çendîn zarokên wî hebûne, şalwar gotine. Bi vî awayî, şalwar jî xortên çend yek bavî pêk hatiye. Ji eskerên çend şalwarên tîre û berebabe “parîn” pêk anîne. Ji eskerên çend parîne tîreyê “cuk” pêk hatiye û ji cukên hozê jî “bulik” pêk anîne.

Leşkerên Kurdên Tûran û Mekranê bi ser du beşan ve parve bûne: Serbazên peyade û siwarî. Ji van du beşan re gotine “payî” û “siwares”ê leşker. Leşkerên siwarî wek tîravêj, şûrweşên û berqenîavêj ji sê desteyan pêk hatiye. Di şer de şûrweşên li pişt tîravêjan disekinîn û hevkarîya wan dikirin. Li pişt wan jî berqenîavêj di kemînan de disekinîn. Berqenîavêj ew desteya leşker bûne ku bi berqenî dijmin berbaran kirine. Leşkerên vê desteyê ewqas bi lezgîni berbaran kirine ku dijmin nikaribûye xwe li ber ragire û şikestiya.

Leşkerên siwarî wek siwariyên barsivik û siwariyên bargiran ji du desteyan pêk hatiye. Siwariyên bargiran hemû awa çek hilgirtine û siwariyên barsivik jî tenê tîr û kevan an rim hilgirtine.

Kurdên Beluçî tu leşkerekî wan ê timî tune bûye, helbet hêzeke biçûk a serbazî hebûye ku bi navê Pasevanê Sindan

dihat nasîn û ji tîreyên Kurdên Beluçî pêk hatibû. Ev hêz li ser sînorê hevbeş ê Tûran û Sindanê hatibû bicihkirin û erka wan dîdevaniya wan sînoran bûye, ku di dema êrişê dijmin de îmkana bergiriyê hêsan bikin.

Navê pileदारên/rutbeyên leşkerê Kurdan bi vî awayî bûye:

Seranmîran,

Seranbulik,

Serancuk,

Seranparîn û

Seranşalwar

Sîstema Medenî/Sîvîl a Kurdên Beluçî

Sîstema leşkerî û medenî ya Kurdên Mekran û Tûranê hevawa bûye. Cihêtiya wan tenê ew bûye ku peywendiya sîstema leşkerî bi bergirîkirina welat ji êrişin dijmin û peywendiya medenî jî bi rêveberiya medenî ve hebûye.

Sîstema medenî/sîvîl a Kurdan li ser bingeha peywendiya biratiya navbera hozan hatiye avakirin. Hoz ji tîre, tîre ji çend berebab û berebab jî ji çend malbatan an “xelek”an pêk hatiye. Ji hozan re gotine “timin/tumen” an “bulik”, ji tîreyan re gotine cuk, ji berebaban re gotine parîn. Her parînek jî ji çend şalwar an helekan pêk hatiye.

Di sîstema medenî de, hoz di bin desthilata serekekî mezin de bûne ku bi nasnavê/leqebê “mîrmîran/mîrêmîran” hatiye nasîn. Her hoz, tîre, berebab û şalwarek jî xwediyê serekê xwe yê taybet bûye ku Kurdan jê re gotine mîran, sergul, kimaş û wace. Her bi vî awayî sîstema medenî ya Kurdên Beluçî hatiye birêvebirin.

Mezra, Gund û Bajarên Kurdan

Di serdema kevn de, di dema desthilatdariya Madê de,

wilayetên Tûran, Mekran û Zabilistanê gelek hêşîn, terr û bi bereket bûne, xelkê wan asûde û xweşhal bûne. Li hemû milên vî erdî, mezra, gund û bajar avadan û bi rewneq bûne.

Ji bajarên kevn her çend navên wan hatine gunertin, hinek jê hê jî ava ne. Lê piraniya mezra, gund û bajaran bi rewşa serdemê re wêran û kavil bûne û ji nav çûne û niha tenê şûnewarên wan mane û ji wan re “tepe” tê gotin.

BEŞA ŞEŞEM

ESLÊ KURDÊN BELUÇÎ


Eslê Kurdên Biraxoyî yên Beluçî


Li gor çavkanî û belgeyên dîrokî, Kurd li du beşan parve dibin. Beşa yekem ew Kurd in ku ji aliyê Araratê û zincîra Çiyayên Cûdî ve hatine û di dirêjahiya navçeyên Dicle û Firatê de ji rojavayê heta Sûriyeyê û qeraxên Deryaya Romayê û ji rojhilat heta qeraxên Farsê û rexê Deryaya Umanê belav bûne. Tîreyên eslî yên vê beşê ji Lolo, Gûtî, Kasû û Sûbarî pêk hatine. Ev tîreyên Kurd ji bo ku ji aliyê rojavayê Deryaya Hezarê ve hatine bi navê Kurdên rojavayê tên nasîn.

Beşa duyem ew Kurd in ku ji naverasta Asyayê ve ber bi rojhilatê Îrana wê serdemê ve hatine û ji wir ji rojhilatê Deryaya Hezarê derbas bûne û di başûrê vê deryayê re li navçeya Etropanê belav bûne û bi cih bûne. Tîreyên eslî yên vê beşê jî ji Mad, Nahîrî û Kardoxiyan pêk hatine. Ev welatê mezin û fireh jî ku tê de bi cih bûn ji ber navê Madê wek Madayî yan Mêdya hatin nasîn. Ev heft tîre, tîreyên eslî yên Kurd in û di dawiyê de tîreyên şaxên din jê cihê bûne û her yek ji wan şaxan guherîne bûne tîre yan hozek. Ji vê beşa duyem a Kurdan re Kurdên rojhilatê jî tê gotin.

Kurdên Biraxoyî, Edreganî, Mamilî û Kirmanî ji hoza Madê cihê bûne. Ji ber vê em li vir behsa eslê tîreyên din ên Kurdan dirêj nakin û em ê bîr ser behsa eslê hoza Madê.

Di behsa eslê de, em ê ji Hz. Nuh, silav lê bin, dest pê bikin ku piştî tofanê bavê Ademê Duyem ê însaniyetê bûye.





Heşt kurên Mîr Biraxmê Biçûk hebûne: Kîkan, Goran, Sarûn, Xuz, Mişkan, Ermîl, Bolan û Girişkan. Ji ber zêdebûna nesla van heşt kurên Biraxmê Biçûk, heşt tîreyên Kurd ên Biraxoyî yên bi navên: Kîkanî, Goranî, Sarûnî, Xuzdarî, Mişkanî, Ermîlî, Bolanî û Girişkanî hatine nasîn çêbûne. Eslê van heşt tîreyên hoza Biraxoyî bi vî awayê xwarê ye:

- A- Kîkan, Zorak Sengîn, Arîn, Pindran, Raxur, Zîbar, Umran, Sengîn, Xuman, Kîkan
- B- Goran, Şîdan, Başman, Delût, Zînel/Zeynel, Tekş, Kaş, Şîdan, Kusad, Başman, Gîdran
- C- Sarûn, Zîrek, Başûk, Kurtî, Lasîn, Mamiş, Dusek, Sarim, Basîr, Daxur, Zaxu
- D- Xuz, Ewram, Lasîn, Duxan, Katîn, Gîwer, Xuz, Gurus, Mahêk, Zûçap, Mihran
- E- Mişkan, Eyle, Ûkî, Mişkan, Eyle, Başar, Mirdas, Gîlek, Tûrab, Kuyan, Mişkan
- F- Ermîl, Merzek, Zirwan, Kuyan, Mengur, Sabûl, Merzek, Zirwan, Kaş, Şawil, Ermîl
- G- Bolan, Zînel/Zeynel, Bûzik, Kazan, Melîl, Karçî, Şagan, Şûhan, Kirmac, Bûzik, Bolan
- H- Girişkan, Berûz, Basîr, Kij, Bolan, Berûz, Girişkan, Kireck, Maxan, Çirmûk, Lertzîn

Paşatiya Malbata Pişdadiyan

Dema Madî ber bi navçeya Etropana xwarê Deryaya Hezarê ve koç kirin û li wir bi cih bûn, ji ber bicihbûna wan navçe bi navê Madê hat nasîn û nav û deng da. Ev navçe ketiye der û dora bakur û başûrê Esbehan (Esfehan) û Ekbetanê (Hemedan).

Ev desteya Kurdan di destpêkê de beş bi beş bûne û her beşek xwediyê serekê xwe yê taybet bûye. Pişeya wan

xwedîkirina heywanan bûye û xwe gelek bi çalakiya siyasî ve mijûl nekirine û di bin desthilat û fermanrewatiya Kilde, Asûrî, Babil û Elamê de jiyana xwe derbas kirine. Lê piştî têkçûna fermanrewatiya van malbatan, welatê Mad û Parsê ji bin destê wan rizgar bûne û cara yekê malbata xwemalî ya Mad û Parsê ya bi navê “Pişdadî” hatiye nasîn, paşatiya xwe li Mad û Parsê damezirandiye û heta şeş piştan fermanrewayî kiriye.

Cemşîd damezirînerê dewleta Pişdadiyan bû û navê padişahên vê malbatê bi vî awayî ne: Cemşîd, Epitan, Feridûn, Menûçehr, Tehmasb, Ūştâb û Girşasp. Girşasp dawîn paşayê zincîra fermanrewatiya binemala Pişdadî bûye. Piştî mirina wî, welatê Mad û Parsê duçarî bêhêzî û valahiya desthilatê bûye. Sebebê vê jî ew bûye ku kesek ji malbata Pişdadiyan tune bûye layîqê textê seltenetê be.

Wê wextê, Efrasyab li Tûranê paşa bûye û xelkê hozên Kurd û hozên din ên Mad û Farsê rêveberî û desthilatdariya wan pesend nebûye. Ji ber ku Efrasyab paşayekî bedkirdar, bedxwe û xwedî karakterê xerab bûye. Hemû mîr, serek û serdarên Mad û Farsê jî xwestiyarê wê bûne ku welatê Mad û Parsê ji êrîş û miameleyên xerab û ji radeyê der a Aşûr rizgar bibe. Her ji ber vê Keyqubad serekê mezin ê Madên Kurd ku bi zanayî û dadperwerî bi nav û deng bûye, danîn ser textê selteneta Madê. Di netîceya vê berxwedanê de, paşatiya selteneta Mad û Parsê ji malbata Pişdadiyan ketiye destê Madan.

Dîroknivîsan navçeya Madiyan bi navê “Kiyân/Keyan” û malbata Madiyan jî bi navê “Kiyani/Keyani” dane nasîn. Piştî têkçûna desthilata Pişdadiyan, bi giştî serek û serdarên hozên Kurd ên Madiyan û serekên hozên Pars, Gil, Deylem û Hezerê piştî pirs û rawêjkariya dûr û dirêj gihîştin wê netîceyê ku serekê mezin ê Madê Kurd Keyqubad ku bi dadperwerî û karzaniyê bi nav û deng bû, ji bo desthilatdariya textê seltenetê hilibijêrin. Wê wextê, Kurdên Biraxoyî tîreyeke xwedî şiyân

û mezin a neteweya Kurd bûye û li gel rewşa dîrokê heşt berebabên mezin jê hatine dîtin ku navê wan bi vî awayî ye: Kîkanî, Goranî, Sarûnî, Xuzdarî, Mişkanî, Ermîlî, Bolanî û Girişkanî.

Mîrê mezin ê van tîreyan Mîr Kîkan bûye ku ji tîreya Kîkaniyan bûye. Her yek ji tîreyên din hozên Biraxoyî xwediyê serekekî taybet bûye ku navên wan bi vî awayî bûne: Mîr Goran, serekê tîreya Goranî, Mîr Zaxu serekê tîreya Sarûkî, Mîr Mihran serekê tîreya Xuzdarî, Mîr Mişkan serekê tîreya Mişkanî, Mîr Ermîl serekê tîreya Ermîlî, Mîr Bolan serekê tîreya Bolanî û Mîr Lerzîn serekê tîreya Girişkanî.

Ev tîre wekî hozên din ên tîreyên Kurd li navçeya Madê bi cih bûne. Dema ku Keyqubad wekî mîrê mezin ê Madên Kurd hat ser textê selteneta Madê û malbata wî heta şeş piştan paşatî kir, di serdema van paşayên malbata Madê de ku hinek dîroknivîsên kevn wek malbata Kiyaniyan jî nivîsandine, yanî Keyqubad, Keykawus, Tûs, Ferîbûrz, Keyaksar û Azdiyak, eslê mîrên tîreyên Kurdên Biraxoyî bi vî awayê xwarê ye:

- A- Tîreya Kîkanî: Kîkan, Zûrak, Êştab, Zigrîn, Zîbar, Biraxm, Goran
- B- Tîreya Goranî: Goran, Kireck, Şadîn, Kaş, Ramîn, Buxaz, Rasin
- C- Tîreya Sarûnî: Zaxu, Seldûz, Şagîn, Sabûl, Sûrçîn, Manî, Şûhan
- D- Tîreya Xuzdarî: Mihran, Keytûn, Kaşk, Kîçan, Manûr, Gawr, Mihran
- E- Tîreya Mişkanî: Mişkan, Mirdas, Kirecil, Gilbag, Tûrab, Manûr, Beyker
- F- Tîreya Ermîlî: Ermîl, Mişkan, Xuman, Kilecîk, Kirmac, Guren, Kusad
- G- Tîreya Bolanî: Bolan, Bacel, Pûran, Xuman, Keytûn, Tirman, Hekar

H- Tîreya Girişkanî: Lerzîn, Tadí, Zîdan, Berûş, Pazû, Tapîn, Xîzan

Piştî 300 salan, paşatiya malbata Madê dawî lê hat û fermanrewatiya malbata Hexamenşî dest pê kir û Kurişê Mezin ê mirê tîreya Hexamenşî hat ser textê selteneta Mad û Farsê. Paşatiya vê malbatê 230 salan fermanrewati kir û di serdema fermanrewatiya wan de jî eslê serekên tîreyên Kurdên Biraxoyî bi vî awayî bûye:

A- Tîreya Kikanî: Zirşan, Zuran, Ercan, Şamûz, Biraxm, Sabûl, Nûrgan, Kiyanûş, Kikan

B- Tîreya Goranî: Nagan, Dûc, Çirmûk, Kazan, Zeynel, Goran, Mihran, Gîşan

C- Tîreya Sarûnî: Nêrman, Hînar, Kabû, Mirdas, Rîgan, Keytûn, Başûk, Înax, Cağîn

D- Tîreya Xuzdarî: Şîşar, Kaşk, Deylim, Xerzan, Kusad, Mişkan, Beyfil, Kirecl, Şadîn

E- Tîreya Mişkanî: Gurgîn, Bûlûr, Tûtik, Duxan, Katîn, Zirwan, Bûzîk, Biraxm, Rasin

F- Tîreya Ermilî: Bahûr, Amaç, Kembîl, Basîr, Bûlak, Ewram, Uki/Ewkî, Zerîn

G- Tîreya Bolanî: Buxa, Dernîl, Xîzan, Mişkan, Sikran, Sasun, Kelxel, Lakûr, Berûz

H- Tîreya Girişkanî: Semban, Zîdek, Pilar, Maxan, Sarim, Darûn, Nuxê, Bilbas, Açak

Dema ku Îskenderê Makedonî yê paşayê Yûnanî êrişî ser selteneta Mad û Parsê kir û dawî bi fermanrewatiya malbata Hexamenşî anî, ev mirên tîreyên Kurdên Biraxoyî li diji artêşa Yûnaniyan li Mekran û Tûranê şer kirin:

Mirê mezin Mîr Kikan Kikanî, Mîr Rûş Goranî, Mîr Cağîn Sarûnî, Mîr Şadîn Xuzdarî, Mîr Rasin Mişkanî, Mîr Nûrgan Ermilî, Mîr Berûz Bolanî û Mîr Açak Girişkanî.

Eslê Kurdên Beluçiyên Edreganî, Mamilî û Kirmanî

Piştî behsa esil û nijada Kurdên Zengene yên Zabilistanê û kurên Biraxoyî yên Tûranê em ê bên ser behsa eslê Kurdên Edreganî, Mamilî û Kirmaniyên Mekranê. Ev tîre jî ji desteya Kurdên rojhilatê ne û bapîrên wan ên mezin jî wekî tîreyên Biraxoyî û Zengene Mada Biçûk e.

Heft kurên Mada Biçûk hebûne ku navên wan Partasin, Estirûşat, Arîzant, Bûz, Maj, Bûd û Dîlman bûne. Bi rewşa zeman re nesla van heft kuran ewqas zêde bû ku heft tîreyên mezin ên Kurdên Madê jê peyda bûn û bi navê Partasinî, Estirûşatî, Arîzantî, Bûzî, Majî, Bûdî û Dilmî nav û deng dan.

Bapîrê mezin ê hoza Biraxoyî, Biraxm li gel bapîrê mezin ê hoza Zengene, Zengan bira bûne û kurê Bûdê Mada Biçûk bûne. Her bi vî awayî, bapîrê mezin ê tîreya Edreganî, Edregan û bapîrê mezin ê tîreya Mamilî, Mamil û bapîrê mezin ê tîreya Kirmanî, Kirman bira bûne û yek ji heft kurên Mada Biçûk Estirûşat in. Madem wiha ye di warê vê ronîkirinê de ji me re derdikeve ku Kurdên hoza Biraxoyî û Zengene wek Kurdên hoza Edreganî, Mamilî û Kirmanî neviyên du birayên Bûd û Estirûşat in ku ew jî du kurên Mada Biçûk in.

Destpêka eslê tîreyên Edreganî, Mamilî û Kirmanî ji Hz. Nûh dest pê dike:

Bi navê Edregan, Mamil û Kirman sê kurên Estirûşat hebûn ku bi rewşa zeman re nesla wan zêde bû û sê tîreyên bi navê Edreganî, Mamilî û Kirmanî ji wan çêbûn. Eslê van her sê tîreyan bi vî awayê xwarê ye:

A- Edregan, Xesan, Kılçar, Parkan, Cagîn, Semek, Daxur, Şahêk, Bahû, Nûdû, Metek, Sabûl, Çûng, Şikurd, Mindgar, Sindwan, Rûmber, Darûn, Eyle

B- Mamil, Cilabîn, Semek, Çûmber, Hûtan, Zûrak, Ūşab, Zinel/Zeynel, Murrak, Katîn, Bembekan, Kazan, Nida-man, Hûtkar, Sarûn, Hîcwar, Makul, Unkar, Zûng

C- Kirman, Kudan, Şembed, Çilkan, Duşek, Pindran, Der-

abil, Gamûn, Lasîn, Burk, Nûtan, Merzek, Lewza, Kilzan,
Goran, Pirûkir, Rax, Kesetk, Huşar

Dema ku serek û mezinên hozên Kurd mîrê mezin ê Madên Kurd Keyqubad li ser textê Madê dan rûniştandin, Mîr Eyle serekê tîreya Edreganê, Mîr Zûng serekê tîreya Mamilê û Mîr Huşar serekê tîreya Kirmanê bûne. Di şerê navbera paşayê Madê Keyqubad û paşayê Tûranê Efrasyab de hevkarê paşayê Madê bûne. Keyqubad di vî şerî de Efrasyab şikand û selteneta Tûranê parve kir.

Di vî şerî de, wilayeta Mekranê ji aliyê mîrên tîreyên Edreganê, Mamilê û Kirmanê ve hatibûn azadkirin. Her ji ber vê Keyqubad desthilatdariya vî welatî da destê mîrê mezin ê Edreganê.


Di serdema fermanrewatiya malbata Madê de, eslê serekên tîreyên Kurdên Edreganê, Mamilê û Kirmanê bi vî awayê xwarê ye:


A- Eyle, Şîtab, Bûsa, Munhan, Eda, Mubrikan, Semek

B- Zûng, Sûl, Pijgan, Şahûl, Şexel, Tûhû, Nûkef

C- Huşar, Tigran, Sûran, Ladî, Ewram, Kindaf, Satik

Di serdema Mîr Semek Edreganî, Mîr Nûkef Mamilî û Mîr Satik Kirmanî de desthilata malbata Kurdên Madê dawî pê hat û malbata Hexamenşî cihê wan girt û Kurişê Mezin li Mad û Parsê bingeha fermanrewatiya Hexamenşî danî. Peywendiyên Kuriş ên nijadî bi Kurdên Madê re hebû, dayîka wî ji malbata paşayên Kurd ên Madê bû. Ji ber vê sebebê, wî Kurdên şûrweşîn hevalên xwe yên nêzik dizanî û awayê rêveberiya sistema dewletê ya malbata Madê wekî berê hişt. Ev jî ji ber wê bûye ku hestê biyantî û cihêti di navbera Kurdan û malbata Hexamenşîyan de çênebe. Ji bo vê yekê, fermanrewatiya mîrên tîreyên Kurdên Edreganî, Mamilî û Kirmanî li wilayeta Mekranê hevçerxê mîrên din ên Kurd mane. Di vê serdemê de, eslê serekên tîreyên Kurdên Edreganî, Mamilî û Kirmanî bi vî awayî ye:





- A- Semek, Cadî, Hûnran, Cîsan, Sûsin, Pirtûs, Tîbar, Nûtan
 B- Nûkef, Tigê, Hîrend, Mundan, Girsan, Tûfan, Melman, Bitû
 C- Satik, Mekal, Şahûl, Bûjîr, Helîkan, Cîsan, Serengan, Şir-
 ban, Adman, Tûran

**Peywendiyên Di Navbera Kurdên
 Tûran û Mekranê De**

Kurdên Biraxoyî yên Tûran û Kurdên Edreganê, Mamilê û Kirmanên Mekranê hevnişad bûn. Ji ber vê, di serdema fermanrewatiya wan de, peywendî û danûstendinên navbera wan gelekî nêzik û birayane û hevrêyane bûne. Ev pênc tîre neviyên yek bapîrî bûne ku ew jî Mada Biçûk e. Yanî ev neviyên du kurên Mada Biçûk: Bûd û Estirûşat in. Tîreyên Biraxoyî û Zengene neviyên du kurên Bûd; Biraxm û Zengan in. Tîreyên Edreganî, Mamilî û Kirmanî jî ji berê sê kurên Estirûşat; Edregan, Mamil û Kirman in.

Ev tîreyên Kurd, nêzikî pêncsed salan li Mekran û Tûranê di du serdemên paşayên malbata Madê û Hexamenşiyê de fermanrewatî kirine, di vê serdema dûr û dirêj de dûçarî hevraz û nişovên zeman, şoriş û bûyerên awa awa yên rojgarê bûne. Li gel vê jî, bêhnfirehî, dilêrî, wêrekî, şehamet û camêrî ji dest nedane û berengarê van asêti û neheziyan bûne. Karîbûne tevlihevî û şer bidin sekinandin û bi hev re yekgirtî bin. Bi vî awayî, bi hevbeşî fermanrewatiya Tûran û Mekranê kirine û tu wextê rê nedane ku di navbera wan de dijîtî, durûyî û biyantî pêk bê.


Nijad, ziman, dîn û urf û adetên van Kurdan wekî hev bûne û xwediyê civateke hevawa bûne. Di esnayê tengî, bela, nehezî û eziyetê de, ji bo jêderbasbûnê yek ji yê din re bûye destgîr û hevkar.

BEŞA HEFTEM

KURDÊN BELUÇÎ DI SERDEMA PAŞAYÊN SILUKIYÊ (SELEFKOS) YÛNANÎ DE

Pîşdadî

Tê neqilkirin ku Kîwmers bingeha fermanrewatiya Pîşdadiyan li Mad, Pars û Aryana Turkistanê danî û piştî wî neviyê wî yê kurî, Hoşangê kurê Siyamek derket ser textê welêt. Piştî wî Tehmûrs derket ser text. Piştre Tehmûrs koça dawiyê kir, Cemşîd birêvebiriya hikûmetê girt destê xwe. Piştî wî, Aptiyan hat ser textê fermanrewatiyê û piştre wî jî koça dawiyê kir û kurê wî Ferîdûn derket ser text ku karibû Zuhakê Tazî¹⁵ bişikîne û di zindanê de bend bike û xelkê ji sitem û destdirêjiya wî rizgar bike.



15. Tazî bi Farisî tê maneya 'Ereb an Tancî.

Du kurên Ferîdûn ên navê wan Tûr û Îrec hebûn û wî seltenet di navbera wan de parve kir. Di vê parvekirinê de Turkistan û Xizran da Tûr û Mad, Pars û Aryan jî da Îrec. Zincîra bingeha Pîşdadiyan bi vî awayî ye:

Tîreyên Sindanê

Tê ravekirin ku çendîn kurên Hamê kurê Nûh hebûne. Navê yek ji wan kuran Sindan bûye û bi mebesta peyda kirina cih û warekî hatiye erdê Sindanê û tê de bi cih bûye. Navçe ji ber bicîhbûna wî li wir bi navê Sindan hatiye nasîn. Bi re- wşa serdemê re, hejmara neviyên Sindanê kurê Ham ewqas zêde bûye ku bi ser sê tîreyên mezin ve parve bûne û bi navê Binyan, Takîn û Mûmîdan nav û dengê wan belav bûye û li navçeyên cihê yên Sindanê belav bûne.

Navçeya Tûran û Sindanê hevsînor in û ji demên kevn ve peywendiyên xelkê van herdu wilayetan bi hev re hebûye. Ji ber wê pêwîst e em behsa wê jî bikin. Di serdema Keyqubadê Kurdê Madê de ku Kurdên Biraxoyî wilayeta Tûranê dagir kirin û tê de bi cih bûn, ev tîreyên Sindanê bûn ku navê “Kurdgal” li Kurdan kirin û Kurdan jî navê “Cidgal” li wan kirin ku di netîceyê de di navbera wan de dostanî û peywendiyê dest pê kir.

Li welatê Sindanê serekên van tîreyan fermanrewayî kirine û bingeha van tîreyan bi vî awayê xwarê ye:

Bingeha Binyan: Nûh silav lê bin, Ham, Sindan, Binyan, Langan, Maçan, Nahir, Dahir, Mahir, Diharî, Sihtan, Ebran, Cûkan, Sûdan, Enran, Cûna, Samra, Ebra, Bimban, Cuxaran, Hinbî, Bûrra, Hirçender, Singhar, Siyakir, Matan, Bingan, Êsayû, Esyar, Bûlra, Bagarm, Cûbin, Bicra, Kindabûc, Kiksû, Gûpî, Pirmîl, Ceşel, Cibîn, Agmaran.

Bingeha Takîn: Nûh silav lê bin, Ham, Sindan, Takîn, Bûngan, Singar, Ratûr, Damaç, Dekya, Cisûdan, Maç, Sûmir, Mestûn, Kilwar, Etar, Dirig, Mayîn, Bûtnî, Siyala, Erîn,

Cuya, Awan, Xerel, Kitper, Benger, Kirpal, Tûnyan, Min-
cûn, Çaçir, Îrî, Kiran, Samit, Derpal, Subran, Cettan, Me-
sen, Ûtran, Siyanc, Mîsrû.

Bingeha Mûmîdan: Nûh silav lê bin, Ham, Sindan, Mûmîdan,
Engaran, Mûmidra, Gûnga, Bûrdî, Şahûk, Sexan, Rûncan,
Wuçan, Duda, Bexra, Bûrra, Camatî, Şapt, Mûtîk, Gîdûra,
Mûna, Wahû, Çetta, Engîr, Eçra, Pela, Kurk, Ûçanî, Gur-
dan, Dindu, Dikhîr, Geccer, Herîpal, Kurîpal, Ûdana,
Hudkir, Waçir, Sumer, Sebibra, Mûndir, Gîdran.

Serkeftina Cidgalan Li Ser Tûran û Mekranê

Dema ku Îskenderê Makedonî selteneta Mad û Parsê da-
gir kir û dawî li fermanrewatiya malbata Hexamênşî anî, di
vegera xwe ya ber bi Yûnanê de li Babilê koça dawiyê kir û ji
ber nebûna cihgirekî wî, serleşkerên selteneta mezin û fireh
ew seltenet di navbera xwe de parve kirin. Di vê parvekirinê
de, Silukus bû paşayê beşa rojhilatê seltenetê ku welatên Mad,
Pars, Tûran, Mekran, Kabilistan û Zabilistanê diketin ber. Lê
heziya dagirkirina welatan çavê Silukus tarî kiribû û çavgirtî
êrişî ser Hindistanê kir û şikest. Di netîceya vê şikestinê de
Silukus wilayetên Tûran, Mekran û Kabilistanê wekî tawanê
şer da paşayê welatê Hindê Çenderan Guptan Morê.

Ev guherîna fermanrewatiyê, Cidgalan, tîreyên Sindanê
han da ku birjîn nav erdê Tûran û Mekranê. Bi êrişanîna ser
van welatan bi Kurdan re ketin şer. Kurdan gelek bi camêrî û
xweragirî parêzgerî li erdê xwe kirin û ji herdu milan gelek
kes birîndar bûn û hatin kuştin. Hejmara Cidgalan bi awayekî
wisan zêde bû ku Kurdan nikaribûn bi ser bikevin û Cidgalan
hemû wilayeta Mekranê û xwarê naverasta Tûranê heta mel-
benda Geliyê Suhrabadanê dagir kirin û Kurd ji van navçeyan
derxistin.

Kurdên Beluçiyên Mekran û Tûranê li navçeya bakurê
Tûranê û Kîkanê berhev bûn. Wê wextê Kurdên Zabilistanê ji

bo piştgirî û destgiriya birayên xwe yê Kurd hatin Kîkanê û bi hev re êrîş birin ser leşgergeha Cidgalanê ya li Suhrabadê û piştî şerekî giran karîbûn wan bişikênin. Di netîceyê de tu çareyêke Cidgalan nema û daxwaza haşîtiyê kirin û Geliyê Suhrabadê bû xeta sînorê navbera navçeyên Cidgalê û Kurdan.

Di serdema fermanrewatiya malbata Kurdên Madê de, ev fermanrewayên Sindanê hevçerxê paşayên Madê bûne: Mîr Hircender, Mîr Singhar, Mîr Siyakir, Mîr Matan, Mîr Bingan, Mîr Êsayû, Mîr Esyar, Mîr Bûlra. Piştî desthilatdariya Kurdên Madê, di serdema Hexamenşiyana de ev serekên Cidgalan li Sindanê fermanrewayî kirine: Mîr Bagarim, Mîr Cubin, Mîr Bicra, Mîr Kindabûc, Mîr Kikisû, Mîr Gûpî, Mîr Pirmîl, Mîr Ceşel, Mîr Cibîn, Mîr Agmaran.

Fermanrewatiya Paşayên Silukiyê Yûnanî Li Mad û Parsê

Îskenderê Makedonî, piştî dagirkirina welatên rojhilatê, di vegeza xwe ya ber bi Yûnanê de, li Babilê koça dawiyê kir. Bi nebûna mîratgîrê piştî wî, selteneta mezin û fireh ket ber destê serleşkerên wî û wan jî ew seltenet di navbera xwe de parve kirin.

Ev çarenivîs di berjewendîya sîstema Mîr Silukus de bû û rojhilatê seltenetê ku ji Mad, Pars, Tûran, Mekran, Kabilistan û Zabilistanê pêk dihat, para wî ket. Silukus seltenet firehtir kir û karîbû deştên der û dorê bike bin rikêfa xwe û heta 30 salan bi şikurdarî fermanrewatiyê bike. Her çend piştî wî, neviyên wî nikaribûn vî welatê fireh bi rê ve bibin.

Silukus di dawîn saetên jiyana xwe de dixwaze biçê Makedonyaya niştîmanê bav û kalên xwe. Lê di rê de bi destê mirovekî navê wî Kîranos hat kuştin. Piştî vê bûyerê Antîyakûs hat ser textê bavê xwe û 18 salan fermanrewatî kir û piştî koça dawiyê kir. Li cihê wî kurê wî Antîyakûsê Duyem bû paşa û di dema fermanrewatiya wî de Diyudtûsê dadgerê Baxterê

serî hilda û nasnavê “şah”iyê li xwe kir. Dema ku Mîrên parsê serkeftina dadgerê¹⁶ Baxterê dîtin, liva azayetiye di laşê wan de hat û alaya şoriş û serhildanê hildan. Di netîceyê de ev bûyer bû sebebê wê ku welatê Eşkanî serî hilde û bê damezirandin.

Piştî koçkirina Antiyakûsê Duyem, fermanrewatiya malbata Silukî li Mad û Parsê bêhêz bû û şeq û qelş lê ketin. Di netîceyê de Mîr Eşk, mîrê mezin ê Parsê bingeha fermanrewatiya malbata Eşkanî li Mad û Parsê dani.

Cihê balkêşiyê ye ku fermanrewayên malbata Silukiyê Yûnanî şêl û helwesta dostaniyê bi xelkê Mad û Parsê re domandin û bi dewlemendan re xizmatî pêk anîn. Her wiha, mîrên Madiyan li ser pileya bilind danîn û di nav artêşa xwe de xelkê Mad û Parsê kirin serbaz. Lê li gel van tevan ji, xelkê Mad û Parsê xwe ji bin destê wan rizgar kirin.

Mîrê Wilayeta Zabilistanê Mîr Birsan Zengene

Mîr Birsan, mîrê mezin ê tîreya Kurdên Zengeneyan bû û di serdema fermanrewatiya Hexamenşiyan de wekî mîrên din ên Kurd xwediyê pile û payeyê bû û li welatê Zabilistanê desthilatdarî kir. Dema ku Îskenderê Makedonî selteneta Mad û Parsê anî bin desthilata xwe û li hember malbata Hexamenşiyan bi ser ket, Darayê Sêyem yê dawîn paşayê malbata Hexamenşî bû, hevkarî û hevdestên wî ji tirsê paşdevegera Îskenderê Makedonî ew kuştin.

Bi vî awayî desthilata Mîr Birsan jî li Zabilistanê leqiya û duçarî asteng û nexweşiyên awa awa hat. Lê ji ber ku mirovekî zana û zîrek bû, îstîfade ji vî halê xwe wergirt û xwe da destê Îskenderê Makedonî yê Yûnanî û Îskender jî ew li ser pile, paye û desthilatdariya wî hişt.

¹⁶ Nivîskar bêjeya “sitirab”ê bi kar aniyê ku tê bi maneya dadger “hakim” an fermanrewa.

Piştî Îskender koça dawiyê kir û Silukusê serleşkerê wî hat ser textê selteneta Mad û Parsê, Mîr Birsan jê re îtaet kir. Ji ber wê Silukus ew wek layengirê xwe hesêb kir û mîrnişîna wî li Zabilistanê îtaetî wî dikir. Piştî koça dawiyê ya Mîr Birsan, kurê wî Mîr Feyrûz erka desthilatdariya Mîrnişîna Zabilistanê, bi dilsozane xizmeta Antîyakûsê Duyem ê paşayê malbata Silukus kir. Antîyakûs bi nûnertîkirina wî ya spehî şad bû û xelatên giranbuha pêşkêşî wî kir.

Piştî koça dawiyê Mîr Îspiybûdiş, kurê wî Mîr Kuring rêveberiya Mîrnişîna Zabilistanê girt destê xwe. Di serdema mîrnişîna wî de, fermanrewatiya malbata Silukî li Mad û Parsê duçarî tevlihevî û keşmekêşiyê bû û ew di qonaxa têkçûnê de bû. Ev serhildan û şoriş li Mad û Parsê bû sebebê derketina mîrên Eşkaniyên Parsê û bi awayê ku bikaribin hêzê pêk binin û li ser fermanrewatiya Yûnaniyan hakim bibin û ji welatê xwe derbixin.

Şorişa Hakimên Bi Nijad Yûnanî Li Mad û Parsê

Di serdema fermanrewatiya Antîyakûsê Duyem de, kurê wî Silukîs, hakimên Yûnanî ku li wilayetên Mad û Parsê li ser kar bûn, li serekên xwe vejeriyan û zincîra serhildêran dest pê kir. Destpêka vê serkêşî û serhilderiyê, hakimê Baxterê Diw-ditûs da destpêkirin.

Dema Antîyakûs ji vê şorişê hatiye agahdarkirin, bi lez berê xwe daye Mad û Parsê ku agirê vê şorişê bitefine. Lê nikaribûye li hember Diw-ditû bi ser bikeve û di netîceyê de karîbû di hewlê damezirandina welatê serbixwe de bi ser bikeve. Kirinên Diw-ditûs tesîreke dijkarî li ser selteneta malbata Silukê hişt û bûyerê agirê liva serxwebûnê di dilê xelkên Mad û Parsê de hil kir. Di vê çarçoveyê de, yekem car rûniştîyên Xorasanê dest bi xebat û têkoşînê kirin.

Sîstema Nû ya Tîreyên Kurdên Beluçî yên Tûran û Mekranê

Piştî girêdana navçeya bakurê Tûranê yanî Kîkanan bi Mîrnişîna Zabilistanê ve, Kurdên Tûran û Mekranê li Kîkanan berhev bûn û ji ber sebebê êrişên Îskenderê Makedonî sîstema hozatîyê ya van Kurdên Beluçî tevlihev bûbû û zebûnhalî û bê ser û ber bûbûn. Lê xweşbextane xwe kirin bin alaya fermanrewatiya Kurdên Zengene û ji sitem û zordariya zêde ya Cidgalên bêwijdan, bedkar û nehez ên Sindan rizgar bûn.

Kurd di esnayê mana xwe ya li Zabilistanê de qîmeteke zêde bi rêxistina sîstema xwe ya medenî, hozayetî û leşkerî dan ku ji ber êrişên Yûnaniyan û Cidgalên Sindanê di halekî seperze de bû. Tîreyên Kurd bi belavbûn û niştecibûna wan li navçeyên awa awa yên Zabilistanê, desteyek bi hêz û bi şiyanî ya Kurdan damezirandin ku di serdemên dawiyê de jî tu guhertinê hundirîn a welat nikaribû ziyane lê bike. Fermanrewatiya nûhatî jî bi dîtina yekîtî û tebayiya wan bi dilxwazî hevaltî û piştevaniya wan dikirin.

Bi vî awayî, ev rêveberiya nû ya Kurdên Beluçî, ev tîreyên xwarê xwe li ser bingeha yekgirtinê rêk xistin û geşe bi biratiya navbera xwe dan: Edreganî, Biraxoyî, Îşkene, Zengene, Mamilî, Kirmanî, Dirmenî, Sebahî, Sincawî Seffarî, Xanî Xelî, Başarî, Şamarî, Sencanî, Şîrkibarî, Mûtlisanî, Bazîcanî, Sûranî, Siryanî, Babînî, Makkî, Tûkanî, Askani, Selahî, Şinwanî, Gurcîn, Celabûk, Hûtkarî, Kukanî, Şekkanî, Nidamanî, Şûn, Mûcaranî, Mûrrayî, Qencanî, Kîşanî, Şembed, Cadî, Xawerî, Kidek, Cemmak, Sûhatî, Dînûrî, Cesfanî, Sûyanî, Hesranî, Dîganî, Gucarî, Şahûlî, Etwanî, Şembiyanî, Salmanî, Ûnîzî, Şahêkî, Bîwanî, Sarûlî, Semedînî, Îlzarî û Kirma.

Ev tîreyên Kurdên Beluçî di bin sayeya liva mîr Birsanê Kurdên Zengene de li Mîrnişîna Zabilistanê jiyana xwe derbas dikirin û Mîr Birsan mîrên xwe çavkaniya hêz û şiyana xwe dizanî.

Rêkxistina leşkerî ya Kurdên Beluçî bi vî awayî bû: Leşkerê Kurd bi ser pênc beşan ve parve bûye. Ji her beşeke leşker re gotine “Yesel”. Navê wan pênc beşên leşker bi vî awayî bûye: Biraxîn Yesel, Zengîn Yesel, Edregîn Yesel, Mamilîn Yesel û Kirmîn Yesel. Maneya van navan bi vî awayî ye: Beşa Leşkerê Tîreyên Biraxoyî, Beşa Leşkerê Tîreyên Zengene, Beşa Leşkerê Tîreyên Edreganî, Beşa Leşkerê Tîreyên Mamilî û Beşa Leşkerê Tîreyên Kirmanî. Ji temamê leşkerê tîreyên Kurdan re gotine: “Bulika Tîreyan”. Mîrên van tîreyên girîng ên Kurdan yanî Mîr Kîkan Biraxoyî, Mîr Birsan Zengene, Mîr Libûsan Edreganî, Mîr Kîşan Mamilî û Mîr Ennû Kirmanî serleşkerê vê beşa leşkerê xwe bûne. Mîrê Zabilistanê jî serleşkerê hêza bulika tîreyan bûye. Ev pênc mîrên tîreyên Kurdên Beluçî bi navê “Mîrê Tîreyên Pêncînî” hatibûn nasîn.

Mîr Birsan Zengene, Mîr Kîkan Biraxoyî, Mîr Libûsan Edreganî, Mîr Kîşan Mamilî û Mîr Ennû Kirmanî hevçerxê Sîlukus, yekem paşayê malbata Sîlukiyê Yûnanî bûne. Mîr Feyrûz Zengene, Mîr Mihrab Biraxoyî, Mîr Mingîp Edreganî, Mîr Gincan Mamilî û Mahdad Kirmanî di serdema Antîyakûsê Yekem de serekê tîreyên xwe bûne. Her wiha, Mîr Îspîbûd Zengene, Mîr Mihrab Biraxoyî, Mîr Mingîp Edreganî, Mîr Besran Mamilî û Mîr Makek Kirmanî hevçerxê Antîyakûsê Duyem bûne.

Di serdema fermanrewatiya Sîlukusê Duyem de Mîr Kuring Zengene mîrê Zabilistanê bûye û Mîr Sam Biraxoyî, Mîr Bextiyar Edreganî, Mîr Besran Mamilî û Mîr Makek Kirmanî serekên tîreyên xwe bûn.

BEŞA HEŞTEM

KURDÊN BELUÇÎ DI SERDEMA EŞKANIYAN DE

Eşkani

Dema ku Diwditûsê hakimê Baxterê li dijî Antîyakûsê Duyem ê paşayê malbata Sîlukî şoriş berpa kir, Antîyakûsê Duyem her çend bêdeng kir, lê nikaribû serkeftinê bi dest bixe û bi ser de jî koça dawiyê kir. Piştî kurê wî, Sîlukusê Duyem bû cihnişînê wî û derket ser textê Mad û Parsê. Di vê serdemê de, hakimê Partiya, Andiraguras şaşıyeke mezin kir û birayê mîrê Parsê, Tîrdadî li koşka xwe li ser xizmeta mîrî lome lê kirin û sivikayî pê re kir.

Mîr Eşk li vê kirina hakimê Partiyayî sivikayî û şerefbirina malbata xwe temaşe kir û biryar da ku toleya wê veke û ji bo vê mebestê jî xwe amade kir. Ev herdu bira di netîceyê de bi nehênî bi pênc kesên hevalên xwe re li hev kirin û hakimê Parsê Andraguras dan kuştin û xelkê Parsê ji bo şoriş û serhildanê amade kirin.

Diwditûsê hakimê Baxterê bi vê desteyê re bû yek û fermanrewaya Eşkê pesend kirin. Mîr Eşk li bajarekî navê wî Esak ku nêzikî Koçanê bû û ketiye Geliyê Deryaya Etrekê, taca paşatiyê danî serê xwe.

Di warê pênaseya awayê nijada Eşkaniyan de ji dîroknivîsên kevn zanyarî bi destê me dikeve ku ew mirovên deştan ên gerok û nivkoçer bûne û di deştên mezin û fireh de zêde bûne.

Dîroknivîs di eynî wextê de dibêjin ku Partî beşek ji

desteya Parnî ne ku ew jî beşek ji hozên bedewî ne û bi navê Daha ew dane nasîn.

Ev xelk di serdema gera di deştan de wek Parsî nehatine nasîn, heta dema ku ber bi başûr ve hatin û li Parsê li herêma Parsawayê pêgeh peyda kirin bi navê Parsî hatin nasîn. Bi şertên zeman re, serekeşîrên wan li Parsê sermiyan, pile û paye bi dest xistin.

Di netîceyê de, Eşkê mîrê mezin ê Parsan, bingeha selteneta Eşkanî danî. Eşk ji bo xurtkirina selteneta xwe di salên destpêkê de, hemû wextan bi şer re mijûl bû û di esnayê van şer û qirênan de giyanê xwe ji dest da. Piştî wî, birayê wî Tîrdad bû paşa û êriş bir ser navçeya Herkanê û ew kir bin destê xwe.

Tîrdad piştî xwe ji bo xurtkirina fermanrewatiya xwe mijûl kir û ji bo vê mebestê jî hejmara eskerên xwe zêde kir û çend keleh ava kirin. Li gel vê jî, bajar xurt kirin û bajarekî bi navê Dara li Geliyê Gizkiwe Apurtiwanê ava kir ku bijarteke stratejîk a gelek bi hêz û negirî bû.

Tîrdad piştî 23 sal fermanrewatiyê koça dawiyê kir û textê xwe ji kurê xwe Erdewan re hişt. Di serdema Erdewanê Yekem de, Antiyakûsê Sêyem ku şeşem paşayê malbata Silukî bûye, biryar daye welatên rojhilatê ku ji destê bapîrên wî derketibûn careke din bîne bin desthilata xwe. Ji bo vê mebestê jî dest bi amadekariya şer kir.

Peywendiyên Di Navbera Kurdên Beluçî û Paşayên Eşkanî de

Eşk bingeha dewleta Eşkanî danî û ji bo bihêzkirina seltenetê bi berdewamî têkoşîye û bi dijminan re di nav dijîtiyan de bûye û di vê navê re giyanê xwe ji dest daye. Piştî birayê wî Tîrdad li cihê wî dibe cihnişînê textê fermanrewatiya Eşkanê.

Mîr Kuringê Kurdê Zengene û mîrêmîran dema ku vê rewşê dibîne, bi mebesta rawêjkariyê mîrên Tîreyên Pêncînî yên Kurdên Beluçî Mîr Sam Biraxoyî, Mîr Bextiyar Edreganî, Mîr Besran Mamilî û Mîr Makek Kirmanî bangî ba xwe kir. Di netîceyê de, mîrên Kurd bi hev re li ser wê rêk ketin ku piştevaniya malbata Eşkanê bikin. Ev jî ji ber wê bû ku ew hevnişad û hevniştîmanê Kurdan bûn.

Her ji bo vê, dema ku Tîrdad derket ser text mîrên Pêncînî yên Kurdên Beluçî belêni û peymana dostaniyê pê re girêdan û piştevaniya Kurdan jê re ragihandin. Tîrdad jî di miqabilî vê hevkarî û peywendiya dostaniyê de, mafê desthilatdariya Mîrnişîna Zabilistanê da Mîr Kuring.

Êrîşên Antîyakûsê Sêyem ên Ser Selteneta Eşkanî

Piştî koça dawiyê ya Tîrdadê Yekem, Erdewanê Yekem ê kurê wî derket ser text û di serdema fermanrewatiya wî de Antîyakûsê Sêyem ku şeşem paşayê malbata Sîlukus bû û li Sûriyê fermanrewatî dikir, ket nav wê tamahiyê ku navçeyên selteneta rojhilatê Mad û Parsê careke din bine bin desthilata xwe. Ji bo vê mebestê, ji rojhilatê ket rê heta gihîşt perestgeha Anahîtayê û ew talan kir û dest danî ser zexîreya mal û darayiya perestgehê.

Piştî vê, bi leşkerekî mezin ber bi Ferkanyayê ve çû û piştî dagirkirina navçeyê hat dora Demxanê. Serbazên Eşkaniyan û hevkarên leşkerê Kurdên Beluçî li bilindahiyên çiyayên Demxanê bi cih bûbûn û bê payîn êrîşî ser dijmin dikirin.

Di netîceyê de Antîyakûs çiyayên Demxanê ji çar milan ve kir bin dorpêçê. Ji ber wê baş dît ku bi Erdewanê paşayê Eşkaniyan re aştîyê çêke û peymana yekîtiyê pê re îmze kir.

Kurdên Beluçî û Alikariya Paşayê Eşkanî

Kurdên Beluçî di şerê Antîyakûsê Sîlukî de piştevaniya

Erdewanê Yekem ê paşayê Eşkaniyan kirin û li dijî Yûnaniyan şer kirin. Mîrên Kurd ji wan Mîr Kuring Zengene, Mîr Sam Biraxoyî, Mîr Bisûl Edreganî, Mîr Ercan Mamilî û Mîr Goran Kirmanî bi 40 hezar serbazên şerker ên Kurdên Beluçiyan ve di şergehê de mil bi milê Eşkaniyan bi dijmin re şer dikirin.

Koça Dawiyê ya Erdeganê Yekem

Erdeganê Yekem piştî 19 sal fermanrewatiyê kirinên vê dinyaya fanî terk kir û desthilatdarên seltenetê Pirpatyûsê kurê wî li cihê wî kirin paşa.

Paşabûna Pirpatyûsê Eşkani

Piştî Pirpatyûs hat ser textê bavê xwe, midetê 16 salan fermanrewatî kir û piştî koça dawiyê kir. Pirpatyûs du kur li pey xwe hiştin: Ferhad û Mihirdad. Ferhad kurê mezin bû û li gor urf û adetên Parsan derket ser textê bavê xwe.

Paşabûna Ferhadê Yekem ê Eşkani

Dema ku Ferhadê Yekem derket ser textê paşatiyê, çiyanişînên Alburzê li hemberî wî serî hildan, şoriş berpa kirin û ji xwarê Deryaya Hezarê ve dest bi şer kirin. Ferhad komek ji wan ku bi navê Merewiyan dihatin nasîn û gelek asî bûn guhest navçeya “Çerx”ê ya lêwarekî Deryaya Hezarê û ew li wir bi cih kirin. Midetekê piştî van serkeftinan koça dawiyê kir û li cihê wî, birayê wî Mihirdad ku gelek hez jê dikir derket ser text.

Paşabûna Mihirdadê Yekem ê Eşkani

Piştî koça dawiyê ya Ferhad, Mihirdadê Yekem ê birayê wî derket ser textê Eşkani. Bi destpêkirina desthilata Mihirdad re mezintirîn serdema dîroka Eşkaniyan dest pê kir.

Li derdora 175 sal beriya zayînê, Yukratîdis dest bi

vêxistina agirê şer û tevliheviyan kir. Dema ku Mihirdad bi tevlihevî û jariya kar û barên welatê Baxterê hisiya, êriş bir ser wî erdî û Tapûrya û Maweraunehîr dagir kir.

Piştî van serkeftinan, Mihirdad dagirên xwe domandin û ji xwarê Zabilistanê heta der û dora Pûralîn û navçeyên Aryan, Tûran û Mekranişê anî bin desthilata xwe. Mihirdad şeşem sultanê malbata Eşkanî bûye.

Hatina Kurdên Beluçî ya Nav Erdê Tûran û Mekranê

Piştî Mihirdad welatê Maweraunehîrê dagir kir, berê xwe da ser erdê xwarê Zabilistanê yanî Tûran û Mekranê ku di serdema fermanrewatiya Yûnaniyan de, Sîlukus Paşa ji ber tawanê şer ve dabû paşayê Hindê Çendran Guptan Moryan. Ev wilayetên hanê, niştimanê bav û bapîrên Kurdên Beluçî bûn. Kurdên Beluçî çaverêya firseteke wiha bûn ku bikaribin careke din niştimanê bav û bapîrên xwe werbigirin. Ji ber wê Kurdên Beluçî bi dil û giyan hevkarî û hevaltiya Mihirdad Paşayê Eşkanî kirin.

Dema ku Mihirdad Paşayê Eşkanî êriş bir ser Tûran û Mekranê, Mîr Bûrganê mîrêmîranê Zabilistanê bi serekên Tîreya Pêncînî yên Kurd, yanî Mîr Behram Biraxoyî, Mîr Ginzan Edreganî, Mîr Kalanç Mamilî û Mîr Estal Kirmanî re di vî şerî de beşdarî Mihirdad Paşayê Eşkanî bûn.

Şer Li Suhrabadanê

Kurdên Beluçî bi hemû tîreyên xwe ve êrişî ser xêwetgeha Cidgalan a li Suhrabadê kirin. Ji ber ku êrişeke nepayîn bû, Cidgalan nikaribûn bi çelengî berxwedanê bikin.

Serleşkerê Cidgalan Pûran tê de bi çend serhengên xwe yên navê wan Balra, Mûndra û Giya di meydana şer de hatin kuştin û leşkerê Kurdên Beluçî û Eşkanî gihîştin der û dora Kuhyara paytexta Tûranê.

Şer Li Kuhyarê

Xebera êrîşa Eşkaniyan gihîştibû mîrê artêşa Cidgalan, ku wan eskerekî giran li Kuhyarê berhev kiribûn û di bin serekatiya serleşkerê xwe Radhan de rû bi rûyê Eşkanî û Kurdên Beluçî bûbûn.

Di esnayê şer de, rêxistina leşkerê Eşkanî û Kurdên Beluçî bi vî awayî bûye: Rêveberiya beşa navenda leşker Mîr Soranê mîrê Qişûnî yê Eşkanî dikir, serekatiya milê rastê artêşa Mîr Behramê Biraxoyî kiriye û serekatiya milê çepê jî Mîr Ginzanê Edreganî kiriye.

Dema ku dengê dehula şer bilind bûye, şerekî dirêjkêşayî dest pê kiriye. Di netîceyê de Cidgalan dîtin ku dişikên dest bi bazdanê kirin. Artêşa Eşkaniyan û Kurdên Beluçî heta der û dora Gola Pûralînê û Deryaya Umanê rizgar kirin.

Di vê navê re, Mîr Bûrganê mîrêmîranê Zabilistanê navçeya Mekranê rizgar kir û serleşkerê Cidgalan Birhimabisîn kuşt. Hemû leşkerên Birhimabisîn jî di nav tevlihevî û perîşaniyê de ji nav çûn.

Piştî vê serkeftin û serbilindiyê, Mihirdad Kurdên Beluçî ku hevniyadê wî bûn careke din li wilayetên bav û bapîrên wan yanî Tûran û Mekranê bi cih kirin. Her wiha careke din desthilatdariya Tûran û Mekranê giha wan Kurdên Beluçî ku di serdema paşatiya Madan û Hexamenşiyân de desthilatdariya van navçeyan dikirin.

Bi vî awayî, Mîr Behramê Biraxoyî li ser textê Mîrnişîna Tûranê û Mîr Ginzanê Edreganî li ser textê Mîrnişîna Mekranê dan rûniştandin û îtîraf bi fermanrewatiya wan hat kirin.

Eslê Tîreyên Kurdên Beluçî yên Ji Welat Dûr

Eslê Tîreyên Kurdên Beluçî yên ji welat dûr bi vî awayî bûye:

A- Kurdên Biraxoyî: Mîr Kikanê Duyem, Mîr Bextiyar, Mîr

- Mihrab, Mîr Sam, Mîr Şahek, Mîr Behram
- B- Kurdên Zengene: Mîr Birsan, Mîr Feyrûz, Mîr Îspîbûd, Mîr Kuring, Mîr Bûrgan, Mîr Mihran
- C- Kurdên Edreganî: Mîr Libûsan, Mîr Şaheng, Mîr Mingîb, Mîr Bextiyar, Mîr Bisûl, Mîr Ginzan
- D- Kurdên Mamilî: Mîr Bolan, Mîr Kîşan, Mîr Kincan, Mîr Besran, Mîr Ercan, Mîr Kalanç
- E- Kurdên Kirmanî: Mîr Tûran, Mîr Ennû, Mîr Mahdad, Mîr Makek, Mîr Goran, Mîr Estal

FERMANREWAYÊN KURDÊN BELUÇÎ LI TÛRAN Û MEKRANÊ (Dewreya Sêyem)

Dema ku malbata Eşkanî dawî bi desthilatdariya malbata Sîlukî ya bi nijad Yûnanî li Mad û Parsê anî û Yûnanî ji welat kirin der û fermanrewatiya xwe ragihandin, serekên Tîreyên Pêncînî yên Kurdên Beluçî Mîr Behram Biraxoyî, Mîr Ginzan Edreganî, Mîr Kalanç Mamilî û Mîr Estal Kirmanî li dûrê welat bûn û li wilayeta Zabilistanê jiyana xwe derbas dikirin. Van serekan bi Eşkeniyan re peywendiyên biratiyê pêk anîbûn û cara sêyem xwe gihandin kopa desthilatdariyê.

Bi vî awayî, Mîr Berhem Biraxoyî li ser textê Mîrnişîna Tûranê rûnişt û Mîr Ginzan Edreganî desthilata Mîrnişîna Mekranê girt destê xwe. Bi vî awayî cara sêyem fermanrewatiya Kurdên Biraxoyî li Tûranê û Kurdên Edreganî li Mekranê dest pê kir.

Mîrêmîran Mîr Behram Biraxoyî

Piştî Mîr Behram hat ser textê Mîrnişîna Tûranê, xwe mijûlî bihêzkirina pêgeha desthilatdariya xwe kir. Di vê qahîmkirinê de, hejmara artêşa tîreyan di van bajarên de zêde kir: Tifanê, Deştê Suhrabadanê, Kîkanê, Xuzdarê û Ermabilê çend kelehên asê û bi hêz ava kirin.

Mîr Behram dixwest Xuzdarê bike paytexta Mîrnişîna Tûranê, lê ev daxwaza wî bi ser neket. Ev jî ji ber wê bû ku di serdemên pêşîn de, paytexta mîrên Kurdên Biraxoyî li navçeya bakurê Tûranê li bajarê Kîkanê bûye. Pozisyona/cihê vî bajarî gelek bi hêz û negir bûye.

Koça Dawiyê ya Mihirdadê Yekem

Mihirdadê Yekem 33 salan fermanrewatî kir. Di serdema xwe de selteneta Mad û Parsê fireh kir û fermanrewatiya xwe gihand asta hêz û şikuya cîhanê û nav û dengê ronahiya heta hetayî pê da. Piştî dinyaya fanî terk kir û koça dawiyê kir.

Êrişa Hozên Sakayê ya Ser Kewşenê Madê

Mihirdadê Yekem di serdema fermanrewatiya xwe de dema ku mijûlî dagirkirina wilayetên Tûran û Mekranê bû, xebera hatina Sakayiyan gihîştê ku ji navçeya xwe hatine Turkistanê û ji wê jî berê xwe dane başûr û gihîştine nêzikî sînorên Parsê.

Mihirdad piştî destdanîna ser wilayetên Tûran û Mekranê, bi lez ber bi Herkanê bi rê ket û êriş bir ser rêya êrişa Sakayiyan ku ji bajarê mezin Merro û Hatimpîlweseyê ber bi Ekbatanê ve anîbûn. Mihirdad bi vî awayî bi wan re mijûlî şer bû. Dema ku Sakayî rû bi rûyî berhelistî û xweragiriye bûn, ber bi aliyê xwarê ve çûn û bi rêya Merro, Hîrat û Zalibistanê rêya Hindê dan pêşiya xwe.

Paşabûna Ferhadê Duyem

Ferhad piştî koça dawîn a bavê xwe derket ser textê Eşkanê. Paşayê Silukê Dîmtirdis di bin destê bavê wî de girtî bû. Dema ku Ferhad bû paşa wekî bavê xwe exlaqekî mîhrîbanî bi vî paşayê dîl re bi kar anî.

Wî wextî, Antîyakûsê birayê Dîmtirdis li ser neheziya Tirifûn bi ser ket û paşatiya artêşê kir bin desthilata xwe. Piştî vê serkeftinê, bi mebesta azadkirina Dîmtirdisê birayê xwe ji bendîtiya Eşkanan, bi leşkerekî giran ve ber bi Madê ve êriş anî. Piştî sê şeran, Antîyakûs artêşa Eşkanî şikand. Zivistan hat û Antîyakûs diviyabû vegere Sûriyê, lê wî ev nekir û li der û dora Madê ma. Ferhad jî dest bi paşvekêşiyê kir.

Antîyakûsê paşayê Silukê xwediyê eskerekî zêde bû, ji ber wê neçar ma wan bi ser bajarên cihê cihê ve parve bike. Ev jî bêguman bû sebebê bargiraniyê li ser milê xelkê bajarnîşînên ehlê cih, kerb û kîna wan roj bi roj zêde dibû. Her wiha serbazên Silukî jî ji ber sebebê çend mehan mayîna bêkariyê, bê hêz û giran bûn. Ev ji bilî wê ji ber belavbûna wan li dora bajarên cihê cihê baladestîya xwe li hember hêzên Eşkanî ji dest dan.

Antîyakûs di vê rewşê de xwest şer dest pê bike û ji bo vê mebestê bi lez çû ku nêziktirîn desteya hêza xwe amade bike. Lê dema ku gihîşt cihê dixwest, pê hisiya ku Ferhad ji wî zûtir dest bi amadekariyê kiriye. Serdarên wî nesîhet û pêşniyar kirin ku bi artêşa dijmin re ya ku hejmara wan ji ya wî zêdetir e nekeve şer û dev ji paşayê Eşkanî ku ji bo lazimiyê çiyayên der û dorê senger girtibû berde.

Antîyakûs jê re ar bû li hemberî dijminekî ku pêştir wî ew şikandibû dest bi revê bike û êrîşî ser artêşa Eşkanî kir. Serbazê Silukî ku di warê çek û hecmê de bêhêz û jartir bûn, li hemberî siwariyên Eşkanî şikestin û bazdan. Antîyakûs bi tik û tenê ma, Eşkaniyan ew kuştin û bi temamî zora artêşa wî jî birin.

Kuşîna Ferhad Bi Destê Sakayan

Di şerê pêşîn ê Antîyakûs de, Ferhad serbazên ji hozên Sakayan bi kirê girtibû, lê serbaz negihîştin dema şer û her ji bo vê jî Antîyakûs Ferhad şikandibû. Lê vê carê piştî ku Ferhad dijmin şikand daxwaza kirêyê ji Sakayan kir.

Sakayan di bersivê de gotin serbazên me ji bo şer amade ne. Lê ji bo ku wextê şer derbas bûbû, Ferhad serekê Sakayiyan qebûl nekir. Ji ber vê jî Sakayiyan dest bi serhildan, talan û birîna navçeyên parastî yên Eşkaniyan kir. Di vê şoriş û serhildanê de, beşek ji hozên Sakayî ku bi navê Uka dihatin nasîn, bi temahiya zexeliyê bûn û dagirkirina navçeyan di hişê wan de bû.

Ferhad li hemberî Sakayiyan leşkerek pêk anî û hinek serbazên Yûnanî jî ku di şerê Antîyakûs de dîl girtibûn kir rexê artêşa xwe, wisan li hev xistin ku ji ser erdê xwe gelek dûr bûn û ji bo parastina giyanê xwe bi wefadarî dibin dijî dijmin, ji bo wî şer dikin. Lê di meydana şer de, dema ku Yûnanî his bi zebûniya Ferhad kirin, piştî wî berdan û çûn nav artêşa Sakayiyan. Di netîceya vê xwînêrêjî, kuştin û birinê de Ferhad giyanê xwe ji dest da.

Paşabûna Erdewanê Duyem

Piştî ku Ferhad di şerê Sakayiyan de giyanê xwe ji dest da, Erdewanê mamê wî bû cihnişînê wî û astenga êrişên dijwar ên Sakayiyan bi awayê ku bacê bide wan çareser kir. Lê ji ber Sakayiyan navçeya bi bereket a Eşkaniyan dagir kiribûn, di netîceyê de kar gihîşt şer.

Erdewan ji milê Baxteriyê ve êrişî ser Sakayiyan kir, di esnayê şer de birîneke kuştarî jî baskê xwe xwar û ji bo ku çek bi jehr bû, mir.

Koça Dawiyê ya Mîr Behramê Biraxoyî

Mîr Behram 42 sal fermanrewatî kir û di serdema xwe ya kalitîyê de koça dawiyê kir. Erdewanê Duyem ê paşayê Eşkan hevçerxê wî bû û her wiha ev mîrên Tîreyên Pêncînî yên Kurdên Beluçî jî hevçerxên wî bûn: Mîr Mihrab Zengene, Mîr Ginzan Edreganî, Mîr Kalanç Mamilî û Mîr Estal Kirmanî.

Mîrêmîran Mîr Şahdad Biraxoyî

Piştî koça dawiyê ya Mîr Behram, kurê Mîr Şahdad derket ser textê Mîrnişîna Tûranê. Di serdema fermanrewatiya wî de, hozên Sakayî jî navçeya Baxterê êriş anîn ser rojhilatê Xorasanê û beşek bi bereket a welatê Eşkaniyan dagir kirin. Erdewan jî êrişî ser wan kir û di şer de hat kuştin.

Piştire, Mihirdadê Duyem ê kurê wî derket ser text û dest-hilatdariya selteneta Eşkanî girt destê xwe û ji bo bêdengkirina hozên Sakayî têkoşiya.

Paşabûna Mihirdadê Duyem

Piştî ku Erdewanê Duyem di şerê Sakaiyan de hat kuştin, berpirsiyarên seltenetê Mihirdadê kurê wî anîn ser text. Mihirdadê Duyem wekî Mihirdadê Yekem, hevnavê mezin-tiya xwe, serdema paşatiya xwe bi bûyerên girîng derbas kir, gelek nav û deng da û bi nasnavê Mihirdadê Mezin hat nasîn.

Mihirdadê Duyem di serdema fermanrewatiya xwe de rê li pêşveçûna Sakaiyan ku hêzên biyanî bûn girt û beşa serekî ya van hozan ber bi xwarê ve ber bi welatê Hindê ve raqewirand û selteneta xwe ji şer, tevlihevî û problemên wan bi temamî rizgar kir û piştî 26 sal fermanrewatiyê koça dawiyê kir.

Şerê Kurdên Beluçî Bi Sakaiyan Re

Piştî kuştina paşayê Eşkanî Erdewanê Duyem di şerê Sakaiyan de, hozên Sakayî morala wan bilind bû û êriş anîn ser navçeya Tûran û Sistanê. Beşeke Sakaiyan di bin fermana Mîr Tuxas de ber bi Tûranê ve êriş anîn. Serekên Tîreyên Kurdên Beluçî Mîr Şahdan Biraxoyî, Mîr Nûcan Zengene, Mîr Dilgîn Edreganî, Mîr Dirwar Mamilî û Mîr Zirenk Kirmanî li navçeya Zixawî ya Geliyê Nişkinê rê li ber êrişên wan girtin.

Dema ku ev herdu hêz rû bi rûyî hev bûn, şer û qirêneke giran rû da, Tuxasê mîrê Sakaiyan şikest û rêya bazdanê da pêşiya xwe û vegeriya Baxterê.

Mîrêmîran Mîr Feyrûz Biraxoyî

Piştî Mîr Şahdad 31 sal fermanrewatî kir, cihana fanî terk kir û kurê wî Mîr Feyrûz derket ser textê Mîrnişîna Tûranê. Wê wextê Sakaiyan careke din êriş anîn Tûran û Mekranê û dest bi dagirkirinê kirin.

Li Geliyê Misatnicê Bi Sakaiyan Re Şer

Mîrên Tîreyên Pêncînî yên Kurdên Beluçî bi sehkirina hatina Sakaiyan, ji bo şêwrê berhev bûn. Ew mijûlî şêwrê bûn ku Mîr Moxo Saka bi eskerên xwe ve hat navçeya Kîkanê û li Geliyê Misatnicê li nêzikî bajarê Sampûranê baregeha xwe veda. Mîrên Kurdên Beluçî Mîr Feyrûz Biraxoyî, Mîr Siyamek Zengene, Mîr Behram Edreganî, Mîr Sam Mamilî û Mîr Mihrab Kirmanî bi lez bi mebesta rêgirtina hatina pêşve bi leşkerên tîreyan ve êriş birin ser cihê dijmin û li dora bajarê Sampûranê bi dijmin re rû bi rû bûn. Mîr Moxo Saka şikest û daxwaza aştiyê kir û ji serekên Kurd rica kir ku rê bidin wî û tîreyên wî ji Tengava Bolanê derbas bibin.

Kurdan daxwaza wî qebûl kirin û bi vî awayî ew bi tîreyên xwe ve çû nav erdê rojavayê Hindê.

Paşabûn û Kuştina Guhderzê Yekem

Du kurên Mihirdadê Duyem hebûn: Guhderz û Ewrûd. Guhderz kurê wî yê mezin bû û li gor destûra Eşkaniyan derket ser textê bavê xwe û heft salan fermanrewatî kir. Lê ji bo ku bi birayê xwe re problemên wî hebûn, birayê wî Ewrûd ew kuşt û bi xwe derket ser textê fermanrewatiyê.

Paşabûn û Kuştina Ewrûdê Yekem

Piştî Ewrûd bi fen birayê xwe Guhderz kuşt û li cihê wî derket ser text, mideteke dirêj desthilatdarî nekir û paşatiya wî şeş salan kêşa. Terefdar û piştivanên Guhderz ji ber toleya Guhderz ve, Ewrûd kuştin û cezayê kirinên wî danê.

Paşabûna Sena Turk

Piştî kuştina Ewrûdê Yekem, ji malbata Eşkaniyan kesek tunebû ji bilî kalemêrekî navê wî Sena Turk ku hêj sax bû û di dema kuştina Ewrûdê Yekem de di mêvanseraya seltenetê de

jiyana goşegêriyê derbas dikir û temenê wî 80 sal bû, loma ew anîn ser textê seltenetê.

Hozên Sakaiyan ew mîratgirê selteneta Eşkanî hesêb kirin. Bi vî awayî wan hozên koçer piştgirî û hevkarîya wî kirin û bang ji lê kirin ku hefsarê desthilatdariyê bigire destê xwe û dawî bi rewşa tevlihevî û nerêkî ya li welat bîne. Dema ku ew jî derket ser text, hêminî û aşti vegerand nav welat û piştî şeş sal fermanrewatiyê koça dawiyê kir.

Mîrêmîran Mîr Mihirdadê Biraxoyî

Piştî koça dawiyê ya Mîr Feyrûz, kurê wî Mîr Mihirdad Biraxoyî derket ser textê Mîrnişîna Tûranê. Mîr Mihirdad ew mîrên tîreyên Kurd ku di şerê Sakaiyan de çûbûn Geliyê Misatnicê û di rêya parastina axa xwe de di şer de hatibûn kuştin, kurên wan bi rawêjîya endamên Dîwana Bulikê li ser pileya serektîretîya wan danî û destdarî li ser kir. Di wan şeran de, Mîr Siyamek Zengene û Mîr Sam Mamilî giyanê xwe ji dest dabûn û kurên wan Mîr Bîdar Zengene û Mîr Bilfan Mamilî li gor biryara endamên Dîwana Bulikê bi lez li ser pileya serektîratîyê hatin danîn ku jarî di sîstema hozatiyê de peyda nebe.

Di serdema fermanrewatiya Mîr Mihirdad de, mîrê Sakaiyan Musun ku jê re “Mayus” û “Maka” jî digotin, li Baxter, Erasûşya û Zerengiyanê bingeha welatê xwe danî û bi Kurdên Beluçî yên Tûran û Mekranê re peywendiyên dostaniyê bi hêz kir.

Mîr Mihirdad Biraxoyî 14 salan fermanrewatî kir û ev mîrên tîreyên bi eslê xwe Kurdên Beluçî bûn hevçerxên wî bûn: Mîr Bîdar Zengene, Mîr Feyrûk Edreganî, Mîr Bilfan Mamilî û Mîr Ecban Kirmanî.

Paşabûna Ferhadê Sêyem

Piştî koça dawiyê ya Sena Turk, kurê wî Ferhadê Sêyem derket ser textê Eşkaniyan û di dema fermanrewatiya wî de, hozên Sakayê li Eraxusya û Zabilistanê mîrnişîna xwe damezirandin û li gel wê jî serweriya fermanrewatiya Eşkaniyan qebûl kirin. Ferhadê Sêyem 11 sal fermanrewatî kir.

Kuştina Ferhadê Sêyem

Du kurên Ferhadê Sêyem ên navê wan Mihirdad û Ewrûd hebûn. Van herdu kuran destê xwe dan hev û jehr dan bavê xwe û ew kuştin. Vê yekê di nav malbata Eşkaniyan de destpêka awayê urf û adetê bavkujî û birakujiyê anî.

Hozên Saka

Yûçîn tîreke hoza Tûxarê bû û niştecihê navçeya Kansînê bûn û bi tîreyên din ên Tûxarê re dijmintiya wan hebû û her wextê di nav şer û qirênan de bûn. Di netîceyê de tîreyên berhelîstê bi ser tîreya Yûçînê de hakim bûn û ew ber bi başûr ve çûn. Tîreya Yûçînê ji neçarî nişîngeha bav û bapîrên xwe terk kir û bi serekatiya xwe re ku xwediyê nasnavê “Ersk” bûn, Ersk Muxan, Ersk Musas û Ersk Tuxir hatin navçeya rûbarê Seyhûnê. Ev navçe nişîngeha bav û bapîrên Sakayîyan bû. Ji ber wê di vê navçeyê de bi hoza Sîtekanê yanî Sakayîyan re tûşî şer û qirênan bûn.

Tîreya Yûçîn ji ber hejmara xwe bi ser Sakayîyan de hakim bûn û navçeya wan kirin bin desthilata xwe û tîreyên Sakayîyan ber bi rojavayê navçeyên Baxterê yanî rojhilatê Xorasanê ve çûn.

Sakayî êleke mezin bû û ji du tîreyan pêk hatibûn: Sakara û Masakara. Wan ji neçarî êrişî Baxterê kirin û li Tûrîwayê li navçeya Maweraunehîrê Mihirdadê Yekem ê paşayê Eşkaniyan rû bi rûyî van êrişên Sakayîyan bû û hat pêşiya wan ew

dan sekinandin û ew şikandin.

Piştî koça dawiyê ya Mihirdadê Yekem, di serdema fermanrewatiya Ferhadê Duyem ê kurê wî de, Sakayiyên êrişker careke din êriş anîn ser sînorên rojhilata Parsê. Vê hoza mezin a êrişker a Sakayî paşvemayê Mîrnişîna Baxteriyân bi temamî ji nav birin. Lê paşayê Eşkaniyan bi hemû hêza xwe ya şer ve berhelistkarî û berxwedanî kir. Giranî û dijiwariya van şeran bi awayekî bû ku du kes ji şahên Eşkanî Ferhadê Duyem û kurê wî Erdewanê Duyem di şerê Sakayiyân de hatin kuştin û xwîna wan bertelef çû.

Damezirandina Mîrnişîna Sakayiyân

Sakayî beriya koça xwe ya bi giştî, zanyariya wan li ser erdê rojhilatê welatê Mad û Parsê hebûye. Ji ber ku di serdema fermanrewatiya Yûnaniyan de çûn û hatina wan li Baxterê hebûye. Ji bilî vê Yûnaniyan artêşa xwe ji serbazan wergirtine û hinek ji serdaran jî li ser pileya meziniya serbazên wan dane damezirandin.

Ji ber wê dema ku Sakayiyân dest bi koça xwe ya mezin kirin, ji Baxterê ber bi jêr bûn û li navçeyên Zereng û Kendarayê perş û belav bûn û li ser wan erdan bi cih bûn. Bi rewşa zeman re bingeha hozatiya xwe zexim kirin û ketin damezirandina mîrnişîna xwe û bûn xwediyê welatekî bi hêz û fireh.

Kewşenê welatê wan ji rojhilatê ve gihîştibû navçeyên Sindanê û Tengeya Bolanê. Wan Tengeya Bolanê bi navê “Bêlan”ê dan nasîn û navê welatê Zerengê jî ji ber niştecihbûna wan a li wir bi navê “Sekistan”ê dan nasîn û niha jî her bi wî navî tê nasîn.

Mayîsesê Mirê Sakayiyân

Mayîses ku hinek diroknivîsan jê re “Mayus” jî gotine, serdarê hozên Sakayiyân bûye û di sala 75ê beriya zayîne

de wilayeta “Erasûşya”yê dagir kiriye û li wir mîrnişîna xwe pêk aniye û serweriya fermanrewatiya Eşkanî ya Mad û Parsê qebûl kiriye û welatê xwe serbixwe kiriye.

Paşayên Eşkanî kesîne bûn ku bikaranîna rewşê têgihîştin û sûd û qazanca zêde ji dema aştiyê wergirtin. Xwediyê karekterekî bûne ku bi awayekî peyman îmze kirine ku ji bo berjewendiyên xwe jê îstîfade wergirtine. Her wiha, li gor urf û adetên Parsan hemû wextê di peymanan de rêya îmzekirinê dane ku di nav welatê xwe de serbest bin. Paşayên Eşkanî bi mîrên Sakaiyan re jî eynî urf û adet peyrew kirine.

Mayîses, piştî hatina ser textê mîrnişînê, karîbû mîrnişînê xurt bike û kewşenê wê fireh bike. Di vî warî de, ji rojhilat gelek navçe kirine bin desthilata xwe ku sînoren wê heta Tiksulânê û rûbarê Sindanê çûye.

Mayîses 25 sal fermanrewatî kir. Ew bi navê “Musus” jî dihat nasîn û hevçerxê Sena Turkê Paşayê Eşkanî bû.

Yekgirtina Kurdên Beluçî yên Tûran û Mekranê Bi Sakaiyên Zabilistanê Re

Di serdema paşatiya Sena Turkê Eşkanî de hozên Sakayî li Erasûşya, Kendara, Zabilistan û Baxterê mîrnişîna xwe damezirandin û serweriya fermanrewatiya Eşkaniyan qebûl kirin. Sakanî bi xelkê xwecih ê van herêman re tevlihev bûn ku ferq û cihêti di navbera wan de nemîne.

Li ser bingeha vê destûrê, peywendiyên xwe bi zanayî bi kurên Beluçî yên Tûran û Mekranê re qahîm kirin û ev yekgirtina navbera wan bû sebebê zexmî û bihêzbûna herdu milan. Mîr Mayîses Saka di destbikarbûna desthilatdariyê de hişê xwe da yekgirtikirina Kurdên Beluçî û Sakaiyan.

Mîr Îzsês Saka

Mîr Mayîses Saka yekem paşayê Mîrnişîna Sakaiyan bû

ku midetê 25 salan fermanrewatî kir. Dema ku koça dawiyê kir, du kurên navên wan Îzses û Azûnses li pey man. Îzses derket ser textê bavê xwe rûnişt û navçeya Penc Abeyê dagir kir û bi welatê xwe ve girêda. Azûnsesê birayê xwe jî kir hakimê vî wilayetî.

Îzses nêzikî 28 salan fermanrewatî kir. Di dema fermanrewatiya wî de, Mîr Ferhadê Kurdê Zengene bi hoza xwe ve nişîngeha xwe guhast Tûranê û du tîreyên Sakayî Selgur û Sagdî jî bi xwe re anîbûn.

Paşabûn û Kuştina Mihirdadê Sêyem

Mihirdadê Sêyem, piştî kuştina bavê xwe, derket ser textê paşatiyê û piştî midetekê êriş bir ser Ermenistanê. Di dema nebûna wî li wir de, Ûrûdê birayê wî textê desthilatdariyê dagir kir. Dema ku ev xeber gihîşt Mihirdad bi lez hat paytextê û ew şikand û hejmareke zêde ji piştivanên wî jî kuştin.

Mihirdad sitem û zordarî ji xwe re kir adet û endamên dewletê bi vê dilgiran bûn û ew jî ser text dûr xistin û Ewrûdê birayê wî anîn ser text. Mihirdad jî çû û xwe avêt Ereban û bi alîkariya wan bi yek carî êriş anî ser selteneta Parsê. Lê Sûrinê serekerkanê Ewrûd şikest û hat kuştin.

Mîrêmîran Mîr Behmen Biraxoyî

Piştî Mîr Mihirdad koça dawiyê kir, Mîr Behmenê kurê wî derket ser textê Tûranê. Di serdema desthilatdariya Mîr Behmen de, Mîr Ferhad Zengene bi xwe û hoza xwe ve bi du tîreyên Sakayî yê navê wan Selgur û Sagdî re ji navçeya Zabilistanê nişîngeha xwe veguhest Tûranê. Mîr Behmen Biraxoyî yê mîrêmîranê Tûranê, Mîr Ferhad û hoza wî li Geliyê Goranê bi cih kir û du tîreyên Sakayî jî şandin navçeya Xuzdarê û Mîr Sakîn serdarê tîreya Sagdiyê bi tîreya xwe re di Geliyê Girişkanê de bi cih kir û Mîr Kudirê serekê tîreya Selgurê jî bi tîreya wî re li Geliyê Pîlarê bi cih kir.

Ev serekên tîreyên Kurdên Beluçî hevçerxên Mîr Behmen bûn: Mîr Ferhad Zengene, Mîr Bûbik Edreganî, Mîr Mîwan Mamelî û Mîr Sinhan Kirmanî. Mîr Behmen 29 salan li wilayeta Tûranê paşatî kir.

Îzsesê Duyem ê Mîrê Sakayiyan

Dema ku Îzsesê Yekem koça dawiyê kir, Îsalê Sesê kurê wî bi nasnavê Îzsesê Duyem derket ser textê Mîrnişîna Zabîlistanê. Wunsan birayê wî yê biçûk bû. Îzsesê Duyem dagira xwe ya Penc Abê domand û birayê xwe Wunsan ji bo wilayeta dagirkirî ya welatê Hindê şand ku desthilatdariya dewletê ya li wir bigire destê xwe û fermanrewatiyê bike. Ew yekem Sakayî bû ku destpêka fermanrewatiya xwe li welatê Hindê da destpêkirin. Îzsesê Duyem li Zabîlistanê 22 salan fermanrewatî kir û piştê koça dawiyê kir.

Mîrêmîran Mîr Besam Biraxoyî

Piştî koça dawiyê ya Mîr Behmen, Besamê kurê wî derket ser textê Mîrnişîna Tûranê. Di serdema mîrnişîniya Besam de “Dîwana Milûka Tûran û Mekranê” hat damezirandin. Mebest ji damezirandina vê saziyê ew bû ku rêveberiya wilayeta Tûran û Mekranê bi karê hevbeş Dîwana Milûkê bigihînin netîceyekê.

Piştî damezirandina Dîwana Milûkê kar û barên serbazî yên Tûran û Mekranê di bin çavdêriya vê dîwanê de dihatin meşandin. Ev serekên Kurdên Beluçî, Mîr Besam Biraxoyî yê mîrêmîranê Tûranê, Mîr Mihirdad Edreganî yê Mîrêmîranê Mekranê, Mîr Siyawuş Zengene, Mîr Semban Mamilî û Mîr Mihîr Kirmanî endamên Dîwana Milûkê bûn.

Paşabûn û Goşenişîniya Ewrûdê Duyem

Piştî Mihradê Sêyem, Ewrûdê Duyem ê birayê wî derket ser textê Eşkanê û şerekî nevegêr bi Roman re rû da. Ev ji ji ber

wê bû ku selteneta Eşkanî bi Roman re di nav şer de bû.

Piştî di navbera van herdu welatan de şer rû da, Eşkaniyan di şerê Hurranê de Romayî şikandin û Ewrûd rabû ji bo dagirkirina Sûriyê Feyrûzê kurê xwe bi leşkerekî mezin ve şand ser. Li Sûriyê Eşkanî paşve vekişyan û Feyrûz jî di şer de hat kuştin. Ewrûd bi vê ziyane xemgîn bû û jiyana goşenişinî hilbijart û desthilata textê Eşkanî da destê Ferhadê kurê xwe yê duyem.

Gundus Fasanê Mîrê Sakanê

Dema ku Îzsêsê Duyem koça dawiyê kir, kurê wî Gundus Fasan derket ser textê Mîrnişîna Zabilistanê û ji birayê xwe Gûda re meqamê wezaretê da. Piştî wê, Gundus desthilatdariya herêmên Hindê girt destê xwe û Mîrnişîna Zabilistan Erasûşyayê da Gûdayê birayê xwe.

Gundus Fasan li Hindê nav û deng da û li wir bi navûdengtirîn şahê malbata Sakayîyan bû. Çarçoveya desthilatdariya welat a Sakayîyan li Hindê berfireh kir û bi dadperwerî fermanrewayî kir.

Paşabûna Ferhadê Çarem

Ferhadê Çarem, piştî goşenişîniya bavê xwe derket ser textê Eşkanê ku mirovekî sitemkar û zordar bû. Wî çewisandin û sitem ji xwe re kiribû kar û ji bo wê hinek ji endamên dewletê welat terk kirin.

Ferhadê Çarem bi selteneta Romayê re şer û qirên da destpêkirin. Di netîceyê de kesekî ji malbata Eşkanî yê navê wî Tîrdad alaya şoriş û serhildanê bilind kir û karîbû Ferhadê Çarem ji ser text hilde. Ferhad piştî xwe avêt ba Sakayîyan.

Paşabûna Tîrdadê Duyem

Tîrdadê Duyem derket ser text û midetekê fermanrewatî

kir. Piştire, Ferhad bi alîkariya Sakayiyan êrîşî ser Parsê kir. Tîrdad şiyana bergiriyê bi xwe re nedît û bazda. Bi xwe re kurê xwe yê biçûk ê navê wî Ferhad bû bir û xwe avêt ba Qeyserê Romê.

Kuştina Ferhadê Çarem

Ferhadê Çarem ku careke din derket ser text, midetekê fermanrewatî kir. Di netîceyê de Ferhadê kurê Ferhad bi handana dayîka xwe jehr da bavê xwe. Bi vî awayî bavê xwe kuşt û bi xwe derket ser text.

Mîr Gûdayê Mîrê Sakayiyan

Dema ku Gundus Fasan desthilata paşatiya Hindê girt destê xwe, paşatiya Mîrnişînên Kindara û Zabilistanê da destê Gûdayê birayê xwe. Gûdaş jî kurê xwe Ebdîn Gases da ser desthilatdariya Mîrnişîna Zabilistanê û bi xwe jî hinek ji wilayeta Kirmanê ji paşayê Eşkanî stend û kir bin desthilata xwe û mîrnişîna xwe fireh kir.

Hatina Dinyayê ya Peyamber Îsa (Silav Lê Bin)

Di navbera salên çar û şeşê beriya zayînê de, Hz. Îsa (silav lê bin), di yek ji wan gundên Beytulmuqedesê yê navê wî Beyt Lehem de hat dinyayê. Di wê serdemê de du seltenetên bi hêz û gelek bi şîko di dinê de hebûn: Selteneta Parsê û selteneta Romayê.

Agistas(Agûstûs) paşayê Romayê û Tîrdad jî paşayê Parsê bû. Paşayê Parsê ji bo piştrastkirina stêrnasan ku Mesîh hatiye dinyayê, komek ji nûçegihanên xwe şandin Beytulmuqedesê ku eger mizgînî rast be biçin cihê hatina dinyayê ya Hz. Mesîh û xêrhatina Wî bikin. Ev deste piştî piştrastkirina hatina dinyayê ya Mesîh vegeriya Parsê û nûçe gihand Tîrdadê paşayê Eşkanî û behsa hemû rewşê jê re kirin.

Mîr Feyrûzê Mîrê Sakayîyan û Têkçûna Mîrnişîna wî

Piştî ku Gundus Fasan li Hindê koça dawiyê kir, kurê wî Feyrûz derket ser textê welatê Hindê û Mîrnişîna Erasûşyayê. Sinarbarê kurê Gûda jî ku kurmamê wî bû, kir desthilatdarê Mîrnişîna Zabilistanê.

Di serdema fermanrewatiya Mîr Feyrûz de, desthilatdariya Sakayîyan li Zabilistan, Baxter û Hindê, hêdî hêdî ber bi têkçûnê ve diçû. Cihnişînên mîrên Sakayî bi hêz bûn û hoza Koşaniyan bi ser de hakim bû û desthilat kirin destê xwe.

Mîrêmîran Xefî Biraxoyî

Piştî koça dawiyê ya Mîr Besam, kurê wî Mîr Xefî derket ser textê paşatiya Tûranê û di serdema mîrnişîniya wî de Ferhadê Pêncem, paşayê seltêneta Eşkanê bû. Her di vê serdemê de, desthilat û hakimiyeta mîrên Sakayîyan li Baxterê, Zabilistanê û Erasûşyayê dest bi jariyê kir. Li der û dora sed salên hêminî û ewlekariyê piştî êrişên Sakayîyan, li herêma Baxterê yek ji serekên hozên Koşanê ku ew jî bi eslê xwe ji tîreyên Yûçînê ye, bi ser Sakayîyan de hakim bû û desthilat kir destê xwe û bingeha dewletê damezirand ku bi navê Koşan hat naskirin.

Mîr Xefî 34 salan fermanrewatî kir û ev serekên Tîreyên Pêncînî yên Kurdên Beluçî hevçerxên wî bûn: Mîr Wundan Zengene, Mîr Kîkan Edreganî, Mîr Botan Mamilî û Mîr Mengur Kirmanî.

Xweyîkirina Selgur û Sagdî

Mîr Xefî di serdema fermanrewatiya xwe de urf û adetê xweyîkirina tîreyên Selgur û Sagdiyê meşand ku bi Mîr Ferhad Zengene re ji Zabilistanê hatibûn Tûranê û li wir bi cih bûbûn. Ev adet ji bo wê çêbûbû, ji ber ku ev herdu tîre ji nijadê Kurdên Beluçî nebûn û pêwîst bû bîn xweyîkirin, ku tu cihêti di navbera wan û Kurdên Beluçî de nemîne û piştî bi cihkirina

adetê ew tîreyên Kurd bên hesêbkirin.

Urf û adeteke Kurdan hebûye ku bi wê rêyê tîreyên biyanî bi civata xwe re girê didan û ji vê urf û adetê re digotin “hêskşikandin”. Ev adet bi vî awayî hatiye meşandin ku mîrêmîranê tîreyan ku serekê Dîwana Milûkê bûye, bang serekên tîreyên din dikir, di civîna Dîwana Milûkê de behsa xweyîkirina wan tîreyên biyanî dikir û gotûbêj li ser dikirin. Piştî wê, serekê Dîwana Milûkê mêzer yan destara bi bira hesêbkirina li ser mîrê wê tîreyê girêdida û serekê tîreyê jî piştî destargirêdanê peymana wefadariyê bi wî xelkî re girêdida ku tevî nav wan bûbûn. Piştî wê bi serekê Dîwana Milûkê re xwarin dixwarin û pîrozbahî li serekê wê dikirin û diçûn. Bi vî awayî, piştî bicihkirina vê urf û adetê tîreya biyanî yek ji tîreyên Kurdên Beluçî dihat hesêbkirin.

Paşabûn û Kuştina Ferhadê Pêncem

Ferhadê Pêncem jehr da bavê xwe û kuşt. Ji ber vê kirinê endam û desthilatdarên seltenetê jê bêzar û tore bûn. Qeyserê Romê jî ew dagirker dizanibû û qîmet nedida daxwaz û xwestekên wî. Li gel wê jî, Ferhad kesekî gelek tirsonek bû û fermanrewatî lê nedihat. Di netîceyê de mezin û desthilatdarên seltenetê ew ji ser text hildan û kuştin.

Hoza Koşaniyan

Koşanî hozek bû ku ew û Sakayî ji yek esil û nijadê bûn û wek xelkê Çîn û Yüçînê hatine naskirin. Wan li dora 160 sal beriya zayîne konên xwe yên nişîngeh ku li rojhilatê Çînê bûye terk kirine û hatine geliyê ser deryayê, bakurê Amoyê. Sakayî li vir bi cih bûbûn, ji ber xwediyê şiyana berxwedana li hemberî êrişên wan nebûn bazdan û berê xwe dan rojhilatê Baxterê û başûrê zincîrên çiyayên Hindukuşê.

Wê wextê, Împaratoriya Çînê ji ber êşandinên hozên Hwang Nwanê ketibû tengiyê û sefirê xwe şand ba Yüçînan û

ji bo bêdengkirina Hwang Nwan daxwaza alîkariyê ji wan kir. Lê Yûçîn bi dengê wan ve neçûn û împaratorê Çînê ji vê aciz bû û êrîşî ser wan kir. Yûçînî paşve vekîşîyan û ji jorê Deryaya Amoyê ve ber bi jêr bûn û hatin xwarê wilayeta Baxterê ku nişîngeha Tiraxîyan bû û bi alîkariya wan Mîrnişîna Baxterîyan kirin bin desthilata xwe.

Hoza Koşî yek ji pênc hozên Koşangê bûye. Li gor nivîsandina dîroknivîsên Çînê mîrê wan Kucule Kefîz çar tîreyên din ên Koşangê bi xwe re kir yek û mîrnişîna xwe li Baxterê damezirand û xwe wek şahê Koşangê da nasîn. Ji ber vê di behsa dîroka wan de bêjeya Koşanê cihê Yûçînê girt.

Piştî wê, Kucule Kefîz Pars, Kendaran û Zabilistan dagir kir, selteneta xwe fireh kir û Kurdên Tûran û Mekranê jî kir bin destê xwe.

Paşabûn û Kuştina Ewrûdê Sêyem

Piştî kuştina Ferhadê Pêncem, endamên dewleta Parsê kesekî ji malbata Eşkanê ku navê wî Ewrûd bû û ji tîrsa Ferhad di goşeyekî veşartî de jiyana xwe derbas dikir, anîn ser textê fermanrewatiyê. Lê wî jî sitem û şidet kir awayê xwe. Piştî sê sal fermanrewatiyê, desthilatdar û mezinên dewletê ew bi fêl û fend ji text dûr xistin û kuştin û xwe ji sitemkariya wî rizgar kirin.

Paşabûna Enuşê Yekem û Dûrxistina Wî Ji Text

Piştî kuştina Ewrûdê Sêyem, di nav malbata Eşkaniyan de kesekî wiha nemabû ku layîqî pile û payeya paşatiyê be. Ji ber wê, desthilatdarên dewletê sefir şandin ba paşayê Romayê û daxwaz jê kirin ku Enuşê kurê Ferhadê Çarem ku li ba wan bû, bişînin Parsê ji bo wî deynin ser textê Eşkanê.

Enuş ji Romayê hat û derket ser textê fermanrewatiyê. Piştî midetekê, desthilatdarên seltenetê ji wî jî nerihet û neşad

bûn. Ji ber ku wî li gor urf û adetên Romayê hereket dikir û rikê wî ji adetên Parsê vedibû. Van sebebên wisan kir ku şahzadekî malbata Eşkanî yê bi navê Erdewan li hember serî hilde. Desthilatdarên seltenetê piştgiriya wî kirin û karîbû Enuş bişikêne, wî ji welatê Parsê derxe û desthilatdariya welat bigire destê xwe.

Paşabûn û Koça Dawiyê ya Erdewanê Sêyem

Erdewanê Sêyem ku derket ser text careke din artêşek amade kir, êrişî ser Enuş kir û ew şikand. Enuş ji bilî bazdanê tu çareyeke din jê re nema û çû bajarê Silûsiyê. Erdewan bi pey ket û gelek terefdarên wî ji orteyê rakir. Piştî Enuş Silûsî jî terk kir, berê xwe da Ermenistanê û bû paşayê wir. Lê ji ber zorlêkirina Erdewanê paşayê Eşkanî, ji neçarî dev ji fermanrewatiya wir ji berda û xwe da destê fermanrewayê Romên Şamê. Xwest ji Şamê jî derkeve, lê Roman ew destgîr kirin û kuştin.

Erdewanê Eşkanî xwe mijûlî xurtkirina pêgeha desthilata xwe kir û bi Roman re aşitî danî û piştî 26 sal fermanrewatiyê koça dawiyê kir.

Kucele Kile Kedfîzê Mîrê Koşanê

Kucule Kile Kedfîzê mîrê hoza Koşanê bû û mirovekî zana, bi cesaret û mêrxas bû. Karîbû çar tîreyên Koşanê li gel xwe rêk bixe û li Baxterê mîrnişînê damezirîne. Di mideteke dirêj de bi hewl û têkoşînê, selteneta xwe berfireh kir û wilayetên der û dora selteneta Parsê bi desthilatdariya xwe ve girêda û pêgeha xwe li temamê wan cihan bi hêz kir ku ew ji wilayetên Kendara, Kabilistan, Zabilistan û Xorasana Rohhilatê pêk dihatin.

Kucul piştî 38 sal desthilatê koça dawiyê kir. Navê wî Kucele bû û piştî nasnavê Kile Kedfîzê jî lê hat kirin, ku dihat maneya dîndar û kurê şahê ji asman hatiye.

Mîrêmîran Şawiş Biraxoyî

Piştî koça dawiyê ya Mîr Xefî, kurê wî Mîr Şawiş derket ser textê Mîrnişîna Tûranê. Di serdema desthilatdariya wî de, mîrê mezin ê Koşaniyan Kucele Kile Kedfîz, piştî dameziradina desthilatdariya xwe li Baxterê, wilayetên Parsê ku ji Kendara, Zabilistan, Kabilistan û Xorasana Rojhilatê pêk dihatin, dagir kir û bingeha selteneta Koşanê damezirand.

Mîrên Tîreyên Pêncîne yên Kurdên Beluçiyên Tûran û Mekranê xwe nedan dest û serî li ber mîrên Koşanê dananîn. Ji bilî vê, hevahengiya tîreyên Kurdên Beluçî ewqas bi hêz û xurt bû ku mîrê Koşanê nedixwest dijmintiyê bi wan re çêke. Her wekî gotine: “Rizgarî di aşî û hêminiyê de ye.” Ji ber wê, mîrê Koşanê li ser rêya aşiyê bi Kurdên Beluçî re meşiya.

Mîrê Koşanê mirovekî hişmend bû û dizanibû bi zeman û serdemê re hereket bike û sûd û qazancê ji serdema aşiyê bi dest bixîne û hemû wextê peymanên wisan girêdida ku bi wê rêya îmzekirina wan di çarçoveya desthilatdariya xwe de serbest bike. Kucule Kile Kedfîz li ser bingeha vê nêrinê peyman bi Kurdên Beluçî yên Tûran û Mekranê re girêda û îtiraf bi fermanrewayên li Tûran û Mekranê kir. Bi vî awayî, belênî û peyman bi wan re girêda û ew kirin hevpeymanê welatê xwe.

Mîr Şawiş piştî 25 sal fermanrewatîyê koça dawiyê kir û ev serekên Kurdên Beluçî, Mîr Kimbîc Mîrêmîranê Mekranê, Mîr Şîno Mamilî, Mîr Xefî Kirmanî û Mîr Nûzer Zengene hevçerxên wî bûn.

Paşabûna Guhderzê Duyem û Rakirina Wî Ji Ser Text

Piştî Erdewanê Sêyem, kesekî ji malbata Eşkaniyan ê bi navê Guhderz derket ser textê fermanrewatîya desthilata Eşkanê. Du birayên Guhderz ên navê wan Erdewan û Wardan hebûn, ji wan bi gûman bû û bawerîya wî bi wan tunebû. Ji ber wê yek ji wan bi jin û zarokên wî ve kuşt û yê duyem bazda.

Hêj midetek di ser desthilatdariya Guhderz re derbas nebûbû ku mezin û karbidestên welat bangî Wardan kirin ku ji bo bidestxistina paşatiyê şorişê bike. Wardan piştî du rojan xwe gihand Parsê ku bikaribe ji nişka ve bi ser Guhderz de bigire. Guhderz ji neçarî ji Parsê bazda û çû ba hozên Dahayê û mijûlî plandanîn û handana hereketa dijî Wardanê birayê xwe bû. Guhderz ji bo vê mebestê alîkarî ji hozên Dahayê wergirt û ji bo bidestxistina text û tacê ket rê.

Wardan bi xwe û bi hêzekê ve berê xwe da Deştê Baxtirayê. Ji nişka ve xweber ji Guhderz re hat ku mezin û desthilatdar bûne hevdest û li hev kirine ku text û tacê ji herdu birayan bistînin. Vê tirsê hevbeş herdu bira ji neçarî li hev nêz kir, li hev kirin ku taca selteneta Parsê di destê Wardan de be û Guhderz jî bi desthilatdariya Herkaniyê razî be.

Paşabûn û Kuştina Wardanê Yekem

Dema ku Wardanê Yekem derket ser text, bajarê Silûsiyeyê hê jî di nav şorêş û serhildanê de bû. Wardan bi alîkarî û pêşengiya çîna mezin a wî bajarî ku terefdarê wî bûn, êrişî ser bajêr kir û wan jî ji neçarî xwe dan dest û ew şoreşa ku heft sal bû berdewam dikir dawî lê hat.

Piştî vê serkeftinê, Wardan serkeftineke din jî bi dest xist û selteneta xwe gelekî fireh kir. Piştî midetê dirêj, careke din di navbera wan herdu birayan Wardan û Guhderz de şer û qirênê dest pê kir û heta du salan kêşa; di netîceyê de bi mirina Wardan dawî lê hat. Ev jî bi wî awayî ku mezin û desthilatdar dest dabûn hev û ji nişka ve Wardan dabûn kuştin.

Paşabûna Cara Duyem a Guhderz û Koça Wî ya Dawiyê

Piştî kuştina Wardanê Yekem, di navbera mezinên Parsê de li ser mîrata text û taca paşatiya Eşkanê dijîti û gîrûgirîftan rû dan. Piranî terefdarên Guhderz bûn û komek ji Mihirdadê

kurê Enuş û neviyê Ferhadê Çarem ji bo paşatiyê dan nîşan. Ev şahzade li Romayê mezin bûbû û xelkê Parsê bi gelemperî rika wan ji wî şahzadeyî dihat û ruhê wan jê diçû ji ber ku li Romayê mezin bûbû. Îhtîmal e ji ber van sebebên û bi taybetî ji ber ku Guhderz jî di nav welat de amade bû, di netîceyê de hemûyan li ser selteneta Guhderz li hev kirin û Guhderz anîn ser textê paşatiyê.

Hê midetek di ser paşatiya Guhderz re derbas nebûbû ku netîceya bêmerhemetî, dilhişkî û kirinên wî yê neşayisteyî hatin dîtin, ji hemû milan ve hawara gilî û gazina bilind bû û di netîceyê de berhelistkaran gilî û gazind birin ba Qeyserê Romê û jê daxwaz kirin ku şahzade Mihirdad bişîne Parsê. Qeyserê Romê ferman da ku şahzadeyê dawakarê text û tacê bişînin heta qeraxên Firatê.

Mihirdad hat Parsê û di şerê li dijî Guhderz de netîceyeke helkirinê bi dest nexist. Dema ku temaşe kir eskerên wî bi temamî şeperze û ji hevdu ketine, xwe avêt ba serdarekî pileya xwarê ku bavê wî tayîn kiribû û navê wî Paron Ses bû. Lê wî bi nemerdî ew girt û zincîrkirî şand ba Guhderz. Guhderz jî her çend ew efû kir lê ferman da ku herdu guhên wî bibirin ji bo careke din fikira bidestxistina seltenetê neke. Piştî midetekê Guhderz koça dawiyê kir.

Paşabûn û Koça Dawiyê ya Enuşê Duyem

Piştî koça dawiyê ya Guhderzê Duyem, Enuşê Duyem ku paşayê Madê bû derket ser textê selteneta Eşkanî û piştî neh sal fermanrewatiyê koça dawiyê kir. Di serdema fermanrewatiya wî de tu bûyereke girîng rû neda.

Paşabûn û Koça Dawiyê ya Bilaşê Yekem

Piştî Enuşê Duyem koça dawiyê kir, Bilaşê Yekem derket ser text. Du birayên Bilaş hebûn: Feyrûz û Tîrdad. Ew bi temen ji herduyan mezintir bû, lê li gel wê jî wan serî li ber paşatiya

wî dananîn. Bilaş selteneta Madê da şahzade Feyrûzê birayê xwe. Ji ber wê pêwîst bû ji birayê xwe Tîrdad re ji cihekî şiyayî temîn bike.

Partan berdewamî xwe xwediyê Ermenistanê dizanibûn, wê wextê dagirkirina wî welatî ji bo Bilaş zêde ne asê bû. Ji ber wê Bilaş ji bo bihêzkirina desthilatdariya xwe û bidestxistina desthilatdariyekê ji birayê xwe yê biçûk re ku wî welatî bîne bin rikêfa xwe, firseteke guncaw dît. Ev di wê demê de bû ku hozên deştî yên bakurî bi navê Alanî êriş anîn ser erdê welatê Parsê û ber bi Madê ve berjêr bûn. Feyrûzê fermanrewayê Madê li hemberî êrişên wan xwediyê mecala berxwedanê nebû, ji ber wê paşve kişiya û li cihekî dûr bi cih bû.

Piştî van hozan êrişî aliyê rojavayê kirin û rû bi rûyê leşkerê Tîrdad ê paşayê Ermenistanê bûn û di netîceyê de ew gelekî bi giranî şikandin û bi destkeftiyeke gelek giranbuha ber bi rojhilatê ve vegeyan.

Bilaşê Yekem piştî 20 sal fermanrewatiyê koça dawiyê kir û di serdema wî de bûyera têkçûnê di selteneta Eşkaniyan de didomiya.

Mîrêmîran Mîr Miradan Biraxoyî

Piştî koça dawiyê ya Mîr Şahêş, kurê wî Mîr Miradan hat ser textê Mîrnişîna Tûranê. Di serdema wî de, fermanrewayê mezin ê Koşaniyan Kucel Kile Kedfîz koça dawiyê kir, kurê wî Wîma Kile Kedfîz bû cihnişînê wî. Dema ku Wîma Kile Kedfîz êrişî ser Împaratoriya Çînê kir, mîrê Sindanê ev wek fersend dît û êrişî ser Tûranê kir.

Êrişa Mîrê Sindanê ya Ser Tûranê

Mîr Manya mîrê mezin ê Sindanê bû û bi du serleşkerên xwe Mîr Gingû û Mîr Bindan û serbazên Sindanê re ji zincîra Çiyayên Katêreyê ve êrişî ser erdê Tûranê kir. Dema ku ew xeber gihîşt serekên Kurdan, ji bo bergirikirina wan a hatina

pêş bi lez ji gerdenên zincîra Çiyayê Katêrê ve ber bi jêr bûn û bajarên Sindan talan kirin. Dema ku mîrê Sindanê ev rewş dît, têgihîşt ku ji du milan ve şerkirin ji bo serbazên wî ne şîya ye. Ev jî dihat wê maneyê ku li milekî êrîşa li ser Tûranê bidomîne û li milekî din jî bergiriyê li çûna pêş a Kurdan li nav deşt û bajarên Sindanê bike. Ji ber wê serleşkerên Sindanê neçar man ji erdê Tûranê paşve bikişin û bergiriya welatê xwe bikin. Yanî Kurdên Beluçî ku rijiyabûn nav deşt û bajarên Sindanê derxin. Kurdên Beluçî bi serkeftî bi destkeft û dewlemendiyeke zêde ji erdê Sindanê derketin û vegeriyan Tûranê.

Mîr Miradan piştî 17 sal fermanrewatiyê koça dawiyê kir û ev serekên Tîreyên Pêncînî yên Kurdên Beluçî hevçerxên wî bûn: Mîr Nûzer Zengene, Mîr Şîran Edreganî mîrêmîranê Mekranê, Mîr Pindik Mamîlî û Mîr Şûlan Kirmanî.

Wîman Kile Kedfîzê Mîrê Koşanê

Piştî koça dawiyê ya Mîr Kucule Kile Kedfîz mîrê mezin ê Koşanê, Wîman Kile Kedfîz derket ser textê bavê xwe, nêzîkî niv sedsalê yanî 50 salan fermanrewatî kir û di midetê desthilatdariyê de kewşenê welatê xwe ewqas fireh kir ku sînorê rojhilatê yê welatê wî digihîşt nêzîkî rûbarê Kingê.

Wîman bi rêya sefiran daxwaz ji paşayê Çînê kir ku wî bike zavayê xwe û keça xwe bidê. Lê împaratorê Çînê daxwaza wî qebûl nekir. Wîman Kile Kedfîz aciz bû û leşkerekî mezin ku ji 70 hezar siwariyan pêk hatibû di bin serekatiya sererkan Sîan de ji bo dagirkirina Çînê şand. Sîan bi rêya Pamîrê êrîş bir ser rojavayê Çînê û ew rû bi rûyê leşkerê Çînê bû. Di netîceyê de, sererkanê leşkerê Çînê Pançe ew şikand û Sîanê serleşkerê Wîman Kile Kedfîz daxwaza aştiyê kir û li ser ku mîrê Koşanê di dahatî de bacê bide împaratorê Çînê li hev kirin.

Wîman Kile Kedfîz ji bo xurtkirina welatê xwe dostanî bi paşayên Eşkanî re bi hêz kir û di temenê 100 salî de koça dawiyê kir.

Mîrêmîran Mîr Şahbûz Biraxoyî

Piştî koça dawiyê ya Mîr Miradan, Mîr Şahbûzê kurê wî derket ser textê Mîrnişîna Tûranê. Di dema desthilatdariya wî de, Wîman Kile Kedfîz êrişî ser seldeneta Çînê kir û bi giranî şikest û paşve kişiya. Ev jî bû sebêbê wê ku welatê Koşanê jî seviya bihêziyê derkeve û dûçarî jaryê bibe. Lê li gel wê jî, Wîman Kile Kedfîz paşayekî bi tedbîr bû û bi dîtina vê rewşê fermana jî bo xurtkirina neteweyî da ku mîrnişînen hevpeymanên xwe bi awayê eskerî jî nû ve birêk bike. Di vî warî de Kurdên Beluçî jî guherîn di ser awayê rêxistina xwe ya eskerî de kirin û jî nû ve leşkerekî wêrek jî bo parêzgarîkirina welatê Tûran û Mekranê rêk xistin.

Ev artêş jî du awa eskeran pêk hatibû: Eskerên hilgirê çekên sivik û eskerên hilgirê çekên giran. Eskerên hilgirê çekên sivik tenê zirx û xeftan li xwe kirine û mertal û kapek/benek li ser wan bûye û tîrdanga wan tijî tîr bûye. Eskerên çekên giran jî zirx û xeftanên hesinî li ber kirine û endamên siwar û hespê wan seranser bi hesin hatine pêçan. Çeka wan a şer rimeke dirêj bûye ku jî bo êrişbirina ser rêzên dijmin bi kar anîne.

Mîr Şahbûz Paşa, piştî 30 sal fermanrewatiyê dinyaya fanî terk kir. Ev serekên Tîreyên Pêncînî yên Kurdên Beluçî hevçerxên wî bûne: Mîr Bîsût Zengene, Mîr Şadan Edreganî mîrêmîranê Mekranê, Mîr Zûngan Mamilî û Mîr Cûg Kirmanî.

Paşabûn û Koça Dawiyê ya Feyrûzê Duyem

Piştî koça dawiyê ya Bilaşê Yekem, Feyrûzê kurê wî derket ser textê paşatiyê û di serdema paşatiya wî de cardin pêla êrişên tîreyên Alanî li ser Parsê dest pê kir. Feyrûz hemû hişê xwe jî bo bergirîkirina wan amade kir û jî bo demeke dirêj li dijî tîreyên Alanî li sînoren rojhilatê mijûlî şer û qirênan bû.

Di serdema fermanrewatiya Feyrûzê Duyem de, tevlihevî û sistî di seldeneta Eşkaniyan de peyda bû. Şahzadeyên

Eşkanî takevanî kar dikirin û li çî wilayetê bûna bi serbestî fermanrewayî dikirin. Feyrûz 29 sal fermanrewatî kir û piştîre koça dawiyê kir.

Paşabûna Erdewanê Çarem û Rakirina Wî Ji Ser Text

Piştî Feyrûz, Erdewanê Çarem derket ser textê Eşkanê. Hêj salek bi ser fermanrewatiya wî re derbas nebûbû ku desthilatdarên dewletê ew ji text anîn xwarê û Xesro li cihê wî danîn.

Paşabûn û Koça Dawiyê ya Xesro

Piştî Erdewanê Çarem, Xesro derket ser textê Eşkanê. Xesro zavayê Feyrûz bû, dema ku bû paşa, kesekî bi navê Bilaş li ser seltenetê dest bi dijîtiya Xesro kir û piştî wê şer û qirênan dest pê kir. Di dawiyê de Xesro agirê şorişa Bilaş tefand. Piştî wê, di navbera selteneta Parsê û Roman de li ser desthilatdariya wilayetên li ser sînor şer dest pê kir. Romayîyan Beynûlnehreyn û Babil dagir kirin. Piştîre qeyserê Romê hat bajarê Tîsfûnê û Xesro ji wê bazda, lê keça wî bi textê zêrîn ê şahane ve wekî destkeftî ket destê qeyser. Ji bilî vê, baceke zêde ji navçeyên dagirkirî ket destê qeyser. Xesro jî bi bêdengî û bêhnfirehî li pêşkeftina Romayîyan dinêriya.

Dema ku fermanrewayê Romayîyan ber bi niştîmanê xwe ve vegehiyan, Xesro dest bi karê dijîti û berhelîstkarîyê kir û rûniştîyên herêmên dagirkirî ji bo berpakirina şorişê han da. Bi vî awayî, xelk li hemû cihê şorişê berpa kir û karbidestên Romayîyan ji welatê xwe derxistin. Dema ku qeyserê Romayê ev rewş dît, peyman aştîyê bi paşayê Eşkanî re îmze kir. Xesro Paşa piştî 20 sal fermanrewatiyê koça dawiyê kir.

Mîrêmîran Mîr Sergêj Biraxoyî

Piştî koça dawiyê ya Mîr Şahburz, Mîr Sergêjê kurê

wî derket ser textê Mîrnişîna Tûranê. Di serdema Sergêj de, Sûrnsanê mîrê artêşa Xesro yê paşayê Eşkanê dixwest wilayetên Mekran û Tûranê bine bin desthilata welatê Eşkanê. Ji bo vê mebestê, bi leşkerekî mezin ve êrîşî ser Finazbûrana paytexta Mekranê kir. Kurdên Beluçî di bin serekatiya mîrê xwe Mîr Sergêjê Mîrêmîranê Tûranê, Mîr Balgît Mamilî û Mîr Bîfar Kirmanî de ji bo pêşilêgirtina dijmin daketin ser rêya wan û li Geliyê Piryamanê bi wan re dest bi şerekî giran kirin. Piştî şer û qirênê, Sûrnsanê serleşkerê artêşa Eşkanê birîndar bû û paşve kişiya û wegeriya niştimanê xwe û nikaribû wan herdu wilayetan bigire.

Di wî şerî de, Mîr Mihranê mîrê tîreya Zengene û Mîr Bîfarê mîrê tîreya Kirmanî hatin kuştin. Mîr Sergêj piştî 20 sal fermanrewatiyê koça dawiyê kir. Ev serekên Tîreyên Pêncîne yên Kurdên Beluçî hevçerxên wî bûn: Mîr Mihran Zengene, Mîr Şawiş Edreganî Mîrêmîranê Mekranê, Mîr Baligît Mamilî û Mîr Bîfar Kirmanî.

Kenşikîne/Kenişkin Mîrê Koşanê

Wîman Kile Kêdfîz bi ocaxkorî koça dawiyê kir, ji ber wê Kenşikîn ku ji malbata Eşkanî û xizmê Wîman Kile Kêdfîz bû, text wek mîrat wergirt. Yê bûyeran neqil dîkin, dibêjin ku ew neviyê mamê mîrê mezin ê Kucele Kile Kêdfîz bûye.

Kenşikîn bi nav û dengtirîn paşayê zincîra malbata Koşaniyan bûye û selteneta Koşanê gelek fireh kiriye. Li rojhilat sînorê selteneta xwe bi bajarê Bûnarsê Hindê û li rojava jî bi selteneta Parsê ve girêdaye.

Kenşikîn di serdema fermanrewatiya xwe de wilayeta Suxdistanê dagir kiriye û toleya şikestina kurê mamê xwe Wîman Kile Kêdfîz jî împaratorê Çînê wergirtiye û li gor peymana aştîyê jê bac wergirtiye.

Kenşikîn dîne Bawadayî qebûl kir û ji bo belavkirin û propagandeya dîne xwe di nav xebatê de bû. Ji ber propagan-

deya vî dînî, rûniştiyên welatên der û dorê dînê Bawadayî qebûl kirin û li ser vê rêbazê meşyan.

Mîrêmîran Mîr Şahmîr Biraxoyî

Piştî Mîr Sergêj, Şahmîrê kurê wî derket ser textê Mîrnişîna Tûranê. Di serdema fermanrewatiya Mîr Şahmîr de, Mîrê Koşaniyan Kenşikîn ku mîrekî bikêrhatî û navdar bû, dinyaya fanî terk kir. Piştî kurê wî Mîr Husyan Wuşka derket ser textê Koşaniyan.

Mîr Şahmîr, piştî derketina ser textê Mîrnişîna Tûranê, xwe mijûlî xizmeta Kurdên Beluçî kir. Karekî girîng ku encam daye, peymana di navbera mîrê Tûranê û mîrê Sindanê de ya di warê mafê çêrandina terşê şivanan û zozanên Kurdên Beluçî de bûye ku li navçeyên Sindanê zivistanên xwe derbas kirine.

Xwediye keriyana û koçerên Kurdên Beluçî ji bo derbas-kirina zivistanan ber bi jêr dibûn û terş û keriyên xwe dibirin deştên Sindanê. Lê desthilatdarên wan cihan bi miameleyên sitemkarane bi wan re hereket dikirin. Di netîceyê de, di navbera Kurdan û xelkên Sindanê de problem, şer û qirênan rûdan. Mîr Şahmîr dawî li vê nexweşiyê anî. Wî ji bi vî awayî ku kesekî ji Kurdên Biraxoyî yê navê wî Mîr Cigasûran bi komek ji xelkê tîreya xwe ve di serdema selteneta Madê de li navçeya Diwadanê welatê Sindanê ku ketiye dawîya zincîra Çiyayê Pamîrê û zivistanan Kurdan ew dikirin cih û çêrîngeh, bi temamî bi cih bûbûn. Mîr Şahmîr bangî vî mîrî kir li ba xwe û wekî sefir şand ba Kunyal Kimaçeyê mîrê welatê Sindanê û jê daxwaz kir ku di warê vî xelkê Kurd de ku li Mîrnişîna Sindanê zivistanên xwe derbas dikir, guftûgo bikin. Mîrê Sindanê ev daxwaz qebûl kir.

Mîrê Tûranê û yê Sindanê bi serdarên xwe re li navçeya Celarîn Kilxayê yê li sînorê erdê Tûranê di rûniştineke mîrî de li ser zivistangehên Kurdan peymanek girêdan û tê de mercên çêrandinê diyar kirin. Piştî rûniştinê, mîrê Welatê Sindanê ber bi welatê xwe ve vegeheriya.

Mîr Şahmîr piştî 33 sal fermanrewatiyê, koça dawiyê kir û ev mirên Kurdên Beluçî hevçerxên wî bûn: Mîr Bidîs Zengene, Mîr Şacîl Edreganî Mîrêmîranê Tûranê, Mîr Behmen Mamîlî û Mîr Xûfû Kirmanî.

Paşabûn û Koça Dawiyê ya Bilaşê Duyem

Piştî koça dawiyê ya Xesro, Bilaşê Duyem derket ser textê Eşkanê. Wî xwe mîratgirê text û xwediyê mafê paşatiyê dizanibû. Ji ber wê, di serdema fermanrewatiya Xusro de, li ser fermanrewayî û serekatiya welat bi Xusro re dest bi şer kir. Di netîceyê de, di şer û qirinên di navbera wan herdu şahan de, bi gotineke din van herdu dawakarên seltenetê de, Bilaş li ser yê li hemberî xwe hakim bû û piştî mirina wî jî desthilat girt destê xwe.

Dema ku Bilaşê Duyem derket ser text, hozên Alanî bi hândan û paldana fermanrewayên der û dorê, ji bakurê rojhilatê ve hereket kirin û êriş anin ser herêmên Parsê û wilayetên selteneta Eşkanî û ew talan kirin. Bilaş hêza şer bi xwe re nedît û bi zora diyarî û rişweta darayî rêya pêşkeftina wan girt û welatê xwe kirî.

Bilaşê Duyem di temenê 70 salî de derketibû ser text û temenê wî pê re wefa nekir û piştî 30 sal fermanrewatiyê koça dawiyê kir.

Paşabûn û Koça Dawiyê ya Mihirdadê Çarem

Piştî mirina Bilaşê Duyem, ji malbata Eşkanî kesekî bi navê Mihirdadê Çarem ku xizmatiya wî ya nêzik bi Xusro re hebû, desthilata text girt destê xwe û bû paşa. Di serdema vê fermanrewatiya Eşkanî de, qeyserê Romayê Hadrun (Hadrianus) koça dawiyê kir û li cihê wî Entas Payus bû qeyserê Romayê. Peywendiyên wî bi paşayên Eşkanî re dostane bûne. Ji ber wê, di serdama Mihirdadê Çarem de, di navbera van herdu welatan de tu awayê dijîtiyê rû neda û li ser sînoren wan hiç bûyerek çênebû.

Paşabûn û Koça Dawiyê ya Bilaşê Sêyem

Piştî koça dawiyê ya Mihirdadê Çarem, Bilaşê Sêyem ê kurê Bilaşê Duyem bêyî tu asteng û problemekê derket ser text. Bilaşê Sêyem di serdema fermanrewatiya xwe de bi seltaneta Romayê re li ser du sebebên şer berpa kir. Yekem, paşayê Ermenistanê ji nijada Eşkanî nebû û duyem jî qeyserê Romayê di serdema Qeyser Tirucan (Trajan) de textê zêrînî yê Xesro wekî destektiyê şer biribû û di şandina wî de poşman bûbû.

Şer di navbera dewleta Eşkanî û Romayîyan de dest pê kir û Romayîyan ji hemû milan ve Eşkanî şikandin û perestgehên hemû welatê wan wek talan birin. Wê wextê nexweşiyêke epidemî/grîp a werzî ku li ber çav di nav hemû leşker de belav bûye û di netîceyê de gelek kes jê kuştîye. Rewşa heyî ya Romayîyan bi awayekî wisan xerab bûye ku neçar bûne beşeke serekî ya destektiyên xwe yê zêde di cih de bihêlin û paşve bikişin. Di rê de ji ber vê nexweşiyê gelek esker mirin, qir bûn û yê bi saxî gihîştin welatê xwe, ev ziyar û acizîya xwe li seranserê erdê welatê Romayê belav kirin û nexweşiyê piraniya navçeyên Romayê da ber xwe.

Bi vî awayî, şikestina Eşkaniyan bi serkeftî dawî lê hat û Bilaşê Sêyem piştî 40 sal fermanrewatî koça dawiyê kir.

Paşabûn û Koça Dawiyê ya Bilaşê Çarem

Piştî koça dawiyê ya Bilaşê Sêyem, Bilaşê Çarem hat ser textê Parsê. Di serdema wî de sê kes xwestiyarê paşatî û daxwazkarên text û taca qeyseriya Romayê bûn. Di demekê de ku Romayî mijûlî lêkdan û şerê hundirîn bûn ku di netîceyê de bûye sebebê wê xelkê xwemalî yê Beynelnehreynê alaya serhildan û şorişê bilind bikin û hemû eskerên Romayê ji nav bibin.

Şer û qirinên çendîn salan ên qeyserê Romayê bi Parsan re, çî ji goşenîgara welat û çî di warê takekesî de ji bo wan ne

netîceyeke baş bû. Di van şeran de ziyar û xesareke berfireh li Parsiyan jî ket, bajarên mezin û textên rojavayê careke din bû cihê lehiya êrîşên artêşa Romayê. Ev wêrankarî û kuştin di têkçûn û hilweşandina hêzên Parsê û erdê wê de, têkçûn û hejandina bingeha seltentê ku dikir di netîceyê de zûtir saz bike, zêdetir bûn yarmetîder. Bilaşê Çarem piştî 16 sal fermanrewatiyê koça dawiyê kir.

Hûşan Ūşka Mîrê Koşanê

Piştî koça dawiyê ya Kenîşkîn, Hûşan Ūşka derket ser textê Mîrnişîna Koşanê. Rewşa welat di serdema fermanrewatiya wî de gelek rihet û bi ewlekarî bûye û xelk xwediyê jiyaneke asûde bûye. Hûşan Ūşka her wextê mijûlî belavkirina dîne Bawadayî bûye. Nêzîkî 30 salan fermanrewatî kiriye û piştî koça dawiyê kiriye.

Mîrêmîran Mîr Beyx Biraxoyî

Piştî koça dawiyê ya Mîr Şahmîr, kurê wî Mîr Beyx derket ser textê Mîrnişîna Tûranê. Di serdema Mîr Beyx de, mîrê mezin ê Koşaniyan Hûşan Ūşka koça dawiyê kir û li cihê wî kurê wî Wasan Ūşka ku jê re “Wasa Dîwan” dihat gotin, derket ser textê fermanrewatiya Koşanê.

Di serdema Mîr Beyx de çend propagandîstên dîne Bawadayî ji bo propagandayê û nesîheta ji bo dîne xwe hatin Tûran û Mekranê û hinek ji xelkê rûniştîyên Ermabilê yê navçeya xwarê Tûran û navçeya bakurê rojhilatê Tûranê ku bi navê Bidhan dihatin nasîn ev dîn qebûl kirin. Lê Kurdên Beluçî yê Tûran û Mekranê li ser dîne xwe yanî Zerdeştîyê man û propagandaya dîne Bawadayî tu tesîrek li ser wan nekir. Ev rûniştîyên Ermabilê û Bidhan jî ku dîne Bawayî qebûl kirin, ji nijada Kurdên Beluçî nebûn, hevnijadê Cidgalên Sindanê bûn. Mîr Beyx 22 salan fermanrewatî kir û piştî koça dawiyê kir. Ev serekên Kurdên Beluçî hevçerxên wî bûn: Mîr Merdan Zengene, Mîr Kîluş Ed-

reganî Mîrêmîranê Mekranê, Mîr Şîmîn Mamilî û Mîr Behker Kirmanî.

Paşabûna Erdewanê Pêncem Li Parsê û Bilaşê Pêncem Li Babilê

Dema ku Mîr Bilaşê Çarem koça dawiyê kir, du kur jê man: Bilaş û Erdewan. Bilaşê Pêncem bû cihnişînê bavê xwe. Lê Erdewan paşatiya wî qebûl nekir û dest bi dijîtiyê kir û xwe wek dawakarê text nîşan da.

Di netîceyê de di navbera van herdu birayan de şer dest pê kir û endamên dewleta Parsê di navbera wan de aştî pêk anîn, ku welatê Babilê dan Bilaş û selteneta Parsê jî dan Erdewan. Di vî warî de herduyan li welatên xwe bingeha fermanrewatiya xwe damezirandin.

Mîrêmîran Mîr Şahrûz Biraxoyî

Piştî koça dawiyê ya Mîr Beyx, kurê wî Şahrûz derket ser textê Mîrnişîna Tûranê. Di serdema Şahrûz de li hemû goşê û penayê selteneta Eşkanî şoriş û serhildan berpa bû û rewşa tevlihevî û keşmekeşiyê bi lez geşe kir û belav bû.

Mîrên Kurdên Beluçî piştî hûrbûna li ser rewşê, ji bo rawêjkariyê berhev bûn û bi bîr û raya giştî li ser bîr, nêrîn û berjewendiyekê li hev kirin ku xwe ji tevliheviya wê serdemê dûr bixin û beşdarî şer û qirinên fermanrewatiya xwemalî nebin. Xwe ji ziyar û xesarê dûr bikin. Helbet di destpêkê de gerek serekên Kurdên Beluçî li dijî Erdeşêrê Sasanî, bi mebesta welatê xwe ji ziyar û xesarên giştî û pêwistiya gelemperî ya yarmetî û hevkarîya Mîr Wasan Ūşka yê paşayê Koşaniyan biparêzin. Lê ev helwest û kirinên Kurdan negihîştin armanca xwe, ji ber wê kar û barên dewleta Koşaniyan bi radeyeke tevlihev û şeperze bûn ku îmkana başbûn û liveke nû nemabû. Kurdên Beluçî jî dev ji hevkarî û piştevaniya wan berdan.

Li vir ev cihê balkêşiyê bû ku ruhiyeta nêrîna rêbaza dinê

Bawadayî bi rewşa serbazî ya Koşaniyan re nedigunca û ew hêza ku ji bo bihêziya leşker û serkeftinê pêwîst bû nedihat dîtin. Ev jî bûn sebebê şikestina Koşaniyan li hemberî hêzên Sasanî.

Mîr Şahrûz 30 salan fermanrewatî kir û ev serekên Tîreyên Pêncîne yên Kurdên Beluçî hevçerên wî bûn: Mîr Riwanşêr Zengene, Mîr Ûnkan Edreganî, Mîr Nûtar Mamilî û Mîr Behend Kirmanî.

Kuştina Erdewanê Pêncem ê Dawîn Paşayê Eşkanî

Piştî serdema Erdewanê Pêncem ê paşayê malbata Eşkanî, zîncîrek şoriş û serhildan li welatê Mad û Parsê dest pê kir û dawî bi Împaratoriya Eşkanî anî. Ev şoriş di destpêkê de bi awayê şer û tevlîheviyên biçûk ên xwemalî di navbera mîran û fermanrewayên wilayetan de li sînorê herêmên Parsê ku wê wextê di rastiya xwe de serxwebûna wan hebû tevlîhev bû. Erdeşêrê kurê Papikê kurê Sasan rêveberiya welatê xwe fireh kiribû û navçeyên der û dorê yek bi yek dagir kiribûn. Her wiha bavê xwe han dida ku li dijî fermanrewatiya berê şoriş û serhildanê dest pê bike. Papik daxwaz ji paşayê Eşkanî kir ku kurê wî Şahpûr li cihê fermanrewayê berê ku hatibû kuştin deyne ser seltenetê. Ev daxwaz ji aliyê şah ve nehat qebûl kirin. Papik di wê navê re koça dawiyê kir û Şahpûrê kurê wî bû cihnişînê wî û ew jî gelek di ser re derbas nebû dîwarek bi ser de hilweşiya û mir. Piştî vê bûyerê, Erdeşêrê birayê Xeyra xwe gihand bajarê Estexrê û li cihê wî derket ser textê paşatiya welatê Parsê. Fermanrewayên Madê, Kurdistanê û Kerkûkê bi Erdeşêr re yekîti çêkirin li dijî malbata Eşkanî dest bi şer kirin.

Di seranserê salekê de paşayên van welatan êrîşî ser çendîn bajarên mezin kirin û ew dagir kirin. Di netîceyê de, Erdewanê Pêncem li Ehwezê bi giranî şikest û hat kuştin. Bi vî awayî, seranserê welatê wî ket bin desthilata Erdeşêrê Papikan û serdema paşatiya Eşkaniyên Parsê tamam bû.

BEŞA NEHEM

KURDÊN BELUÇÎ DI SERDEMA SASANIYAN DE

Sasanî

Tê neqilkirin ku dema Behmen Hexamenşî yê paşayê Mad û Farsê, li gor dîne Zerdeştî bi xweha xwe Humayê re zewicî û kurek jê çêbû, navê wî danî Dara. Hatina dinyayê ya Dara bû sebeb ku Sasanê birayê Behmen ji mîrata text û tacê bêpar be. Sasan di rewşeke perîşanî de çû çiyayên Kurdistanê û jiyana li goşeyekî rûniştinê hilbijart û xwe bi xwedîkirina pez mijûl kir.

Paşayê Eşkanî Papikê kurê Sasanî bi pileya fermanrewatiya Parsê hat hilbijartin û di vî warî de ew yek fermanrewayê navçeyekê yê paşayê Eşkanî bûye. Piştî Papik koça dawiyê kir, Şahpûrê kurê wî li cihê wî derket ser textê Farsê. Lê fermanrewatiya wî gelek nekêşa û diwarek bi ser de hilweşiya û mir. Erdeşêrê birayê wî derket ser textê paşatiya wilayeta Parsê.

Paşabûna Erdeşêr

Piştî koça dawiyê ya Şahpûr, Erdeşêr ku birayê wî û neviyê Sasan bû derket ser textê wilayeta Farsê û bingeha selteneteke bi hêz û xurt li Farsê damezirand. Dema ku hat ser wilayeta Farsê, selteneta Mad û Parsê bi ser 140 wilayetan ve parve kiribû û her yek ji wan wilayetan jî xwediyê fermanrewatiya xwe bi xwe bû ku di bin desthilata paşayê Eşkanî Erdewanê Pêncem de bû. Dema ku Erdeşêr paşatî ji Erdewanê Pêncem

wergirt û dawî li selteneta Eşkanî hat, hinek ji fermanrewayên wilayetên Mad û Parsê paşatiya Erdeşêr qebûl nekirin. Ji ber wê biryar da ku wan bîne bin desthilata xwe. Di vê navê re, fermanrewayên wilayetên bakurê rojhilat li dijî wî rabûbûn û Erdeşêr ber bi navçeyên Xorasan, Merro, Belx û Xîwayê ket rê. Dema ku Erdeşêr mijûlî dagirkirina wilayetên van navçeyan bû, sefirên fermanrewayên Koşan, Tûran û Mekranê ji bo paşatiya wî hatin û peyama îtaeta fermanrewatiya xwe jê re ragihandin. Erdeşêr jî piştî qebûlkirina îtaetê nûnerên wan bi diyarî û xelatan ve şandin û ew jî ber bi welatê xwe ve vegehiyan.

Mîrêmîran Mîr Bûrak Biraxoyî

Piştî koça dawiyê ya Mîr Şahzûr, Mîr Bûrakê kurê wî derket ser textê Mîrnîşîna Tûranê û di serdema wî de, Erdeşêrê Papik desthilatdarî li ser hemû selteneta Eşkanî bi dest xist. Erdeşêrê Papik piştî şer Erdewanê Pêncem li Dešta Hurmuzê li rojhilatê Ehwazê bi giranî şikand. Erdewanê Pêncem di meydana şer de hat kuştin û Erdeşêr jî cardin paşatiya xwe îlan kir û derket ser textê Mad û Parsê.

Bi dîtina guherînên vê rewşa welat, Kurdên Beluçî û serekên wan bi mebesta rawêjkariyê li hev kom bûn û biryar dan ku ji Erdeşêrê Papikî re îtaet bikin. Di netîceya vê biryarê de, Mîr Bûrak Biraxoyî yê mîrêmîranê Tûranê, Mîr Sargan Edreganî yê mîrêmîranê Mekranê, Mîr Îzbûk Zengene û Mîr Silxan Mamilî nûner û peyamnêrên hoz û tîreyên Kurdên Beluçî yên Tûran û Mekranê şandin ba Erdeşêr ku îtaeta wan mîran pê rabigihîne. Van mîran piştî gihandina peyama îtaetê ber bi Tûranê ve vegehiyan.

Mîr Bûrak 35 sal fermanrewatî kir û piştê koça dawiyê kir. Ev mîrên Kurdên Beluçî hevçerxên wî bûn: Mîr Îzbûk Zengene, Mîr Sargan Edreganî yê Mîrêmîranê Mekranê, Mîr Silxan Mamilî û Mîr Laskan Kirmanî.

Êrîşa Erdeşêr Li Ser Erdê Hindê

Erdeşêr Paşa ji bindestkirina fermanrewayên serhilder ên Xorasan, Merro, Belx û Xîwayê vala bû û bira dagirkirina Hindê ket serî, di wilayetên Kabilistan û Kindaranê re derbas bû û bajarê Pûşanpûranê dagir kir. Erdeşêr bi şer bi ser Qişûnê Hindê ket. Paşayê Hindê Cunan zêr, zîv, xezîne û serwetên mezin dan Erdeşêr. Erdeşêr jî piştî dagirkirinê bi vê baca bêemsal ve ber bi Mad û Parsê vegeriya.

Erdeşêr 13 salan fermanrewatî kir û piştî koça wî ya dawiyê, Şahpûrê kurê wî derket ser text.

Paşabûna Şahpûrê Yekem

Piştî koça dawiyê ya Erdeşêr, kurê Şahpûrê Yekem derket ser textê selteneta Sasaniyan. Şahpûr ji aliyê dayikê ve neviyê Erdewanê Pêncem ê pašayê Eşkanî bû.

Fermanrewayên Ermenistan û Hitrayê li ser mirina Erdeşêr amadeyî serhildanê bûn û ketin wê tamahiyê ku careke din dest bi ser wan herêmên beriya wê di destê wan de bûn bigirin. Dema ku Şahpûr bi vê hesiya, tedbîreke zanayî girt ku pêşiyê serhilderê fermanrewayê Ermenistanê bi hêsayî berteref kir û piştîre paytexta Hitrayê dorpêç kir. Lê çi heye fermanrewayê Hitrayê ji Şahpûr re xeber şand ku eger ew bi jin bixwaze dê li hev bikin û alîkariya wî bike.¹⁷ Piştîre peyam qebûl kir û Hitra dagir kir.

Şahpûrê Yekem 31 salan fermanrewatî kir û piştî koça dawiyê kir.

¹⁷ Ev hevok baş nehat fehmkirin, gelo mebest ji gotina "...ew bi jin bixwaze..." danîna xizmatiya pê re ye? Yan wergirê soranî hevok temam nekiriye? Ez nizamim? -Z. Avci.

Manî û Dînê Wî

Ew kes navê wî Manî û rûniştiyê Hemedanê bû. Navê bavê wî Patka û navê dayîka wî Ewtaxim bû. Wan ji Hemedanê bar kirin û çûn li Babîlê bi cih bûn. Manî li Babîlê hat dinê û di temenê 13 salî de Siruş/Cebraîl jê re hat xwarê. Lê rêbaza dinê xwe di dema hatina ser text a Şahpûr de îlan kir. Şahpûr bi îlankirinê re bawerî bi dinê wî anî, dinê wî qebûl kir û bû yek ji perestiyarên wî. Ev guherîna Şahpûr ji dinê bav û bapîrên xwe bû sebebê aciziyê û acizkirina perestgehên û endamên dewletê. Wan ewqas acizî çêkirin ku neçar bû ji vê bêdîniyê (ateîzmê) tobe bike û cardin bête nav çarçoveya dinê Zerdeştî ku dinê bav û bapîrên wî bû. Her wiha ji bo dilsozî û rastbêjiya xwe li hemberî dinê bav û bapîrên xwe îsbat bike Manî ji bajêr derxist.

Manî di dema derxistina ji bajêr de geşta Hindê û Çînê kir û piştî koça dawiyê ya Şahpûr vegehiya Parsê. Peyrewkerên Manî li gel wan hemû sitem, tundî, tûjî û çewisandinên ku ji her aliyê welat ve bi ser de dihatin, bi bêhnfirehî tehamulî wan hemû kirin û nedadperweriyên dikir û bi bêdengî û nehênî dinê xwe belav dikir.

Dînê Manî di miqabilî dinê Zerdeştî de gelek sade û hêsan bû. Ji ber wê bi rihetî nav û deng da. Her wiha cihê îşaretê ye ku adetê peyrewkerên dinê Zerdeştî gelek bi eziyet û giran nebûye.

Mîrêmîran Mîr Mihran Biraxoyî

Mîr Bûrak di serdema fermanrewatiya Şahpûrê Yekem de koça dawiyê kir û piştî wî Mîr Mihranê kurê wî derket ser textê Mîrnişîna Tûranê. Di serdema Mîr Mihran de, hemû balkêşî û hişê welatê Sasanî û fermanrewayên hevpeymanên wê ji bo dagirkirina wan navçeyên Mad û Parsê hatibûn amadekirin ku di dawîna serdema Eşkaniyan de welatê Romayê dest bi ser de girtibû. Sebebê vê jî ew bû ku Romayîyan dest danîbûn ser

beşeke serekî ya welatên rojavayê selteneta Mad û Parsê.

Kurdên Beluçî yên Tîreyên Pêncîne jî bi çavdêrî û parastina sînorên rojhilatê ku gihîştibû welatê Sindanê mijûl bûn. Mîr Mihran piştî 25 sal fermanrewatiyê koça dawiyê kir. Ev mîrên Kurdên Beluçî hevçerxên wî bûn: Mîr Behram Zengene, Mîr Ewnîz Edreganî Mîrêmîranê Mekranê, Mîr Mîrdad Mamilî û Mîr Şahar Kirmanî.

Paşabûna Hurmuzê Yekem

Piştî koça dawiyê ya Şahpûrê Yekem, kurê Hurmuzê Yekem derket ser text. Du kurên Şahpûr hebûn: Hurmuz û Behram. Hurmuz kurê mezin bû, ji ber wê endamên dewletê li gor destûr û adetê Sasaniyan ew danîn ser textê bavê wî.

Hurmuz, beriya derketina ser text, dadgerê welatê Xorasanê bû. Hurmuz wekî bav û bapîrên xwe bi dadperwerî fermanrewatî kir. Di serdema desthilatdariya xwe de bangî Manî kir ku cardin bê Mad û Parsê û di koşka xwe de jê re mazûvanî kir. Temen bi Hurmêz re ne yar bû û piştî salekê koça dawiyê kir.

Hatina Şîretkerên Manî Li Sikistan, Tûran û Mekranê

Dema ku Hurmuzê Yekem Manî bangî Parsê kir, hat û li koşka paşa bi cih bû û peyrewkerên wî careke din bi eşkere dest bi belavkirina dîne xwe kirin. Kesekî navê wî Kisûn ku rastbêj û bawerîpêkiriye dîne Manî bû hat Sikistanê û ji wir jî çû Tûran û Mekranê û xelkê van welatan anî ser rêbaza dîne xwe.

Kisûn ji zanayê bijarte ye Manî bû û bi awayekî wisan zimanşêrîn û qisexweş bû ku biçûya çî cihî, piştî sehkirina nesîhetên wî yên efsûnî xelkê deste bi deste dîne Manî qebûl kirine. Kurdên Beluçî jî bi serekên xwe ve dîne Manî qebûl kirine.

Rêbaza dînê Manî gelek sade bûye û dînê wî li ser van her sê bingehan jiyaye: Bîra baş, kirina baş û soz/peymana baş telqîn daye û adetê xwedûrkirina ji adetên bêcih û tijî eziyet, daye.

Mîrêmîran Mîr Şadan Biraxoyî

Mîr Mihran piştî ku malavayî xwest, Mîr Şadanê kurê wî derket ser texê selteneta Mîrnişîniya Tûranê. Di serdema Mîr Şadan de, Hurmuzê Yekem koça dawiyê kir û Behramê birayê wî li cihê wî derket textê Sasanê. Peywendiyên Behram bi hevpeymanên xwe re gelek bi dostane û dilsozane bûne.

Ev mîrên Tîreyên Pêncînî yên Kurdên Beluçî hevçerxê Mîr Şadan Biraxoyî bûne: Mîr Şêrbûz Zengene, Mîr Bazîç Edreganî Mîrêmîranê Megranê, Mîr Mihirdad Mamilî û Mîr Nûkaf Kirmanî.

Paşabûna Behramê Yekem

Hurmuzê Yekem piştî salek fermanrewatiyê li Gencê koça dawiyê kir û endamên dewletê Behramê birayê wî anîn ser text. Behram kesekî bi weswese bû û di karên xwe de sist bû. Ji ber van sebebên di welatê wî de tevlihevî û neasûdeyiyê serî hildaye.

Kuşîna Manî

Di serdema fermanrewatiya Behremê Yekem de Manî hat kuştin. Hurmuzê birayê Behram hevdeng û piştevanê Manî bû. Di serdema fermanrewatiya xwe de izin dabû ku Manî propagandaya dînê xwe bike. Ji ber vê gelek rik û kîna Berhem ji Manî vedibû. Ji ber vê çawan derket ser text bi perestgehên Zerdeştî re yekîti pêk anî û bi awayekî ev izin gihandiyê netîceyê ku Manî ji orteyê rakin.

Behram ji bo vê mebestê ji bo guftgoyê bangî Manî

kir û di vê gotûbêjê de pêşewayên Zerdeştî Manî bê din û xwedênenas hesêb kirin û kuştin.

Li gel wê jî, sitem û zordariya li hemberî peyrewker û bawermendên Manî rewa dîtin. Kurdên Beluçî yên Sikistan, Tûran û Mekranê jî bawermendên dîne Manî bûn. Ji ber vê sebebê, ew jî ketin ber gilî, acizî û tund û tûjiya Behram.

Ev rêbaz guhertin heta bûye sebebê têkçûna mîrnişînên Kurdên Beluçî li Tûran û Mekranê. Bi vî awayî Kurdên Beluçî careke din bi jiyana xwe ya hozatiyê mijûl bûne.

Behramê Yekem piştî sê sal fermanrewatiyê koça dawiyê kir.

Paşabûna Behramê Duyem

Piştî koça dawiyê ya Behramê Yekem, kurê wî Behramê Duyem derket ser textê bavê xwe. Behramê Duyem xemxwarê wê rewşa tevlihev û keşmekeşiyê bû ku di serdema desthilatdariya bavê wî de di nav welat de belav bûbû û dixwest bi lez van ziyankariyan çareser bike. Ew wisan difikirî ku bi zebr û zengê dikare xerabkeran ji karê welat dûr bixe. Di bikaranîna vî awayê tekayî de, hereketê wî ewqas giran bû ku mezinan û endamên seltenetê û xelkê welat jê bêzar bûn û nikaribûn tişteki bikin. Mezinên seltenetê ji bo kuştina wî bi nehênî peymanek girêdan. Lê yek ji pêşewayên Zerdeştî ku dilsozê Behram bû bi vê planê hesiya û di navbera Behram, endam û desthilatdarên welat de aştî pêk anî.

Behram ji vê bûyerê ders wergirt û dev ji zordarî û sitemê berda û destpêka fermanrewatiya xwe bi dadperwerî û dilsozî meşand. Bi vî awayî, xelk ji van hereketê wî şad bûn û Behram careke din bû evîndarê xelkê welatê xwe.

Behramê Duyem piştî heft salên fermanrewatiyê koça dawiyê kir.

Îtaetkirina Hozên Sakayî û Kurdên Beluçî

Hozên Sakayî yên Zabilistanê û Kurdên Beluçî yên Tûran û Mekranê dîne Manî qebûl kiribûn û ji bawermendên wê bûn. Piştî mirina Hurmuzê Yekem, birayê wî Behramê Duyem derket ser text ku li hemberî Manî gelek bi rik û kîn bû û ew xwedênenas û bêdîn dizanî. Piştî kuştina Manî, Behram dest-dirêjî li ser bawermend û şopdarên Manî kir. Ji ber ku Kurdên Beluçî û Sakayî jî hevberê Manî bûn. Duçarî xeyd û tund û tûjiya Behram bûn û ji sitem û zordariya wî rizgar nebûn. Di netîceyê de mîran hevdu girtin û şoriş û serhildan berpa kirin û êrîş ber bi Kirmanê ve birin û ew welat talan kirin.

Behramê Duyem bi hemû hêzên şer ve li hemberî Sakayiyên Zabilistanê û Kurdên Beluçî yên Tûran û Mekranê bergirî kir û êrîş bir ser Zabilistanê. Piştî şerekî giran, serhildêr şikandin.

Di vî şer û qirênê de, mîrê Sakayîyan Mîr Eşkin Serû, mîrê Kurdên Beluçî Mîr Şêrbûz Zengene û Mîr Mihirdad Mamîlî hatin kuştin. Di netîceya vî şerî de, Behramê Duyem mîrên Sikistan, Tûran û Mekranê ji ser kar daxistin û li cihê wan li van welatan dadgerê xwe bi cih kirin.

Hatina Zawik a Ser Dadgeriya Tûran û Mekranê

Behramê Duyem ku agirê şoriş û serhildanên Sikistan, Tûran û Mekranê tefand û bawermendên Manî qetil kirin û bi ser wan de hakim bû, baweriya wî bi mîrên van welatan tune bû. Ji ber vê ew ji ser pile û meqamên wan hildan û li cihê wan Mîr Zawik li ser pileya dadgeriyê Tûran û Mekranê bi cih kir.

Paşabûna Behramê Sêyem

Behramê Sêyem piştî koça dawiyê ya bavê xwe derket ser text. Wî tenê çar mehan fermanrewatî kir û piştê koça dawiyê kir.

Paşabûna Narses

Piştî koça dawiyê ya Behramê Sêyem, ji malbata Sasanî du kurên Şahpûr, Hurmuz û Narses di jiyane de bûn. Hurmuz xwe xwediyê mafê paşatiyê dizanibû û dema ku Narses derket ser textê selteneta Sasaniyan, wî dest bi şoriş û tevliheviyan kir. Lê bi ser neket, şikest û şorişa wî pûç bû.

Şer Bi Romayîyan Re

Dema ku Narses derket ser text, wilayeta Ermenistanê di bin desthilata Romayîyan de bû. Narses ev destbisergirtin rewa nedidît û êrişî ser Ermenistanê kir û mîrê Ermenistanê Tîrdad bi giranî şikand.

Tîrdad xwe avêt ba qeyserê Romayê û Qeyser alikariya wî kir û ferman da serleşkerekî ku êrişî ser selteneta Parsê bike. Romayîyan bajarê 'Ekasanê ku Narses tê de bû dorpeç kirin û di navbera van herdu welatan de şerekî giran rû da. Di netîceyê de, Narses şikest û Romayîyan hemû dewlemendiyên bajêr û menceñiqên keleşikên, kelûpel û wasiteyên Sasaniyan bi temamî ji orteyê rakirin.

Narses di şer de birîndar bû û bazda. Piştî, ji dax û kula şikestinê dev ji seltenetê berda û jiyana goşenişîniyê hilibijart.

Behramê Sêyem 19 salan fermanrewatî kir.

Paşabûna Hurmuzê Duyem

Piştî goşenişîniya Narses, bi wasîtiya wî Hurmuz anîn ser text. Hurmuz di serdema zaroktiya xwe de li gor Romayîyan hatibû perwerdekirin û urf û adetên Romayîyan li balê gelek qebûlbar/pesendbar bûn. Ji ber vê, endamên dewleta Parsê qebûl nedikir.

Piştî derbasbûna heşt salan bi ser fermanrewatiya wî de, mezin û karbidestên seltenetê ew ji ser text hildan û li cihê wî Şahpûrê kurê wî ku hêj zarok bû anîn ser text. Bi mebesta perwerdekirina wî jî civateke endaman damezirandin.

Hatina Erşem Ji Bo Dadgeriya Tûran û Mekranê

Hurmuzê Duyem ku bû paşa, zewqa dagirkirina Tûran û Mekranê ji nav karê xwe derxist û di cihê wê de Mîr Erîm ji bo dadgeriya van herdu welatan şand.

Ev serekên Tîreyên Pêncînî yên Kurdên Beluçî hevçerxên Hurmuzê Duyem bûn û li Tûran û Mekranê jiyana xwe derbas dikirin: Mîr Rostem Biraxoyî, Mîr Bûrak Zengene, Mîr Gibil Edreganî, Mîr Îfdad Mamilî û Mîr Cadî Kirmanî.

Bingeha Eslê Sakaiyên Sikistanê

Mîr Mayîses ku bi navê “Musun” jî dihat nasîn, yekem mîrê Sakaiyan bû ku bi tîreyên xwe ve hat Zabilistanê û li wir bi cih bû. Ji ber sebebê bicihbûna wan, wilayeta Zabilistanê bi navê Sikistanê hat nasîn. Eslê wî bi vî awayî xwarê ye:

Mabîses, kurê Îzsêsê kurê Îsalîsesê kurê Gûdayê kurê Ebdîn Gases yek li pey yekî li ser Mîrnişîna Zabilistanê fermanrewatî kirine.

Piştî ku Mîrnişîna Sakaiyan duçarî bêhêzî û jariyan bû, Sakaiyan wekî hozeke mezin li Zabilistanê jiyana xwe derbas kirin. Eslê serekên hozên Sakaiyan ku ji neviyên Ebdîn Gases bûne, bi vî awayî ye:

Ebdîn Gases, kurê Kîdarsesê kurê Pîrûsanê kurê Taxirtûyê kurê Mûxantûyê kurê Keydikê kurê Mûsnasesê kurê Tikantûyê kurê Timandûsê kurê Eşkinsar e û piştî Eşkinsar jî ku di şerê Behramê Duyem de hatiye kuştin, kurê wî Ewsitwan û piştî wî jî kurê wî Exirtû serekê hozên Sakaiyan bûne.

Paşabûna Şahpûrê Duyem

Desthilatdar û mezinên selteneta Parsê, Şahpûr di temenê zaroktiyê de danîn ser textê paşatiya bavê wî. Heta temenê biloxê, dayîka wî fermanrewatî bi rawêjkariya endamên dewletê dimeşand. Lê dema ku gihîşt temenê biloxê, bi xwe

kar û barên fermanrewatiya welat girt destê xwe û heta demeke dirêj ku ji 70 salan pêk hatibû fermanrewatî kir.

Serdema fermanrewatiya Şahpûr bi ser sê qonaxan ve parve dibe. Qonaxa yekem ji 28 salan pêk tê. Di vê serdemê de Şahpûr kar û barên welat ên hundir rêk xistiye û welatê xwe bi hêz kiriye. Qonaxa duyem, bi şer û qirênên bi Romayîyan re dest pê dike û heta 15 salan dom dike. Di vê serdemê de li hemû cihan selteneta Romê şikandiye, tirs û sawa artêşa xwe bi awayekî wisan kiriye dilê wan ku ji tirsê Şahpûr di nav lerzê de bûne.

Piştî hakimiyeta xwe li ser welatê Romayê, qonaxa sêyem a Şahpûr dest pê dike. Şahpûr di vê serdemê de hişê xwe daye karûbarên wilayetên rojhilatê û agirê şoriş û serhildanên wan tefandiye û çendin bajarên mezin dagir kirine. Ji bo bibîranîna serkeftinên xwe sike lê daye û piştî 70 sal fermanrewatiyê koça dawiyê kiriye.

Şahpûr di qonaxa yekê de ev serekên Kurd ên Beluçî hevçerxên wî bûne: Mîr Selem Biraxoyî, Mîr Mihirdad Zengene, Mîr Mihrab Edreganî, Mîr Birmiban Mamilî û Mîr Rostem Kirmanî.

Ji bo ku serdema fermanrewatiya Şahpûrê Duyem dûr û dirêj bûye, di dawîn serdema desthilatdariya wî de ev serekên Kurd ên Beluçî yên Tîreyên Pêncînî hevçerxên wî bûn: Mîr Tîrdad Biraxoyî, Mîr Rostem Zengene, Mîr Peyx Edreganî, Mîr Pişkîn Mamilî û Mîr Bûrzmihir Kirmanî.

Hatina Menûçeher Ji Bo Dagirkirina Tûran û Mekranê

Dema ku Şahpûr desthilata fermanrewatiyê girt destê xwe, Mîr Menûçeher tayînî dadgeriya Tûran û Mekranê kir ku heta mideteke dirêj li ser pileya dadgeriyê ma. Lê piştê Şahpûr ew derxist û Mîr Kawyan şand cihê wî.

Paşabûna Erdeşêrê Duyem

Piştî koça dawiyê ya Şahpûrê Duyem, kurê wî Erdeşêr derket ser text. Temen wefa pê re nekir û rastî nexweşiyekê hat û piştî çar salan koça dawiyê kir.

Hatina Erbed Ji Bo Dadgeriya Tûran û Mekranê

Erdeşêrê Duyem di serdema fermanrewatiya xwe de, Mîr Erbed ji bo dadgeriya Tûran û Mekranê şand.

Paşabûna Şahpûr (Sêyem)

Erdeşêrê Duyem di salên xwe yê xortaniyê de koça dawiyê kir û tu zarokên wî tune bûn. Ji ber wê, endamên dewletê kurê birayê wî Erdeşêrê Sêyem anîn ser text. Vî fermanrewayî jî midetê dirêj fermanrewatî nekir û piştî derketina ser text pênc salan sax ma û piştê koça dawiyê kir.

Paşabûna Behramê Çarem

Piştî koça dawiyê ya Şahpûrê Sêyem, endam û karbidestên seltenetê fermanrewatiya Parsê dan Behram ku beriya derketina ser text fermanrewayê Kirmanê bû. Behram 11 salan fermanrewatî kir û di serdema paşatiya wî de eskeran dest bi şoriş û serhildanê kirin. Behram ji bo bêdengkirina wan rabû û di wextê tefahdina şorişê de hat kuştin.

Ev serekên Kurdên Beluçî yê Tîreyên Pêncinî hevçerxên wî bûn: Mîr Siyamek Biraxoyî, Mîr Tîrdad Zengene, Mîr Şasir Edreganî, Mîr Mipirdad Mamilî û Mîr Gulbehar Kirmanî.

Paşabûna Yezgurdê Yekem

Piştî kuştina Behramê Çarem, Yezgurdê Yekem derket ser textê Sasaniyan. Ev paşa gelek aştxwaz bû û bi selteneta dijber re yanî selteneta Romyê re peywendiyên dostane bi hêz kirin. Her wiha bi çavekî gunehpêhatî li gawiran nihêriye

û bi wan qencî kirine. Piştî 21 sal fermanrewatiyê baregeha xwe li dinê da hev.

Hatina Mîr Keysûn Ji Bo Dadgeriya Tûran û Mekranê

Dema ku Yezdgurdê Yekem desthilata fermanrewatiyê girt destê xwe, Erbedê dadgerê Tûran û Mekranê koça dawiyê kir. Li ser vê Yezdgurd Mîr Keysûn danî ser pileya dadgeriya Tûran û Mekranê.

Ev serekên Kurdên Beluçî yên Tîreyên Pêncînî hevçerxê Yezdgurdê Yekem bûn: Mîr Mingîb Biraxoyî, Mîr Guhderz Zengene, Mîr Behar Edreganî, Mîr Kudan Mamilî û Mîr Zeng Kirmanî.

Paşabûna Behramê Pêncem

Dema ku Yezdgurdê Yekem koça dawiyê kir, du kur li pey man: Behram û Şahpûr. Desthilatdar û endamên selteneta Parsê herdu layîqî fermanrewatiyê nedidîtin. Ji ber wê Behram di salên xwe yên zaroktiyê de di nav Ereban de perwerde bûbû. Şahpûr jî dema ku xebera mirina [Yezdgurdê Yekem] gihîştê, paytexta Ermenistanê terk kir, ji bo bidestxistina text bi lez xwe gihand Parsê. Di netîceya vê lezê de, fermanrewayê Romayê dest danî ser Ermenistanê. Ji ber van sebebên, karbidest û endamê dewletê kesekî navê wî Xesro yê ji malbata Sasanî anîn ser text.

Dema ku Behramê Pêncem ku jê re “Behramgur/Behram Gur” jî gotine, vê rewşê dibîne, bi alîkariya Ereban êrişî ser selteneta Parsê dike, Xesro dişikêna û bi xwe derdikeve ser textê fermanrewatiyê. Behram piştî bicihbûnê, rewşa neşayîste ya li hemberî gawiran ku rûniştîyên welatê wî bûn, bi kar anî. Ew jî li ber sitem û zordariya wî rabûn û xwe avêtin ba Qeyserê Romayê. Behram daxwaza vegeza rûniştîyên welatê xwe ji qeyserê Romayê kir û welatê Romayê jî daxwaza wî bi cih nekir û di netîceyê de di navbera wan herdu welatan de şer dest pê kir.

Şer Bi Selteneta Romayê Re

Behram êrîşî ser welatê Romayê kir û piştî çend şer û qirênên giran şikest. Behram daxwaza aştiyê kir û li ser wê li hev kirin ku Behram bi dadperwerî bi rûniştîyên gawir re hereket bike.

Hatina Mîr Xeyzûn Ji Bo Dagirkirina Tûran û Mekranê

Behram ku derket ser text, mîrekî xwe yê bawerpêkirî yê navê wî Xeyzûn bi pileya dadgeriyê tayînî Tûran û Mekranê kir. Keysûn jî ji ser vê pileyê rakir.

Hatina Xwarê ya Hoza Hîtalî

Di serdema fermanrewatiya Behramê Pêncem de hozên rengê spî ku di zimanê Kurdî de jê re Hîtal, Hîtil û Hiftal hatiye gotin, ji ser erdên Asyaya Navîn û Deryaya Amoyê ve ber bi dewletên bakurê Tixar û Baxterê ve çûn û ji wir jî ber bi xwarê ve berjêr bûn. Koşanî ku his ji tirsê êrîşên wan kirin, ji fermanrewayên Sasanî daxwaza alikariyê kirin. Lê kar gihîşt wê qonaxê ku şiyana bergirîkirina wan nema û paşve kişyan.

Hîtalî ber bi xwarê û rojhilatê ve ketin rê û pêşve hatin, geliyên Kabilistan, Kendara û Zabilistanê dagir kirin û li wan cihan mîrnişîna xwe damezirandin. Ev hozên han wekî Koşanî û Sakaiyan bi xelkê xwecih ên ser van erdan re tevlihev bûn.

Şerê Hîtalan Bi Behramê Pêncem Re

Zordana hatina pêş a hozên Hîtal ewqas zêde bû ku dikir selteneta Behram ji orteyê rake. Mîrê Hîtalan bi 250 hezar eskeran ve berê xwe da geliyê Mîrxabê û rûbarê Meroyê û şer bi leşkerê Behram re dest pê kir. Lê çarenivîsê hevaltiya Behram kir, paşayê Hîtalan şikest û di meydana şer de hat kuştin. Behram Hereme girt û mal û destkeftiyeke gelek mezin

ket destan. Bi vê hatina pêş a Hitalan sekinandin.

Kurdên Beluçî di şerê Hitalayan de piştevaniya Behremê Pêncem kirin û li dijî Hitalan şer kirin. Ev serekên Kurdên Beluçî yên Tîreyên Pêncînî hevçerxên Behramê Pêncem bûn: Mîr Candar Biraxoyî, Mîr Resan Zengene, Mîr Kêsak Edreganî, Mîr Siyamek Mamilî û Mîr Sarûn Kirmanî. Behram 20 salan fermanrewatî kir.

Paşabûna Yezdgurdê Duyem

Piştî koça dawiyê ya Behramê Pêncem ê bi navê “Behramgur” hatiye nasîn, Yezdgurdê kurê wî yê biçûk derket ser text û çendîn caran bi Hitalayan re ku li ser erdê vala, bakurê Gurgan û Talqanê jiyana xwe derbas dikirin, şer kir. Lê di dawiyê de Hitalan Yezdgurd şikandin û bi hemû wan kêmasiyan re, Yezdgurd karîbû sînore welatê xwe ku gihîştibû navçeyên Hitalayan bi hêz bike û amadekariya êrişan bike.

Di serdema Yezgurd de propagandîstên gawiran zêde propaganda kirin û nesîhetên dîne xwe ji Ermenistanê dest pê kirin û ev jî bû sebebê perîşanbûna pêşewayê Zerdeştîyên Parsê. Yezdgurd jî di bersiva vê de, bi propagandayên zêde xelk ji çûna nav rêbaza mesîhîtiyê dûr xistin.

Ev serekên Kurdên Beluçî yên Tîreyên Pêncînî hevçerxê Yezdgurdê Duyem bûn: Mîr Şabûz Biraxoyî, Mîr Kubad Zengene, Mîr Selem Edreganî, Mîr Risan Mamilî û Mîr Şadîn Kirmanî. Yezdgurd 17 salan paşatî kir.

Hatina Mîr Kirahûn Ji Bo Dadgeriya Tûran û Mekranê

Yezdgurdê Duyem di serdema fermanrewatiya xwe de dadgerê Tûran û Mekranê Mîr Xêyzun rakir û Mîr Kirahûn li ser pileya dadgeriyê tayînî cihê wî kir.

Paşabûna Feyrûz

Piştî Yezdgurdê Duyem, Feyrûzê kurê wî bû paşa. Wê wextê serekatiya Hîtaleyan jî gihiştibû seviya paşatiyê û navê paşayê wan Nexşunewaz bû. Bi vî awayî, dewleta Hîtalî û Sasanî li bakurê Xorasanê li hev ketin û di netîceya vê lihevketinê de Feyrûz şikest û erdê Talqanê ji bo talanê şer dane wî. Her wiha, bi Nexşunewaz re peyman imza kir ku li hêla sînorê Xorasanê dewleta Parsê ji sînor derbas nebe û heta du salan baceke mezin bide Hîtaleyan. Lê Feyrûz peyman şikand û piştî demekê leşker kişiya ser wan û Hemîsan artêşa Parsê li deşta bakurê Xorasanê belav û welav bû û Feyrûz bi xwe hat kuştin û selteneta Parsê bû bacderê Hîtaliyan.

Dema ku şahên Hîtaleyan li Suxdus, Kabilistan û Sikistanê bi cih bû, hoza wan Zabilistan kir melbenda xwe. Her ji ber vê jî ji xwe re gotin “Cabule” yanî “Zabilî”.

Feyrûz piştî 26 salên fermanrewatiyê di şerê Hîtaleyan de hat kuştin. Ev serekên Kurdên Beluçî hevçerxên wî bûn: Mîr Kûşan Biraxoyî, Mîr Girşasp Zengene, Mîr Caf Edreganî, Mîr Beyx Mamilî û Mîr Tîrdad Kirmanî.

Hatina Kirkûyî Ji Bo Dadgeriya Tûran û Mekranê

Dema ku Feyrûz derket ser text pileya dadgeriya Tûran û Mekranê da mîrê artêşê ku navê wî Kirkûyî bû.

Paşabûna Bilaş

Piştî kuşina Feyrûz di şerê Hîtaleyan de, birayê wî Bilaş ku bi navê “Bilas” jî hatiye nasîn, derket ser textê Sasanê. Bilaş mirovekî neşayiste û bêfeyde bû û nikaribû şan û şohreta selteneta Sasanî bilind rabigire û wezîrê wî ku navê wî Zirmihir bû ew ji ser text rakir û çavên wî derxistin.

Hatina Mîr Kiyarş Ji Bo Dadgeriya Tûran û Mekranê

Zirmihre ku Feyrûz ew anîbû ser text, mîrekî bawerpêkiriye xwe ku navê wî Kiyarş bû bi pileya dadgeriyê li Tûran û Mekranê bi cih kir.

Ev mîrên Kurdên Beluçî yê Tîreyên Pêncînî hevçerxên Bilaş bûne: Mîr Resan Biraxoyî, Mîr Selem Zengene, Mîr Eyle Edreganî, Mîr Rostem Mamilî û Mîr Şahdad Kirmanî.

Paşabûna Kubadê Yekem

Di serdema paşatiya Bilaş de Kubadê kurê Feyrûz hewl da textê paşatiyê ji Bilaş bistîne, lê bi ser neket û neçar ma xwe avêt ba sultanê Hîitalan. Dema ku Zirmihir, Bilaş ji ser text hilda, Kubad bi alîkariya Hîitalan textê Parsê dagir kir û keça sultanê Hîitalan ku ji kemera Nexşunewaz û ji zikê keça Feyrûz bû, pê re zewicî û fermanrewatiya wî dest pê kir.

Bêdengkirina Hozên Hezerê

Di destpêka paşatiya Kubad de, hozên Hezerê ajotin ser seldeneta Parsê û êrişî ser geliyê Kurê kirin. Kubad li ber xwe da û di şerekî giran de ew şikandin, piraniya wan kuştin û destkeftiyeke bêpîvan ket destan.

Hatina Îmam Mezdek

Mezdek li bajarê Mawayê ku ketiye qeraxên Dîcleyê, hat dinê. Navê bavê wî Bamdad bû, ji çîna xelkê navendî bû. Mezdek di serdema fermanrewatiya Kubad de peyamberiya xwe ragihand û dixwest dinê Manî zindî bike. Piştî dused salan ew alaya rêbaza baş bilind kir û bang li xelkê kir ku di bin vê alayê de berhev bibin.

Mezdek mirovekî çê, zimanşêrîn, xwegir û hêmin bû. Ji ber wê li her cihî pêşwazî li banga wî kirin. Nesîhetên wî heta tesîr li Kubad Paşayê Sasanî jî kir. Lê guhertina dîn ji aliyê

Kubad ve bû sebeb ku endam û karbidestên dewletê jê aciz bibin. Bi vî awayî, endam û karbidest bi pêşewayên Zerdeştî re bûn yek û alaya serhildanê bilind kirin. Di netîceyê de, Kubad ji ser text dûr xistin û bend kirin.

Kubad piştî midetekê di girtîgehê de bi alikariya piştevanên xwe bazda û çû ba paşayên Hîtalayan û piştî re karbidest û pêşewayên Zerdeştî re name şand ku bi mercê wî careke din bikin paşa, ew ji dinê Mezdekî tobe dike. Bi vî awayî, di navbera wî, karbidest û pêşewayên Zerdeştîyan de aştî çêbû û Kubad hat Parsê û careke din derket ser text û dev ji dinê Mezdekî berda.

Guftûgoyên Mezdek Bi Pêşewayên Zerdeştîyan Re

Her wekî destûra şahên berê, Kubad civateke guftûgoyê pêk anî û bang kirin pêşewayên Zerdeştî ku bi Mezdek re li ser problema dîn guftûgoyê bikin. Dema ku civat berhev bû, pêşewayên Zerdeştî piştî guftûgoyê Mezdek ne li rê dîtî û ew ji dîn derketî hesêb kirin û qebêhetê belavkirina vê bêdîniyê kirin stûyê wî û ew avêtin zindanê.

Piştî midetekê Mezdek bi rêya bawermendên xwe bi dadwerên zindanê re li hev kir û ji zindanê azad bû û bazda.

Paşabûna Tehmasp

Piştî rakirina Kubad ji ser text, desthilatdarên dewletê Tehmaspê birayê wî kirin paşa û wî sê salan fermanrewatî kir. Di wê navê re, Kubad name û peyman ji endam û karbidestên Zerdeştîyan re şand û soz da ku ji dinê Mezdekî tobe dike û dinê bav û bapîrên xwe ku rêbaza Zerdeştî ye qebûl dike.

Piştî vê soz û peyman dayînê, karbidest û endamên dewletê bangî Kubad kirin û careke din danîn ser text.

Paşabûna Kubad Cara Duyem

Dema ku Kubad cara duyem derket ser text, li gor wan soz û peyamên ku dabû, bi rawêjkariya karbidest û pêşewayên dînê Zerdeştî, civateke guftûgoyê pêk anî û Îmam Mezdek û pêşewayên dînê Zerdeştî tê de berhev kirin, ku di navbera xwe de guftûgoyê bikin û bizanibin kîjan mil li ser rêya rast e.

Guftûgoyê dest pê kir û pêşewayên Zerdeştî, Mezdek bêdîn hesêb kirin û ew avêtin zindanê. Kubad careke din bi midetê sê salan fermanrewatî kir û piştîre koça dawiyê kir.

Hatina Mîr Gistim Ji Bo Dadgeriya Tûran û Mekranê

Di serdema yekem a paşatiya Kubad de, Mîr Kiyarş dadgerê Tûran û Mekranê bû. Lê di serdema duyem de, Kubad Mîr Kiyarş ji ser karê dadgeriya Tûran û Mekranê hilda û di cihê wî de Mîr Gistim li ser pileya dadgeriya Tûran û Mekranê danî.

Ev serekên Kurdên Beluçî yên Tîreyên Pêncînî hevçerxên Kubad bûn: Mîr Kiyasir Biraxoyî, Mîr Seran Zengene, Mîr Ercan Edreganî, Mîr Siyamek Mamilî û Mîr Murra Kirmanî.

Paşabûna Enuşêrwan

Piştî koça dawiyê ya Kubad, kurê wî yê mezin Enuşêrwan derket ser text. Zamîsê birayê biçûk ê Enuşêrwan desteyek ji mîrên seltenetê bi xwe re hevdeng kirin û plan darişt ku desthilata text ji Enuşêrwan bistîne. Lê Enuşêrwan bi vê planê hesiya û bi giranî gazind ji wan kir û bi vê jî nema û hemû birayên xwe bi kurên wan ve kuştin. Ev jî ji bo wê kir ku careke din kesek li dijî wî şorişê berpa neke. Li gel wê jî kurê Zamiş ku navê wî Kubad bû di van kuştinan de ji bo ku bazdabû rizgar bû.

Qetliama Mezdek û Mezdekiyan

Dema ku Enuşêrwan derket ser text, bang kir ku çi kesê Mezdekiyekî bêdîn bigire dê bê xelatkirin. Piştî vê bangê Mezdek hat girtin û ew kuştin û kuştina bawermendên wî jî teksîr nekirin. Nêzikî 100 hezar kes ji bawermendên Mezdekî hatin kuştin.

Kurdên Beluçî ji ku dinê Mezdekî qebûl kiribûn, ji wan jî nêzikî 200 hezar kes ketin ber pêlên vê qetliamê. Serekên Kurdên Beluçî yên Tîreyên Pêncînî Mîr Behram Biraxoyî, Mîr Şagan Zengene, Mîr Zerîn Edreganî, Mîr Riswan Mamilî û Mîr Şember Kirmanî paşvemayê xelkên tîreyan ku ji vê qetliamê rizgar bûbûn di gerdên çiyayên Tûranê de xwe veşartin. Hinek jî ji zincîra çiyayên Tûranê ber bi jêr bûn û li deştên welatê Sindanê stirîn.

Hatina Mîr Yezen Ji Bo Dadgeriya Tûran û Mekranê

Dema ku Enuşêrwan derket ser text, Mîr Gestem der kir û şand Kirmanê. Li cihê wî Mîr Yezen li ser pileya dadgeriya Tûran û Mekranê bi cih kir.

Şahiya Zêde ya Ji Bo Hatina Dinyayê ya Hz. Mihemed Mistefa (Silav Lê Bin)

Di serdema fermanrewatiya Enuşêrwan Paşayê Sasanî de, Mihemed Mistefa ji aileyê Ebdulayê kurê Ebdulmutelib ê serdarê Qureyşiyên hat dinyayê. Ebdula çend meh beriya hatina dinyayê ya Hz. Mihemed Mistefa koça dawiyê kir. Dema Hz. Mihemed hat dinyayê û mizgîniya hatina wî ya dinyayê gihandin Ebdulmutelibê bapîrê wî, ew şad û xweşhal bû û çû mala Ebdula û yê nû hatibû dinyayê hilgirt û bir mala Kabeyê û li wir ji Xwedayê mezin hêvî û lava kir. Roja heftan adetê “eqîqe”ya Hz. Mihemed Mistefa hebû û navê “Mihemed” lê kirin. Navê dayîka Mihemed Mistefa Amîneya Keça Weheb bû. Li gor destûra Qureyşiyên bi mebesta perwerdekirinê Hz.

Mihemed spartin Helîmeya ku ew ji hoza Benî Se'd bû. Helîme ew girt û bir Benî Se'dê. Piştî çend salan Ebdulmutelib çû balê û dema gihîşt wir Mihemed dît. Mihemed derket pêş û gotê, tu kî yî? Wî ji jê re got, ez bapîrê te me. Piştre Ebdulmutelib hat xwarê ew hembêz kir û maçî kir. Piştre rûnişt û ew danî ser zîn û bi xwe re anî Mekkeyê.

Di temenê şeşsaliya wî de dayîka Hz. Mihemed Mistefa koça dawiyê kir û Ebdulmutelibê bapîrê wî û Ebu Talibê mamê wî ew perwerde kirin. Di temenê 12 saliyê de Mihemed Mistefa sefera Şamê û Besrayê kir û di temenê 25 saliyê de jineke çakekarî ya navê wê Xedîceya keça Xweylid re zewicî.

Yezdanê mezin ew pak ragirt û tu wextê pûtperestî nekir û tenê Xwedayê mezin diperest. Dema ku temenê wî gihîşt 40 saliyê, ji aliyê Xwedê ve ferman jê re hat ku bang xelkê bike ji bo yeqîniya yek Xwedayî û ji wan re bibêje “Lailahe îlellah Mihemed Resûlillah”. Yekem kesê bawerî kir Ebûbekir bû û ji ber wê jê re gotiye “Sidîq” [rast]. Yezdanê mezin dînê wî bi ser xist û geşkerên wî zêde bûn. Di destpêkê de Medîne û piştre Benî Nezîr, Xeyber, Fidik, Geliyê Qurayê, Têyma, Mekke, Tayif, Cerş, Dumtel-Cendel, Behran, Yemen, ‘Uman, Behreyn û Yemame hatin bin desthilata Îslamiyetê. Piştî van serkeftinan, peyamber çûye Medîneyê û roja duşemba 12ê rebûlewela sala 11ê koçî dinya terk kir.

Navên malîyên wî yên pakîze ev in: Xedîce, Sewde, ‘Aîşe, Hefse, Zînet, Umulmesakin, Um Seleme, Zeyneb, Curiye, Um Hebîbe, Meymûne, Sefye û Marye Qubtî.

Paşabûna Hurmuzê Çarem

Piştî koça dawiyê ya Enuşêrwan, kurê wî Hurmuz ku ji dayîka keça paşayê Tirk bû derket ser textê paşatiya Sasanî. Di destpêkê de bi awayê bavê xwe fermanrewayî kir, lê piştre dadparwerî û wijdan da milekî û sitem û zordarî kir awayê rêveberiya xwe. Xelk jê êşiya û aciz bû. Di wê navê re Tirkan

êrîşî ser welatê wî kir û di şer de kuştin. Hurmuz 11 salan fermanrewatî kir.

Hatina Mîr Erşib Ji Bo Dadgeriya Tûran û Mekranê

Piştî koça dawiyê ya dadger Mîr Yezen, Hurmuz Mîr Erşib tayînî dadgeriya Tûran û Mekranê kir. Di serdema dadgeriya wî de, mîrê welatê Sindanê wilayetên Tûran û Mekranê dagir kirin û Erşib ji dadgeriyê dûr xistin.

Rizgakerina Wilayetên Tûran û Mekranê Ji Waliyê Sindanê

Dema ku Rayî Siharîsê fermanrewayê Sindanê, selteneta Sasanî di nav tevlihevî û paşveçûnê de dît, ji vê rewşê îstifade kir û êrîşî ser wilayetên Tûran û Mekranê kir. Dadgerê Kura û Mekranê Erşib şikand û ew wilayet dagir kirin û bi wilayetên xwe ve girêdan û Erşib jî ji welat der kir.

Ev serekên Kurdên Beluçî yê Tîreyên Pêncînî hevçerxê Hurmuz Paşayê Sasanî û Rayî Siharîsê waliyê Sindanê bûn: Mîr Bîdar Biraxoyî, Mîr Beyker Zengene, Mîr Yusif Edreganî, Mîr Baban Mamilî û Mîr Takul Kirmanî.

Paşabûna Xesro Perwîz

Piştî kuştina Hurmuzê Çarem di şerê Tirkan de, Xesro Perwîzê kurê wî derket ser text. Xesro daxwaz kir Behram Çûpîn ku kurmamê wî bû pê re aştîyê çêke. Lê Behram ji bo aştîyê amade nebû û xwe ji şer re amade kir û piştî şerekî giran, wî Xesro Perwîz şikand. Xesro Perwîz bazda û çû ba qeyserê Romayê. Qeyserê Romayê, pêşwazî lê kir û piştî alîkariya wî kir û di netîceya vê alîkariyê de Xesro Perwîz careke din êrîşî ser Parsê kir û seltenet kir bin desthilata xwe.

Şerê Xesro Perwîz Bi Romayîyan Re

Dema ku Xesro Perwîz careke din derket ser text, Marsan qeyserê Romaya Rojhilatê ku hevkarê Xesro bû û li ser text şewq vedabû, bi destê berhelistkeran hat kuştin. Hesro Perwîz bi sehkirina vê karesatê gelek êşiya û xemgîn bû û bi îradeyeke bi hêz biryar da ku toleya xwîna Marsan ji nehezên wî bistîne. Bi vî awayî, êrîşî ser selteneta Romayê kir û şer dom kir. Serleşkerên Xesro Perwîz terefdarên vî şerî nebûn û ew girtin û kuştin ku ji çengê van şer û qirênên bêfeyde û bêşûd rizgar bibin.

Xesro Perwîz 38 sal fermanrewatî kir. Ev serekên Kurdên Beluçî yên Tîreyên Pêncînî hevçerxên wî bûn: Mîr Bissim Biraxoyî, Mîr Tîrdad Zengene, Mîr Tarab Edreganî, Mîr Mancan Mamilî û Mîr Sakûr Kirmanî.

Nameya Hz. Mihemed Mistefa Ji Xesro Perwîz Re

Di serdema Xesro Perwîz de girîngtirîn bûyer ku rû dabe, ragihandina peyambertiya Hz. Mihemed Mistefa bû. Di netîceyê de Hz. Peyamber ji Xesro Perwîz re nameyek şand û bang lê kir ku Îslamiyetê qebûl bike.

Paşabûna Kubadê Duyem

Piştî kuştina Xesro Perwîz, kurê wî Kubad derket ser text. Wî bi qeyserê Romayê re aştî çêkir û girtî azad kirin. Her wiha qencî bi xelkê kir û baca li ser wan kêr kir ku xweşhal bin û li welat ewlekarî berdewam be. Hêj salek di ser fermanrewatiya wî re derbas nebûbû, tûşî nexweşiya webayê bû û giyanê xwe ji dest da.

Misilmanbûna Xelkê Yemenê

Di serdema Kubad de, xelkê Yemenê û paşayê welat serî li ber Hz. Mihemed Mistefa tewandin û Îslamiyet qebûl kirin.

Paşayê Yemenê eynî paşa bû ku Xesro Perwîz ê paşayê Sasanî di serdema desthilatdariya xwe de jê re name şandibû ku êrîşî ser Medîneyê bike, Mihemed bigire û bişîne Parsê ba wî.

Li Ser Erdê Sindanê

Hinek dîroknivîs bi vî awayî behsa sebebê pênaseya erdê Sindanê dikin ku Hind û Sind du kurên Hamê kurê peyamber Nûh bûne û dema ku hatine vê navçeyê û tê de bi cih bûne navê xwe li navçeyan kirine. Yanî navçe bi navê wan hatine nasîn.

Neviyên Sind li geliyê Sindanê bi cih bûne û xwe bi navê Binyan, Takîn û Mûmîdan dane nasîn. Neviyên wan yek li pey yekê li ser erdê Sindanê fermanrewatî kirine. Di serdema fermanrewatiya malbata Sasaniyên Parsê de, malbata Raslan li ser erdê Sindanê fermanrewatî kiriye û midetê fermanrewatiya wan heta 200 salan domandiye. Tê gotin yekem fermanrewayê vê malbatê Risal Dîwanç bûye.

Risal Dîwanç

Tê neqilkirin ku Risal Dîwanç yekem fermanrewayê malbata Risalan bûye û li bajarê Elurdinê yê paytexta Sindanê rûniştiye. Saheya welatê wî gelek fireh bûye: Sînorê rojhilatê gihîştîye kewşenê Qinûcanê, sînorê rojava heta Mekranê û deryaya Umanê çûye, sînorê bakur gihîştîye sînorên Kendara, Zereng, Tûran û çiyayên Kurdan û sînorê başûr jî gihîştîye erdê Sûrtinê. Rasil Dîwanç ev welatê mezin û fireh bi ser çar wilayetan ve parve kiriye: Burehmen Abadan, Sêwsitan, Êskalendûn û Multate.

Rasil Dîwanç piştî pêkanîna welatê xwe 15 salan fermanrewatî kir û piştê koça dawiyê kir. Ew hevçerxê Enuşêrwanê paşayê Parsê bûye. Di wê serdemê de, ev serekên Kurdên Beluçî yê Tîreyên Pêncînî serekhozên tîreyên Kurdên Beluçî bûne û li Tûran û Mekranê jiyana xwe derbas

kirine: Mîr Behram Biraxoyî, Mîr Şagan Zengene, Mîr Zerrîn Edreganî, Mîr Riswan Mamilî û Mîr Şembed Kirmanî.

Parastina Teqlîdkerên Mezdek

Di serdema fermanrewatiya Rasil Dîwançê mîrê Sindanê de, Enuşêwanê fermanrewayê Parsê fermana qetliama şopdar û bawermendên Mezdek da. Yên ji vê qetliamê rizgar bûbûn berê xwe dan welatê Sindanê û xwe avêtin welatê Rasil. Rasil Dîwanç bi dilfirehî bi wan re hereket kir û bi wan re hevderdî nîşan da. Piraniya parastinxwazan ji tîreyên Kurdên Beluçî bûn.

Rasil Siharis

Piştî koça dawiyê ya Rasil Dîwanç kurê wî Rasil Siharis derket ser textê fermanrewatiya Sindanê. Rasil Siharis cara yekem bingeha adet û karê ziraetê li welatê Sindanê damezirand, qencî bi cotkaran kir û çî pêdawistiyên jê bixwestina ji wan re bi cih dikir û dida wan.

Dagirkirina Wilayetên Tûran û Mekranê

Dema ku Rasil Siharis derket ser textê Mîrnîşîna Sindanê, Hurmuzê Sasanî fermanrewayê welatê Parsê bû û di serdema wî de şoriş û serhildan li hemû cihên welat belav bûbûn û tevlihevî di kar û barên welatê Parsê de diyar bûn. Rasil Siharis ji vê jarî û tevliheviyê îstîfade kir û êrişî ser Tûran û Mekranê kir û li hember leşkerê Parsiyan bi ser ket. Di netîceya vê serkeftinê de, wilayetên Tûran û Mekranê bi wilayeta Sindanê ve girêda. Li gel vê jî, Mîr Erşib ê dadgerê Parsê ji welat derxist û desthilata rêveberiya welat da destê mîrê xwe.

Tayîna Mîr Li Tûran û Mekranê

Dema ku Rasil Siharis wilayetên Tûran û Mekranê kir bin

desthilata xwe, mîrê tîreya Cunayî ya hoza Binyan ku navê wî Semera û nasnavê wî “Sîwa” bû, li ser fermanrewatiya Tûran û Mekranê hat bicihkirin.

Rasil Siharîs piştî 20 sal fermanrewatiyê koça dawiyê kir. Ev serekên Kurdên Beluçî yên Tîreyên Pêncînê hevçerxên Hurmuz Paşayê Sasanî û Rasil Siharîs bûn: Mîr Bîdar Biraxoyî, Mîr Beyker Zengene, Mîr Yûsif Edreganî, Mîr Baban Mamilî û Mîr Takul Kirmanî.

Sîwa Semerayê Mîrê Tûran û Mekranê

Sîwa Semera bi fermana Rasil Siharîsê fermanrewayê Sindanê ji bo fermanrewatiya wilayetên Tûran û Mekranê hat Tûranê û desthilata fermanrewatiyê girt destê xwe. Ew yekem Sîwayê wan welatan bû û dema ku hat bajarê Kîkanê yê paytexta Tûranê, Kurdan serî hildan. Semera bi leşkerê xwe ve rû bi rûyî wan bû û şerekî giran qewimî û ji herdu milan gelek kes hatin kuştin. Ji Sîwa Semera re ji derveyî aştiyê tu çareyeke din nema. Rasil Siharîsê fermanrewayê Sindanê bi agahdarbûna ji vê xeberê tûşî sergêjîyê bû. Lê ji bo ku ew kesekî dûrbîn û karzan bû his kir bi du dijminan re yanî Kurdên Beluçî û paşayên Sasanî re şerkirin karekî neşîya ye. Ji ber wê pêwîst bû bi rûniştîyên Tûran û Mekranê re ku Kurdên Beluçî bûn aştiyê çêke û paşayên Sasanî li xwe nêzik bike û bike piştivanê xwe. Ji ber vê, bi wan re peyman îmze kir ku ew li wilayetên Tûran û Mekranê bi hevbeşîya Kurdan fermanrewatiyê bike.

Sîwa Semera piştî 25 salên li Tûran û Mekranê fermanrewatiyê koça dawiyê kir. Wî di serdema xwe de Tûmanê birayê xwe kir waliyê Mekranê. Ev serekên Kurdên Beluçî hevçerxên Sîwa Semera bûn: Mîr Bîdar Biraxoyî, Mîr Beyker Zengene, Mîr Yûsif Edreganî, Mîr Baban Mamilî û Mîr Takul Kirmanî.

Beşdariya Kurdên Beluçî ya Nav Hêzên Eskerî

Bi girêdana vê peymanê Risal Siharis fermanrewatiya Sindanê bi mebesta bihêzkirin û berdewamiya desthildariya xwe ya li Tûran û Mekranê pêwîst zanibû. Ji aliyê din ve dixwest rûniştîyên van wilayetan ku di hevahengiyeke bi hêz û pêwîstdar de yekgirtî bûn, ji bo pûçkirina eger û metirsiyên êrişanîna welatê Sasanî li gel xwe hevdeng bike. Ji bo vê mebestê jî, leşkerekî xurt û xwedî şîyan ji Kurdên Beluçî pêk anî.

Rasil Sihal

Piştî koça dawiyê ya Rasil Siharis, kurê wî Rasil Sihal derket ser textê welatê Sindanê û adetê ziraetê ku bavê wî danîbû di dirêjahî û pehniya welatê xwe de rewac pê da. Her dem li dijî niyetxeraban û xerabkerên şaristanî û dijminên gundnişîn ên cotkaran şer kiriye. Rasil Sihal piştî 21 sal fermanrewatiyê koça dawiyê kir.

Sîwa Cunîn Mîrê Tûran û Mekranê

Piştî Sîwa Semera, kurê wî Sîwa Cunîn derket ser textê Mîrnişîna Tûran û Mekranê û adetê zîraetê li Tûran û Mekranê pêş ve bir. Qencî bi Kurdên Beluçî kir û di azayetî û mêrxasiyê de bêemsal bû.

Sîwa Cunîn piştî 20 sal fermanrewatiyê koça dawiyê kir. Ev serekên Kurdên Beluçî hevçerxên wî bûn: Mîr Besam Biraxoyî, Mîr Şêrdad Zengene, Mîr Tarab Edreganî, Mîr Mancan Mamilî û Mîr Sakur Kirmanî.

Rasil Siharisê Duyem

Piştî malavahiya Rasil Sihal, kurê Rasil Siharisê Duyem derket ser textê welatê Sindanê. Hê gelek di ser re derbas nebûbû, Paşayê Nîmrûzê êrişî ser wilayeta Mekranê kir.

Siharisê Duyem bi leşkerekî mezin ve çû Mekranê, şerekî giran di navbera wan de dest pê kir û gelek kes ji herdu aliyên hatin kuştin. Cidgalan nikaribûn şer bidomînin û ji hêz û şiyana wan tirsîyan û bazdan. Herdu Sîwa Cunîn ê mîrê Tûran û Mekranê û Rasil Siharisê Duyem ê fermanrewayê Sindanê hatin kuştin.

Paşayê Nîmrûzê destkeftiyê mezin bi dest xist û bi serkeftî bi kole, çek û gelek hespan ve veşerîya Nîmrûzê. Paşvemayê leşkerên wî yê Kurdên Beluçî ji Mekranê derketin û welatê wan jî hat dagirkirin. Ev serekên Kurdên Beluçî hevçerxê Rasil Siharisê Duyem, Sîwa Cunîn û Hz. Mihemed Mistefa bûn: Mîr Cad Biraxoyî, Mîr Ewram Zengene, Mîr Mûsa Edreganî, Mîr Sînan Mamîlî û Mîr Şîban Kirmanî.

Paşabûna Pûran Duxt

Piştî serdemaya selteneta Sasaniyan hevawayê dawîn serdemên selteneta Hexamenşî û Eşkaniyan, zîncîrek şoriş û serhildan li welatê Parsê serî hildabû ku netîceya wê bûye sebebê têkçûna paşatiya Sasaniyan.

Piştî Kubadê Duyem, desthilatdar û karbidestên seltenetê Pûran Duxta keça Xesro Perwîzî anîn ser text û piştî du salan ji ser text hildan.

Koça Hz. Mihemed Mistefayê Peyamberê Îslamê û Malavahiya Wî

Di serdemaya fermanrewatiya Rasil Siharisê Duyem de, peyamberê Îslamê Mihemed Mistefa (silav lê bin) di roja duşemba yekê rebî'ulewelê de ji Mekkeyê koçî Medîneyê kir. Sebebê koçkirina wî ew bû ku sitem û zordariya kafiran li ser Misilmanan li Mekkeyê gelek giran bûbû û ew kiribûn tengiyê. Hz. Peyamber (silav lê bin) ji bilî koçkirinê tu rêya çareyekê nedît. Bi vî awayî koç kir, li Medîneyê bi cih bû û 10 salan propagandaya Îslamîyetê domand. Di netîceya vê de

jî, Nîvگیرava Erebi bi tîşka Îslamê rohnî bû û Hz. Mihemed Mistefa di 12^ê meha Rebî'ulewela sala 11^ê koçî de malavahî ji dinyaya fanî xwest.

Paşabûna Arzim Duxt

Piştî derkirina Pûran Duxt, endam û karbidestên selteneza Parsê xweha wê ya bi navê Arzim Duxt danîn ser text. Bi textnişîniya Arzim Duxt, şoriş û serhildan li cihên din ên welatê Parsê nehatin birîn, heta zêde firehtir jî bûn. Endam û karbidestên malbata Sasanî ji bo bidestxistina text û desthilatê her yekî ji wan ji aliyê xwe ve kar dikirin û di nav xwe de ketin lêkdana hevdu.

Di serdema Arzim Duxtê de roja Îslamê ji Nîvگیرava Erebi hilatibû û xelkê li wir Îslam qebûl kiribû.

Rasil Sihasê Duyem

Rasil Sihasê Duyem di şerê Paşayê Nîmrûz de hat kuştin. Ew ocaxkor bû, ji ber wê karbidest û desthilatdarên welatê Sindanê birayekî wî yê ku navê wî Rasil Sihasê Duyem bû danîn ser text.

Rasil Sihasê Duyem xwediyê exlaqekî baş bû û ji xelkê re başî kir û baca li ser wan kêr kir. Çaksaziya ziraetê encam da û piştî 10 sal fermanrewatiyê koça dawiyê kir.

Sîwa Esyarê Mîrê Tûran û Mekranê

Dema ku Sîwa Cunîn bi Rasil Siharisê Duyem re di şerê Paşayê Nîmrûzê de giyanê xwe ji dest da, kurê wî Sîwa Esyar derket ser textê Mîrnişîna Tûran û Mekranê. Di serdema Sîwa Esyar de, paşayê Sindanê Rasil Sihasiyê Duyem bi ocaxkorî koça dawiyê kir û wezîrê wî Çeçê kurê Silayîç ku mirovekî zîrek, zana û hişmend bû, desthilata fermanewatiyê girt destê xwe û endam û karbidestên dewletê han da ku îtaetê ji

desthilata wî re bikin.

Sîwa Esyar piştî 15 sal fermanrewatîyê koça dawiyê kir. Ev serekên Kurdên Beluçî hevçerxên Rasil Sihasê Duyem û Sîwa Esyar bûn: Mîr Canbeg Biraxoyî, Mîr Siwîd Zengene, Mîr Ladîn Edreganî, Mîr Kuyan Mamilî û Mîr Wan Kirmanî. Ev serekên Kurd hevçerxê mîrê Misilmanan Ebûbekir jî bûn.

BEŞA DEHEM

KURDÊN BELUÇÎ DI SERDEMA ÎSLAMIYETÊ DE

Xilafeta Mîrê Misilmanan Ebûbekir

Dema ku Hz. Mihemed Mistefa malavahî kir, roja sêşembê mîrê Misilmanan Ebûbekir derket ser seqîfeya Benî Sa'dê.¹⁸ Beriya hemû kesî Omerê kurê Xetab îtaetî xelîfetiye kir. Vêca Ensariyan beriya veşartina Resûl îtaetî xelîfetiye kirin.

Ebûbekir li ser kirin û isûla peyamber Mihemed (silav lê bin) meşîya û fermanên xilafetê li ser esasê Qur'an û şerîetê derdixistin. Li dijî dînderketiyan şer kir û careke din vegerand ser dînê Îslamê û dînê Îslamê li ser bingehêke bi hêz da rûniştandin.

Dema nêzikî nefesên dawîn yê jiyane bû, Omerê kurê Xetab ji bo cihnişîniya xwe hîlbijart. Îtîraf bi xelîfetiya wî kir û nûsxeke ve fermanê ji hemû cihî re şand. Bi vî awayî, piştî du sal û du mehan di temenê 62 saliyê de koça dawiyê kir. Omerê kurê Xetab, Osmanê kurê 'Efan, Telheyê kurê 'Ubeydulah û Ebdurehmanê kurê ebî Bekir naaşê wî li ba gora Mistefa veşartin.

Xilafeta Mîrê Misilmanan Omerê Kurê Xetab

Piştî koça dawiyê ya Mîrê Misilmanan Ebûbekir, penaber û ensaran îtaetî desthilata Omer kirin. Omer Îslam li ser

¹⁸ Mîmbera Dîwana Benî Sa'd e.

bingeha şerîfetê, isûl û exlaqê peyamber Mihemed (silav lê bin) peyrew kir û Yezdanê mezin gelek bajar bi destê wî dan dagirkirin û mal û darayîya fireh di beytulmala Misilmanan de berhev bû. Derketina wê çirûska li rêya derçûyan tefîya û dawî bi paşvemayînê hat.

Yekem car Ceser dagir kir û piştire artêş şand Şamê ku dagir bikin. Îslam bi hêz bû, bi ser ket û kafir têk çûn. 'Etbeyê kurê Xezwan şand Uble ku Firatê dagir bike, Se'dê kurê ebî Weqas şand Qadîsiyeyê. Rostemê serekerkanê Yezdgurdê şahê Ecem bi artêşeke mezin ve hat. Lê şikest û Se'd Ecemîstan dagir kir.

Piştî wê, ferman da Kufe û Besrayê dagir bikin. Destî hilatdarên Qensirîn, Reha, Simîsat, Himis, Cendê Şapûr, Sûs, Ramhurmuz, Ester, Supahan, Qûm û Qaşanê çî bi name û aşî û çî bi şer dagir kirin. Vêca Mu'awiyeyê kurê ebû Sufyan şand Qeysariyeyê ku Remelahê dagir bike, name ji Omerê kurê 'Asî re şand ku Îskenderûnê dagir bike û Nu'manê kurê Meqrûn şand ku Nehawendê dagir bike. Piştire 'Emrê kurê 'Asî şand Berqeyê ku ew Berqe û Etrablûsê dagir bike û Muxeyre Şe'bey şand ku Azerbaycanê dagir bike.

Piştî vê kar giha cihekî ku beyana roja çarşembê ya meha zilheceyê li ser nimêjê ku xwest tekbîrê bêje, Luluyê xizmetkarê Muxîreyê kurê Şe'be sê xencer lê dan, janneke giran Omer girt û Ebdurehman 'Ewfi bi destê wî girt heta ku nimêja xwe tamam kir. Vêca Osman, Elî, Telhe, Zubeyr, Se'd û Ebdurehman bang kir û ji wan re got, di nav xwe de çend kesan pêşniyaz bikin û yê raya hevalan bi dest xist bikin xelîfe.

Omer piştî wê koça dawiyê kir. Temenê wî 65 sal bû û serdema xilafetiya wî jî 10 sal û 6 mehan kişandibû. Su'eyb li ser nimêj kir û Osmanê kurê 'Efan û Ebdulayê kurê wî ew li Seraya 'Aşîşeyê li ba gora Ebûbekir veşartin.

Ev serekên Kurdên Beluçî yê Tîreyên Pêncînî hevçerxên mîrê Misilmanan Hz. Omer bûn: Mîr Mihirdad Biraxoyî, Mîr

Sewîd Zengene, Mîr Patak Edreganî, Mîr Berzinc Mamîlî û Mîr Cûdik Kirmanî.

Paşabûna Yezdgurdê Sêyem

Pîştî derkirina Arzimê Duxt, endam û karbidestên seltaneta Sasanî Yezgurd kirin paşa. Hêj çarîk sedsal di ser derketina Îslamê re derbas nebûbû ku mîrê Misilmanan Xelîfe Ebûbekirê Sidîq koça dawiyê kir û mîrê Misilmanan Hz. Omer hat ser textê xilafetê û leşkerê cîhangîr û dilêr ê Ereb şahînşahê kevnare yê Sasaniyên Persê ji orteyê rakirin.

Yezdgurdê Sêyem ê dawîn paşayê Sasaniyan, piştî şerên Qadîsiye, Medayin, Celewla û Nehawendê hat Xorasanê û daxwaza alîkariyê ji paşayê Maweraunehîrê kir. Lê tu alîkarî jê nehat dîtin. Ehnefê kurê Qeys bi fermana Xelîfe Omer li pey çû û erdê Xorasanê dagir kir. Yezdgurd ji neçarî ji ber ketina Ehnef a pey wî çû Merroyê û xwe avêt ba Mahwa Surî. Mahwa Surî desthilatdarê Xorasanê bû û ji bihêzbûna peywendiyên Yezdgurd bi desthilatdarên piştî wî ditirsiya. Ji ber wê ew li Merroyê bi destê aşvanekî da kuştin û rêveberiya desthilatdariya xwe heta Belx, Hîra û Buxarayê fireh kir. Buxara bi destê Kirêysûnê serekerkanê Mahwa Surî dagir kir.

Li milê din Ehnef Mahwa Surî li Xorasan û Merroyê û heta milê din ê Ceyhûnê bi pişt xwe ve kêşa. Di wê navê re li milê başûr leşkerên Ereb di bin serekatiya Ebdulayê kurê Bedeyal Xeza'î de heta Germiyanê pêşve hatibûn. Desteyeke din a leşkerên Ereb di bin serekatiya Ebdulayê kurê 'Amir de piştî dagirkirina Kirmanê, êrîşî ser Secistanê kir. Dadwerê Secistanê li bajarê Zerengê ku navenda Secistanê bû xwe sitirand. Lê ji bo ku leşkerên Îslamê heta Qendehar, Hind, Sind, Tûran û Mekranê pêşve hatibûn, ji neçarî aştî kirin û Zereng ket destê Misilmanan.

'Asimê kurê Omer cihgirê sererkanê Ebdulayê kurê 'Amir Secistan dagir kir. Mîrekî din ê artêşa Ereb ê ku navê wî He-

kemê kurê Omer Se'lebî bû êrîşî ser Mekranê kir, bi Rasilê fermanrewayê Sindan, Tûran û Mekranê re li Geliyê Hilmendê rû bi rûyî hev bû û wî karîbû wî bikuje û Mekranê dagir bike.

Rasil Çeçê Kurê Sîlayiç

Rasil Sihasê Duyem bi ocaxkorî koça dawiyê kir. Ji ber wê, Çeçê kurê Sîlayiç ku wezîrê Rasil Sihasê Duyem bû, xelk han da ku îtaetî desthilata wî bikin. Dema ku di vê hewldanê de bi ser ket, jina Sihasê Duyem Suhindiyana xwest û paşatiya xwe îlan kir û derket ser text.

Şer Bi Ranûn Mihirtûn Re

Welatê Çitûr Pûran cîranê welatê Sindanê bû. Fermanrewayê vî welatî Ranûn Mihirtûn xizmatiya wî bi Rasil Sihasê Duyem re hebû û xwe mafdarê welatê Sindanê dizanibû. Ji ber vê çû şerê Sindan. Çeçê kurê Sîlayiç beşdarî şer bû. Ew mirovekî wisan bû ku kesî nikaribû li hemberî wî bisekine û gelek kuştin û heta bi rimekê li Ranûn Mihirtûn jî da. Lêdana wî bi awayekî wisan xurt bû ku Ranûn ji ser piştî hespê xwe ket xwarê û ji ber Çeç bazda. Bi vî awayî şikest, di eynî wextê de nûnerê xwe şand û aştî kir.

Piştî 40 sal fermanrewatiyê Çeç koça dawiyê kir û du kurên navê wan Dahro û Hersîne li pey xwe hiştin.

Sîwa Mayîne Mîrê Tûran û Mekranê

Sîwa Espar bi ocaxkorî koça dawiyê kir û birayê wî, Sîwa Mayîn derket ser Textê Mîrnişîna Tûran û Mekranê. Di serdema Mayîna de Sihasê Duyem koça dawiyê kir û wezîrê wî Çeçê kurê Sîlayiç bû paşayê Sindanê. Çeç Suhindiyanana jina Sihasê Duyem ji xwe re xwest û fermanrewatiya Sîwa Mayîn li Tûran û Mekranê dom kir.

Sîwa Mayîn di Geliyê Hilmendê de di şerê leşkerê Îslamê

de hat kuştin û li cihê wî Sîwa Zûrak derket ser text.

Êrîşa Leşkerê Îslamê Li Ser Secistan û Mekranê

Di dawîn serdema mîrê Misilmanan Omerê kurê Xetab de, desteyek eskerên Erebi di bin serekatiya Hekem kurê Omer Se'lebî de, piştî dagirkirina Secistanê êrîşî ser Mekranê kir. Fermanrewayê Mekranê Sîwa Mayîn bi leşkerê xwe û leşkerê Rasil Çeçê kurê Sîlayiç ê fermanrewayê Sindanê re li Geliyê Hilmendê rû bi rûyê leşkerê Îslamê bûn. Di vî şerê xwînavî de, serleşkerê Rasil Çeçê kurê Sîlayiç ku navê wî Muna bû û waliyê Tûran û Mekranê Sîwan Mayîn şikand û kuşt.

Leşkerê Îslamê, leşkerên pêşîn ji nav birin û welatê Mekriyan dagir kirin û bingeha sistema Îslamê damezirandin. Piştî wê leşkerên Îslamê erdê Mekranê kirin melbenda artêşa Îslamê.

Ev serekên Kurdên Beluçî hevçerxên Çeçê kurê Sîlayiçê fermanrewayê Sindan û Mîr Sîwa Mayînê waliyê Tûran û Mekranê û mîrê Misilmanan Xelîfe Omerê kurê Xetab bûn: Mîr Tîrdad Biraxoyî, Mîr Sewîd Zengene, Mîr Tapik Edreganî, Mîr Berzinc Mamilî û Mîr Cûdik Kirmanî.

Îtaeta Kurdên Beluçî a ji Mîrê Misilmanan Hz. Omerê Kurê Xetab Re

Di serdema xilafeta mîrê Misilmanan Hz. Omerê kurê Xetab de, serleşkerê Îslamê Hekemê kurê Omer Se'lebî, Mekran dagir kir û hê li Mekranê bû ku mîrên Kurdên Beluçî yên Tîreyên Pêncînî Mîr Mihirdad Biraxoyî, Mîr Sewîd Zengene, Mîr Patak Edreganî, Mîr Berzinc Mamilî û Mîr Cûdik Kirmanî rabûn û Mîr Siyawuşê birayê Mîr Mihirdad Biraxoyî wekî nûnerê xwe şandin ba Hekemê kurê Se'leb û wî jî mercên Kurdên Beluçî ji bo îtaetê raxist ber çavên wan.

Mercên Kurdên Beluçî ev bûn: Eger Kurdên Beluçî dinê

Îslamê qebûl bikin û hevkarîya Ereban bikin, di miqabilî vê alîkarîyê de divê Erebi jî wan jî wan gelîyên ku tê de niştecîh bûne dernexin û ber bi deştên din ve neşînin. Hekemê kurê Omer Se'lebî ev merc di nameyekê de nivîsand û bi yek ji wan Teteran re şand Medîneyê ba xelîfeyê Îslamê Omerê kurê Xetab. Mîrê Misilmanan Omerê kurê Xetab peymanname qebûl kir û Kurdên Beluçî li gelîyê Tûran, Mekran û Secistanê ku cih û warê bav û bapîrên wan bûn man û dinê Îslamê qebûl kirin.

Xilafeta Mîrê Misilmanan Osmanê kurê 'Efan

Piştî veşartina Omer, Eliyê kurê ebî Talib, Zubeyrê kurê 'Ewam, Telheyê kurê Ebdula, Ebdurehmanê kurê 'Ewf, Se'dê kurê ebî Weqas û Osmanê kurê 'Efan li ser xilafetê şewîrin. Osman ji Ebdurrehman re got tu desthilata xilafetê bigire destê xwe. Lê Ebdurrehman gotê ez nikarim. Piştî Ebdurrehman pêşniyaz kir ku ji bo destnîşankirina kesekî çak sê roj muhlet bê dayîn. Piştî wê ji hevkaran pirsîn û midetek di ser re derbas bû, li ser wê li hev kirin ku Osman hilbijêrin.

Osman di dîn, dadperwerî, dadvanî û parvekirinê de li ser şopa xelîfeyên beriya xwe meşîya. Yekem navçeya ku di serdema xilafeta Osman de hat dagirkirin Hemedan bû. Her çend Hemedan di serdema Omer de hatibû dagirkirin, lê cardin veguherîbû. Ji ber wê Osman di roja mirina Omer de, Muxeyre Şe'be şand ku wê dagir bike. Piştî Mûsa Eş'erî şand ku Reyê dagir bike. Osman piştî Mûsa Eş'erî ji desthilatdariya Besreyê û Osmanê kurê ebî El'as jî ji desthilatdariya Farsê rakir û desthilatdariya Besreyê û Farsê da destê Ebdulayê kurê Omerê kurê Kirîz.

Temenê Ebdula 25 sal bû, di destpêkê de hat Besrayê û çend rojan li wir ma û piştî çû Parsê. Ziyadê kurê Ebye li wir hişt, ku beriya wî cihgir bû û Ebdulayê kurê Mu'emer temîmê serekerkanê bû.

Piştî derbasbûna 30 sal bi ser koça Mihemed Mistefa re

(silav lê bin), Ebdulayê kurê ‘Emrê kurê Kirîz “Mucaşî” şandin Sîstanê û şer kir û gelek Misilman kuştin û piştê Mucaşî‘ vegeriya.

Hz. Osmanê kurê ‘Efan 11 salan li ser textê xilafetê ma û piştê berhelistkeran ew şehîd kirin. Ev serekên Kurdên Beluçî yên Tîreyên Pêncînî hevçerxên wî bûn: Mîr Merwan Biraxoyî, Mîr Xelef Zengene, Mîr Alak Edreganî, Mîr Takul Mamilî û Mîr Akul Kirmanî.

Şorişa Xelkê Kabilistan û Zabilistanê

Di serdema xilafeta Osmanê kurê ‘Efan de, xelkê Zabilistanê şoriş û serhildan berpa kir. Mîrê Zabilistanê Ebdullayê kurê ‘Omer şorişa wan ji nav bir, ew şikandin û cardin Kabûl dagir kir.

Micaşî‘ê kurê Mes‘ûd ê desthilatdarê Kirmanê, bi hêzên Çiyayên Qefesê re ku Kurdên Beluçî bûn û bi navê tîreyên Kuc û Beluç dihatin naskirin, li hev ket û piştî çendîn şerên giran wan îtaetî wî kirin. Kurdên Beluçî yên Tûran û Mekranê li gel ku bûbûn Misilman jî, di şerê Çiyayên Qefesê de alîkariya Kurdên xwe kirin lê bi ser neketin.

Hatina Ebdurrehmanê Kurê Semere a Mekranê

Dema ku mîrê Misilmanan Hz. Osmanê kurê ‘Efan derket ser textê xilafetê, Ebdurrehmanê kurê Sekere şand Mekranê. Ebdurrehman midetekê li vir maye û bi xelkê re baş hereket kiriye. Wê wextê, fermanrewayê Sindanê Çeçê kurê Silayîç leşkerê xwe anîbû ser sînorê Mekranê û tehdida êrişa li ser Mekranê dikir.

Ebdurrehmanê kurê Semere, dema ku agahdarî vê xeberê bû, êrişî ser dijmin kir û di şerekî giran de ew şikand û ji sînorê Mekranê dûr kir. Piştê ji bo wê şorişa ku li wir berpa bûbû ji orteyê rake çû Kabilê.

Hatina Ubeydullayê Kurê Mu'emer a Mekranê

Piştî Ebdurrehmanê kurê Semere, mîrê Misilmanan Ubeydullayê kurê Mu'emere şand Mekranê. Ew hat Mekranê û fermanrewatî kir. Bi azayî û camêriya xwe çendîn navçe dagir kir û heta sînorê welatê Hindê pêşve çû.

Xilafeta Mîrê Misilmanan Eliyê Kurê Ebi Talib

Piştî kuştina Hz. Osmanê kurê 'Efan, Eliyê kurê ebi Talib derket ser textê xilafetê. Wî hemû karbidestên Osmanê kurê 'Efan ji selteneta Îslamê derxistin û li cihê wan karbidestên xwe şandin.

Dema ku xebera Osman gihîşt Ubeydullayê kurê Mu'emer, bi hevalên xwe şêwirî û ji wan re got, ew neçar e biçe ba Ebdullayê kurê 'Amir. Dema ku gihîşt Besrayê, şerê Cemilyanê dikir û Elî mijûlî wî şerî bû. Dema ku Ubeydulla ev dît, xwe veşart heta Elî ji wî şerî vala bû. Piştî bi wê mal û darayiya ku pê re bû çû Şamê ba Muawiye û hemû ew diyarî dan Muawiye û li wir ma. Dema ku mîrê Misilmanan Eliyê kurê ebi Talib seh kir ku ew hatiye û çûye ba Muawiye, Saxirê kurê Ze'r şand Mekranê. Piştî wê, mîrê Misilmanan Elî bi destê Ebdurrehmanê kurê Melcem hat kuştin. Temenê wî 62 sal bû û midetê xilafeta wî 4 sal û 9 mehan kêşa.

Sîwa Zûrakê Mîrê Tûranê

Piştî kuştina Sîwa Mayîn di şerê Geliyê Helmendê de, kurê wî Sîwa Zûrak derket ser textê Mîrnişîna Tûranê. Di serdema fermanrewatiya Zûrak de, karbidestên Îslamê yên welatê Mekranê anîbûn bin desthilata xwe, ji ber wê Mîr Zûrak tenê mîrê Tûranê bûye.

Di serdema Mîr Zûrak de, Saxirê kurê Ze'er êrîşî ser Kîkanan kir. Mîr Zûrak karîbû wan bişîkîne û ber bi paşve vegeîne.

Hatina Saxirê Kurê Ze'er a Mekranê

Mîrê Misilmanan Eliyê kurê ebî Talib, Saxirê kurê Ze'er sand Mekranê. Saxir midetekê li wir ma û karûbarên li wir baş kirin û piştê ji zincîra çiyayên Kurdan êrîşî ser erdê Tûranê kir û hat nav bajarê Kîkanê. Sîwa Zûrak bi leşkerekî 20 hezar kesî ve hat pêş û bi wan re şerekî dijwar kir. Gelek ji Misilmanan hatin kuştin û dîl hatin girtin û hinek jî rizgar bûn.

Di wê navê re, Saxirê kurê Ze'er hat agahdarkirin ku mîrê Misilmanan Eliyê kurê ebî Talib bi destê Ebdurehmanê kurê Melcem hatiye birîndarkirin û piştê miriye. Ji ber vê ew ji meydana şer paşve kişiya û çû Mekranê.

Ev mîrên Kurdên Beluçî hevçerxên Sîwa Zûrak û mîrê Misilmanan Eliyê kurê ebî Talib bûne: Mîr Şîrak Biraxoyî, Mîr Bekir Zengene, Mîr Bazûk Edreganî, Mîr Curkan Mamilî û Mîr Huse Kirmanî.

Benî Umeye

Benî Haşim û Benî Umeye ji nesla du birayan bûne û bapîrên wan ên mezin Haşim û Ebdulşemsê kurê Ebdulmenaf bûne. Umeyyê kurê Ebdulşems û Ebdulmutelibê kurê Haşim hevtemen û hevçerxên hev bûne.

Benî Umeye wekî Benî Haşim ji tîreya pêş û aktîv a Qureyşî bûye. Beriya wê midetêke dirêj di navbera van herdu tîreyan de li ser serperîştîya malê Ke'be û Mekeyê problem derketine. Lê ji ber navberiya serdar û rihspîyan tîreyên din ên Qureyşî di navbeyna wan de aştî pêk anîne. Ev jî di netîceya lihevhatina li ser parvebûna erka rêvebirina malê Ke'beyê û Mekkeyê bi awayekî ku serekatiya eskerî yanî serekerkaniya Qureyşîyan dane mîrê tîreya Benî Umeye û erkê serperîştîkirina malê Ke'beyê jî dane mîrê Benî Haşim.

Umeyê kurê Ebdulşems û Ebdulmutelibê kurê Haşim hevriyên hev bûne û bi eynî awayî peyamberê Îslamê Hz.

Mihemed Mistefa (silav lê bin) û ebû Sufyanê neviyê kurê Umeye ji hevçerxên hev bûne. Ew şerên di navbera Misilmanan û Qureyşiyên Mekkeyê de rû dane di serdema destpêka Îslamê de, ebû Sufyan mîrê sistema leşkerî ya Qureyşî bûye û Qureyşiyên di bin rêveberiya ebû Sufyan de li dijî Misilmanan şer kirine. Lê piştî Misilmanan Mekke dagir kirin, ebû Sufyan bû Misilman û Mihemed Mistefa Mu'awiyeyê kurê ebû Sufyan kir nivîskarê wehyan.

Di serdema xilafeta raşîdiyîn de, mîr, serdar û mezinên Benî Umeye ji bo serfirazî û serkeftina Îslamê xizmetên hêjayî pesnê kirine. Omerê kurê Xetab di serdema xilafeta xwe de Yezîdê kurê ebû Sufyan kir nûnerê Şamê û piştî koça wî ya dawiyê, Mu'awiye li ser vê pileyê rûniştiye. Piştî kuştina Osmanê kurê 'Efan, Mîr Mu'awiye serbixwe bû û bi Eliyê kurê ebî Talib re dest bi şer kir û di navbera wan de problem derketin. Piştî kuştina Elî bingeha fermanrewatiya malbata Benî Umeye hat damezirandin.

Rûniştina Mu'awiye ya Li Ser Textê Xelîfetiye

Piştî kuştina mîrê Misilmanan Elî, xelkê Kufeyê îtaetî desthilatdariya Hesênê kurê Eliyê kurê ebî Talib dike. Dema ku xebera kuştina Elî gihîşt Şamê îtaetî desthilatdariya Mu'awiye kirin. Mu'awiye ji Babilê hat Şamê û ji wir jî hat Kufeyê. Hesênê kurê Elî ji Kufeyê derket derve û li Enbarê ew û Mu'awiye gihîştin hev û li ser çend mercan aştî çêkirin. Hesênê dest ji desthilatdariyê kêşa û paşatî tenê ji Mu'awiye re ma û piştîre çû Medîneyê.

Hatina Ebdula Siwar El'ebdî ya Mekranê

Dema ku Mu'awiye desthilat girt dest, Ebdulayê kurê Siwar El'ebdî bi çar hezar siwaran ve li wilayeta Mekranê da bicihkirin û jê re got; li navçeya Tûranê çiyayekî navê wî Kîkan heye, li wir hespên xweşik û spehî hene, hin ji wan hespan

bişîne vir. Her wiha, ew agahdar kir ku xelkê vê navçeyê ji ber siruştê navçeyên çiyayî serhildêrî û serhişkiyê dikin.

Ebdullayê kurê Siwar El'ebdî bi 4 hezar eskerên siwarî ve hat Mekranê û midetekê li wir ma. Piştê Mu'awiye Omerê kurê Ebdullayê kurê Omer ji bo dagirkirina Ermabilê şand û ew ji hat Mekranê.

Êrîşa Ser Tûranê

Ebdullayê kurê Siwar El'ebdî bi hevaltiya Omerê kurê Ebdullayê kurê Omer berê xwe da Tûranê û di esnayê seferê de nehiştin di nav leşker de tu kesek agir bike. Ji ber ku xwarina çêkirî û amadekirî li ser wan bû. Şevê di nav leşker de çiriskên agir hatin dîtin. Di netîceya lêgerînê de derket ku jineke ducanî/hamile hemla xwe daniye û pêwîstî agir bûye û Ebdulla jî îzin dayê.

Dema ku gihîştine navçeya Kîkanê, Siwa Zûrak bi leşkerekî 3 hezar neferan ve ji bo bergiriyê hatiye pêş. Leşkerê Îslamê bi ser wan de hakim bûye û ew şikandiye û gelek destkeftî bi dest xistine. Leşkerê Zûrak berhev bûne û devê çiyayan girtine û dest bi şerê tîr tîriyê kirine û Kîkaniyan dest bi şerê lêde û bazde kirine.

Ebdullayê kurê Siwar El'ebdî bi komek eskerên çekdar û taybet ve rawestiya û kir hawar "Ey lawên Îslamê! Ji ber gawiran paşve venegerin, ji bo ku ziyan negihê baweriya we, şehîd bibin". Leşkerê Îslamê li dora sancax û alaya Ebdulayê kurê Siwar berhev bûn û mirovekî navê wî benî Ebdulqeys ji nav artêşê derket derve û daxwaza şerkerekî ji dijmin kir. Serekê dijmin li hemberî wî rawestiya. Yasirê kurê Siwar jî bi benî Ebdulqeys re çû û êrîşî ser wî serek û pehlewani kir. Hemû leşkerên Zûrak derketin û leşkerê Îslamê şikest û hemû çiya tijî kuştîyên artêşê bûn.

Ebdullayê kurê Siwar rû bi rûyî xortekî bû. Her çend eshabeyan êrîş kirin û gelek ji dijmin kuştin, lê Ebdulla piştî janneke zêde mir. Piştî mirina wî Misilman vegeyriyan Mekranê.

Sîwa Zûrak piştî serkeftinê bi daburqelêdanê hat Keleha Kîkanê û destkeftiyên şer bi leşker re parve kirin.

Hatina Senanê kurê Seleme ya Tûranê

Piştî Ebdullayê kurê Siwar El'ebdî hat kuştin, Mu'awiye ji Ziyad re name şand û daxwaz jê kir ku mirovekî hilibijêre ku hêjayî sînorê Hindê be. Ziyad di bersiva xwe de jê re nivîsand ku pesendkiriyê min û hêjayî wî sînorî du kes in, Ehnefê kurê Qeys û Senanê kurê Seleme el-Hezli. Mu'awiye Senanê kurê Seleme el-Hezli pesend kir û wî jî kurê Seleme el-Hezli da nîşan. Senan çû Mekranê û midetê du salan li wir ma û piştrew der kirin.

Hatina Raşidê Kurê Omer a Mekranê

Piştî Ziyad rabû, bi derkirina [Senan] kurê Seleme, Mu'şwiye Raşidê kurê Omer ji bo desthilatdariya welatê Mekranê şand û ew kir nûner. Raşid kirinên baş pêk anin û piraniya xelkê hînî zanista Quranê û tefsîra wê kir. Dadperwerî xurt kir û ji ber exlaqê baş piraniya Gebriyan¹⁹ bûn Misilman.

Dema ku Raşidê kurê Omer hat Mekranê, mal û darayiya çiyayê Kurdan bi dest xist. Piştrew çû Kîkanê û Sîwa Zûrak pê re şer kir û şikest û vegeriya welatê Sindanê. Raşid li Kîkanê ma û mal û darayiya berê û ya nû bi dest xist. Destkeftî û "kole"yên dijmin ku bi talan biribûn bi dest xistin û piştî salekê ji wê vegeriya. Ji Sîstanê derbas bû heta gihîşt Çiyayê Menzerê û Behricê. Xelkên van navçeyan berhev bûn û nêzikî 50 hezar kes kom bûn, rê lê girtin û ji beyanê heta nimêja esrê şer kirin û di netîceyê de Raşid hat kuştin.

Careke Din Hatina Senanê kurê Seleme ya Mekranê

Dema ku Raşidê kurê Omer hat kuştin, Ziyad careke

¹⁹ Agirperest.

din Senanê kurê Seleme kir nûner û şand Mekranê. Ferman dayê ku dema gihîşt wir Tûranê dagir bike û hemû pûtxane û perestgehên agirî yên agirperestan wêran bike. Ji ber ku peyamberê me (silav lê bin) tiştê jê nehiştine û hemû kufr û dînekî ji bilî dînê Îslamê rahê wan derxistiye û yên rahê wan nekêşabe bi wan re bi serane aştî çêkiriye.

Senanê kurê Seleme midetekê li Mekranê ma û hinek ji wan wilayetan bi hêz kir heta gihîşt wilayeta Kîkanê û bi Sîwa re şer berpa kir. Sîwa Zûrak bi leşkerekî fireh ve hat pêş û şerekî giran pê re kir û Yezdanê mezin Misilman bi ser xistin. Sîwa Zûrak xwe kuşt, kurê wî jî ku navê wî Sîwa Sengîn bû bazda û xwe li çiyayên Nûrgan û Bilbilanê veşart. Senan bi pey ket û Keleha Nûrganê dorpêç kir. Artêşa Sengîn pêşve hat û şerekî giran kirin. Senan wê rojê bi xwe bi awayekî wisan şer kir ku Rostem di wextê xwe de kiribû, heta Sîwa Sengîn jî kuşt.

Senan ew erdên biçûyayê, adet û exlaqê baş dihiştin, heta gihîşt navçeya Bûdhayê û xelkê Bûdhayê xedri lê kir û ew kuştin.

Rasil Çenderê Birayê Çeç

Piştî koça dawiyê ya Çeç, ji bo ku kurê wî Dahir hê biçûk bû, Rasil Çenderê birayê wî derket ser textê welatê Sindanê.

Rasil Çender kesekî dindar bû û bawermendê dînê Bawadayî bûye. Di serdema Çender de, Misilmanan Tûran û Mekran dagir kirin û ew wilayet bi seltaneta Îslamê ve girêdan. Dawîn fermanrewayê Tûran û Mekranê Sîwa Zûrak û kurê wî Sîwa Sengîn bûn ku bi Senanê kurê Seleme yê waliyê Mekranê re şerên giran kirin û hatin kuştin.

Senanê kurê Seleme wilayeta Tûranê dagir kir û bi rêveberiya Îslamê ve girêda. Rasil Çender ji ber jidestdana wilayetên Tûran û Mekranê gelek xemgîn bû û piştî heft sal fermanrewatiyê koça dawiyê kir. Ev serekên Kurdên Beluçî yên Tîreyên Pêncînî hevçerxên Rasil Çender û Mîr Mu'awiyeyê

xelifeyê Benî Umeye bûne: Mîr Şîrak Biraxoyî, Mîr Beker Zengene, Mîr Bazûk Edreganî, Mîr Curkan Mamilî û Mîr Huse Kirmanî.

Hatina Menzerê kurê Carûd Bişir a Mekranê

Piştî mirina Senanê kurê Seleme, Mu'awiye welatê Mekranê spart Menzerê kurê Carûdê kurê Bişir. Ew jî hat Mekranê çend rojan li wir ma, desthilata mîrnişînê girt destê xwe û piştê ji bo şer bi rê ket. Ev jî wekî wê bû ku kincên xwe bi dar ve bialiqîne û bidirîne yanî Ubeydullayê kurê Ziyad xemgîn bû û gotê ev gava Menzer ne baş e û xatir jê xwest û bi girîn got, Menzer ji vê seferê venagere û tê kuştin.

Piştî vê, Menzer ji wir bi rê ket û gihîşt wilayeta dijminan û li ser sînore Tûranê nexweş ket û giyanê xwe ji dest da. Wê wextê kurê wî, Hekemê kurê Menzer li Kirmanê bû û Menzer ew ji nexweşîna xwe agahdar kiribû. Birayê Menzer jî dema bi mirina wî hesiya, daxwaz ji Ebdulezîz kir ku desthilatdariya wî welatî bide wî. Hucac gihîşt ber derî û dengê banga nimêjê bilind bû. Hucac berê xwe da Ebdulezîz û gotê; eger dengê bangê nehatiya guhê min, min birayekî xwe ceza dikir, ji ber wê yek ji mezin û maqûlekî me canê xwe di rêya Xwedayê mezin de feda kiriye û kurê wî di cihê wî de ye û tu jî daxwaza wilayetê dikî.

Hatina Hekemê Kurê Menzer a Mekranê

Dema ku Hekemê kurê Menzer gihîşt wir û Ubeydullayê kurê Ziyad ew agahdar kir, Ubeydulla giriya û xemgîn bû û ew wekî kurê xwe hesêb kir û 300 hezar dirhem dayê. Ew kesekî aza û dilêr bû û piştî vê rêzlêgirtinê çû Mekranê û midetê şeş mehan Mekran di bin desthilata wî de bû.

Hatina Ebdulmulikê Kurê Merwan a Ser Textê Xelifetiyê

Piştî Merwanê kurê Hekem, dora xelifetiyê hat ser

Ebdulmulikê kurê Merwan. Wî Îraq, Sindan û Hindanê da Hucacê kurê Yûsif û piştire Hucac Seîdê kurê Eslem Kulab şand Mekranê.

Hatina Seîdê Kurê Eslem Kulab a Mekranê

Seîdê kurê Eslem Kulab gihîşt Mekranê û midetekê li Mekranê ma. Rojekê Sefhewê kurê Lam Elhemamî ku ji hoza Ezedê bû hat ba Seîd. Seîd jê re got; ez ê herim aliyê xwarê, hevaltîya min bike û bi min re were. Wî di bersiva xwe de got, kes û karên min tune û jê re got “Ez ji dîwana xilafetê emir werdigirim”. Jê re got: “Bi Xwedê! Ez nikarim di bin xizmeta te de bim, ez şerm dikim.” Seîd ew girt û kuşt û ew ji kevil kir û serê wî jî ji Hucac re şand. Piştire li Mekranê ji bo berhevkirina mal û darayî bawerpêkiriye xwe tayîn kir û bi bikaranîna awayê nerm û mihriban mal û darayîya zêdetir ji Mekran û Tûranê bi dest xist.

Mixalefeta [Seîd] Bi ‘Elafîyan Re

Rojekê Kelbê kurê Xelef Elmuxenî, Ebdullayê kurê Ebdurrehîm El‘elafî û Mihemedê kurê Me‘awiye El‘elafî bi hev şewirîn û gotin ku Sefhewê kurê Lam ji wilayeta me û rûniştîyê Ummanê ye û navçeya me û wî bi hev ve ye û Seîd kî ye ku pismamê me bikuje. Di vê navê re, Seîd ji bo wergirtina bacê hatiye. Ew rastî hevdu hatine û dest bi guftûgoyê kirine û kar gihîştîye şer. ‘Elafî hakim bûn, Seîd kuştin û li Mekranê rûniştin.

Hatina Meca‘eyê Kurê Si‘erê Kurê Yezîdê Kurê Hezîfe ya Mekranê

Der û dora Seîd çû ba Hucac. Hucac ji wan aciz bû û pirsî, mîrê we li ku ye? Ji bo ji kesekî deng derneket, serê çend kesan birî û vêca îtiraf kirin ku ‘Elafîyan xiyamet lê kirine û kuştine.

Piştire Hucac ferman da kesekî ji Benî Kilaban û Suleyman ‘Elafî da kuştin û serê wî şand mala pismamên wî û der û dora Seîd, dilxweşî da wan û dilê pismamên wî xweş kir.

Hucac piştire Meca‘ê kurê Se‘erê kurê Yezîd şand Mekranê. Dema ku Meca‘ê hat Mekranê, ‘Elafîyan bazdan. Meca‘ê ew xwestin û ew jî çûn ba Dahirê kurê Çeç ê paşayê Sindê. Meca‘ê salekê li Mekranê ma û mir.

Xelîfebûna Welîdê Kurê Ebdulmelikê Kurê Merwan

Dema ku Welîdê kurê Ebdulmelik derket ser textê xilafetê, desthilatdariya wilayeta Mekranê da Mihemedê kurê Harûn. Her wiha, desthilatdariya herdu Îraqan da destê Hucac û Hucac jî desthilatdariya Xorasanê û Sistanê da destê Quteybeyê kurê Muslim.

Hatina Mihemedê Kurê Harûn a Mekranê

Hucacê kurê Yusif rabû Mihemedê kurê Harûn wekî walî tayînî Mekranê kir û wekî xwe di desthilatdariyê de serbest kir û di wergirtina mal û darayiyê de jê re ragihand ku daxwaza ‘Elafîyan bike, bi çi awayî be wan bi dest bixe û ji ber toleya Seîd wan bikuje.

Piştire Mihemedê kurê Harûn kesekî ji ‘Elafîyan peyda kir û li ser fermana xelîfe ew kuşt serê wî ji Hucac re şand û nameyek di vî warî de ji Hucac re nivîsand ku serê yek ji wan ‘Elafîyan biriye û eger temenê min hevaltîya min bike û bext bi min re be, ez ê yê din jî bigirim û bişînim.

Mihemedê kurê Harûn tîreyên Kurdên Beluçî girtine nav eskerên xwe. Ev serekên Kurdên Beluçî yên Tîreyên Pêncînî hevçerxên Mihemedê kurê Harûn bûne: Mîr Esed Biraxoyî, Mîr Beker Zengene, Mîr Bişir Edreganî, Mîr Xîzan Mamilî û Mîr Mudan Kirmanî.

HIN WÊNE

**Wêneyên Mirên Mîrnişîna Kurdên Beluçî
yên Beluçîstanê Û Wêneyên Kulturî**



Mîrê Biraxoyî - Kurdê Beluçî - Tûranê



Mîrê Edreganî - Kurdê Beluçî- Mekranê



*Mîr Ehmedê Sêyem - yê bi navê Ehmedê Mezin Kemberanî
Beluç hatiye nasîn- Mîrê Beluçistanê 1666-1695*



*Mîr Mihrabê Yekem - Ehmed Zeyî Beluç
- Mîrê Beluçistanê 1695 - 1697*



*Mîr Semender Ehmed Seyî Beluç -nasnavê Sexî
Semender - Mîrê Beluçistanê 1697 - 1714*



*Mîr Ehmedê Çarem Ehmed Zebî Beluç -
Nasnavê Ehmed Parsa. 1714 - 1716*



*E'la Hezret Mîr Ebdula Xan -nasnavê Heloyê
Şaxî. Mîrê Beluçistanê. 1716 - 1731*



*Mîr Muhebet Xan Ehmed Zeyî Beluç Mîrê Beluçistanê:
Cara yekem 1731 - 1733 Cara duyem: 1736 - 1749*



Mîr Eltaz Xanê Sêyem - Mîrê Beluçîstanê. 1736 - 1738



Xazî Mîr Nesîrxan Ehmed Zeyî Beluç
-Mîrê Beluçistanê 1749 - 1794



Mîr Mehmûd Xanê Yekem -Mîrê Beluçistanê 1794-1817



*Mîr Mihrab Xanê Duyem Ehmed Zeyî Beluç
(Şehîd) Mîrê Beluçistanê 1817-1839*



*Mîr Şanewaz Xan Ehmed Zeyi Beluç -
Mîrê Beluçistanê 1839 - 1841*



*E'la Hezret Mîr Nesîrxanê Duyem Ehmed Zeyî
Beluç -Mîrê Beluçistanê. 1841-1857*



*E'la Hezret Mîr Xudadadxan Ehmed Zeyî Beluç -Mîrê
Beluçistanê. Cara yekem: 1857-1863 Cara duyem: 1864-1893*



*Mîr Şêrdal Xan Ehmed Zeyî Beluç -Mîrê
Beluçistanê. 1863 - 1864*



Mîr Mehmûd Xanê Duyem Ehmed Zeyî
Beluç -Mîrê Beluçistanê- 1893-1931



*Dema tacdanîna serî Mîr Mihemed E'zem Xan
- dema li Kîwêtê tacdanîna serî -1932
E'la Hezret Mîr Mihemed E'zem Xan –Mîrê wilayeta
Beluçistanê -dema li Kîwêtê tacdanîna serî - 1932.*




*Mîr Dawid Xan Ehmed Zeyî Beluç -Mîrê wilayeta Beluçîstanê.
Cara yekem: 1958-1962 Cara duyem: 1977-1998*



Peyamber Zerdest



Agirdan - Perestgeha Zerdeštî



Keleha Mir Çakerxan li nêzikî bajarê Sibî yê Beluçistanê